

এক

জাহাজ-বিধ্বংসী উপকূল হিসেবে কুখ্যাতি অর্জন করেছে তাকরির। লেবাননের এদিকে সাগরতীর অত্যন্ত দুর্গম, ঢেউ আকৃতির সারি সারি পাহাড়ের ভাঁজে লুকিয়ে থাকা জেলে পাড়াগুলোকে সহজে খুঁজে পাওয়া যায় না। তাকরিরের দুর্নাম সম্পর্কে মাসুদ রানার স্পষ্ট কোন ধারণা ছিল না, এখানে এসে পৌছানোর আগে ধরে নিয়েছিল কয়েক শো বছর আগে নির্দয় ষণ্ডামার্কী দুঃসাহসী কিছু লোক ভুল আলোক-সঙ্কেত দেখিয়ে জাহাজগুলোকে ডুবো পাহাড়ের দিকে টেনে আনত, জাহাজডুবির সময় নাবিকদের ছুরি মেরে লুঠ করে নিত সমস্ত কার্গো। বর্তমান যুগে সে-ধরনের লোক ওই একই পেশায় এখনও যে এখানে আছে, এ-সম্পর্কে ওর কোন ধারণাই ছিল না। তবে ধারণা থাক বা না থাক, যেহেতু বিসিআই-এর নির্দেশ, এখানে ওকে আসতেই হত।

জায়গাটার নাম মুয়াক্কা, ওখানেই থাকছে রানা। পাহাড়ের ঢালু গায়ে কিছু কুঁড়েঘর আছে, পরিচ্ছন্ন নিকানো উঠান, চারপাশে ফুলের বাগান। ঢালের মাথায় চূড়া। সেই চূড়া থেকে উল্টোদিকের ঢাল বেয়ে খুদে একটা সৈকতে নামা যায়। এদিকের ঢালে একটা মাত্র বাড়ি আছে, মালিক থাকে অনেক দূর—বৈরুত শহরে। বাড়িটা খালিই পড়ে ছিল, মালিকের সঙ্গে দেখা করে ভাড়া নিতে চাওয়ায় সঙ্গে সঙ্গে রাজি হয়ে যায় সে। ঢালের আরেক দিকের কুঁড়েগুলোয় জেলেরা থাকে, তবে উল্টোদিকের ঢালটা তারা ব্যবহার করে না, কারণ এদিকের সৈকত খুবই ছোট, একসঙ্গে দু'তিনটির বেশি নৌকা ভেড়ানো যায় না।

মুয়াক্কা খাঁড়ির দক্ষিণে 'জলপরীদের আস্তানা' ও 'শয়তানের তাওয়া'-য় সৈকত খুব লম্বা, বছরে দু'পাঁচটা জাহাজডুবির ঘটনা ওদিকটাতেই ঘটে। চলতি শীতে মিশরীয় পণ্যবাহী জাহাজ ক্রিওপেটা ডুবছে, জেলেরা মাছ ধরা ছেড়ে দিয়ে এখনও সেটা থেকে মাল-পত্র সরাতে ব্যস্ত, তবে সবাই নয়। এদিকে জাহাজডুবির কারণ রানা যেটা জানতে পারল, পানিতে ডুবো পাহাড় আর পাথরের স্তূপ আছে। খাঁড়ির বাইরে, খোলা সাগরেও পাহাড় আছে, তবে পানির ওপর দেখা যায়। সেগুলোকে এড়াবার জন্যে শটকাট পথ বেছে নিতে খাঁড়ির খানিকটা ভেতরে জাহাজ নিয়ে ঢুকে পড়ে নাবিকরা, আর তখনই দুর্ঘটনা ঘটে। তবে এটাই একমাত্র কারণ বোধহয় নয়, রাতের বেলা ভুল

আলোক-সঙ্কেত দেখিয়ে জাহাজগুলোকে ফাঁদে ফেলার ঘটনাও ঘটতে পারে।

এ এমন একটা সময় যখন প্রেসিডেন্ট সাদ্দাম হোসেনের আটটা প্রাসাদে জাতিসংঘের অস্ত্র পরিদর্শক টীমকে ঢুকতে না দেয়ার সমস্যা সমাধানের জন্যে বিশ্ব জনমতকে উপেক্ষা করে ইস্রায়েল সরকার ইরাক আক্রমণ করার জন্যে মরিয়া হয়ে উঠেছে। বিশ্ব নেতৃবৃন্দের কেউ কেউ বলছেন, এই বিরোধের সামরিক সমাধান চাইলে তৃতীয় বিশ্বযুদ্ধ বেধে যেতে পারে। তবে এ-ব্যাপারে তাকরির উপকূলের জেলেদের মধ্যে তেমন কোন ভয় বা উত্তেজনা নেই বললেই চলে, বেশিরভাগই তারা ক্লিওপেট্রা লুঠে ব্যস্ত।

মুয়াক্কা ঢালের বাড়িতে যেদিন এল রানা সেদিনই পরিচয় হলো আল হাদীর সঙ্গে। সে-ও জেলে, আকার-আকৃতিতে দৈত্য বললেই হয়। শরীরটা যা-ই হোক, অত্যন্ত সরল প্রকৃতির লোক সে, নিজের শক্তি সম্পর্কে তেমন একটা সচেতনও নয়। জাহাজ ডুবলে যারা লুঠপাট করে না তাদের মধ্যে সে-ও একজন। যুবা বয়েসে কিছুদিন নৌ-বাহিনীতে কাজ করেছে, সেজন্যে তার গর্বের সীমা নেই। সাগরে এখন মাছ খুব কমই পাওয়া যায়, তবু বাপ-দাদা জেলে ছিল বলে অন্য কোন পেশায় তার আগ্রহ কম। গ্রামে প্রায় সবার আর্থিক অবস্থাই স্বচ্ছল, শুধু যারা লুঠপাট করে না তাদের অবস্থা কাহিল। রানা যখন হাদীর মাছ ধরার নৌকাটা পনেরো দিনের জন্যে পাঁচশো মার্কিন ডলারে ভাড়া নিতে চাইল, হাদীর মনে হলো পরম করুণাময় তার দিকে মুখ তুলে তাকিয়েছেন। প্রস্তাবটা পেয়ে সবেগে মাথা নাড়ল সে, দুই হাতের তিনটে আঙুল তুলে ইস্তিফাতে রানাকে বোঝাতে চাইল, তিনশো ডলারের বেশি নেবে না সে, নিলে তার পাপ হবে। প্রথম দিনেই পরস্পরকে ভাল লেগে গেল ওদের। রানা যখন বলল সে কায়রোর একটা ইংরেজি দৈনিকের রিপোর্টার, ইরাকের ওপর মার্কিন হামলা শুরু হবার আশঙ্কা দেখা দেয়ায় এলাকায় তার কি প্রভাব পড়ে, সাগরে যুদ্ধ প্রস্তুতি কতটা ব্যাপক ইত্যাদি বিষয়ে খবর সংগ্রহ করতে এসেছে, শুনে হাঁ করে তাকিয়ে থাকল হাদী। সেই থেকে নিষেধ করা সত্ত্বেও রানাকে-স্যার বলছে সে, সুযোগ পেলেই জানিয়ে দিচ্ছে হাদীসে নাকি লেখা আছে জ্ঞানী ও শিক্ষিত লোককে সম্মান করা পুণ্যের কাজ।

পাঁচটা দিন মাছ ধরে, রেডিওতে খবর শুনে আর পত্রিকা পড়ে সময় কাটাল রানা। ওর বাড়িতে ডিশের লাইন নেই, তবে জেলেপাড়ায় আছে। হাদীর বাড়িতে বা রেস্তোরাঁয় বসে গভীর রাত পর্যন্ত বিবিসি আর সিএনএন-এর খবর শোনে। যতই দিন যাচ্ছে ততই একটা ব্যাপার পরিষ্কার হয়ে উঠছে, মুখে কূটনৈতিক সমাধানের কথা বললেও আমেরিকা ও ব্রিটেন ইরাকের ওপর হামলা চালাবার সব প্রস্তুতিই নিয়ে রাখছে।

রানার মনে হলো, শান্তিপ্রিয় ও নিরপেক্ষ কোন মানুষই ইরাকের ওপর মাত্রা ছাড়ানো এই অন্যায্য ইস্রায়েল-মার্কিন চাপ মেনে নিতে পারে না। একানব্বুই সালে কুয়েত আক্রমণ করে সত্যি গুরুতর অন্যায্য করেছিল সাদ্দাম হোসেন,

কিন্তু গত সাত বছরে ইরাকের সাধারণ মানুষকে সেজন্যে কম ভোগান্তি পোহাতে হয়নি। বিদেশে তেল বিক্রির ওপর নিষেধাজ্ঞা থাকায় অর্থনীতি ভেঙে পড়েছে, মধ্যবিত্ত পরিবারের গৃহবধূরা পর্যন্ত বাসন-কোসন থেকে শুরু করে পুরানো জুতো আর ছেঁড়া কম্বল নিয়ে রাস্তায় বসে পড়েছেন, আশা ওগুলো বিক্রি করে যদি এক-আধ বেলার রুটি কেনা যায়। সবচেয়ে বেশি ভুগছে শিশুরা, পুষ্টির অভাবে হাড়িডাস্ত কঙ্কালে পরিণত হয়েছে, ওষুধ আর পথ্যের অভাব আরও উঁচু করেছে লাশের স্তূপ। আমেরিকা আপত্তি করলেও, বিশ্ব জনমতের চাপে জাতিসংঘ শুধু খাদ্য আমদানীর জন্যে সীমিত পরিমাণে তেল বিক্রি করার অনুমতি দিলে ইরাকীরা অস্তিত্ব রক্ষার একটা সুযোগ পায়। অন্যান্য শাস্তিমূলক নিষেধাজ্ঞা ও শর্ত অবশ্য ইরাক সরকারকে মেনে নিতে হচ্ছেই, না মেনে উপায় নেই। ‘নো ফ্লাই জোন’-এর পরিধি এত বিশাল যে ইরাকের বিমানবাহিনী আকাশে প্রায় উঠতেই পারছে না। জাতিসংঘের নিরাপত্তা পরিষদ প্রযুক্তিগত বিশেষজ্ঞদের নিয়ে একটা অস্ত্র পরিদর্শক টীম গঠন করেছে, সেই টীম গোটা দেশের সমস্ত ছোট বড় কারখানা পরিদর্শন করে দেখছে জানমালের ব্যাপক ক্ষতি হয় এমন কোন মারণাস্ত্র ইরাক তৈরি করেছে কিনা। সামরিক ঘাঁটিগুলোয় যাচ্ছে তারা, মিসাইল পেলে ধ্বংস করে দিচ্ছে। মিসাইল, বায়োলজিকাল ও কেমিকেল উইপন-এর সন্ধানে গোটা ইরাক চষে ফেলা হচ্ছে। গুরুতর একটা অন্যায় করে বোকা বনে গেছে ইরাক, প্রতিবাদ করলেও গলায় জোর আনতে পারছে না। পাল্টা যুক্তি দেখাচ্ছে বটে, কিন্তু কেউ তাদের কথা শুনছে না—ইসরায়েলও তো প্যালেস্টাইন দখল করে রেখেছে, তাদের কাছেও তো পারমাণবিক মারণাস্ত্র, দূর পাল্লার মিসাইল, বায়োলজিকাল ও কেমিকেল উইপন আছে; কিন্তু কই, নিরাপত্তা পরিষদ তো তাদের বিরুদ্ধে কোন শাস্তিমূলক ব্যবস্থা নিচ্ছে না! বিশাল সোভিয়েত রাশিয়া ভেঙে যাওয়ায় মস্কো এখন আর সুপারপাওয়ার নয়, গোটা দুনিয়ার ওপর ছড়ি ঘোরাচ্ছে একা মার্কিন যুক্তরাষ্ট্র, ইরাকের জন্যে এটাও একটা দৃঃসংবাদ। আমেরিকানদের অনেক নীতি ও সিদ্ধান্ত সমর্থন করা যায় না, তবু ওরা অসন্তুষ্ট হবে ভেবে অনেক রাষ্ট্র চুপ করে থাকে। এই চুপ করে থাকার ফল লক্ষ করা যায় নিরাপত্তা পরিষদ অস্ত্র পরিদর্শক টীম গঠন করার সময়—টীমে আমেরিকা ও ব্রিটেনের সদস্য সংখ্যা খুব বেশি। মি. বাটলার, টীম প্রধানও একজন আমেরিকান।

বর্তমান সঙ্কট শুরু হয় জাতিসংঘের এই অস্ত্র পরিদর্শক টীম প্রেসিডেন্ট প্রাসাদগুলো পরীক্ষা করতে চাওয়ায়। পরীক্ষা মানে শুধু ঘুরেফিরে দেখা হলে আলাদা কথা ছিল। টীমের সঙ্গে মেশিন ও যন্ত্রপাতি আছে, সন্দেহ হলে তারা প্রাসাদের যে-কোন অংশ খনন করতে পারবে, যত ইচ্ছা তত গভীর পর্যন্ত, লুকিয়ে রাখা কেমিকেল ও বায়োলজিকাল উইপনের খোঁজে। ইরাকী হিসেবে সব মিলিয়ে আটটা প্রাসাদ। আমেরিকানরা বলছে উনিশটা। প্রাসাদগুলো ইরাকের মর্যাদা আর সার্বভৌমত্বের প্রতীক এবং এর সঙ্গে প্রেসিডেন্ট সাদ্দাম হোসেনের ব্যক্তিগত নিরাপত্তার প্রশ্ন জড়িত, কাজেই ইরাক কোন প্রাসাদেই

পরিদর্শক টীমকে ঢুকতে দিতে রাজি নয়। তাদের আসল ভয়, প্রাসাদগুলোয় ঢুকে পরিদর্শক টীম ভাঙচুর তো যা করার করবেই, মি. বাটলার প্রাসাদগুলোর ভেতর কোথায় কি আছে তার মানচিত্রও তৈরি করবেন, ফলে ইরাক আক্রান্ত হলে প্রেসিডেন্ট সাদাম হোসেন সহ সামরিক বেসামরিক নেতৃবৃন্দকে বাঁচানো যাবে না, কারণ যুদ্ধের সময় ওই প্রাসাদগুলোর ভেতর থেকেই তাঁরা যুদ্ধ পরিচালনা করবেন।

আমেরিকা বলল, কূটনৈতিক প্রচেষ্টা ব্যর্থ হলে অবশ্যই তারা ইরাকের ওপর হামলা চালাবে। পরিবেশ যখন আরও উত্তপ্ত হয়ে উঠল, ইরাক তখন কিছুটা ছাড় দিয়ে বলল যে ঠিক আছে, পরিদর্শক টীমে আমেরিকান ও ব্রিটিশ সদস্য সংখ্যা কমাও, মি. বাটলারকে টীম থেকে বাদ দাও, তাহলে প্রাসাদগুলোয় ঢুকতে দিতে আমাদের কোন আপত্তি নেই। তবে এর একটা সময়সীমা বেঁধে দিল তারা—দু'মাস। প্রেসিডেন্ট সাদাম হোসেনের নিরাপত্তার কথা ভেবে আরও একটা কথা বলল, প্রাসাদগুলোর বাছাই করা কিছু অংশে পরিদর্শক টীমকে যেতে দেয়া হবে না।

সবাই যখন কূটনৈতিক আলোচনার মাধ্যমে সমস্যার সমাধান চাইছে, আমেরিকা আর ব্রিটেন তখন অজ্ঞাত কোন আক্রোশবশত ইরাকের ওপর সামরিক হামলা চালাবার সমস্ত প্রস্তুতি প্রায় সম্পন্ন করে ফেলেছে। ভূমধ্য আর লোহিত সাগরে নৌবহর পাঠিয়েছে তারা, তার মধ্যে এয়ারক্রাফট ক্যারিয়ারও আছে, সেই সব ক্যারিয়ার থেকে আকাশে মহড়া দিচ্ছে বম্বার আর ফাইটার প্লেন। ব্রিটেনও যুদ্ধজাহাজ পাঠিয়েছে, পাঠিয়েছে রয়্যাল এয়ারফোর্সের অত্যাধুনিক বম্বার ও ফাইটার। একানব্দুই সালের মত সৌদি আরব তাদের বিমানঘাটিগুলো ব্যবহার করতে দিতে রাজি না হলেও, কুয়েত রাজি হয়েছে, সেখানেও পৌছে গেছে আমেরিকানদের বিপুল যুদ্ধ সরঞ্জাম ও সেনাবাহিনী। গত গালফ ওঅর-এর বিল মেটাতে গিয়ে সৌদি আরব আর কুয়েতের কোষাগার প্রায় খালি হয়ে গেছে; আবার যুদ্ধ বাধলে তার খরচ কে মেটাবে সেটা এখনও অমীমাংসিত প্রশ্ন।

আমেরিকার যুদ্ধংদেহি মনোভাব দেখে রাশিয়া বলেছে, প্রেসিডেন্ট ক্লিনটন ক্লিনটনসুলভ আচরণ করছেন না, তাঁর এই আচরণ তৃতীয় বিশ্বযুদ্ধের সূচনা ঘটাতে পারে। কোন সাড়া না পেয়ে মস্কো থেকে আবার বলা হলো, বিশ্ব জনমত উপেক্ষা করে আমেরিকা যদি ইরাকে হামলা চালায়, আমেরিকার সঙ্গে রাশিয়ার যে বন্ধুত্বপূর্ণ সম্পর্ক রয়েছে সেটা মারাত্মকভাবে ক্ষতিগ্রস্ত হবে। এবার প্রেসিডেন্ট বিল ক্লিনটন হোয়াইট হাউস থেকে স্পষ্ট ভাষায় জানিয়ে দিলেন, রাশিয়ার আপত্তি সত্ত্বেও আমেরিকা ইরাকের ওপর আক্রমণ চালাবে, যদি ইরাক সমস্ত শর্ত মেনে নিয়ে প্রাসাদগুলোয় অস্ত্র পরিদর্শক টীমকে ঢুকতে না দেয়। ব্যাপারটা এখন প্রায় দিবালোকের মতই পরিষ্কার, ইংল্যান্ড ও আমেরিকা মধ্যপ্রাচ্যে নিজেদের অস্ত্র বিক্রির জন্যে এই যুদ্ধটা বাধাতে চাইছে।

নিরাপত্তা পরিষদের দুই স্থায়ী সদস্য আমেরিকা ও ব্রিটেন ইরাকের জন্যে মর্যাদা হানিকর ও সার্বভৌমত্ব বিরোধী শর্ত দিয়ে সমস্যার সমাধান করতে চাইছে, তা না হলে তারা ইরাককে ধুলোর সঙ্গে মিশিয়ে দেবে বলে হুমকি দিচ্ছে। বাকি তিন সদস্য আলাপ-আলোচনার মাধ্যমে সমস্যা সমাধানে আগ্রহী—তারা হলো রাশিয়া, ফ্রান্স আর চীন। নিরাপত্তা পরিষদের প্রায় সব শর্তই ইরাক মেনে নিয়েছে, কাজেই বিশ্ব জনমতও কূটনৈতিক সমাধানে আগ্রহী। সেজন্যেই বার কয়েক সফর বাতিল করার পরও জাতিসংঘ মহাসচিব কফি আনান নতুন করে সিদ্ধান্ত নিয়েছেন, বাগদাদে যাবেন তিনি, আপস রফার একটা ব্যবস্থা করা যায় কিনা দেখবেন। কিন্তু তিনি শুধু যদি একটা বার্তা নিয়ে বাগদাদে যান তাহলে সমাধানের আশা করা বোকামি হবে। আর যদি সহযোগিতা ও আলোচনার অধিকার ও ক্ষমতা নিয়ে যান এবং সেটা প্রয়োগ করতে পারেন তাহলে যুদ্ধ এড়ানো সম্ভব হতেও পারে।

এরকম পরিস্থিতিতে দরিদ্র ও দুর্বল রাষ্ট্রগুলোর তেমন কিছু করার থাকে না, মুখ বুজে সব কিছু নীরবে সহ্য করা ছাড়া। এই দলে বাংলাদেশও পড়ে। তবে বাংলাদেশ কাউন্টার ইন্টেলিজেন্স-এর কথা আলাদা।

মহৎ উদ্দেশ্য, আন্তরিকতা আর নিষ্ঠা থাকলে যে-কোন উদ্যোগ অনন্ত সম্ভাবনার দুয়ার খুলে দিতে পারে; বিস্ময়কর হলেও বিসিআই-এর ক্ষেত্রে ঠিক তা-ই ঘটেছে। বিসিআই প্রতিষ্ঠিত হয়েছিল দেশের স্বার্থবিরোধী কর্মকাণ্ড প্রতিহত করার জন্যে, জাতির বিরুদ্ধে কোথাও কোন ষড়যন্ত্র হলে তা ব্যর্থ করে দেয়াই ছিল প্রধানতম দায়িত্ব। বিসিআই প্রধান মেজর জেনারেল (অবসরপ্রাপ্ত) রাহাত খানের বুদ্ধিমত্তা, দূরদর্শিতা আর মানবকল্যাণের প্রতি আত্মনিবেদন প্রতিষ্ঠানটাকে আন্তর্জাতিক পর্যায়ে এমন এক সুনামের আসনে এনে বসিয়ে দিয়েছে যে শুধু এসপিওনাজ জগতেই নয়, দুনিয়ার যে-কোন বড় ধরনের কর্মকাণ্ড বা সঙ্কটে বিসিআই এজেন্টদেরকে ভূমিকা রাখার জন্যে ডাকা হয়। বিসিআই এজেন্ট মাসুদ রানাকে ব্রিটিশ সিক্রেট সার্ভিসের উপদেষ্টা হিসেবে নিয়োগদান করা হয়েছে। জাতিসংঘের অ্যান্টি-টেরোরিস্ট অর্গানাইজেশন-এর কমান্ডারের পদটাও দেয়া হয়েছে ওকে। স্নায়ুযুদ্ধের সময় আমেরিকা ও সোভিয়েত রাশিয়ার মধ্যে বিরোধ মীমাংসায় অনেক দায়িত্বও পালন করতে হয়েছে বিসিআইকে। মাসুদ রানা আমেরিকার ন্যাশনাল আন্ডারওয়াটার অ্যান্ড মেরিন এজেন্সির (নুমা)-ও প্রজেক্ট ডিরেক্টর। আলোচনা চলছে, নুমার এসপিওনাজ বিভাগটা রানা এজেন্সির হাতে তুলে দেয়া যায় কিনা। এছাড়াও, বিশ্বব্যাপী অসংখ্য সংগঠন আর প্রতিষ্ঠানের সঙ্গে জড়িত বিসিআই ও তার কাভার প্রতিষ্ঠান রানা এজেন্সি।

যদিও ইরাক ও জাতিসংঘের মধ্যে চলতি সঙ্কটে বিসিআই কি করবে বা করতে পারবে সেটা এখনও পরিষ্কার নয়, তবে এরচেয়েও বড় সঙ্কটে ভূমিকা রেখে সফল হতে দেখা গেছে রাহাত খানকে। সেজন্যেই কেউ কোন সাহায্য না চাইলেও ঢাকা হেডকোয়ার্টারের ওপর একটা দায়িত্ব বর্তায়। ব্যাপারটা

এখনও রানার কাছে স্পষ্ট নয়, তবে ওর ধারণা মানবতা ও বিশ্বশান্তির পক্ষে কল্যাণকর কোন ভূমিকা রাখার জন্যেই লেবাননের এই দুর্গম উপকূল তাকরিরে পাঠানো হয়েছে ওকে। পাঠানো হয়েছে কোন রকম ব্রিফিং না করেই, মিশরীয় একটা ইংরেজি দৈনিকের রিপোর্টার হিসেবে কাভার গছিয়ে দিয়ে। ওর ওপর নির্দেশ আছে, লেবাননে করার মত কোন কাজ না পেলে আরব আমিরাতে চলে যেতে হবে, তারপর আরব জাহানেরই অন্য কোথাও।

প্রতিদিন গাড়ি চালিয়ে মুয়াক্কা রেস্টোরাঁয় আসতে হয় রানাকে পত্রিকা পড়ার জন্যে। এলাকায় মুসলমান, খ্রিস্টান আর ইহুদি, সব ধর্মের লোকই আছে, অন্তত আপাতত তাদের মধ্যে সাম্প্রদায়িক সম্প্রীতিও অটুট। রেস্টোরাঁটায় আরবী, ইংরেজি ও হিব্রু ভাষায় প্রকাশিত প্রায় সব পত্রিকাই পাওয়া যায়। আঁকাবাকা পাহাড়ী পথ ধরে গাড়ি চালিয়ে ওখানে যাবার সময় উপত্যকার ঢালে কিছু লোককে ফসল কাটতে দেখল রানা। ছোট শহরটায় ঢুকে রাস্তা-ঘাট একদম ফাঁকা দেখে একটু অবাক হলো ও। রেস্টোরাঁর সামনে পাঁচ-সাতটা গাড়ি সব সময় দাঁড়িয়ে থাকে, আজ একটাও নেই। গতকালের কথা মনে পড়ে গেল রানার। ওর বাড়ির নিচে খুদে সৈকতে যখন হাঁটাচাঁটা করছিল, খোলা সাগরে কয়েকটা যুদ্ধ জাহাজকে আসা-যাওয়া করতে দেখেছে। ইরাক আক্রান্ত হলে যুদ্ধটা কৌনদিকে গড়ায় কেউ তা বলতে পারে না, কাজেই এলাকার সব রাষ্ট্রই সাধ্যমত প্রস্তুতি নিয়ে রাখছে। অনেক দূর থেকে দেখায় সবগুলো জাহাজকে চিনতে পারেনি ও, তবে ওগুলোর মধ্যে যে মিশরীয় আর লেবাননী জাহাজ ছিল তাতে কোন সন্দেহ নেই। চেনা গেছে শুধু কাছাকাছি থেকে দেখা যুক্তরাষ্ট্রের পতাকাবাহী এক জোড়া ডেস্ট্রয়ার আর জাতিসংঘের পীস মিশনের একটা পর্যবেক্ষক জাহাজকে।

রেস্টোরাঁতেও ভিড় জমেনি। দু'কাপ কফি খেয়ে কাগজ পড়া শেষ করল রানা। নিঃসঙ্গ আর একঘেয়ে লাগায় কাছাকাছি লম্বা সৈকত থেকে একবার ঘুরে এল। হাঁটার সময় ইচ্ছে হলো গোসলটা সেরে নেয়। গোসল সারার পর রেস্টোরাঁয় ফেরার আগে একজন মাত্র লোকের সঙ্গে ওর দেখা হলো। ছোটখাট মানুষটা, মাথায় পানামা হ্যাট। কাছাকাছি হতে মাথা নাড়ল আরবীতে বলল, 'অবস্থা ভাল নয়, ভাই। দেখছেন না সৈকত কেমন খালি হয়ে গেছে। যুদ্ধ একটা লাগবেই।'

সায় দিয়ে রানাও বলল, 'হ্যাঁ, রেস্টোরাঁর মালিক বলল, রেডিওতে ঘোষণা করা হয়েছে তরুণদের সেনাবাহিনীতে নাম লেখাতে হবে।'

রেস্টোরাঁয় ফিরে মালিকের বাথরুমে শাওয়ার সারল রানা, লাঞ্চ সেরে রেডিও শুনল কিছুক্ষণ, তারপর গাড়ি না নিয়েই রওনা হলো জেলেদের সবচেয়ে বড় গ্রামটার দিকে, আল হাদীর সঙ্গে দেখা করার জন্যে।

বিশ মিনিট হেঁটে 'শয়তানের তাওয়া'-য় পৌঁছল রানা। বিশাল বৃত্তাকার ইনলেটটাকে ঘুরে আসতে হলো ওকে, ঘাসে ঢাকা পাথরের পাঁচিল ঘিরে

রেখেছে ওটাকে। এদিকের খেতেও ফসল কাটা চলছে। এটা 'জলপরীদের আস্তানা'-র মধ্যে পড়েছে। খাঁড়ির মুখে কৃষকদের বসবাস। জেলেনদের গ্রামটা আরও একটু দূরে।

সৈকতে পৌঁছে নৌকার বহর দেখতে পেল রানা, মাথার ওপর গাঙচিলেরা চিৎকার-চোঁচামেচি করছে। জেলে পাড়ার কুঁড়েগুলো সবই খড় আর খেজুর পাতা দিয়ে তৈরি। বাতাসে মাছের গন্ধ পেল ও। কিন্তু নৌকা বহরের আশপাশে বা গ্রামের ভেতর প্রাণচাঞ্চল্য চোখেই পড়ে না।

রাস্তা মানে সরু একটা ঢাল, পাঁচিল দিয়ে ঘেরা। গ্রামে ঢুকে কয়েকটা প্রাইভেট কার দেখতে পেল রানা। একটা গাড়ির পাশে লাইফবোট রয়েছে, বনেটে কয়েকটা ম্যাকারেল মাছ বাঁধা। পাশেই একটা বেঞ্চ, তাতে জেলেরা বসে সিগারেট ফুঁকছে। ওদেরকে পাশ কাটিয়ে ইব্রাহিমের রেস্টোরাঁয় ঢুকে পড়ল ও।

জেলেরা অনেকেই ভিড় করেছে এখানে। ব্যবসা মন্দা, এটাই সবার আলোচনার বিষয়। সৌখিন মৎস শিকারী ট্যুরিস্টরা এখন আর আসছে না, অথচ দুই হপ্তা আগেও জেলে পাড়ায় প্রাইভেট কারের লম্বা লাইন দেখা গেছে। খালি একটা টেবিলে গালে হাত দিয়ে বসে রয়েছে হাদী, রানাকে দেখে ম্লান হাসল। পাঁচ দিন হলো তার বোট ভাড়া নিয়েছে রানা, অথচ মাত্র একদিন মাছ ধরতে গেছে ওরা।

কাউন্টারে কফির অর্ডার দিয়ে হাদীর সামনের খালি চেয়ারটায় বসল রানা। 'মাছ ধরতে যা-ই বা না যা-ই, তোমার পাওনা তুমি ঠিকই পেয়ে যাবে,' প্রথমেই তাকে আশ্বস্ত করল ও। তারপর জানতে চাইল, 'আর সব খবর কি?'

হাদী কিছু বলার আগেই বাড়ের বেগে এক তরুণ ঢুকল রেস্টোরাঁয়। তার দুই সমবয়সী বন্ধু একটা টেবিলে বসে আছে, সেখানে থেমে হাতের টেলিগ্রামটার ভাঁজ খুলল সে। 'কালকের প্রোগ্রাম থেকে আমাকে বাদ দে তোরা,' বলল। 'জাহাজে চড়ার জন্যে কাল আমাকে বৈরুতে যেতে হচ্ছে।'

আলোচনার মোড় ঘুরে গেল, সবাই এখন আসন্ন যুদ্ধ নিয়ে কথা বলছে। একজন বলল, কাল সারাদিন সাগরে যুদ্ধ জাহাজের আনাগোনা লক্ষ করেছে সে।

'হ্যাঁ, আমিও দেখেছি,' গম্ভীর সুরে সাই দিল কোস্টগার্ড শমসের লিবান।

রানাকে চমকে দিয়ে হঠাৎ মুখ খুলল হাদী, 'স্যার, মাছ ধরতে বেরুবেন না, অথচ আপনার কাছ থেকে আমি টাকা নেব, এ হতে পারে না। হপ্তায় অন্তত চারদিন যদি না বেরোন, চুক্তিটা বাতিল হয়ে যাবে।'

হেসে ফেলে রানা বলল, 'তুমি দেখছি সমস্যাতেই ফেললে। ঠিক আদছ, চলো, এখুনি বেরিয়ে পড়ি।'

এক গাল হেসে দাঁড়িয়ে পড়ল হাদী। 'চলুন।'

সৈকতে এসে বোট চড়ল ওরা। আধ ঘণ্টা পর খোলা সাগরে বেরবার মুখে পৌঁছুতেই একঘেয়েমি আর যুদ্ধের আশঙ্কা মন থেকে মুছে গেল; বোট থেকে নেমে যাওয়া দুটো লাইন আর এঞ্জিনের আওয়াজ ওর মনোযোগ কেড়ে নিয়েছে। হাল ধরেছে হাদী, বসেছে ওর দিকে মুখ করে। একটু পর গুন-গুন করে গানও ধরল। যাবে মধ্যে লাইন টানছে রানা, রূপালি মাছের আকার পছন্দ না হলে ছেড়ে দিচ্ছে পানিতে। ডায়নোসর হেড পর্যন্ত এল ওরা। শেষ বিকেলের দিকে আকাশে মেঘ করল। বোট ঘুরিয়ে নিল ওরা, তাসত্ত্বেও ফিরতে সন্ধে হয়ে যাবে।

রেস্তোরার মালিক ইব্রাহিমের সঙ্গে আলাপ করে হাদী সম্পর্কে বেশ কিছু তথ্য পেয়েছে রানা, এই মুহূর্তে কথাগুলো মনে পড়ে যাচ্ছে। জেলে পাড়ার সবচেয়ে সুন্দরী মেয়ে সাবরিনাকে বিয়ে করেছিল হাদী। লেবাননে খ্রিস্টান বা ইহুদি মেয়েকে বিয়ে করা মুসলমানদের জন্যে কোন সমস্যা নয়। সাবরিনা খ্রিস্টান ছিল, কলমা পড়িয়ে তাকে মুসলমান করিয়ে নেয় হাদী। বিয়ের আগে সাবরিনা কথা দিয়েছিল, আর সে মদ খাবে না। কিছুদিন খায়ওনি। তারপর লুকিয়ে খেতে শুরু করে। হাদী একটু রগচটা টাইপের লোক, স্ত্রীর অপরাধ হালকা ভাবে নিতে পারেনি। ধমক তো দেয়ই, স্ত্রীর ওপর নজর রাখার জন্যে বুড়ি এক বিধবাকে বাড়িতে রাখে চাকরানী হিসেবে। কিন্তু সাবরিনার মদ খাওয়া তাতেও থামেনি। বুড়িকে যেভাবেই হোক হাত করে ফেলে সে, হাদীকে লুকিয়ে আবার খেতে শুরু করে। ব্যাপারটা ফাঁস হয়ে গেল মদ বিক্রেতা ডেভিড ডাকরান যখন হাদীর কাছে অভিযোগ করল যে সে তার স্ত্রীর কাছে বেশ কিছু টাকা পায়, দিই-দিচ্ছি করেও দিচ্ছে না।

বাড়িতে ফিরে প্রথমে চাকরানীকে বিদায় করল হাদী, তারপর মারধর করল স্ত্রীকে।

পরদিন এক মিশরীয় ট্যুরিস্টের সঙ্গে পালিয়ে গেল সাবরিনা।

সে আজ দশ-বারো বছর আগের কথা। তারপর থেকে একাই আছে হাদী, ভুলেও কোন মেয়ের দিকে চোখ তুলে তাকায় না।

সন্ধে হতেই বাতাসের গতি বেড়ে গেল। হাদী বলল, ‘বৃষ্টি হবেই।’ বোটটাকে সে পাহাড়-প্রাচীরের দিকে সরিয়ে নিচ্ছে। ‘স্যার, পলাক মাছ ধরার এটাই সুযোগ।’

স্টারবোর্ড বো থেকে খানিক দূরে সাগর ফুলে-ফেঁপে উঠছে, জলমগ্ন পাথরে বাধা পাচ্ছে ঢেউগুলো। ‘তুমি তো এদিকের কোস্ট খুব ভালই চেনো, তাই না?’ জিজ্ঞেস করল রানা।

‘বাধ্য হয়ে চিনতে হয়েছে, তা না হলে জেলে হতে পারতাম না। এ বড় হারামী কোস্ট, স্যার, চারদিকে ডোবা পাথর ছড়িয়ে আছে। মুশকিল হলো, এদিকের পাথরগুলো সুরত কোভের পাথরের মত গোল নয়, এবড়োখেবড়ো। চার বছর আগে এখানে একটা ইসরায়েলি জাহাজ ডুবেছিল। পাথরে বাড়ি খেয়ে এমন ভাঙনই শুরু হয়, তিন দিনের মধ্যে স্টানের একটা আয়রন পোস্ট

ছাড়া পানির ওপর আর কিছু ছিল না।’

পাহাড়-প্রাচীরের কাছাকাছি মিনিট দশেক কাটান ওরা, একটা শিশু সৌর্ভফিশ আর একটা আড়াই হাত লম্বা ঈল ছাড়া আর কিছু পাওয়া গেল না। অবশেষে আবার খোলা সাগরের দিকে বোট ঘোরাল হাদী। সাগর ইতিমধ্যে উত্তাল হয়ে উঠেছে। বোট যেভাবে ঝাঁকি খাচ্ছে, রানার ভয় হতে লাগল ছিটকে না পানিতে পড়ে যায়। কিন্তু হাদীর চোখে-মুখে উদ্বেগের চিহ্নমাত্র নেই। সে তার সামান্য ফাঁক করা প্যাহেলওয়ানি পা দুটো পাটাতনের ওপর এমন ভঙ্গিতে চেপে রেখেছে, যেন তাতেই বোট সিধে থাকবে।

কায়দা খাঁড়ির সঙ্গে সমান্তরাল রেখায় চলে এল বোট, খাঁড়ির মুখ থেকে এখনও আধ মাইল বাইরে রয়েছে ওরা। এই সময় অকস্মাৎ টান পড়ল একটা লাইনে। কিন্তু তারপরই শিথিল হয়ে গেল ওটা। টেনে লাইনটা তুলে ফেলল রান্ন। ম্যাকারেলই, তবে মাঝারি আকৃতির। এগুলোর স্বভাবই এরকম, টোপ খাবার পর নেতিয়ে পড়ে। হুক থেকে মাছটাকে ছাড়বার দায়িত্ব হাদীকে দিয়ে দ্বিতীয় লাইনটার দিকে মনোযোগ দিল রান্ন। এটাতেও টান পড়ল, সম্ভবত আরও একটা ম্যাকারেল। লাইন টানছে ও। আচমকা ঢেউয়ের মাথায় পানিতে প্রবল আলোড়ন উঠল, চোখের কোণ দিয়ে দেখতে পেল রান্ন। বোটের পাশ ঘেঁষে নিরেট কি যেন একটা ছুটে গেল। অসম্ভব উত্থলে উঠছে পানি, কিন্তু জিনিসটা কি দেখার সময় পাওয়া গেল না, হ্যাঁচকা টান পড়ল লাইনে, সেই টানে বোট থেকে পানিতে ছিটকে পড়ল রান্ন।

সঙ্গে সঙ্গে বুদ্ধদের মত পানির ওপর উঠে আসার বদলে মনে হলো সাগর ওকে নিচের দিকে টেনে নিচ্ছে। আকস্মিক আতঙ্ক গ্রাস করল রান্নাকে। ঝাঁক ঝাঁক বুদ্ধ হতে সমস্ত নিঃশ্বাস বেরিয়ে এল, হঠাৎ করেই খালি হয়ে গেল ফুসফুস। ডুবে যাবার এরকম অনুভূতি জীবনে আগে কখনও হয়নি ওর। বুকে তীব্র ব্যথা নিয়ে ওপরে ওঠার জন্যে পানির সঙ্গে ধস্তাধস্তি শুরু করল। যখন মনে হলো ফুসফুস দুটোকে স্বাভাবিক কাজে কখনোই আর ফিরিয়ে আনা যাবে না, এই সময় পানির ওপর উঠে এল মাথা, হাঁ করে বাতাস খেতে শুরু করল।

প্রায় সঙ্গে সঙ্গেই হাদী ওকে তুলে নিল বোটে। এতক্ষণ ওটা চক্কর দিচ্ছিল ওকে ঘিরে। বোটের তলায় শুয়ে হাঁপাচ্ছে রান্ন, মাথার পাশে তড়পাচ্ছে একটা মাছ। পাশ ফিরে মাছটার মুখোমুখি হলো, এটাকেই ও হুক থেকে খোলার দায়িত্ব দিয়েছিল হাদীকে। মাছটার কষ্ট উপলব্ধি করতে পেরে দু’হাতে ধরে সেটাকে পানিতে ফেলে দিল রান্ন। তারপর উঠে বসে হাদীর দিকে তাকাল।

মাথা নাড়ল সে, বলল, ‘হঠাৎ বোটটা ঝাঁকি খাওয়ায় তাকাই আমি, দেখি বোট থেকে ছিটকে পড়ে যাচ্ছেন আপনি। আপনার হাতে লাইনটা টান টান হয়ে ছিল। টোপটা নিশ্চয়ই বড় কিছুতে খেয়েছিল। আপনাকে টেনে নিয়ে গিছে বললে ভুল হবে, উড়িয়ে নিয়ে গেছে। আর লাইনটা এমনভাবে ছিঁড়ে

গেল, যেন ছুরি দিয়ে কেটে ফেলল কেউ।’

বোট এখন ‘জলপরীদের আস্তানা’-র দিকে যাচ্ছে। সাবধানে নিজের পায়ে দাঁড়ান রানা। বোটের কিনারায় বা শেষ প্রান্তে বসতে ভয় করছে ওর। ‘এরকম কি প্রায়ই ঘটে?’ চোখ তুলে তাকাতে অবাক হয়ে গেল ও।

হাদীকে হতভম্ব দেখাচ্ছে। ‘আগে কখনোই এরকম ঘটতে দেখিনি, স্যার।’

‘কি ছিল ওটা? বিশাল কোন পলাক? নাকি টার্নি বা শার্ক?’

‘টানি বা শার্ক যে হতে পারে না তা নয়,’ বলল হাদী, ‘গলায় সন্দেহ।’
‘কিন্তু আপনার লাইনে তো ম্যাকারেল ছিল, স্যার।’

‘হ্যাঁ।’ মাথা ঝাঁকাল রানা। ‘পানি আসলে আগে থেকেই ফুলে উঠেছিল, চোখের কোণ দিয়ে দেখে ওটাকে আমি ঢেউ বলে মনে করেছিলাম। বোটের পাশে পানির ওপর কিছু একটা ভেসে উঠতেও দেখেছি, লাইনের উল্টো দিকে যাচ্ছিল। সেটা কি কোন শার্কের ফিন হতে পারে? এদিকের উপকূলে শার্ক তোমরা দেখো?’

‘মাঝে মাঝে। সব কোস্টেই দেখা যায়। শার্ক যদি হয়ও, প্রকাণ্ডই বলতে হবে,’ বিভ্রিভ্রি করছে হাদী। ‘আপনি ডুবে যাবার পর সাগরের অবস্থা দেখলে বুঝতেন—মনে হলো একটা তিমি লাফ দিয়েছে।’

সিগারেট ধরাল হাদী, সাধতে রানাও একটা ধরাল। শুধু যে ভয় পেয়েছে তা নয়, রহস্যটা বুঝতে না পারায় মনটাকে স্থির রাখতে পারছে না। ‘জলপরীদের আস্তানা’-য় না পৌঁছানো পর্যন্ত কোন কথা হলো না। ইতিমধ্যে শীতে কাঁপ ধরে গেছে রানার। তীরে বোট ভিড়িয়েই রানাকে নিয়ে টম যোসেফের বার-এ চলে এল হাদী। যোসেফ মধ্যবয়স্ক খ্রিস্টান, তার স্ত্রী লিজা অল্প বয়স্কা ইহুদী তরুণী। হাতে স্বামীর ট্রাউজার ও শার্ট ধরিয়ে দিয়ে খালি একটা ঘরে রানাকে ঠেলে দিল লিজা। ভিজ়ে কাপড় ছেড়ে আবার যখন বার-এ বেরিয়ে এল ও, দেখা গেল ঘটনাটা নিয়ে উপস্থিত সবাই আলোচনা করছে। সবারই ধারণা, হাঙরই ছিল ওটা। রানা বিয়ার বা হুইস্কি খাবে না শুনে কফি তৈরি করে আনল লিজা। কফি শেষ হতে হাদী প্রস্তাব দিল রানাকে সে বোটে করে মুয়াক্কায় পৌঁছে দেবে। মাথা নেড়ে রানা জানাল, ‘আমি হেঁটে ফিরব।’ লিজার দিকে তাকাল ও। ‘তোমার স্বামীর কাপড়গুলো কাল ফিরিয়ে দিলে চলবে তো?’

কাউন্টার থেকে কৌতুক করল যোসেফ, ‘আজ আমার কাপড় দিয়েছে, কাল না নিজেরগুলো খুলে দেয়!’ নিজের রসিকতায় নিজেই গলা ছেড়ে হেসে উঠল।

বিল মিটিয়ে তাড়াতাড়ি বার থেকে বেরিয়ে এল রানা। পিছন থেকে শুনতে পেল বার-এর দু’জন কর্মচারীকে ডাকছে হাদী, বোটটাকে ডাঙায় টেনে তোলার জন্যে সাহায্য দরকার তার।

মুয়াক্কায় ফেরার পথে অনেকটা পথ হাঁটতে হলো রানাকে। দ্রুত হাঁটছে

বলে শরীরটা গরম হয়ে উঠল, তবে জুতো জোড়া এখনও ভিজে থাকায় হেঁটে আরাম পাচ্ছে না। খেতগুলোকে পিছনে ফেলে এল ও, তারপর পাথুরে প্রাচীর দিয়ে ঘেরা সরু পথ ধরে ঢালের মাথায় উঠতে শুরু করল, ‘শয়তানের তাওয়া’-টাকে ঘিরে রেখেছে এই প্রাচীর। উপকূল বরাবর দূরে দেখা যাচ্ছে লাইটহাউসের আলোর ঝলকানি। মেঘ থাকায় মাথার ওপর আকাশ নেই, অন্ধকারে পথ চলতে অসুবিধে হচ্ছে। পাহাড়-প্রাচীরের মাথা থেকে পড়ে যাবার ভয়ে খুব সাবধানে পা ফেলেছে রানা।

হেডল্যান্ডে বড় একটা সাদা চুনকাম করা বাড়ি আছে, সেটাকে পাশ কাটিয়ে এল রানা। তারপর সামনে পড়ল আংশিষ্ কাঠ দিয়ে খাড়া করা বাংলাটা, এক লোক ওটাকে কাফে বানিয়েছে। কমলা রঙের জানালার পর্দাগুলো অর্ধেক আলোকিত, বাকি অর্ধেক ব্রাউন পেপার দিয়ে কালো করে রাখা হয়েছে। হঠাৎ করেই রানা উপলব্ধি করল, প্রায় চার-পাঁচ ঘণ্টা হলো যুদ্ধের আশঙ্কা নিয়ে কিছুই চিন্তা করেনি। মনটা আবার বিষন্ন হয়ে উঠল। প্রাচীর ঘেরা আরেকটা পথ পেরুতে হলো ওকে। সামনে লম্বা একটা গর্ত, থাকায় সেটাকে ঘুরে এগোতে হচ্ছে।

কেন ওকে লেবাননের তাকরির উপকূলে পাঠানো হয়েছে, প্রশ্নটা আবার ফিরে এল মনে। অন্যমনস্কই ছিল, হঠাৎ এক লোকের সঙ্গে ধাক্কা খেতে চমকে তো উঠলই, চোখের পলকে আক্রমণের একটা ভঙ্গিও নিয়ে ফেলল।

‘সত্যি দুঃখিত,’ ইংরেজিতে কে যেন বলল, হাতের টর্চটা জেলেই আবার নিভিয়ে ফেলল। ‘আমি বোধহয় আপনাকে ভয় পাইয়ে দিয়েছি।’

রানার মনে প্রথমেই প্রশ্ন জাগল, সঙ্গে টর্চ থাকা সত্ত্বেও ভদ্রলোক অন্ধকারে হাঁটছিল কেন? ‘না-না, একটু চমকে উঠেছিলাম, এই যা। আমি আসলে অন্যমনস্ক ছিলাম।’

‘আচ্ছা, ভাই, বলতে পারেন মুয়াক্কা খাঁড়ির ঢালে জেলেদের পাড়াটা কোনদিকে?’ জানতে চাইলেন ভদ্রলোক। ‘আপনাকে আমি বাড়িটার নামও বলতে পারব, চিনবেন কি?’ ইংরেজি বললেও, বাচনভঙ্গিতেই টের পাওয়া যায় তার মাতৃভাষা ইংরেজি নয়।

‘বলুন।’

‘দোস্তানা।’

‘দোস্তানা?’ বিড়বিড় করল রানা। হঠাৎ করেই মনে পড়ে গেল কোথায় দেখেছে নামটা। ‘মুয়াক্কা খাঁড়ির উল্টোদিকের ঢালে বাড়িটা, তাই না?’

উত্তর দিতে এক সেকেন্ড দেরি করল ভদ্রলোক। ‘হ্যাঁ-হ্যাঁ, তাই।’

‘আপনি যদি আমার সঙ্গে আসেন, বাড়িটা কোনদিকে দেখিয়ে দিতে পারব,’ বলল রানা। ‘এই পথেই যেতে হবে, আধ মাইলটাক দূরে।’

ধন্যবাদ জানিয়ে রানার পিছু নিল লোকটা। রানা ভাবল, সম্ভবত ব্যাটারি খরচ হবার ভয়ে টর্চ জ্বালছে না। তবু বলতে বাধ্য হলো, ‘মাঝে মাঝে হাতের ওটা জ্বালুন, তা না হলে হোঁচট খেতে হবে যে।’

ভদ্রলোক টর্চ জ্বালতেই ঘাড় ফিরিয়ে পিছন দিকে তাকাল রানা। আলোটা প্রায় সঙ্গে সঙ্গে নিভে গেলেও ও দেখল, তার পরনের ওয়াটারপ্রুফ প্রায় কোমর পর্যন্ত ভেজা। ‘আপনি ভিজ্ঞে গেছেন,’ বলল ও।

এবারও উত্তর পেতে এক সেকেন্ড দেরি হলো। ‘হ্যাঁ, আর বলবেন না। বোট নিয়ে বেরিয়েছিলাম, তীরে ভিড়তে জান বেরিয়ে যাবার অবস্থা হয়েছে। না দেখলে বুঝবেন না সাগর কিরকম ফুঁসছে।’

‘অদ্ভুত!’ হাসল রানা। ‘আমিও তো ভিজ্ঞে গিয়েছিলাম।’ তারপর জানাল মাছ ধরতে গিয়ে কি ঘটেছে।

ভদ্রলোক হাসল না, ব্যাপারটাকে বেশ গুরুত্বের সঙ্গেই নিল। রানা থামতে জিজ্ঞেস করল, ‘জিনিসটা কি হতে পারে বলে আপনার ধারণা?’

‘হাঙরই হবে, তাছাড়া কি,’ জবাব দিল রানা।

‘রাস্তাটা চওড়া হতে রানার পাশে চলে এল ভদ্রলোক। অন্ধকার, তবু তার মাথা ঝাঁকানোটা লক্ষ করল রানা। ‘এদিকের পানিতে হাঙর তো আছেই। জানেন, আমিও আপনার মত ম্যাকারেলে ধরতে বেরিয়েছিলাম।’ এরপর প্রসঙ্গ বদলে যুদ্ধের হুমকি নিয়ে কথা বলল, জানতে চাইল, সমস্যাটার কূটনৈতিক কোন সমাধান কি সম্ভব নয়? তারপর জিজ্ঞেস করল, রানা কোন যুদ্ধ জাহাজের বহরকে সাগরে দেখেছে কিনা। জবাবে রানা বলল, ‘বেশ কয়েকটা ডেস্ট্রয়ারকে দেখা গেছে। কয়েকটা গানবোটও চোখে পড়েছে। আর একটা সাবমেরিন—কোন দেশের বলতে পারব না।’

দীর্ঘশ্বাস ফেলে ভদ্রলোক বলল, ‘যুদ্ধ তাহলে বাধবেই।’

‘তাই তো মনে হচ্ছে,’ মন্তব্য করল রানা। তারপর জানতে চাইল, ‘সেনাবাহিনীতে আপনার ডাক পড়েনি?’

‘পড়েনি, তবে পড়তে বাধ্য।’

‘কোন ট্রেনিং নেয়া আছে?’

‘হ্যাঁ, নৌ-বাহিনীতে একবার নাম লিখিয়েছিলাম। বাজেটের অভাবে ছাঁটাই হয়ে যাই।’

‘নেভী তবু ভাল,’ বলল রানা। ‘ট্রেনিং ঢুকতে হয় না।’

‘আপনি আমাকে মিথ্যে সান্ত্বনা দিচ্ছেন,’ হালকা সুরে বলল লোকটা। ‘যুদ্ধের মধ্যে ভাল বলে কিছু নেই।’

বেশ কিছুক্ষণ আর কেউ কোন কথা বলছে না। যুদ্ধের ভয়াবহতা ভোলার জন্যে এক সময় রানাই নিস্তব্ধতা ভাঙল। তাকরির উপকূল, জলময় পাহাড়, জাহাজডুবি ইত্যাদি নিয়ে কথা বলছে ও।

ভদ্রলোক মন্তব্য করল, ‘এদিকে আমি আগেও এসেছি, সবই জানা আছে। তাকরির খুব বিপজ্জনক কোস্ট। বিপজ্জনক এই কারণে যে পানিতে ডোবা পাথরগুলো চাটে দেখানো হয়নি।’

রানা বলল, ‘তবে স্থানীয় জেলেরা জানে কোথায় কি আছে।’

‘তা হয়তো জানে।’

‘হয়তো নয়, সত্যি জানে,’ বলল রানা। ‘পাথরগুলোর মাঝখানে ঠিক কোথায় ডুব দিলে সাগরের তল আর বালি পাওয়া যাবে, একবারে মুখস্থ বলে দেবে ওরা। পানির নিচের রক ফরমেশন সম্পর্কে এই জ্ঞান, আমার ধারণা, পূর্ব-পুরুষদের কাছ থেকে পায়।’ ইতিমধ্যে হেডল্যান্ডের মাথায় উঠে এসেছে ওরা, একটা পথ ডান দিকে ঘুরে গেছে, ছোট এক মাঠকে ঘিরে। ‘আপনি ওই রাস্তা ধরে চলে যান। কটেজটা, দোস্তানা, আপনার ডান দিকে পড়বে।’

আরেকবার ধন্যবাদ দিয়ে নিজের পথ ধরল ভদ্রলোক। তার ঋজু কাঠামোটা একটু পরই হারিয়ে গেল অন্ধকারে। ঢাল বেয়ে নিজের বাড়ির দিকে এগোল রানা।

দুই

পরদিন সকালে মুয়াক্কা রেস্টোরাঁর সামনে থেকে গাড়িতে চড়ল রানা, চলে এল হাদীদেব জেলে পাড়ায়। লিজার কাছ থেকে নিজের কাপড়-চোপড়ের প্যাকেটটা নিল, ফিরিয়ে দিল তার স্বামীর ট্রাউজার আর শার্ট। গাড়িটা ওখানেই থাকল, সৈকতে এসে দেখে সাগরে বেরুবার জন্যে প্রস্তুতি নিচ্ছে হাদী। ওকে দেখে সিধে হলো, জানতে চাইল, ‘কাল ভিজ়ে গেলেন, ঠাণ্ডা লাগেনি তো, স্যার?’

‘আরে না!’ বলল রানা। ‘অদ্ভুত ব্যাপার হলো, মুয়াক্কা ফেরার পথে এক ট্যুরিস্ট ভদ্রলোকের সঙ্গে দেখা হলো আমার, তিনিও মাছ ধরতে গিয়ে ভিজ়ে গেছেন।’

‘মুয়াক্কার ওদিকে দেখা হলো? মুয়াক্কার কোথায় থেকে মাছ ধরতে যাবে?’ হাদী বিস্মিত।

কাঁধ ঝাঁকাল রানা। ‘তা কি করে বলি। কাফেটা ছাড়িয়ে খানিক এগিয়েছি, এই সময় তাঁর সঙ্গে আমার ধাক্কা লাগে।’

‘মুয়াক্কার ওদিকটায় শুধু আপনার বাড়ির নিচে ছোট্ট একটু সৈকত আছে,’ বলল হাদী। ‘ওখানে কখনোই কোন বোট ভেড়ে না।’

‘হয়তো আরও দক্ষিণের কোন তীরে ভিড়েছে।’

‘বাধ্য না হলে কেন কেউ ওদিকে বোট ভেড়াবে? ওদিকটা তো ডোবা পাথরে ভর্তি।’

‘কি জানি। তবে তাঁর কোমর পর্যন্ত ভেজা দেখলাম। সে যা-ই হোক, কি আসে যায় তাতে?’ হাদীকে অবাধ হতে দেখে অস্বস্তি বোধ করছে রানা।

খোঁচা খোঁচা দাড়ি চুলকাল হাদী। খানিক ইতস্তত করার পর বলল, ‘না,

কাল রাতের কথা ভাবছিলাম। আমরা কি সত্যি-সত্যিই জানি যে ওটা একটা মাছ ছিল?’

‘মাছ ছাড়া আর কি হতে পারে?’

ভুরু কুঁচকে হাদী বলল, ‘স্যার, হাসবেন না—যদি বলি ওটা একটা সাবমেরিন ছিল?’

হাদীর দিকে তাকিয়ে থাকল রানা। ‘সাবমেরিন?’ হঠাৎ হেসে উঠল ও। ‘নিরীহ একটা ম্যাকারেলকে ধাওয়া করার জন্যে কেন একটা সাবমেরিন লাফ দিয়ে পানির ওপর অর্ধেকটা উঠে আসবে?’

‘লাফ দিয়ে পানির ওপর অর্ধেকটা উঠে এসেছিল?’ ‘জিজ্ঞেস করল হাদী, রীতিমত সিরিয়াস হয়ে উঠছে। ‘স্যার, আপনি ঠিক জানেন, ম্যাকারেলটাকেই ধাওয়া করেছিল ওটা?’

‘পানির ওপর উঠে পড়া বলাটা একটু হয়তো অতিরঞ্জিত হয়ে যাচ্ছে,’ স্বীকার করল রানা। ‘তবে ফিন বা ওই ধরনের কিছু একটা দেখেছি আমি।’

‘পেরিস্কোপ নয় তো, স্যার?’

এবার জবাব দেয়ার আগে দু’সেকেন্ড চিন্তা করল রানা। ‘স্বীকার করছি, অসম্ভব নয়। কিন্তু আমার লাইন কেন ছিঁড়বে?’

‘লাইনটা হয়তো পেরিস্কোপে জড়িয়ে গিয়েছিল।’

মাথা নাড়ল রানা। ‘বিশ্বাস হয় না।’

‘স্যার, আপনি তলিয়ে যাবার পর পানির অবস্থা দেখেননি, রীতিমত টগবগ করে ফুটছিল। হাঙর হলে এতটা আলোড়ন উঠত না।’

‘তাহলে আমার প্রশ্নের জবাব দাও, একটা সাবমেরিন তীরের এত কাছাকাছি কেন আসবে?’ জিজ্ঞেস করল রানা। ‘বিশেষ করে ওদিকের ওই বিপজ্জনক তীরে?’

‘সেটাই তো ধাঁধায় ফেলে দিয়েছে আমাকে, স্যার,’ বলল হাদী। ‘তবে আপনার মুখে ভেজা লোকটার কথা শুনে আমার মাথায় একটা আশঙ্কা জাগছে। ওরা হয়তো কাউকে সাবমেরিন থেকে তীরে নামাতে এসেছিল।’

সম্ভাবনাটা নিয়ে চিন্তা করল রানা। একেবারে অসম্ভব, তা মনে হচ্ছে না। অথচ বিশ্বাস করতে মন চায় না।

‘লোকটার সঙ্গে আপনার কোনও কথা হলো?’ জানতে চাইল হাদী।

‘হ্যাঁ। একটা বাড়ির খোঁজ চাইলেন। দোস্তানা।’ ভদ্রলোকের সঙ্গে কি কি কথা হয়েছে, সব মনে পড়ে গেল ওর। শোনাও হাদীকে।

হাদী উত্তেজিত হয়ে উঠল। ‘এদিকে সে আগেও এসেছে, এ-কথা বলার মানে হলো, লোকটা ট্যুরিস্ট বা অস্থানীয়। তাহলে জানল কিভাবে ওদিকের কোস্ট বিপজ্জনক?’

‘বললেন, আগেও এসেছেন।’

‘তাহলে বলুন, সে জানল কিভাবে পানিতে ডোবা পাথরগুলো চাটে দেখানো হয়নি?’

হাদী যতই উত্তেজিত হোক, নিজেকে রানা বিশ্বাস করাতে পারছে না যে ভদ্রলোক স্পাই।

‘স্যার, ব্যাপারটা স্বভাবিক বলে মনে হচ্ছে না,’ বলল হাদী। ‘আমাদের যোসেফের সঙ্গে আলোচনা করা উচিত। তাকরিরের সবাইকে সে চেনে। দোস্তানা কটেজটা কার, সে বলতে পারবে।’

হাদীর পিছু পিছু বার-এ ফিরে এল রানা। রেডিওর খবর শুনছে সবাই। জাতিসংঘের মহা সচিব কফি আনানের বাগদাদ সফর অনিশ্চিত হয়ে পড়েছে। ছ’হাজার মার্কিন সৈন্যের তৃতীয় দলটা পৌঁছে গেছে কুয়েতে। জাতিসংঘের বিভিন্ন মিশনের লোকজনকে ইরাক ত্যাগ করার নির্দেশ দেয়া হয়েছে।

যুদ্ধের আশঙ্কা আরও বাড়ছে, সন্দেহ নেই। দুই তরুণ বার থেকে বেরিয়ে গেল, একজন বলে গেল সে তার ভাইকে টেলিফোন করতে যাচ্ছে। রেডিও বন্ধ হতে যোসেফকে হাদী জিজ্ঞেস করল, ‘মুয়াক্কার জেলে পাড়ায় দোস্তানা নামে একটা বাড়ি আছে। ওখানে কে থাকে বলতে পারো?’

‘বছর তিন হলো বাড়িটা এক ব্যাঙ্ক ম্যানেজার ভাড়া নিয়েছেন। রিটার্ডার্ড এক বুড়ো, নামটা বোধহয় জামালু দীন। কেন?’

ইতস্তত করে হাদী বলল, ‘না, এমনি—আমার স্যার জানতে চাইছেন আর কি। তা রিটার্ডার্ড ব্যাঙ্ক ম্যানেজারের কাছে খুব বেশি লোকজন আসে কিনা বলতে পারো?’

যোসেফকে কৌতূহলী দেখাল। ‘তা আমি কিভাবে জানব?’

বার থেকে বেরিয়ে এসে হাদী বলল, ‘স্যার, তেমন কিছুই তো জানা গেল না। চলুন আমরা শমসের লিবানের সঙ্গে কথা বলি।’ শমসের লিবান একজন কোস্টগার্ড, জানে রানা। জেলে পাড়ার সবাই তাকে নিজেদের অভিভাবক হিসেবে মান্য করে।

কোস্টগার্ড শমসের লিবানকে পাওয়া গেল মাছ ব্যবসায়ী সমিতির অফিস কামরায়। অফিসটা পাহাড়ের ঢালে। পুরো ঘটনাটা তাকে শোনাল হাদী। পা সামান্য ফাঁক করে দাঁড়িয়েছে সে, দু’হাতের আঙুল লেদার ওয়েস্টবেল্টে গোঁজা, দেখে মনে হচ্ছে তার বিশাল কাঠামো গোটা কামরাটাকে ভরাট করে রেখেছে। তুলনায় শমসের লিবান লিলিপুটিয়ান, ডেস্কের ওপর টেলিস্কোপের সামনে বসে আছে। হাদীর কথা শেষ হতে ডেস্কের ওপর আঙুলের গিট দিয়ে ড্রাম রাজাতে শুরু করল। ‘সম্ভব,’ বলল সে। ‘কালই তো আমি নিজে দেখলাম কোস্ট থেকে মাত্র ছ’মাইল দূরে ভুস করে একটা সাবমেরিন ভেসে উঠল। তারপরই অবশ্য ডুব দেয়। কিন্তু লোকটা বোট নিয়ে নামবে কোথায়?’

‘মুয়াক্কার ছোট্ট সৈকতে,’ বলল হাদী।

‘ওখানে পানির নিচে কত পাথর আছে জানো না? বোট তো ভেঙে

যাবে।’

‘ওদের সঙ্গে, ইসরায়েলি নাবিকদের সঙ্গে, কলাপসিবল বোট থাকে,’
জবাব দিল হাদী। ‘রাবারের তৈরি।’

‘ঠিক আছে, ধরা যাক সাবমেরিন থেকে একজন ইসরায়েলি নাবিক বা
একজন স্পাই মুয়াক্কা সৈকতে নেমেছে। তার উদ্দেশ্য কি হতে পারে?’

কাঁধ ঝাঁকাল হাদী। ‘বুড়ো জামালু দীন একজন স্পাই হতে পারে।
সাবমেরিনের একজন অফিসার কিংবা হয়তো কমান্ডার নিজেই তার কাছ
থেকে গুরুত্বপূর্ণ তথ্য নিতে এসেছিল।’

শমসের লিবান এখনও ড্রাম বাজাচ্ছে। ‘কি জানো, হাদী, এদিকের
কোস্টে কিন্তু হাঙর খুব কম নয়।’

এক হাতের তালুতে অপর হাতে ঘুসি মারল হাদী, বোমা ফাটার মত
আওয়াজ হলো। ‘পানির আলোড়ন দেখলে তুমিও বলতে ওটা হাঙর ছিল না!’

শমসের লিবান এবার রানার দিকে তাকাল। ‘আপনার কি ধারণা,
স্যার?’

বিপদেই পড়ল রানা। হাদীর সঙ্গে পুরোপুরি একমত হতে পারছে না ও।
‘আমি মনে করি ব্যাপারটা তদন্ত করে দেখা উচিত।’

হাদীর দিকে ফিরল শমসের লিবান। ‘তুমি আমাকে কি করতে বলো?
পুলিসকে জানাব?’

‘পুলিসকে জানিয়ে কি লাভ! নৌ-বাহিনীর সদর দফতরে ফোন করো।’
রাগে লালচে হয়ে উঠল হাদীর মুখ। ‘আর তুমি যদি কিছু করতে না চাও,
আমরা নিজেরা যা পারি করব।’

‘যেমন?’

‘লোকটা ইসরায়েলি হলে নিশ্চয়ই তথ্য নিতে এসেছিল। আর তথ্য নিতে
এসে থাকলে সাবমেরিনে আবার তাকে ফিরে যেতে হবে। আমাদের কাজ
হবে তাকে ফিরে যেতে না দেয়া।’

‘সে হয়তো এরইমধ্যে বোটে ফিরে গেছে,’ বলল রানা।

‘কি? কাল রাতে? না, স্যার!’ মাথা নাড়ল হাদী। ‘কাল রাতে মাতাল
ছিল সাগর, রাত বাড়ার সঙ্গে সঙ্গে মাতলামিও বেড়েছে। ওদিকের সৈকত
থেকে বোট নিয়ে কোথাও যাওয়া সম্ভবই ছিল না। আমি কি চাই বলছি—চলুন
যাই, লোকটার ফেরার পথে ওত পেতে অপেক্ষা করি। পেলো ধরব। না
পেলো...’ কথা শেষ না করে অসহায় ভঙ্গিতে কাঁধ ঝাঁকাল।

কোস্টগার্ড প্রস্তুতটা নিয়ে চিন্তা করল, তারপর বলল, ‘ঠিক আছে, হাদী।
স্যারকে নিয়ে তুমি সৈকতের ওপর ঢালে অপেক্ষা করবে। আমি দু’জনকে
নিয়ে পাহারায় থাকব হেডল্যান্ডে, দক্ষিণ দিকটায়। তোমার বোটটা আমরা
নিতে পারি তো?’

মাথা ঝাঁকাল হাদী। ‘অবশ্যই। আর, লিবান, সার্ভিস রিভলবারটা সঙ্গে
নিতে ভুলো না যেন।’

ডেস্কের দেরাজ খুলে রিভলবারটা বের করল কোস্টগার্ড। ‘ভাল কথা মনে করিয়ে দিয়েছ,’ বিড়বিড় করে বলল সে।

রাত বাজে সাড়ে ন’টা, মুয়াক্কা খাঁড়ির ঢালে হাদীকে নিয়ে অপেক্ষা করছে রানা। লোকটা স্পাই হলে সন্দের আগে বেরুবে না, এটা ধরে নিয়ে সন্ধে থেকে এখানে ওত পেতে আছে ওরা। মশার কামড় তো আছেই, আজ শীতটাও যেন বেশি লাগছে। গিগারেটের আগুন অনেক দূর থেকে দেখা যায়, সেই ভয়ে ধূমপান থেকে বিরত থাকতে হচ্ছে হাদীকে। আর রানা তাকে কথা বলতে নিষেধ করে দিয়েছে।

কোস্টগার্ড শমসের লিবানের কথা ভাবছে রানা। হাদীর সন্দেহ খুব একটা প্রভাব ফেলেনি তার মনে। তা পড়লে নৌ-বাহিনীর সদর দফতর বৈরুতে ফোন করত। লেবানন ছোট্ট দেশ বটে, তবু রাজনৈতিক বিশৃঙ্খলার মধ্যেও প্রতিরক্ষা ব্যবস্থা খুব দুর্বল বলা চলে না। লেবানীজ নৌ-বাহিনীর হাতে কোন সাবমেরিন না থাকলেও, ডেস্ট্রয়ার আর গানবোট আছে। টর্পেডো বোট থেকে একটা সাবমেরিনকেও আক্রমণ করতে পারবে। লিবান ফোন না করায় একটু অবাকই হয়েছে রানা।

নিজের কথা ভাবতে গিয়ে মনে মনে হাসিও পাচ্ছে রানার। ক্ষীণ সন্দেহের ওপর ভিত্তি করে পাথুরে ঢালে ঘন্টার পর ঘন্টা এভাবে অপেক্ষা করা ওকে যেন ঠিক মানাচ্ছে না। এ যেন অনেকটা নেই কাজ তো খেঁ ভাজ। কাল সকালের মধ্যে জেলে পাড়ার সবাই ওদের এই ব্যর্থ অ্যাজভেঞ্চার সম্পর্কে জেনে যাবে, হাদীর সঙ্গে ও-ও হাসির খোরাকে পরিণত হবে।

রাস্তার ধারে একটা পাথরের ওপর বসে আছে ওরা। রাত যত বাড়ছে ততই দৃঢ় হচ্ছে বিশ্বাসটা, হাদীর সন্দেহ অমূলক। আজও আকাশে মেঘ আছে, তবে বাতাস খুব কম। অন্ধকার আলকাতরার মত ঘন। বুদ্ধি করে কিছু চকলেট নিয়ে এসেছে রানা, দু’জন ভাগাভাগি করে খাচ্ছে। ধীরে ধীরে চুষছে, যাতে তাড়াতাড়ি শেষ না হয়। ব্যাপারটাকে হালকাভাবে নেয়াতেই বোধহয়, এক সময় ঘুম পেয়ে গেল রানার। রাত এখন দুটোর মত। শরীরটা ঠাণ্ডা আর আড়ষ্ট হয়ে গেছে। হাদীর ওপর রাগ হচ্ছে, যদিও কিছু বলতে পারছে না। নিজেকে বোকাও মনে হচ্ছে। ঘুম তাড়াবার চেষ্টা করল রানা, কিন্তু সফল হলো না।

মনে হলো মাত্র এক সেকেণ্ড ঘুমিয়েছে, ধাক্কা খেয়ে জেগে উঠল। কথা বলার জন্যে মুখ খুলতে যাবে, কে যেন হাত চাপা দিয়ে থামিয়ে দিল, কানে ফিসফিস করল হাদী, ‘স্যার, চুপ! সাগরের দিকে তাকান!’

আড়ষ্ট হয়ে গেল রানা। অন্ধকার এত গাঢ় যে নিজেকে অন্ধ মনে হলো। তারপর হঠাৎ একটা আলো দেখা গেল সাগরের পানিতে। সরাসরি আলো দেখল, না কি আলোর প্রতিফলন, ঠিক বোঝা গেল না। তারপর আবার সব ঘন কালো। সন্দেহ হলো, চোখের ভুল নয় তো?

হাদী নড়ছে না। তার আড়ষ্টতা অনুভব করতে পারছে রানা। মস্ত্র কয়েক ফুট দূরে তার মাথা, অস্পষ্টভাবে আঁচ করা যায়। একদিকে একটু কাত হয়ে আছে, কান পেতে কিছু শোনার ভঙ্গিতে, দৃষ্টি স্থির হয়ে আছে সাগরের যেখানে আলোটা এইমাত্র দেখা গেছে। রানা ধারণা করল, আলোটা দেখা গেছে 'শয়তানের তাওয়া' খাঁড়ির মুখ থেকে বেশি দূরে নয়।

এক সময় সিধে হলো হাদী। রানাও দাঁড়াল, তবে ও কিছু শুনতে পায়নি। হাদী ওর বাহু খামচে ধরল, দু'জন একসঙ্গে অত্যন্ত সতর্কতার সঙ্গে পথটার দিকে এগোল। পথটা পার হলো ওরা, পাঁচিলে পিঠ দিয়ে দাঁড়াল। 'সাবমেরিন পৌছে গেছে,' ফিসফিস করল হাদী। 'শয়তানের তাওয়ায় রয়েছে। আর ঢালের মাথায় আপনার বন্ধুর টর্চ জ্বলতে দেখেছি আমি, সাবমেরিনকে সন্ধেত দেয়ার সময়।'

মনে হলো কয়েক ঘণ্টা অপেক্ষা করার পর সামনের পথ থেকে পায়ের আওয়াজ ভেসে আসছে। আসলে দেয়ালে পিঠ ঠেকিয়ে দাঁড়াবার পর খুব বেশি হলে মিনিট দশেক পেরিয়েছে। শব্দটা কাছে সরে আসছে। রানা অনুভব করল লাফ দেয়ার জন্যে তৈরি হলো হাদী। অকস্মাৎ পায়ের আওয়াজ থেমে গেল। প্রায় সেই মুহূর্তেই টর্চের আলো দেখা গেল, কাঁচে হাত চেপে রাখায় লাল আভাটুকুই শুধু দেখতে পেল ওরা। সেই আভাতেও ওয়াটারপ্রুফ পরা ঝজু কাঠামোটা পরিষ্কার চেনা গেল। পথ ছেড়ে সরে গেছে লোকটা, দাঁড়িয়ে আছে ঠিক একটু আগে ওরা যেখানে দাঁড়িয়েছিল। ওখান থেকে ঢালের ওপর ধাপ কাটা আছে, নেমে গেছে খুদে সৈকতে। এক মুহূর্ত ইতস্তত করে ধাপ বেয়ে নামতে শুরু করল সে।

বিশাল দেহ, তাসত্ত্বেও বিদ্যুৎ খেলে গেল হাদীর শরীরে। কালো অন্ধকারে আরও কালো একটা ছায়ার মত লাগল তাকে, অস্পষ্ট, ঢাল বেয়ে নেমে যাচ্ছে; রানা তখনও পথটা পেরুতেও পারেনি। পথ পেরিয়ে ঢালে যখন পা দিল, হাদীকে ধস্তাধস্তি করতে দেখল ও। হাদী একটু পিছিয়ে এসেছে, সম্ভবত সে আক্রমণ করার আগেই লোকটা ঘুরে দাঁড়িয়ে ছিল। রানার ভয় লাগল, লোকটার কাছে রিভলবার থাকতে পারে। তবে থাকলেও ব্যবহার করার সুযোগ তার নেই বললেই চলে। ঢালের ওপর দিকে রয়েছে হাদী, এটা তার একটা বাড়তি সুবিধে; তাছাড়া প্রকাণ্ড শরীরের ভারও ওকে সাহায্য করছে। ধস্তাধস্তি চলছে, এক সময় দু'জনেই পড়ে গেল। কাছাকাছি এসে রানা দেখল লোকটার বুকে ভারী বস্তুর মত বসে রয়েছে হাদী, মুখ চেপে ধরেছে এক হাতে। 'স্যার, সার্চ করুন!'

বলার দরকার ছিল না, তার আগেই বুঁকে পড়েছে রানা। ওয়াটারপ্রুফের পকেটে একটা অটোমেটিকের অস্তিত্ব অনুভব করল ও। পকেটে হাত ভরতে যাবে, এই সময় গোটা দৃশ্যটা আলোকিত হয়ে উঠল। চোখ তুলতেই টর্চের আলোয় ধাঁধিয়ে গেল রানার চোখ। টর্চ ধরা হাতটা একটুও কাঁপছে না, সোজা এগিয়ে আসছে ওদের দিকে। সামনে এসে দাঁড়িয়ে পড়ল দীর্ঘদেহী এক

ইউনিফর্ম পরা লোক। টর্চ ধরা হাতের সামনে দ্বিতীয় হাতটা আনল সে, সেই হাতে বড় একটা সার্ভিস রিভলবার দেখা যাচ্ছে। একটু ঝুঁকে হাদীর মাথায় রিভলবারের ব্যারেল দিয়ে প্রচণ্ড বাড়ি মারল লোকটা। রোমহর্ষক আওয়াজ হলো, নেতিয়ে পড়ল হাদী। বুক থেকে হাদীকে ঠেলে ফেলে দিয়ে ওয়াটারপ্রুফ পরা লোকটা সিঁধে হলো, জোরে জোরে নিঃশ্বাস ফেলছে। শক্ত ও ঠাণ্ডা কি যেন একটা চেপে ধরা হলো রানার মাথার পিছনে। জিনিসটা কি জানে ও, ভাবল হাদীর কথা পুরোপুরি বিশ্বাস না করায় এখন না ওকে প্রাণটা হারাতে হয়। আরও সতর্ক থাকা উচিত ছিল, তবে এখন আর নিজেকে তিরস্কার করে কোন লাভ নেই। দ্বিতীয় লোকটা টর্চ নেভায়নি, সেটার আলোয় দেখা গেল একটা পাথরের ওপর হাদীর মাথাটা নড়বড় করছে, খুলি থেকে রক্ত গড়াচ্ছে দাড়িতে। হাদী কি তাহলে মারা গেছে?

প্রথম লোকটা কথা বলছে হিব্রু ভাষায়। ওদেরকে মেরে ফেলার কথা ভাবছে না ওরা, সঙ্গে করে নিয়ে যেতে চাইছে—কারণটাও পরিষ্কার, এখানে ল্যান্ড করার কোন প্রমাণ রাখতে চায় না, নষ্ট করতে চায় না দোস্তানায় বসবাসরত স্পাই লোকটার কাভার।

প্রথম ভদ্রলোক রানাকে ইংরেজিতে বলল, ‘আপনি নিজেকে আমাদের বন্দী বলে মেনে নিন। আমাদের দেড় গজ আগে থাকবেন। পালাবার বা কারও দৃষ্টি আকৃষ্ট করার চেষ্টা করতে দেখলে গুলি করা হবে।’ অটোমেটিক নেন্ডে আগে বাড়ার নির্দেশ দিল। তারপর দু’জন মিলে দাঁড় করাল হাদীকে। টর্চটা নিভে গেল, অন্ধকারে কিছুই দেখতে পাচ্ছে না রানা। ধাপ বেয়ে সাবধানে নামছে, পিছন থেকে ভেসে আসছে ধাপের ওপর হাদীর পা আঁচড়ানোর আওয়াজ। ইসরায়েলি দু’জন মাঝে মধ্যেই থামতে বাধ্য হলো, হাদীর ভার বহন করতে কষ্ট হচ্ছে খুব।

ধাপ থেকে নেমে সৈকতে পা দিল রানা। অন্ধকার এতই গাঢ়, পানির কিনারায় দাঁড়িয়ে থাকা এক লোকের বাড়ানো বাহুর ভেতর সৈঁধিয়ে গেল, তার আগে কিছুই টের পায়নি। ‘কে তুমি?’ হিব্রু ভাষায় ধমক দিল লোকটা।

‘উনি আমাদের বন্দী, কালাহান,’ পিছন থেকে ওয়াটারপ্রুফ পরা লোকটা জবাব দিল। ‘এখানে আরও একজন আছে।’

‘ভাগ্যকে ধন্যবাদ আপনি নিরাপদে ফিরে এসেছেন, কমান্ডার!’

তারমানে হাদীর ধারণাই ঠিক। সাবমেরিনের কমান্ডার স্বয়ং সৈকতে নেমেছিল। রানা ভাবছে, এত ঝুঁকি নিয়ে তীরে নামার পিছনে নিশ্চয়ই গুরুত্বপূর্ণ কোন উদ্দেশ্য আছে। নিজেকে আরেকবার তিরস্কার করতে ইচ্ছে হলো ওর। এরকম ভুল করেছে ওনলে বস ওকে নিঃসন্দেহে সাইকিয়াট্রিস্টের কাছে মানসিক চিকিৎসার জন্যে পাঠাবেন। লোকটা একা ফিরবে না, এটা ওর অন্তত আন্দাজ করা উচিত ছিল। আর নিশ্চিতভাবে ধরে নেয়া উচিত ছিল সৈকতে বোট নিয়ে কেউ একজন অপেক্ষা করবে।

এখন ওদের একমাত্র আশা কোস্টগার্ড, যে কিনা হেডল্যান্ডে অপেক্ষা করছে। নাকি এরইমধ্যে তার ব্যবস্থাও করে এসেছে ওরা? সেজন্যেই কি সৈকতে ফেরত আসার সময় এত সতর্ক ছিল?

তৃতীয় লোকটা রানাকে ছেড়ে দিয়ে পানিতে নামল, টেনে আরও কাছে আনল বোটটাকে। কলাপসিবলই, দুটো বৈঠা, হাদীর অসাড় শরীরটা তোলার পর মনে হলো না বাকি চারজনের জায়গা হবে। তবু উঠল ওরা, গা ঘেঁষাঘেঁষি করে বসল। পানিতে খুব বেশি ডেবে গেল বোট। কমান্ডার বসেছে রানার সামনে, হাতের অটোমেটিক ওর দিকে তাক করা। বাকি দু'জন বৈঠা ধরল।

মুয়াক্কা খাঁড়ির প্রবেশপথ খিলান আকৃতির, সেটার নিচ দিয়ে খোলা সাগরে বেরিয়ে এল ওরা, বোট ঢেউয়ের তালে দুলতে দুলতে শয়তানের তাওয়া, অর্থাৎ আরেকটা খাঁড়ির দিকে এগোচ্ছে। খোলা সাগরে অন্ধকার তত গাঢ় নয়, ওদের ওপর ঝুঁকে থাকা পাহাড়-প্রাচীরগুলোকে অস্পষ্টভাবে হলেও চেনা যাচ্ছে। তবে খানিক পর তা-ও আর দেখা গেল না, রাতের অন্ধকারে হারিয়ে গেল। রানা ভাবছে, এই অন্ধকারে ওরা সাবমেরিনটাকে খুঁজে পাবে কিভাবে?

কয়েক মিনিট পর নাক বরাবর সামনে আলোর একটা বিন্দু দেখতে পেল রানা। দৃষ্টি টেনে এনে কমান্ডারের দিকে তাকাল ও। ওকেই লক্ষ্য করছে কমান্ডার, অটোমেটিকের মাজল ওর দিকে হাঁ করে আছে। দু'জনের মাঝখানে পড়ে আছে হাদী, এক চুলও নড়ছে না। আশপাশে কোথাও কোস্টগার্ড বোটের সাড়া-শব্দ নেই। রানা ভাবল, কমান্ডার লোকটা কি ধরনের তথ্য নিয়ে সাবমেরিনে ফিরছে? বাণিজ্যিক জাহাজের আসা-যাওয়ার হার, যুদ্ধ জাহাজের গতিবিধি? নাকি লেবানীজ নৌ-বাহিনীর যুদ্ধ প্রস্তুতি? যুদ্ধ যদি বাধেই, এই তথ্য হাজার হাজার মানুষের মৃত্যুর কারণ হয়ে দাঁড়াতে পারে, ও যদি তথ্যটা সাবমেরিন পৌঁছুতে বাধা না দেয়। নড়েচড়ে বসল রানা। বোট বিপজ্জনক ভঙ্গিতে কাত হয়ে গেল, প্রথমে একদিকে, তারপর আরেকদিকে। 'নড়বেন না!' ধমক দিল কমান্ডার। অটোমেটিক ধরা হাতটা লম্বা করল রানার দিকে।

কমান্ডারের ঝুঁকি নেয়ার বহর দেখেই উপলব্ধি করতে পারছে রানা, তথ্যটা যাই হোক, অসংখ্য মানুষের জন্যে মারাত্মক ক্ষতিকর হতে বাধ্য। ক্ষতিকর মানে, হাজার হাজার মানুষ মারাও যেতে পারে। মানুষ মানুষই, তা সে স্বদেশীই হোক বা লেবানীজ। হাজার হাজার বা শত শত মানুষ মারা যাবার আশঙ্কা দেখা দিলে, তাদেরকে যদি বাঁচাবার কোন উপায় থাকে, নিজের প্রাণ দিয়ে হলেও সে উপায় কাজে লাগানোর নামই মাসুদ রানার মানবিকতা। একটা দায়িত্ব অনুভব করছে ও। ও মারা যাবে, হাদী মারা যাবে, কিন্তু ওদের প্রাণের বিনিময়ে যদি বহু লোক বেঁচে যায়? না, সিদ্ধান্ত নিল রানা, এই পরিস্থিতিতে প্রাণের মায়া করা চলে না। ঠিক করল, লাফ দেবে পানিতে। সঙ্গে সঙ্গে বোটটা উল্টে যেতে বাধ্য। তারপর বহু কিছু ঘটতে

পারে। লাফ দেয়ার জন্যে পেশী শক্ত করল রানা।

আর ঠিক সেই মুহূর্তে শক্তিশালী একটা এঞ্জিনের গর্জন শুনতে পেল। পানির ওপর সাদা পেন্সিলের মত বিস্তৃত হলো একটা উজ্জ্বল আলো—দ্রুত বৃত্ত তৈরি করেছে, স্থির হলো রাবার বোটে, তীব্রতা প্রায় অন্ধকার করে দিল ওদেরকে। এঞ্জিনের গর্জন ক্রমশ বাড়ছে, সেই গর্জনকে ছাপিয়ে উঠল মেশিন গানের একটানা আওয়াজ। বোটের চারপাশে ফুটতে শুরু করল পানি। বৈঠা হাতে এক লোক বোটের তলায় ঢলে পড়ল। বোটও প্রায় কাত হয়ে যায় যায় অবস্থা।

সার্চ লাইট দ্রুত ছুটে আসছে ওদের দিকে। বোটটা কি করতে চায় তা পরিষ্কার, ওদেরকে গুঁতো মারবে। ওটার পিছন থেকে অকস্মাৎ কান ফাটানো একটা বিস্ফোরণ ঘটল। ছলকে উঠল বিপুল পানি, সার্চ লাইটের আলোয় সাদা দেখাচ্ছে। বোটটার সামনেও আরেকবার ছলকে উঠল পানি। নাক ঘুরিয়ে দিক বদল করল ওটা। ছাই রঙা একটা লেবানীজ টর্পেডো বোটকে দেখতে পেল রানা, তীরবেগে পাশ কাটিয়ে চলে গেল। কিন্তু ও যে কিছু করবে, তার আর সময় পাওয়া গেল না, হঠাৎ করেই দেখা গেল রাবার বোটের গায়ে পাশে একটা সাবমেরিনের স্টীল বো নাক ঘষছে।

লাফ দিয়ে ডেকে নামলেন কমান্ডার, অগভীর পানিতে ডুবে আছে সেটা। কয়েকজন লোক রানাকে টেনে-হিঁচড়ে বোট থেকে তুলে আনল, ঠেলে দিল কনিং টাওয়ারের দিকে। ফরওয়ার্ড গানটাকে পাশ কাটাচ্ছে, আবার ওটা গর্জে উঠল, ফলে পুরোপুরি কালা হয়ে গেল রানা। কনিং টাওয়ারের হ্যাচে ফেলে দেয়া হলো ওকে, তার আগে মুহূর্তের জন্যে দেখতে পেল বিশাল একটা বৃত্ত তৈরি করে ওদের দিকে ফিরে আসছে টর্পেডো বোট—হঠাৎ করে ওটার সার্চলাইট নিভে গেল, সেই সঙ্গে আবার সব ঢাকা পড়ল ঘন কালো অন্ধকারে। লাফ দিয়ে নিচে, রানার পাশে নামলেন কমান্ডার, এক নিঃশ্বাসে এত দ্রুত অনেকগুলো নির্দেশ দিলেন, কোনটাই বুঝতে পারা গেল না। সঙ্গে সঙ্গে সাবমেরিনের এঞ্জিন জ্যাক্ত হয়ে উঠল, দ্রুত বেগে পোর্টসাইডের দিকে ঘুরে যাচ্ছে। রানা উপলব্ধি করল, কমান্ডার ভয় পাচ্ছেন টর্পেডো আঘাত হানবে। অকস্মাৎ নিজের ভেতর একটা শূন্যতা অনুভব করল ও।

হাদীর বিশাল দেহটা হ্যাচের মুখ থেকে নিচে ফেলে দেয়া হলো, প্রায় রানার গায়ের ওপরই পড়ল সেটা। নিচে নামছে জুরা, দু'জন আহত হওয়ায় তাদেরকে বয়ে আনতে হচ্ছে। ধাতব শব্দের সঙ্গে বন্ধ হয়ে গেল হ্যাচ। এঞ্জিনের আওয়াজ ভারী ও গম্ভীর হয়ে উঠল। সাবমেরিনের ভেতরটা খুব গরম, বাতাসে তেলের গন্ধ। ওদের দু'জনকে আসা-যাওয়ার পথ থেকে সরিয়ে দুটো বাস্কে তুলে দেয়া হলো। বাকি সব লোকজন যার যার অ্যাকশন স্টেশনে দায়িত্ব পালন করছে।

স্পীড বাড়ার সঙ্গে সঙ্গে ঝাঁকি খেতে শুরু করল সাবমেরিন। একটা বেল বাজল, কয়েক সেকেন্ড পর কাত হয়ে পড়ল মেঝে। সাবমেরিন ডাইভ

দিচ্ছে। নৌ-পরিভাষায় এটাকে ক্র্যাশ ডাইভ বলে, ডিজেল এঞ্জিনের পরিবর্তে জ্বালত হয়ে উঠল ইলেকট্রিক মোটর। খোল তখনও পুরোপুরি সিধে হয়নি, রানা অনুভব করল সাবমেরিন বাঁক ঘুরছে। অভিজ্ঞতা থেকে বুঝতে পারল, টর্পেডো এড়াবার চেষ্টা করছেন কমান্ডার। উত্তেজনা আর আতঙ্কে ইম্পাতের মত কঠিন হয়ে উঠল ওর মুখের পেশী, হাতের মুঠো এত শক্ত হয়ে উঠেছে যে তালুর ভেতর নখ ঢুকে যাচ্ছে।

এক সেকেন্ড পরই আঘাতটা লাগল। প্রচণ্ড সংঘর্ষই বলতে হবে। সাবমেরিন যেন সরাসরি একটা পাহাড়ে ধাক্কা খেয়েছে। তৈজস-পত্র ভাঙচুরের আওয়াজ শোনা গেল। আলো নিভে যাওয়ায় অন্ধকার হয়ে গেল ভেতরটা, থেমে গেল ইলেকট্রিক মোটর। আচমকা ভৌতিক নিস্তব্ধতা নেমে এসেছে। সব কিছু স্থির, কোথাও কিছু নড়ছে না। সেই স্থিরতার মধ্যে টর্পেডো বোটের মুদু গুঞ্জন ছাড়া আর কিছু শোনা যাচ্ছে না। তারপর ইমার্জেন্সী লাইট জ্বলে উঠল। ডেপথ চার্জের ঝাঁকি খেয়ে বাঙ্ক থেকে খসে পড়েছে হাদী, গড়িয়ে চলে গেছে গ্যাঙওয়ের গোড়ায়। জ্ঞান ফিরে পেয়েছে সে, ধীরে ধীরে উঠে বসল। ঘাড় ফিরিয়ে রানাকে দেখতে পেয়েই হাসতে গেল, অমনি ব্যথায় বিকৃত হয়ে উঠল চেহারা। ‘আল্লাহকে হাজারো শোকর, আপনি বেঁচে আছেন, স্যার! আপনি অতিথি, তার ওপর আমার মক্কেল, আপনার কিছু হলে সারাজীবন নিজেকে ক্ষমা করতে পারতাম না।’

‘আরে বোকা,’ নরম গলায় ধমক দিল রানা, ‘আগে বলো তুমি কেমন আছ। আমার ভয় হচ্ছিল...’

‘মাথায় রক্ত, স্যার। ভেতরে যেন ছোট ছোট বিস্ফোরণ ঘটছে। খুলিটা না ফেটে চার টুকরো হয়ে যায়।’

কি ঘটেছে বলতে যাচ্ছিল রানা, দ্বিতীয় ডেপথ চার্জ বিস্ফারিত হলো। আগেরটার মত কাছাকাছি নয়, তাসত্ত্বেও সাবমেরিন খুব জোরে ঝাঁকি খেলো। বো নিচের দিকে নেমে গেল, কিছুর সঙ্গে ধাক্কা খেয়ে আরেকবার কঁপে উঠল। দ্রুত একবার চারদিক চোখ বুলিয়ে কোথায় রয়েছে বুঝে নিল হাদী। এতক্ষণ মাতালের মত লাগছিল তাকে, বিপদের মাত্রা উপলব্ধি করতে পেরে এখন যেন নেশাটা ছুটে গেছে। দৃষ্টি থেকে ঝাপসা ভাবটা কেটে গেল। চেহারা যুটল সতর্কতা। রানা তাকে সাবধান করে দিল—ওদেরকে হিফ্র না বোঝার ভান করতে হবে।

চিৎকার করে অর্ডার দিচ্ছেন কমান্ডার। গ্যাঙওয়ে ধরে ছুটল দু’জন নাবিক, ধাক্কা দিয়ে পথ থেকে সরিয়ে দিল হাদীকে। ওদের পিছু নিল আরেকজন লোক, এই লোকটাই রিভলবার দিয়ে বাড়ি মেরেছিল হাদীর মাথায়। লোকটার ইউনিফর্ম দেখে রানা বুঝতে পেরেছে, ফার্স্ট লেফটেন্যান্ট। বেশ কিছুক্ষণ পরিবেশে একটা বিশৃঙ্খল ভাব লক্ষ করল ওরা, সবাই ছুটোছুটি করছে। কে যে কাকে কি নির্দেশ দিচ্ছে বোঝা মুশকিল। তবে বেশিরভাগ লোক সাবমেরিনের সামনের দিকে ছুটছে। তারপর সব শান্ত হয়ে গেল।

কন্ট্রোল রুম থেকে পানি বেরুচ্ছে। সব রকম শব্দ বন্ধ রাখার জন্যে হ্যাড গিয়ার ব্যবহার করছে জুরা।

রেগুলেটিং ট্যাঙ্কে পানি ভরা হয়েছে, সাবমেরিনের খোল এখন কাত হয়ে নেই। বাস্ক থেকে হামাঙুড়ি দিয়ে নেমে এল রানা। গ্যাঙওয়ে ধরে ফিরে এল নাস্বার ওয়ান, চিৎকার করে বলল, 'স্টার্ন কমপার্টমেন্ট ডুবে গেছে, পানি ঢুকছে এঞ্জিন রুমে।'

পরবর্তী রিপোর্ট এল, কন্ট্রোল রুমের লিক বন্ধ করা গেছে। দূরে আরও দুটো ডেপথ চার্জ বিস্ফোরিত হলো। কন্ট্রোল রুম থেকে বেরিয়ে এলো কমান্ডার, বেরুতেই দেখা হয়ে গেল এঞ্জিনিয়ার অফিসারের সঙ্গে। অফিসার রিপোর্ট দিল, এঞ্জিন রুমের লিক বন্ধ করা হয়েছে, তবে পোর্ট মোটর ক্ষতিগ্রস্ত হয়েছে। ওয়াচকিপারদের একজন ফুতে আক্রান্ত হয়ে সিক-বেতে ছিল, পা'জামা পরে গ্যাঙওয়েতে বেরিয়ে এসে জানতে চাইল, 'কি ঘটেছে?'

'বলো কি ঘটেনি—তোমার টেমপারেচার একশো দুই,' জবাব এল, 'সিক-বেতে ফিরে যাও।' তারপর এঞ্জিনিয়ারের দিকে ফিরে কমান্ডার বলল, 'স্টারবোর্ড মোটরের কি অবস্থা?'

'প্রপেলার শ্যাফটে ফাটল দেখা দিয়েছে।'

'ঠিক আছে, চেষ্টা করে দেখুন পোর্ট মোটর মেরামত করা যায় কিনা।'

কমান্ডার এরপর তার সেকেন্ড অফিসারের সঙ্গে দীর্ঘক্ষণ আলোচনা করল, কিছু কিছু অংশ রানা শুনে পেল না। তবে সেকেন্ড অফিসারের দু'একটা কথা শুনে বুঝতে পারল প্রথম ডেপথ চার্জের ফলে কি ধরনের ক্ষতি হয়েছে। বিস্ফোরণটা এঞ্জিন রুমের হ্যাচ উড়িয়ে দেয়, ফলে ভেতরে প্রচুর পানি ঢুকে পড়ে। ওদিকে বাইরে থেকে পানির প্রচণ্ড চাপে হ্যাচটা পুরোপুরি সীল হয়ে যায়। তবে সবচেয়ে বিপজ্জনক হলো, সাবমেরিন এখন সারফেসের পঞ্চাশ থেকে ষাট ফুট নিচে ভেসে আছে।

'বিল্জ খালি করতে হবে,' হঠাৎ সিদ্ধান্ত নিল কমান্ডার। 'তাতে যদি তেল আমাদের পজিশন ফাঁস করে দেয়, কিছু করার নেই।'

সেকেন্ড অফিসার নির্দেশ দিল। খানিক পরই বোঝা গেল সাবমেরিন হালকা হয়ে গেছে। কমান্ডার আর সেকেন্ড অফিসার চার্টের ওপর ঝুঁকে পড়ল। বাস্কের নিচ থেকে ওদেরকে পরিষ্কারই দেখতে পাচ্ছে রানা। সম্ভবত ওর দৃষ্টিটা অনুভব করতে পেরেই মুখ তুলে তাকাল কমান্ডার। পরমুহূর্তে চোখ রাখল হাদীর ওপর। সিধে হল, গ্যাঙওয়ে ধরে নেমে এলো নিচে। এখনও সাদা পোশাকে রয়েছে, এত গরমের মধ্যে ওয়াটারপ্রুফটাও খোলেনি। হাদীর সামনে থামল কমান্ডার। 'তুমি তো জেলে, তাই না?' আরবীতে জানতে চাইল।

মুখ তুলে মাথা ঝাঁকাল হাদী।

'আমরা যেমন মরতে চাই না, তুমিও তেমনি মরতে চাও না,' বলল কমান্ডার। 'তুমি সাহায্য করলে আমি খুব খুশি হব।'

হাদী নির্লিপ্ত, কথা বলছে না।

‘সারফেস থেকে পঞ্চাশ ফুট নিচে ভাসছি আমরা,’ বলল কমান্ডার। ‘মোটরগুলো অচল হয়ে পড়েছে। তোমাদের টর্পেডো বোটটা আমাদের মাথার ওপর চক্কর দিচ্ছে, অপেক্ষা করছে আমাদের জন্যে। কাজেই পানির ওপর আমরা উঠতে পারছি না।’

হাদী এখনও কথা বলছে না।

‘তীরের খুব কাছাকাছি রয়েছে আমরা,’ আবার বলল কমান্ডার। ‘এদিকের স্রোত সম্পর্কে আমাদের কাছে কোন তথ্য নেই। সাবমেরিন যদি নিচে নামাই, পাথরের জঙ্গলে আটকা পড়ে যেতে পারি। আর যদি না নড়ি, তাহলেও স্রোতের টানে ধাক্কা খেতে পারি পাথরের সঙ্গে। আমার ধারণা, শয়তানের তাওয়া খাঁড়ির মুখ থেকে সিকি মাইল দূরে রয়েছে আমরা।’

খোঁচা খোঁচা দাড়ি চুলকাচ্ছে হাদী, রানার দিকে একবার তাকাল। হঠাৎ খুব উত্তেজনা বোধ করল রানা। সেটাকে প্রায় উল্লাসও বলা যেতে পারে। ওর এই পরিবর্তন হাদী বোধহয় লক্ষ করল, কমান্ডারের দিকে ফিরে নিঃশব্দে হাসল সে, বলল, ‘মাথাটাকে ফাটিয়ে দিয়ে একটা মুড়ির টিনে তুলে এনেছেন, তারপর এখন বিপদে পড়ে আমার সাহায্য চাইছেন?’

‘বেশি কথা বলবে না,’ ধমক দিল কমান্ডার, তবে কঠিন সুরে নয়। ‘বিপদে পড়েছি, সেজন্যে তোমরা দায়ী। হয় তুমি, নয়তো তোমার ওই বন্ধু। লেবানীজ টর্পেডো বোট আমাদের জন্যে অপেক্ষা করছিল। নিশ্চয়ই কেউ ওদেরকে আগেই খবর দিয়েছে।’

‘টর্পেডো বোট, সত্যি?’ আবার এক গাল হাসল হাদী। ‘তারমানে শমসের লিবান তাহলে আমার কথা বিশ্বাস করেছিল! আমাকে বুঝতে না দিয়ে ঠিকই সে নৌ-বাহিনীর সদর দফতরে ফোন করেছিল!’ দুঃসাহসের কোন সীমা নেই, হাত তুলে কমান্ডারের পাঁজরে আঙুলের খোঁচা দিল সে। ‘উনি আমার স্যার, সম্মানিত ভদ্রলোক, একজন রিপোর্টার—উনি এর জন্যে দায়ী নন। আমরা মাছ ধরতে বেরিয়েছিলাম, আপনার সাবমেরিন আমার বোটের তলায় চলে আসে।’ হঠাৎ হাসতে শুরু করল সে, সে হাসি থামতেই চায় না, চোখে পানি বেরিয়ে আসার অবস্থা হলো।

হাসতে হাসতে দুর্বল হয়ে পড়ল হাদী, তারপর বলল, ‘বুঝুন তাহলে, অতি নগণ্য একটা ঘটনা থেকে কি মহা বিপদের সূচনা ঘটতে পারে! ঠিক আছে, এখন আপনি আমার কাছে কি চান? আসুন, একটু দর কষি। সাহায্য করতে পারি, বিনিময়ে কি পাব আমি? দোস্তানায় আপনার বন্ধু আছে, তার কাছ থেকে কিছু একটা এনেছেন আপনি। দিন ওটা আমাকে।’

রানা ভাবল, কমান্ডার হাদীকে ঘুসি মারবে। ভদ্রলোকের বয়েস বেশি নয়, হাদী তাকে খেপিয়ে দিয়েছে। ‘তুমি আমার বন্দী,’ ঠাণ্ডা, শান্ত সুরে বলল লোকটা। ‘তোমাকে যা করতে বলা হবে তা-ই তুমি করবে।’

‘তাহলে বলি কি করব আমি? এমন বুদ্ধি দেব, শয়তানের তাওয়ায়

আপনারা যাতে ডুবে মরেন।' আবার গলা ছেড়ে হেসে উঠল হাদী।

দুম দুম করে দুটো ঘুসি মারল কমান্ডার। একটা লাগল হাদীর নাকে, আরেকটা চোয়ালে। নাক ফেটে রক্ত বেরিয়ে এল। হাদী এক চুল নড়ল না। না নড়ে সে আসলে কমান্ডারকে বুঝতে দিল, পাল্টা আঘাতের কোন সম্ভাবনা নেই। কিন্তু যে-ই কমান্ডারের পেশীতে ঢিল পড়ল, অমনি তার মুখে একটা ঘুসি মারল সে। ওই এক ঘুসিতেই ছিটকে পড়ে গেল কমান্ডার। সঙ্গে সঙ্গে সেকেন্ড অফিসার তার রিভলবার বের করল। হাদী মারা যাচ্ছে, বুঝতে পেরে লাফ দেয়ার জন্যে তৈরি হলো রানা। কমান্ডার বসল, তারপর টলতে টলতে দাঁড়াল, কাটা ঠোঁট থেকে রক্ত ঝরছে। বারণ করার ভঙ্গিতে হাত নাড়ল সে। একজন জু পিছন থেকে জড়িয়ে ধরল হাদীকে। ইতিমধ্যে গ্যাঙওয়ে বেয়ে নিচে নেমে এসেছে নেভিগেটিং অফিসার। সেকেন্ড অফিসারকে সে বলল, 'ওকে মেরে ফেলাটা বোকামি হবে। এই বিপদ থেকে বাঁচতে হলে ওর সাহায্য ছাড়া চলবে না।'

নেভিগেটিং অফিসার হাদীর দিকে ফিরে বলল, 'একা শুধু আমরা মরব না, তোমার স্যার আর তুমিও মারা যাবে। তাহলে সাহায্য করবে না কেন? টর্পেডো বোটটা সারারাত আমাদের জন্যে অপেক্ষা করবে। ডোবা কোন পাথরে বা পাহাড়ে বাড়ি না খেয়ে স্রোতের টানে আমরা যদি আধ মাইল এগোতে বা পিছাতে পারি তাহলে পানির ওপর উঠতে পারব। বিপদটাও কেটে যাবে।'

হাদীর জবাব, 'কমান্ডারকে তো বললামই, সাহায্য করতে আমি রাজি আছি, তবে বিনিময়ে দোস্তানা থেকে পাওয়া তথ্যটা আমাকে জানাতে হবে। আর মৃত্যুর কথা যদি বলেন, যে লোক সারাজীবন সাগরে কাটিয়েছে তার আবার সলিল সমাধিতে ভয় কি?'

'আমারও সেই কথা,' বলল রানা। 'দোস্তানা থেকে কোন না কোন ক্ষতিকর তথ্য নিয়ে এসেছেন আপনারা। সেটা কি জানতে হবে আমাদেরকে।'

সেকেন্ড অফিসার রিভলবার হাতে পাহারায় থাকল, নেভিগেটিং অফিসার কমান্ডারের ঠোঁটের ক্ষতটা পরীক্ষা করছে। সিক-বে থেকে ডাক্তার এসে ক্ষতটা পরিষ্কার করল।

হাদীর সঙ্গে দৃষ্টি বিনিময় হলো রানার। হাদীর চোখে প্রশ্ন। ছোট্ট করে মাথা নাড়ল রানা। যা থাকে কপালে, তথ্যটা না পেলে ইসরায়েলিদের সাহায্য করা যাবে না। উত্তরে মাথা ঝাঁকিয়ে ক্ষীণ একটু হাসল হাদী। গলা চড়িয়ে বলল, 'কাগজগুলো আমি চাই।'

ঝট করে ঘুরে তার দিকে তাকাল কমান্ডার। 'ডুলে যাও। ওগুলো আমরা তোমাকে দেখতে দিতে পারি না।'

'তাহলে আপনার ওপরওয়ালা ওগুলো দেখতে পাবেন না,' ঠাণ্ডা সুরে জবাব দিল হাদী।

কমান্ডার নেভিগেটিং অফিসারের দিকে ফিরে বলল, 'ঠিক আছে, এখানে আমরা আরও আধ ঘণ্টা থাকছি।'

'আশ্চর্য, কমান্ডার!' বলল হাদী। 'আপনি নিজেকে ও নিজের ক্রুদের নিশ্চিত মৃত্যুর দিকে ঠেলে দেবেন?' রানার দিকে তাকাল সে। 'তাতে অবশ্য আমাদের উদ্দেশ্যই পূরণ হয়, তাই না?'

মিটিমিটি হেসে মাথা ঝাঁকাল রানা।

চোখে আগুন, একদৃষ্টে হাদীর দিকে তাকিয়ে থাকল কমান্ডার। বোঝা গেল সিদ্ধান্ত নিতে পারছে না। তারপর কাঁধ ঝাঁকাল, বলল, 'ঠিক আছে, কাগজগুলো তোমাকে আমি দেখাচ্ছি।' ঘুরল, গ্যাঙওয়ে ধরে দ্রুত পায়ে চলে গেল অফিসার্স কোয়ার্টারের দিকে।

হাদীর দিকে তাকাল রানা, ভাবছে কাগজগুলো দেখে হবেটাই বা কি? ওগুলোর কপি থাকতে পারে, মুখস্থ করাও সম্ভব। 'মুখ বুজে থাকতে অসুবিধে কি? পাথরের সঙ্গে খাক না ধাক্কা,' ফিসফিস করল তার কানে।

'এদিকের স্রোতটা খোলা সাগরের দিকে যাচ্ছে,' গলা খাদে নামিয়ে বলল হাদী। 'পাথরে ধাক্কা খাবার সম্ভাবনা নেই বললেই চলে, কিন্তু ওরা তা জানে না। আগে কাগজগুলো হাতে পাই, তারপর শর্ত দেব—তথ্যগুলো আমাদের নৌ-বাহিনীর সদর দফতরে ওয়াশিংটনের মাধ্যমে পাঠাতে হবে। সবশেষে অভয় দিয়ে বোঝাতে হবে পানির ওপর উঠলে কোন বিপদ ঘটবে না। যদি ওঠে, আর যদি টর্পেডো বোটটা তখনও আশপাশে থাকে, তাহলেই তো কেল্লা ফতে।'

হাদী নিজের মৃত্যুর পরোয়া করছে না দেখে রানার মত সাহসী ও দেশপ্রেমিক মানুষও অবাক না হয়ে পারল না। সামান্য একজন দরিদ্র জেলে, অথচ দেশের জন্যে কি না করতে পারে—একটা দৃষ্টান্তই বটে।

কমান্ডার ফিরে আসতে একটু দেরি করল। তার হাতে একটা মাত্র কাগজ দেখা গেল। সেটা নেভিগেটিং অফিসারকে দিল সে, নেভিগেটিং অফিসার হাদীকে দিল। 'এবার এদিকে এসে চার্ট দেখে স্রোতটার মতিগতি ব্যাখ্যা করো,' নির্দেশ দিল কমান্ডার।

কাগজটায় একবার চোখ বুলিয়ে রানাকে পড়তে দিল হাদী। লেখাগুলো পড়ার সময়ই দু'জনের গায়ের রোম দাঁড়িয়ে গেল, বেড়ে গেল পালস রেট। তিনটে জাহাজের অবস্থান, অক্ষাংশ, দ্রাঘিমা ও রূদেভো উল্লেখ করা হয়েছে। একটা জাহাজ আসছে স্পেন ঘুরে, জিরাঁলটার হয়ে—আমেরিকান সৈন্যদের নিয়ে। বাকি দুটো আসছে লোহিত সাগর থেকে, সুয়েজ ক্যানেল হয়ে—একটা জাতিসংঘের চার্টার করা জাহাজ, তাতে আছে ইউএন পীস মিশনের সৈন্যরা, বেশিরভাগই বাংলাদেশী; অপরটা ব্রিটিশ জাহাজ, রয়্যাল নেভীর নাবিকদের নিয়ে ভূমধ্যসাগরে আসছে। অভিন্ন কোন কারণ না-ও থাকতে পারে, জাহাজ তিনটে এক জায়গায় মিলিত হতে যাচ্ছে, অথবা একটা সময় পরস্পরের অত্যন্ত কাছাকাছি চলে আসবে। কাগজটাকে একটা চার্টই

বলতে হবে, তবে নিচের দিকে কিছু নোট আছে। ওই নোটগুলো নো পড়লে ধাঁধাটা রানা ও হাদীর কাছে পরিষ্কার হত না। ধাঁধাটা যখন পরিষ্কার হলো, রানা ও হাদী বিশ্বায়ের ধাক্কায় অনেকক্ষণ কোন কথাই বলতে পারল না।

নোটগুলোয় পরামর্শ দেয়া হয়েছে, ইসরায়েলিরা যদি তাদের গোপন ঘাঁটি থেকে সাবমেরিন পাঠিয়ে জাতিসংঘ, আমেরিকা আর ব্রিটিশ জাহাজগুলোকে ডুবিয়ে দিতে পারে, তাহলে এই কুকীর্তির দায় বর্তাবে ইরাকের ওপর। ইরাকের সীমান্তে কোন সাগর নেই, কাজেই ইরাকীদের সাবমেরিন থাকার কথা নয়। এ প্রসঙ্গে ব্যাখ্যা দেয়া হয়েছে—দীর্ঘ দিনের চেষ্টায় ইসরায়েল যে গোপন সাবমেরিন ঘাঁটি তৈরি করেছে, বাইরে থেকে এসে সেটা যদি কেউ পরীক্ষা করে, তাহলে দেখতে পাবে ওটা ইসরায়েল বাদে যে-কোন আরব রাষ্ট্রেরই হতে পারে। ইরাক বেশিরভাগ অস্ত্র কেনে রাশিয়ার কাছ থেকে, গোপন ঘাঁটিতে ইসরায়েলিরাও রাশিয়ার তৈরি অস্ত্র ব্যবহার করছে—এমনকি আন্তর্জাতিক দালালদের মাধ্যমে তাদের সাবমেরিনগুলোও রাশিয়ার কাছ থেকে কেনা, সেকেন্ড হ্যান্ড ও পুরানো হলেও। জাহাজ তিনটেকে ডুবিয়ে দেয়ার পর প্রয়োজন মনে করলে গোপন ঘাঁটি থেকে সরে যাবে ইসরায়েলিরা, এবং এমন কিছু তথ্য ছড়িয়ে দেবে যাতে গোপন ঘাঁটির অস্তিত্ব ফাঁস হয়ে যায়। এই কাজ করা সম্ভব হলে ইরাকের সঙ্গে জাতিসংঘের আলোচনা বাতিল হয়ে যাবে, বিশ্ব জনমত চলে যাবে ইরাকের বিরুদ্ধে, আমেরিকা আর ব্রিটেন কালবিলম্ব না করে ইরাকের ওপর বাঁপিয়ে পড়বে। তারা শুধু ইরাকের সামরিক ঘাঁটি আর প্রাসাদগুলোয় বোমা ফেলে সমুদ্র হবে না, ইরাককে আঞ্চলিক অর্থের ধুলোর সঙ্গে মিশিয়ে দেবে।

রানার প্রথম প্রতিক্রিয়া, ‘আপনারা মানুষ, না পিশাচ? আমেরিকা আর ব্রিটেন আপনাদের পরম বন্ধু, অথচ শুধু ইরাককে ধ্বংস করার জন্যে সেই বন্ধুদের জাহাজ ডুবিয়ে দেয়ার প্ল্যান করেছেন?’

‘সেই প্রবাদটা শোনেননি?’ নেভিগেটিং অফিসার মুচকি হেসে বলল, ‘যুদ্ধ আর প্রেমে কোন নীতি থাকে না?’

কাগজটার ওপর আরেকবার চোখ বুলান রানা। জাহাজগুলো কাছাকাছি আসার তারিখ দেয়া হয়েছে বাইশে ফেব্রুয়ারি, রবিবার; সময়, ১৩.৩০।

ইসরায়েলি নেতীর ভয়ঙ্কর উদ্দেশ্য বুঝতে পেরে ঘেমে যাচ্ছে রানা। এর সঙ্গে শুধু বোতাম টিপে তৃতীয় বিশ্বযুদ্ধ বাধিয়ে দেয়ার তুলনা চলতে পারে। এমন পাশবিকতা কল্পনা করাও কঠিন।

বিপদটা যেন ধীরে ধীরে খোলস মুক্ত হচ্ছে। রানা হঠাৎ চিন্তা করল, আমেরিকা ও ব্রিটেনের যা হবার হোক, পীস মিশনের বাংলাদেশীদের কি হবে? ‘এ কি সম্ভব?’ হাদীকে জিজ্ঞেস করল ও। ‘ইসরায়েলিরা তিন-তিনটে জাহাজকে সত্যি ডুবিয়ে দিতে পারবে?’

‘পারবে, ওদের গোপন ঘাঁটিতে যদি যথেষ্ট সংখ্যক সাবমেরিন থাকে,’ জবাব দিল হাদী।

নেভিগেটিং অফিসার ধমক দিল, 'ফিসফাস বন্ধ করুন! এবার তথ্যগুলো দিন আমাদের।'

গ্যাঙওয়ায়ে ধরে কন্ট্রোল রুমের দিকে পা বাড়াল হাদী। 'অবশ্যই,' বলল সে। 'তবে তার আগে বৈরুতে একটা মেসেজ ট্রান্সমিট করার সুযোগ চাই আমি।'

কমান্ডারের চোখ সরু হয়ে গেল। 'আমার কথা আমি রেখেছি। এবার তোমার কথা তুমি রাখো।'

'আপনাদেরকে পথ দেখিয়ে নিরাপদ জায়গায় সরিয়ে নেয়ার আগে কেন এই তথ্য চেয়েছিলাম তা আপনি জানেন,' জবাব দিল হাদী। 'আমি চেয়েছিলাম আমাদের শত্রুপক্ষ যাতে তথ্যটা কাজে লাগাতে না পারে। আপনার কাছে যদি এই কাগজটার কপি থাকে বা তথ্যগুলো মুখস্থ করে রেখে থাকেন...'

বাধা দিল কমান্ডার, 'কপিও রাখিনি, মুখস্থও করিনি।'

'সেক্ষেত্রে মেসেজটা বৈরুতে পাঠাতে দিতে আপনার আপত্তি থাকার কোন কারণ নেই।'

কমান্ডার খেপে গেল। 'তোমার দুঃসাহস আর স্পর্ধা মাত্রা ছাড়িয়ে যাচ্ছে! জানো, তোমাকে আমি এই মুহূর্তে নরকে পাঠাতে পারি...'

'জানি, পিছু নিয়ে আপনাকেও সেখানে যেতে হবে।'

নেভিগেটিং অফিসার বলল, 'তোমার কি মরার ভয়ও নেই?'

রানা বলল, 'আপনাদের প্ল্যান দেখলে শয়তানও আঁতকে উঠবে। ওই তিনটে জাহাজে কয়েক হাজার মানুষ আছে, সবাই তারা মারা যাবে। আমরা দু'জন মারা গেলে ওরা যদি বেঁচে যায়, আমাদের মরারি ভাল।'

'তাহলে তাই মরুন!' খেঁকিয়ে উঠল কমান্ডার। কর্কশ গলায় একটা নির্দেশ দিল সে। নির্দেশ দেয়ার পর রানা ও হাদীর দিকে তীক্ষ্ণদৃষ্টিতে তাকিয়ে থাকল। সাবমেরিনের ট্যাঙ্কে কমপ্রেসড এয়ার ঢোকান জোরাল হিসহিস আওয়াজ ভেসে এল। বাতাস ঢুকে ট্যাঙ্ক থেকে সমস্ত পানি বের করে দিচ্ছে।

'এখনও তথ্যগুলো দেবেন না বলে ভাবছেন?' জিজ্ঞেস করল কমান্ডার, হিংস্র পশুর মত লাগছে তাকে। 'যদি না দেন, সাবমেরিন নিয়ে সারফেসে উঠব আমরা, টার্পেডো বোট আক্রমণ করার ঝুঁকি থাকা সত্ত্বেও।' রানা ও হাদী, দু'জনের কেউই যখন কোন উত্তর দিল না, কাঁধ ঝাঁকাল সে। 'গান ত্রু, স্ট্যান্ড বাই!' হিব্রু ভাষায় নির্দেশ দিল। তারপর কনিং টাওয়ার বেয়ে ওপর দিকে অদৃশ্য হয়ে গেল।

পরবর্তী পাঁচ মিনিটকে রানার জীবনের সবচেয়ে অপ্রীতিকর অভিজ্ঞতা বলা যেতে পারে। সাবমেরিনের ভেতর উত্তেজনা আর উদ্বেগ যেন নিরেট কোন বস্তু, ছোঁয়া যায়। পরিবেশ অত্যন্ত গুমোট হয়ে উঠেছে, দরদর করে ঘামছে রানা। কমপ্রেসড এয়ারের হিসহিস আওয়াজ ক্রমশ কমে এল।

সেকেন্ড অফিসার ট্রিম অ্যাডজাস্ট করল। সাবমেরিনের খোল এখন কাত হয়ে নেই, সম্ভবত সারফেসের কাছাকাছি উঠে এসেছে, পেরিস্কোপটা হয়তো এখন পানির ওপর। কমান্ডারকে কল্লনার চোখে দেখতে পেল রানা—পেরিস্কোপে চোখ রেখে টর্পেডো বোটটাকে খুঁজছে। ওর মনে একটা প্রশ্ন জাগল, ডিজেল এঞ্জিনও কি ক্ষতিগ্রস্ত হয়েছে? তা যদি হয়ে থাকে, বাঁচার সত্যি কোন উপায় নেই।

অকস্মাৎ কমান্ডারের চিৎকার ভেসে এল, ‘ব্লো অল ট্যাঙ্কস! সারফেস!’ এবার প্রবল বেগে কমপ্রেসড এয়ার ঢুকল ট্যাঙ্কে। সাবমেরিন এত দ্রুত ওপরে উঠছে, ডেক থেকে সাগরের পানি নেমে যাবার আওয়াজ শুনতে পাচ্ছে ওরা। গান্ধী জুরা বাদরের মত লাফ দিয়ে কনিং টাওয়ারে ভিড় করল। ধাতব শব্দ তুলে খুলে গেল হ্যাচ, ওদের মাথার ওপর পায়ের আওয়াজ পাওয়া যাচ্ছে। তারপর একটা ডিজেল এঞ্জিন জ্যাস্ত হলো, বোতে ঢেউ লাগায় কাঁপতে শুরু করল সাবমেরিন।

মনে মনে একটা হিসাব করল রানা। সাবমেরিনটা পুরানো, রাশিয়ার তৈরি—সারফেস স্পীড হবার কথা আঠারো নট। কিন্তু সেটা কমে গিয়ে দাঁড়িয়েছে নয় কি দশ নটে, দায়ী স্টারবোর্ডের প্রপেলার শ্যাফট। কিন্তু টর্পেডো বোটের স্পীড চল্লিশ নটেরও বেশি। তারমানে ওদেরকে বেশিক্ষণ অপেক্ষা করতে হবে না। এঞ্জিন রুম থেকে বেল বাজার আওয়াজ ভেসে এল। নিঃসঙ্গ এঞ্জিনের আওয়াজ ক্রমশ বাড়ছে, সেই সঙ্গে গোটা সাবমেরিন ঝাঁকি খাচ্ছে বিরতিহীন। তারপর অকস্মাৎ তীক্ষ্ণ বিস্ফোরণের শব্দ হলো, ছিটকে প্রায় পড়ে যাবার অবস্থা হলো সবার। প্রথমে রানার মনে হলো টর্পেডো আঘাত করেছে। তাল মাত্র ফিরে পেয়েছে, বিস্ফোরণটা আবার ঘটল। রানা বুঝতে পারল, আফটার গান থেকে ফায়ার করা হচ্ছে। তারমানে টর্পেডো বোট ওদেরকে দেখতে পেয়েছে। ওরা এখন অ্যাকশনে!

কারও মুখে কথা নেই। হাদী গম্ভীর ও নির্লিপ্ত। রানা শান্ত ও ঠাণ্ডা। দু’জনেই জানে, নিয়তি ওদেরকে নিয়ে খেলছে। এক মিনিট, দু’মিনিট করে বিশ মিনিট কেটে গেল। হাদীর নির্লিপ্ত ভাব লক্ষ করে আরেকবার তাচ্ছব বনে গেল রানা। যে লোক আগে কখনও সাবমেরিনে চড়েনি, এই অবস্থায় তার তো কেঁদে ফেলার কথা।

একনাগাড়ে নয়, থেমে থেমে ফায়ার করা হচ্ছে। কমান্ডার এক সময় নির্দেশ দিল, ‘স্টারবোর্ডের দিকে আট পয়েন্ট ঘোরো।’ তারমানে ডান দিকে ঘুরতে বলা হলো। রানা ধরে নিল, এবার শেষ। বর্তমান পরিস্থিতিতে সাবমেরিনকে ঘোরানোর একটাই অর্থ থাকতে পারে—ওদের দিকে একটা টর্পেডো ছুটে আসছে।

তারপর কনিং টাওয়ারের মাথা থেকে গানারদের উল্লাসধ্বনি ভেসে এল। রানার বুক ছ্যাৎ করে উঠল, ধরে নিল টর্পেডো বোট বোধহয় ডুবে যাচ্ছে। আসলে সাবমেরিনের গানাররা তৃতীয় বারের চেষ্টায় লক্ষ্যভেদ করতে

পেরেছে, টর্পেডো বোটের এঞ্জিনের মারাত্মক ক্ষতি হয়েছে, আহত হয়েছে একজন লোক—তবে এ-সব রানা জু আর অফিসারদের আলাপ থেকে পরে জানতে পারবে।

পোর্টসাইডের লুকআউট রিপোর্ট করল, ওদিকে একটা জাহাজের বো দেখা যাচ্ছে। ঠিক বো নয়, সে আসলে সাদা বো ওয়েভ দেখতে পেয়েছে। সাবমেরিনের নিচ থেকে রানা ও হাদী সী বুট পরা লোকজনের ছোটোছুটির আওয়াজ শুনতে পেল, ওদের মাথার দিক থেকে ভেসে আসছে। কনিং টাওয়ার থেকে হুডমুড় করে নিচে নেমে এল তারা। বিকট আওয়াজ তুলে বন্ধ হয়ে গেল হ্যাচ। দ্বিতীয়বার ক্র্যাশ ডাইভ দিল সাবমেরিন।

এবার সারফেস আর সাগরের তলার মাঝখানে থামল না ওরা, সরাসরি বালির বিস্তৃতিতে নেমে এসে স্থির হলো সাবমেরিন। প্রায় এক ঘণ্টা ধরে ডেপথ চার্জের কুৎসিত আওয়াজ শুনতে পেল ওরা, তবে সবগুলোই ভেসে এল কমবেশি দূর থেকে। খুব কাছে একটাও বিস্ফোরিত হয়নি।

শুরু হলো দীর্ঘ অপেক্ষার পালা।

সময় যখন আর কাটতে চাইছে না, জু আর নাবিকরা তাস খেলতে বসে গেল। রানা আর হাদীর ওপর কমান্ডার খেপে আছে, তবে কি মনে করে কে জানে, ইচ্ছে হলে ওরা খেলতে পারে বলে জানাল। রাত সাড়ে তিনটের সময় শুরু হলো খেলা, বিভিন্ন বাধাবিঘ্ন ও খেলোয়াড় বদলের মধ্য দিয়ে চলল পরদিন মাঝরাত পর্যন্ত। বাক্সে কেউ শুয়ে আছে, কেউ হেলান দিয়ে বসে, টেবিল হিসেবে ব্যবহার করা হচ্ছে স্টোর চেম্বার থেকে আনা কাঠের একটা বাস্ক। আলোটা ঠিক ওদের মাথার ওপর, ফলে বাক্সের ভেতর পুরোপুরি অন্ধকার থাকায় কারও চেহারা দেখা যাচ্ছে না, এমনকি তাস ফেলার জন্যে কেউ যখন - ঝুঁকে পড়ে তখনও শুধু তার চাঁদিটাই দেখা যায়।

নেভিগেটিং অফিসারও এক সময় খেলতে বসে গেল। দোভাষী ব দায়িত্বও পালন করল সে। রানা ও হাদী প্রথম থেকেই গোপন করে রেখেছে যে ওরা হিব্রু জানে। ওরা বন্দী হলেও, জু ও নাবিকরা ওদের সঙ্গে ভালই ব্যবহার করল। রানার পকেটে অল্প কিছু মার্কিন ডলার ছিল, হাদীর কাছে কিছুই নেই, ফলে ধার দিতে হলো। জুদের কাছে ইসরায়েলি কারেন্সি ছাড়া আর কিছু নেই, তবে ডলার ভাঙিয়ে দিতে রাজি হলো তারা।

ব্রেকফাস্টের পর ঘুম পাবার অভিনয় করল রানা, বোঝাতে চায় রাত জাগতে অভ্যস্ত নয়। হাদীরও ঘুম পায়নি, খেলায় জিতে আরও বরং তাজা আর প্রাণবন্ত লাগছে তাকে। তবে মাথার ক্ষতটা খুব বিরক্ত করছে বলে অভিযোগ করায় সিক-বের ডাক্তারকে একবার ডাকা হলো। ডাক্তার ওর ক্ষতটা পরীক্ষা করে ব্যান্ডেজ বেঁধে দিল, কয়েকটা ট্যাবলেটও দিয়ে গেল। খেলার মধ্যে চিৎকার-চেষ্টামেচি সে-ই বেশি করল। মাঝে-মধ্যে কার্ড চুরি নিয়ে হাতাহাতি হবার অবস্থা হলো, তবে বেশিরভাগ সময় হাস্য-কৌতুকের মধ্যেই কাটল। দেখে বোঝার উপায় থাকল না যে ওরা দু'জন ইসরায়েলিদের পরম

শত্রু ।

খেলা ভঙ্গ হবার পর দুপুরে কেউ কিছু না খেয়েই যে যার বাস্কে নেতিয়ে পড়ল । ঘুমোবার চেষ্টা করলেও রানার ঘুম আসছে না । সাগরের তলায় অচল হয়ে পড়ে থাকার পুরোটা সময় এঞ্জিনিয়াররা পোর্ট ইলেকট্রিক মোটর মেরামতের কাজে ব্যস্ত থাকল । দু'বার স্টার্ট নিল সেটা, কিন্তু প্রতিবারই কর্কশ ধাতব আওয়াজ তুলে বন্ধ হয়ে গেল । বিকেলের দিকে হাল ছেড়ে দিল এঞ্জিনিয়াররা । তারাও একটু ঘুমিয়ে নেয়ার জন্যে যে যার বাস্কে উঠল ।

ঘুমাল না শুধু একজন, কমান্ডার । শত্রু হলেও, তার দায়িত্ব বোধ লক্ষ করে মুগ্ধ হলো রানা । তবে দুঃসংবাদ হলো, রানাকে লোকটা কেন যেন সন্দেহের দৃষ্টিতে দেখতে শুরু করেছেন । বারবার দেখে যাচ্ছে রানা জেগে আছে নাকি ঘুমিয়ে পড়েছে ।

মাঝরাতের খানিক পর পর্যন্ত সাগরের তলায় থাকল ওরা । ট্যাস্কে কমপ্রেসড এয়ার ঢোকাবার নির্দেশ যখন এল, পরিবেশ ইতিমধ্যে এমন গুমোট হয়ে উঠেছে যে শ্বাস নিতে কষ্ট পাচ্ছে সবাই ।

পেরিস্কোপ গভীরতায় উঠে এল সাবমেরিন । অল ক্রিয়ার রিপোর্ট দিল কমান্ডার, অবশেষে সারফেসে উঠল ওরা । কনিং টাওয়ারের হ্যাচ খুলে ফেলা হলো, সঙ্গে সঙ্গে ঠাণ্ডা বাতাস ঢুকল সাবমেরিনে । তাজা বাতাস যে প্রাণ ধারণের জন্যে কতখানি প্রয়োজন, সবাই তা উপলব্ধি করতে পারল । ডেক অগভীর পানিতে ডুবে আছে, আট নট গতিতে এগোচ্ছে সাবমেরিন । রাতের আকাশ মেঘে ঢাকা, তবে মেঘ ভেদ করে চাঁদের ক্ষীণ আলো নেমে এসেছে ।

‘আমরা উত্তর দিকে যাচ্ছি,’ ফিসফিস করল হাদী ।

‘কি করে বুঝলে?’

‘চাঁদের অবস্থান দেখে ।’

‘কিন্তু ওরা উত্তর দিকে যাবে কেন? প্রপেলার শ্যাফটে ফাটল দেখা দিয়েছে, একটা মোটর অচল হয়ে পড়েছে, ওরা তো এখন মেরামতের জন্যে ইসরায়েলে ফিরতে চাইবে, আর সেটা দক্ষিণ দিকে ।’

‘পানির তলা দিয়ে সাবমেরিন চালাতে পারছে না, পানির ওপর দিয়ে তেল আবিবে পৌঁছতে চাইলে ঝুঁকি নিতে হবে—তার মধ্যে পরিচয় ফাঁস হয়ে যাবার ঝুঁকিও আছে ।’

‘তুমি বলতে চাইছ ওদের গোপন সাবমেরিন ঘাঁটিটা উত্তর দিকে কোথাও?’

‘আমার তো তা-ই ধারণা । সেটা সাইপ্রাসের কোথাও হলেও আমি আশ্চর্য হব না ।’

তিনজন গার্ড পাহারা দিচ্ছে ওদেরকে, ওরা যাতে সাগরে লাফিয়ে পড়তে না পারে । ‘আর বেশি তাজা বাতাস খাবার দরকার নেই,’ বলে ওদেরকে ডেক থেকে নিচে নামিয়ে আনল তারা । ঢেউয়ের আঘাতে দোল খাচ্ছে

সাবমেরিন, কনিং টাওয়ারের মই বেয়ে নিচে নামতে সময় লাগল। বাঙ্কে ফিরে এসে শুলো রানা, শুয়েই ঘুমিয়ে পড়ল।

ঘুম ভাঙার পর রানা বুঝতে পারল এঞ্জিন থেমে গেছে। সাবমেরিনের সামনের দিকে একটা বাস্তু ভাব লক্ষ্য করল ও। বাঙ্ক থেকে ঝুঁকে নিচে, হাদীর বাঙ্কে তাকাল, জানতে চাইল, 'কি ঘটেছে?'

'বলতে পারছি না, স্যার,' জবাব দিল হাদী। তারপর ফিসফিস করে বলল, 'আমার ধারণা, তাকরির উপকূল থেকে এখনও আমরা সরতে পারিনি।' 'কি করে বুঝলে?'

জবাবে মুঠো করা একটা হাত রানার চোখের সামনে তুলে খুলল হাদী। তার তালুতে চকচকে একটা সিলভার ওয়াচ দেখতে পেল রানা— পকেট ঘড়ি। 'এখন বাজে মাত্র দুটো। মাঝরাতের খানিক পর রওনা হই আমরা। প্রায় পনেরো মিনিট হলো সাবমেরিন স্থির হয়ে আছে।'

'কি ঘটছে বলে তোমার ধারণা? কমান্ডার কি সেই চার্টটা অন্য কোন বোটে পাচার করছে?'

হাদী কথা বলল না, কারণ গ্যাঙওয়ার কাছাকাছি একটা বাঙ্ক থেকে নেমে ওদের দিকে তাকিয়ে রয়েছে একজন গার্ড। ওই একজনই, আশপাশে আর কাউকে পাহারায় দেখা যাচ্ছে না। কনিং টাওয়ারের হ্যাচ এখনও খোলা। গার্ডকে কাবু করতে পারলে তার রিভলবারটা ওদের হাতে চলে আসে। হাতে রিভলবার থাকলে ট্যাঙ্কের কন্ট্রোল দখল করা সম্ভব হতে পারে। তখন সাবমেরিনটাকে ডুবিয়ে দেয়া যাবে। কনিং টাওয়ারের হ্যাচ খোলা থাকায় মারা যেতে খুব বেশি সময় লাগবে না। রানার চিন্তা-ভাবনা শেষ হয়নি, কনিং টাওয়ারের মই বেয়ে হুড়মুড় করে নেমে আসতে দেখা গেল ত্রু আর নাবিকদের। সবার শেষে নামল কমান্ডার। হ্যাচ বন্ধ করে দেয়া হলো। ঘুমিয়ে পড়েছিল বলে নিজেকে তিরস্কার করল রানা। সময় থাকতে প্ল্যানটা নিয়ে চিন্তা করা উচিত ছিল।

তলিয়ে যাবার নির্দেশ দেয়া হলো, ট্যাঙ্কে পানি ঢোকার আওয়াজ স্পষ্ট শুনতে পেল ওরা। সামনের দিক থেকে ঘষা খাওয়ার কর্কশ একটা শব্দ ভেসে এল, কারণটা রানা বুঝতে পারল না। সাবমেরিন ধীরে ধীরে নিচে নামল। তারপর সব কিছু স্থির হয়ে গেল। কমান্ডার ইতিমধ্যে কনিং টাওয়ারের কাছ থেকে সরে এসেছে, কন্ট্রোল রুমের একটা হুক থেকে এয়ারফোন নামিয়ে কথা বলছে কার সঙ্গে যেন। নিচু স্বরে কথা বলছে, তাই মাত্র দুটো শব্দ ধরতে পারল রানা— 'মোটরস' আর 'ফিক্সড'। ঘষা খাওয়ার আওয়াজটা প্রায় সঙ্গে সঙ্গে থেমে গেল।

'আমরা পূর্ব দিকে মুখ করে আছি,' ফিসফিস করল হাদী।

'তার মানে লেবানীজ উপকূলের দিকেই,' বলল রানা, গলায় অবিশ্বাস। মাথা ঝাঁকাল হাদী।

দু'বার মনে হলো সাগরের তলার সঙ্গে বাড়ি খেলো সাবমেরিন। মোটর

চুপ করে থাকলেও, রানার মনে হলো সামনের দিকে এগোচ্ছে ওরা। হঠাৎ ওদের বাস্কের ঠিক পিছনে, খোলের সঙ্গে কিছু একটার সংঘর্ষ ঘটল। খুব জোরে ঝাঁকি খেলো সাবমেরিন। আবার স্থির হয়ে গেল ওটা। ট্যাঙ্কে বাতাস ভরা হলো, সাগরের তলা থেকে সামান্য একটু ওপরে উঠল ওরা।

এয়ারফোন হুকে ঝুলিয়ে গ্যাঙওয়ায়েতে বেরিয়ে এলে কমান্ডার। ‘সবাইকে অভিনন্দন, ডিয়ার বয়েজ,’ বলল সে। ‘আমরা পৌঁছে গেছি।’

ক্রু আর নাবিকদের উল্লাস দেখে কে। সবাই হাততালি দিল, তারপর নাচানাচি শুরু হলো। যে যার স্টেশন ছেড়ে বেরিয়ে এসেছে, রানা ও হাদীর গার্ডকে ধাক্কা দিয়ে কনিং টাওয়ারের দিকে ছুটছে। কয়েক সেকেন্ডের মধ্যে খালি হয়ে গেল সাবমেরিনের ভেতরটা। রিভলবার নেড়ে ওদের দু’জনকে সামনে বাড়ার ইঙ্গিত করল গার্ড। বাস্ক থেকে নেমে কনিং টাওয়ারের দিকে এগোল ওরা।

সাবমেরিনের ব্রিজে বেরিয়ে এসে অবাধ হয়ে গেল রানা। ওর ধারণা ছিল কোন জাহাজের পাশে ভিড়েছে ওরা। কয়েকটা আইডিয়াই মাথায় ঢোকে। বেসে ফেরার ঝামেলা আর ঝুঁকি এড়াতে হলে সাপ্লাই শিপের সাহায্য নিতেই হবে, জানত ও। কাজেই ধরে নিয়েছিল ইসরায়েলিরা ফলস বটম সহ কোন ধরনের জলযান তৈরি করেছে, তাতেই উঠে এসেছে ওদের সাবমেরিন। সেজন্যই বোধহয় প্রথমে ওটাকে ডুব দিতে হয়েছে। কিন্তু যা দেখল তার সঙ্গে ওর ধারণার কোন মিল খুঁজে পাওয়া গেল না। আসল ব্যাপারটা যেমন অকল্পনীয় তেমনি চমকপ্রদ।

তিন

সাবমেরিন ভেসে আছে অতিকায় এক গুহার ভেতর। এক প্রান্ত থেকে আরেক প্রান্ত প্রায় দেড়শো গজ লম্বা। তবে চওড়ায় খুব বেশি হলে চল্লিশ থেকে পঞ্চাশ ফুট। ছাদ প্রকাণ্ড টানেলের মাথার দিকটার মত, খিলান আকৃতির, চল্লিশ ফুট উঁচু, বিশাল সব ইস্পাতের কড়ি দিয়ে শক্ত আর মজবুত করা। পুরো জায়গাটা উজ্জ্বল আর্ক লাইটের আলোয় ভেসে যাচ্ছে, চারদিক থেকে ভেসে আসছে দৈত্যাকার মেশিনারির যান্ত্রিক গুঞ্জন। সব মিলিয়ে ব্যাপারটা এতই অবিশ্বাস্য, হতভম্ব হয়ে পড়ল রানা। সাবমেরিনের কমান্ডার সেটা খেয়াল করতে পেরেই ব্রিজে ওর পাশে এসে দাঁড়াল, কথাগুলো ইংরেজিতে রানাকে বলার সময় তার কণ্ঠে গর্ব ও আত্মতৃপ্তির সুরটুকু চাপা থাকল না। ‘ইসরায়েলের যুদ্ধ প্রস্তুতি সম্পর্কে দুনিয়ার কারও কোনও ধারণা নেই। ইসরায়েলকে চারদিক থেকে ঘিরে রেখেছে শত্রুরা, মুসলিম প্রধান দেশগুলো,

তাদের নৌ-বাহিনীর তৎপরতার ওপর সারাক্ষণ আমরা কড়া নজর রাখছি।’

‘কিন্তু লেবাননের পাশেই তো ইসরায়েল,’ বলল রানা, ‘স্বদেশের নিরাপদ জায়গা ছেড়ে বিদেশের মাটিতে কেন আপনারা ঘাঁটি তৈরি করলেন?’

‘উত্তরটা পানির মত সহজ,’ বলে হাসল কমান্ডার। ‘আমরা দুর্বল প্রতিবেশী চাই। আর প্রতিবেশীকে দুর্বল করতে হলে চাই যুদ্ধ। কিন্তু সে যুদ্ধ আমরা লড়ব না, আমাদের হয়ে লড়বে ব্রিটেন আর আমেরিকা।’

‘অথচ আপনারা ব্রিটেন আর আমেরিকার যুদ্ধ জাহাজ ডুবিয়ে দেয়ার প্ল্যান করেছেন!’

‘করেছি, কারণ তা না হলে ইরাক আক্রমণ করার যে সুযোগটা তৈরি হয়েছে সেটা মাঠে মারা যাবে,’ জবাব দিল কমান্ডার। ‘ব্রিটেন আর আমেরিকা শুধু আমাদের স্বার্থে ইরাক আক্রমণ করতে চাইছে না, তাদের নিজেদের স্বার্থও আছে। নিরাপত্তা পরিষদের স্থায়ী তিন সদস্য চীন, রাশিয়া আর ফ্রান্স মধ্যপ্রাচ্যের অস্ত্রের বাজার দখল করে নিয়েছে, সেই বাজার বাকি দুই স্থায়ী সদস্য পুনর্দখল করতে চাইছে। নতুন তৈরি কিছু সামরিক সরঞ্জাম কেমন কাজ করে সেটাও এই সুযোগে পরীক্ষা করে নিতে চাইছে ওরা।

‘স্বভাবতই চীন, রাশিয়া আর ফ্রান্স চাইছে না যুদ্ধটা হোক, তাদের সঙ্গে যোগ দিয়েছে জাতিসংঘের মহাসচিব কফি আনান। জোর কূটনৈতিক তৎপরতা শুরু হয়ে গেছে। আমরা চাইছি না কূটনৈতিক তৎপরতা সফল হোক। এখন ভেবে দেখুন, ভূমধ্যসাগরে ব্রিটেন, আমেরিকা আর জাতিসংঘের তিনটে জাহাজ যদি অজ্ঞাতপরিচয় সাবমেরিনের হামলায় ডুবে যায়, ফলাফলটা কি হবে? ইসরায়েলের নৌ-বাহিনী দায়ী, এ-কথা কেউ কি বিশ্বাস করবে?’

গলা ছেড়ে হেসে উঠল কমান্ডার। রানা কথা বলছে না।

‘ব্রিলিয়ান্ট প্ল্যান, তাই না?’ হাসি থামিয়ে বলল কমান্ডার। ‘যুদ্ধ আমরা চাই, চাই ইরাককে ধুলোর সঙ্গে মিশিয়ে দেয়া হোক। জাহাজ তিনটেকে ডুবিয়ে দিয়ে প্রতিক্রিয়ার জন্যে অপেক্ষা করব আমরা, যদি দেখি কারা দায়ী তা জানার জন্যে তদন্ত শুরু হয়েছে, এই ঘাঁটি ছেড়ে ইসরায়েলে ফিরে যাব, কয়েকটা সাবমেরিন রেখে। কাছাকাছি সাগরে এমন কিছু প্রমাণ রেখে যাব, এই ঘাঁটিটা খুঁজে বের করতে আমেরিকা বা ব্রিটেনের যাতে কোন অসুবিধে না হয়। এখানে এসে তারা কি দেখবে? দেখবে সাবমেরিন ও অন্যান্য সামরিক সরঞ্জাম সবই রাশিয়ার তৈরি, গায়ে আরবী হরফে সাক্ষেতিক পরিচয় লেখা।’ মাথা নাড়ল কমান্ডার। ‘ইসরায়েলকে দায়ী করার কোন উপায় থাকবে না।’

কমান্ডার কথা বলছে, চোখ ঘুরিয়ে চারদিকটা ভাল করে দেখে নিচ্ছে রানা।

‘এটা একটা কমপ্লিট ন্যাভাল সাবমেরিন বেস। আমাদের এমন কি নিজস্ব ফাউন্ড্রিও আছে।’

সাবমেরিনের জুরা, সব মিলিয়ে প্রায় ষাটজন, ফরওয়ার্ড ডেকে ভিড় করে দাঁড়িয়ে আছে। বোর দিকে সামনে তিনজন লোক বড় সিলিভার আকৃতির একটা বয়া নিয়ে ব্যস্ত, ওই বয়ার সঙ্গেই বাঁধা রয়েছে সাবমেরিনটা। বয়াটার সঙ্গে লম্বা চেইন আছে, শক্তিশালী একটা ডাংকি-এঞ্জিনের সঙ্গে কয়েক পাক জড়ানো, অপরপ্রান্তটা পানির তলায় নেমে গেছে। রানা বুঝতে পারল এই চেইনের সাহায্যে টেনেই সাবমেরিনটাকে জলমগ্ন প্রবেশপথ দিয়ে ভেতরে ঢোকানো হয়েছে, তারপর গাইড করা হয়েছে সারফেসে উঠে আসতে।

‘ঢোকার বা বেকবার একটা মাত্র পথ,’ বলল রানা। ‘শত্রুরাষ্ট্রের কোন ইন্টেলিজেন্স এই হাইড-আউট সম্পর্কে জানতে পারলে ফাঁদে পড়া ইঁদুরের অবস্থা হবে আপনাদের।’

হেসে উঠল কমান্ডার। ‘লেবাননের ইন্টেলিজেন্স ব্রাঞ্চ নেই বললেই চলে। ওদের এমন কি সাবমেরিনও নেই। সাগরের তলা দিয়ে আমাদের সাবমেরিন আসা-যাওয়া করছে, কেউ কিছু দেখতেই পাচ্ছে না। তবে যদি ভেবে থাকেন আপনি এখান থেকে বেরিয়ে দুনিয়ার সবাইকে সব কথা বলে দেবেন, ভুলে যান।’ হাদীর দিকে তাকালেন তিনি। ‘তুমিও ভুলে যাও। এখানে গাধার খাটনি খাটতে হবে তোমাদের। যুদ্ধ শেষ না হওয়া পর্যন্ত।’

‘আমি একটা ভবিষ্যদ্বাণী করি? বিশ্বাস করুন, এখানে যারা আছে তাদের সবার নিয়তি আমি পড়তে পারছি। যুদ্ধ হোক বা না হোক, সবাই আমরা মারা যাব।’ হাদী গম্ভীর। ‘আমিও, আপনিও।’

কমান্ডারের ঘাড়ের পেশীতে টান পড়ল। কি ঘটতে যাচ্ছে আন্দাজ করতে পেরে আড়ষ্ট হয়ে উঠল রানা। কিন্তু কে জানে কি ভেবে ঝট করে ঘুরে দাঁড়াল কমান্ডার, ব্রিজ থেকে ডেকে নেমে গেল।

‘ভদ্রলোককে তুমি খেপিয়ে তুলছ,’ বলল রানা।

প্রকাণ্ড কাঁধটা ঝাঁকাল হাদী। ‘কি আসে যায় তাতে,’ জবাব দিল সে। ‘ওই ব্যাটা নয়, এই জায়গার চার্জে অন্য কেউ আছে। সাবমেরিন মেরামত হয়ে গেলেই আবার সাগরে ফিরে যেতে হবে ওকে।’

‘আমরা শান্ত ও নিরীহ, এটা ওদেরকে বিশ্বাস করাতে হবে,’ বলল রানা। ‘বিশেষ করে যে ভদ্রলোক চার্জে আছেন তাঁকে চটিয়ে না। ভুলে যেয়ো না এখান থেকে বেরুতে হবে আমাদের।’

রানার দিকে একদৃষ্টে কয়েক মুহূর্ত তাকিয়ে থাকল হাদী। ‘আমি জানি, আপনি শুধু বেকবার কথা ভাবছেন না, স্যার। আপনি অন্য আরও কি যেন ভাবছেন। আপনার চোখের দৃষ্টি আমি পড়তে পারছি।’

এই সময় এঞ্জিনের ভট-ভট আওয়াজ শোনা গেল। প্রধান গুহা থেকে বেরিয়ে যাওয়া অনেকগুলো খিলান-পথের একটা থেকে বেরিয়ে এল ছোট বোটটা। এ-ধরনের অনেকগুলো টানের ভেতর সাবমেরিনের ধূসর স্টার্ন দেখতে পাচ্ছে রানা। বয়াটাকে ইতিমধ্যে সরিয়ে ফেলা হয়েছে। সাবমেরিন থেকে ভারী এক প্রস্থ রশি ফেলা হলো বোটে, বোটটা এখন টাগ হিসেবে

কাজ করছে। রশি বাঁধার কাজ শেষ হতেই সাবমেরিনটাকে টেনে নিয়ে চলল।

শেষ প্রান্তে গুহাটা হঠাৎ চওড়া হয়ে বিশাল অর্ধবৃত্ত তৈরি করেছে। এই অর্ধবৃত্ত থেকে কম করেও সাতটা গুহায় যাওয়া যায়। প্রতিটি এত বেশি চওড়া যে ভেতরে একটা সাবমেরিন ঢোকান পরও ডকইয়ার্ডের জন্যে প্রশস্ত জায়গা অবশিষ্ট আছে। প্রতিটি গুহা ইংরেজি আর আরবীতে নম্বর দেয়া। ইউ-থারটিফোর, রানারা যে সাবমেরিনে চড়ে এসেছে, পাঁচ নম্বর বার্থে ঢুকল। কয়েকজন লোকের হাতে বোট হুক রয়েছে, ডকের দু'পাশের পাথুরে গায়ে সাবমেরিন যাতে ঘষা না খায় সেটা নিশ্চিত করাই তাদের কাজ। খিলান আকৃতির প্রবেশপথ পেরুচ্ছে কনিং টাওয়ার, রানা একটা মিটার গজ-এর মাথা দেখতে পেল, পানি থেকে উঠে এসেছে। ডকের দুই পাশে ভাঁজ করা শক্তিশালী গেটও দেখা গেল। এখন ভরা জোয়ার বলেই মনে হলো। ভাটার সময় প্রতিটি বেসিন থেকে সমস্ত পানি বের করে দিয়ে গেট লাগিয়ে দেয়া হয় ড্রাই ডক-এর সুবিধে পাবার জন্যে। গোটা আয়োজনটা আরেকবার রানার কাছে অবিশ্বাস্য বলে মনে হলো।

সাবমেরিনকে বাঁধার কাজ শেষ হতে ডকসাইড ধরে পথ দেখানো হলো ওদেরকে, খানিকটা ঢাল বেয়ে একটা গ্যালারিতে পৌঁছল ওরা, সেটা সবগুলো ডকের পিছনদিক জুড়ে বিস্তৃত। ডান দিকে ঘুরল ওরা, হয় ও সাত নম্বর ডককে পাশ কাটল, একটা লম্বা র‍্যাম্প বেয়ে ওপরে উঠছে। র‍্যাম্পটা ধনুকের মত বাঁকা হয়ে বাঁ দিকে চলে গেছে। এই পথ ধরে দুটো আপার গ্যালারির প্রথমটায় চলে এল ওরা। এখানে রয়েছে কয়েক শো লোকের স্লীপিং কোয়ার্টার ও রেস্টরুম। বিলিয়ার্ড, ক্যারাম, পিং পং ইত্যাদি ইনডোর গেম খেলার জন্যে আলাদা আলাদা কামরা। কিচেন আর টয়লেটও আছে। গোটা জায়গাটা শীতাতপ নিয়ন্ত্রিত, কোথাও এতটুকু স্যাঁতসেঁতে ভাব নেই।

সাবমেরিনের প্রত্যেক জুকে একটা করে কিউবিকল বরাদ্দ করা হলো, তাতে একটা করে ক্যাম্প বেড। রানা আর হাদীকে একজন পাহারাদারের দায়িত্বে ছেড়ে দেয়া হলো। গার্ড ওদেরকে আপার লেভেল গ্যালারিতে নিয়ে এল, গার্ডরুমে ঢুকিয়ে পরিচয় করিয়ে দিল সিভিল ড্রেস পরা খর্বকায় এক লোকের সঙ্গে। টেবিলের ওপর রাখা অ্যাশট্রেটা ভরে আছে, লোকটার ঠোটেও সিগারেট বুলছে। মাথাটা প্রায় চৌকো, মুখের তুলনায় চোয়াল বড়, চোখ দুটো পরস্পরের খুব কাছাকাছি। ওদের সঙ্গে ভালই ব্যবহার করল সে, কিন্তু রানার মস্তিষ্কে বিপদ সঙ্কেত বেজে উঠেছে। ওর সন্দেহ হলো, লোকটা ইসরায়েলি ইন্টেলিজেন্স মোসাড-এর এজেন্ট। পরে জানা যাবে সন্দেহটা সত্যি কি না। আসলে ইসরায়েলি কর্তৃপক্ষ এমন কি নিজেদের লোককেও বিশ্বাস করে না, এই গোপন সাবমেরিন ঘাঁটিতে কমপক্ষে চারজন মোসাড এজেন্ট কাজ করছে।

রানা জানে না, এই চারজন মোসাড এজেন্ট ছাড়াও প্রতিটি সাবমেরিনে

মোসাডের একজন করে বেতনভুক ইনফর্মার আছে।

মোসাডের চারজন এজেন্টের কাজ হলো ঘাঁটিতে বন্দীদের আনা হলে তাদেরকে ইন্টারোগেট করা। কিন্তু নিজেদের কাজের পরিধি স্বেচ্ছায় বাড়িয়ে নিয়েছে তারা। প্রত্যেকে পালা করে আট ঘন্টা ডিউটি দেয়, গোটা ঘাঁটি ঘুরেফিরে দেখে আসে। এদের ক্ষমতা প্রায় অসীম, এমন কি কমোডরের নির্দেশও অনেক সময় মেনে চলতে চায় না।

রানার ভয় হলো, ও যে বিসআই এজেন্ট, সেটা না ওরা জেনে ফেলে। ধরা পড়লে টরচার করা হবে, তবে তা নিয়ে এখনি আতঙ্কিত না হলেও চলে। আর মেরে ফেললে তো সব চুকেই গেল। বন্দী হয়েছে, কিন্তু তবু হাল ছাড়তে রাজি নয় ও। আর শুধু নিজেদের মুক্ত করার কথাও ভাবছে না। ওর উদ্বেগ ব্রিটিশ, মার্কিন আর জাতিসংঘের জাহাজ তিনটেকে নিয়ে—বিশেষ করে জাতিসংঘের যে জাহাজটায় বাংলাদেশী সৈন্যরা আছে, সেটাকে নিয়ে। এতগুলো নিরপরাধ মানুষকে ইসরায়েলিরা মেরে ফেলবে, প্রাণ থাকতে সেটা ঘটতে দেবে না রানা। কতটুকু কি করতে পারবে এখনও কোন ধারণা নেই, তবে চোখ-কান খোলা রেখে সতর্ক থাকবে ও। চেষ্টা থাকলে উপায় একটা হয়ই।

শুধু যে বাংলাদেশী বা অন্য জাহাজগুলোর বাকি সব সৈন্যদের কথা ভেবে বিচলিত বোধ করছে রানা, তা নয়। ইসরায়েলিরা জাহাজ তিনটে ডুবিয়ে দিতে পারলে তার প্রতিক্রিয়া কি হতে পারে ভেবেও আতঙ্ক বোধ করছে। জাহাজ ডুবিয়ে দেয়ার পর ইসরায়েলিরা নিজেদের পরিচয় গোপন রাখতে সফল হলে আমেরিকা ইরাককে দায়ী না-ও করতে পারে, কারণ ইরাকের সীমান্তে কোন সাগর নেই, কাজেই তার সাবমেরিন না থাকারই কথা। ঘাঁটিটা লেবাননে, লেবাননকে গোপনে রাশিয়া সাবমেরিন সাপ্লাই দিয়েছে বলে অভিযোগ উঠতে পারে। ইসরায়েলের আরেক পাশে মিশর, মিশরের বিশাল সমুদ্রসীমা আছে, মিশরও রাশিয়া থেকে সাবমেরিন কেনে, তাদেরকেও দায়ী করা হতে পারে। এমন কি ইরাক আক্রমণে রাশিয়া সাই না থাকায় আমেরিকা রাশিয়াকেও সরাসরি অভিযুক্ত করতে পারে। অভিযোগ, পাল্টা অভিযোগ ইত্যাদির মধ্যে পরিস্থিতি কোনদিকে মোড় নেবে কেউ বলতে পারে না। আমেরিকা লেবাননে বোমা ফেলতে পারে। একানব্বুই সালে ইরাক গুরুতর অন্যায় করার পরও আটানব্বুই সালে তার প্রতি আরব বিশ্বের সহানুভূতি কম নয়—নির্দোষ লেবাননের ওপর বোমা ফেলা হলে আমেরিকার ওপর শুধু আরব বিশ্ব নয়, বিশ্বের আরও বহু দেশ খেপে যাবে। গুরু হবে মেরুকরণ। তৈরি হয়ে যাবে তৃতীয় বিশ্বযুদ্ধ বাধার পরিবেশ। অর্থাৎ গোটা পৃথিবীর অস্তিত্বই পড়ে যাবে গুরুতর হুমকির মুখে।

কাজেই, কিছু একটা করতেই হবে রানাকে।

একটা কথা ভেবে মনে মনে খানিকটা স্বস্তিবোধ করল ও। হাদী ওর আসল পরিচয় সম্পর্কে কিছুই জানে না। ওর মত হাদীকেও ইন্টারোগেট করা

হবে, তবে কিছু ফাঁস হয়ে যাবার ভয় নেই।

কিন্তু না, ওদেরকে তেমন কিছু জিজ্ঞেস করা হলো না। প্রশ্নগুলো সবই ক্লটিন। আবার ওদেরকে ডক-লেভেল গ্যালারিতে ফিরিয়ে আনা হলো। ছয় নম্বর ডকের উল্টোদিকে পৌছে বাক ঘুরল ওরা, এখানে পাথর কেটে বেশ কয়েকটা ছোট গুহা তৈরি করা হয়েছে, প্রতিটির মুখে ইস্পাতের গ্রিল। তারই একটায় ওদেরকে ঢুকিয়ে দেয়া হলো। ঘুমের চেয়েও জরুরী প্রয়োজনে কষ্ট পাচ্ছে রানা, কিন্তু ঘুরে কিছু ব্যাখ্যা করার আগেই বাইরে থেকে গ্রিলের গোট বন্ধ হয়ে গেল, তালা লাগিয়ে চলে গেল গার্ড।

সেলে ফার্নিচার বলতে দুটো ক্যাম্প বেড, পায়ের দিকে তিনটে কম্বল পড়ে আছে। রানা ভাবল, কে জানে কম্বলগুলো কতদিন ধরে এখানে আছে। ভাবনাটা এল সেলের ভেজা পাথুরে দেয়াল চকচক করছে দেখে, আর খুব ঠাণ্ডা লাগায়। বাইরে, গ্যালারিতে, নল ইলেকট্রিক বালবটা কেউ নেভাল না। এই আন্ডারগ্রাউন্ড সাবমেরিন বেসে বাতাসের নড়াচড়া প্রায় অসম্ভব বলে মনে হলেও, ডকগুলোর ওদিক থেকে কিভাবে বা কোথেকে যেন হিম বাতাস আসছে, সাবমেরিনগুলো যেখানে বাঁধা রয়েছে। ছয় নম্বর ডকে পৌছানোর ঢালু টানেলটা সেলের কোণ থেকে কোন রকমে দেখা যায়।

রাতে ঘুম খুব কমই হলো রানার। কম্বলের তলায় ওরা সম্ভবত পাঁচটা বাজার পর ঢুকল। এমনিতে অচেনা জায়গা, তার ওপর কনকনে ঠাণ্ডা আর নল বালবের সরাসরি অত্যাচার জাগিয়ে রাখল ওকে। তারপরও অবশ্য ঘুম এল চোখে, কিন্তু মনে হলো প্রায় সঙ্গে সঙ্গে ইলেকট্রিক ওয়েল্ডিং মেশিনের কর্কশ শব্দ আর কর্মব্যস্ত লোকজনের হৈ-চৈ নিদ্রাদেবীর কোল থেকে টেনে তুলে আনল ওকে। লোকজন লোহা ও ইস্পাতে হাতুড়ি পেটাচ্ছে, প্রতিটি শব্দ গুহা আর গ্যালারিতে বাড়ি খেয়ে প্রতিধ্বনি তুলছে, ধ্বনির চেয়ে প্রতিধ্বনি শতগুণ বেশি শব্দ করছে। নানা ধরনের আওয়াজ এমনভাবে পরস্পরের সঙ্গে জড়িয়ে যাচ্ছে, ওয়েল্ডিং মেশিনের আওয়াজটা ছাড়া আর কোনটা রানা চিনতে পারল না।

হাতবুড়ি দেখল। সাড়ে ন'টা বাজে। বেডের নিচে পা দুটো ঝুলে থাকলেও, নাক ডেকে অঘোরে ঘুমাচ্ছে হাদী। এত সব কর্কশ শব্দের মধ্যেও তার নাক ডাকার আওয়াজটা অস্পষ্টভাবে শুনতে পাচ্ছে ও। শীত এত বেশি, যেন হাড়ে কামড় বসাচ্ছে, তারপরও আধো ঘুমে বিছানায় পড়ে থাকল। কম্বলগুলো ছেঁড়া, তবু গা থেকে ওটা ফেলে বিছানা ছাড়তে ইচ্ছে করছে না।

ঠিক দশটার সময় তিনজন লোক এল। একজন পেটি অফিসার, দু'জন রেটিং। প্রত্যেকের কাঁধের সঙ্গে ঝুলছে কারবাইন, অটোমেটিক রাইফেল, হাতে একটা করে রিভলবার। ওদেরকে ওয়াশরুমে নিয়ে আসা হলো। মুখ-হাত ধোয়ার সুযোগ দেয়া হলেও, দাড়ি কামাবার সরঞ্জাম দেয়া হলো না। আয়নায় নিজের চেহারা দেখে চমকে উঠল রানা, নিজেকে যেন চিনতেই

পারছে না। মুখে খোঁচা খোঁচা দাড়ি গজিয়েছে। চোখ দুটো সামান্য গর্তে ঢোকা, কিনারায় লালচে ভাব।

রানা আয়নার দিকে তাকিয়ে আছে দেখে দীর্ঘশ্বাস ফেলল হাদী, বলল, 'স্যার, আপনাকে নিয়েই আমার চিন্তা। আরামের শরীর, এত ধকল আপনি সহিবেন কিভাবে।'

'সত্যি যদি আমাকে নিয়ে চিন্তিত হও,' বলল রানা, 'তাহলে মোসাড এজেন্টদের সঙ্গে ভুলেও লাগতে যেয়ো না। তাহলে একা শুধু নিজের নয়, আমারও মস্ত উপকার করা হবে।'

মাথা চুলকে বাধ্য ছেলের মত হাদী বলল, 'আমি একটু বদরাগী, তবু আপনার কথা আমার মনে থাকবে, স্যার।'

টয়লেট ব্যবহার করার পর আবার ওদেরকে গার্ড-রুমে নিয়ে আসা হলো। আজ এখানে ওদের সঙ্গে অন্য একজন মোসাড এজেন্টের পরিচয় করিয়ে দেয়া হলো। এই লোকটা তালগাছের মত লম্বা, সরু মুখ, চোখে অন্তর্ভেদী দৃষ্টি। তাকে দেখে আরও বেশি সতর্ক হবার প্রয়োজনীয়তা অনুভব করল রানা। কোন কথা না বললেও, ওকে সে অনেকক্ষণ ধরে দেখল। কিছু সন্দেহ করেছে কিনা বোঝা গেল না, শুধু মুচকি একটু হাসল। ডেস্ক থেকে সবুজ একটা ফর্ম তুলল সে, চোখ বুলাল সেটায়, তারপর ওদেরকে নিয়ে সরু একটা গ্যালারি হয়ে বেস কমান্ড্যান্ট-এর অফিসে চলে এল। কমান্ড্যান্ট হলেন কমোডর আয়ান পেরেজ। শক্ত-সমর্থ কাঠামো, চূলে পাক ধরেছে। ভদ্রলোককে দেখে রানার অপছন্দ হলো না, চেহারাও ও কথাবাতীয়া মার্জিত একটা ভাব স্পষ্ট।

দরজার কাছে গার্ডদের মাঝখানে দাঁড়িয়ে থাকল ওরা দু'জন, মোসাড এজেন্ট কমোডরের সঙ্গে নিচু গলায় কথা বলছে। এক সময় কমোডোর ওদেরকে ডেস্কের সামনে আসার নির্দেশ দিলেন। তারপর হাদীকে আরবীতে জিজ্ঞেস করলেন, 'তুমি তাকরির উপকূল খুব ভালভাবে চেনো, কথাটা কি সত্যি?'

উত্তরে কথা না বলে মাথা ঝাঁকাল হাদী।

'আমাদের কাছে সমস্ত কোস্টাল ইনফরমেশন সহ চার্ট আছে,' বললেন কমোডর। 'তবে তীর বা সৈকতের কাছাকাছি রক ফরমেশন আর কারেন্ট সম্পর্কে সমস্ত তথ্য নেই। এগুলো আমাদের দরকার। দেবে-তো?'

ধীরে ধীরে মাথা নাড়ল হাদী। চেহারাও এমন বিশ্বল ভাব, যেন একটা কুকুরকে প্রাণ্য হাড় দেয়া থেকে বঞ্চিত করা হয়েছে। 'আমি জানি না,' বলল সে।

'জানো না?' সামনে, ডেস্কে পড়ে থাকা ফর্মটার দিকে আরেকবার তাকালেন কমোডর, তারপর মুখ তুলে হাদীর দিকে। 'তুমি তো একজন জেলে, তাই না? তাকরির উপকূলে মাছ ধরো, ঠিক?'

হাদীকে এখনও বিশ্বল দেখাচ্ছে। 'ঠিক,' ইতস্তত করে বলল সে।

‘বোধহয়... ঠিক জানি না।’

হাদীর দিকে তাকাল রানা, বুঝতে পারছে না হঠাৎ কি হলো তার। প্রথমে ভাবল, নিশ্চয়ই কোন খেলা খেলছে সে। কিন্তু আচরণ বলে না যে অভিনয় করছে। একটা হাত মাথায়, ধীরে ধীরে চাপড় দিচ্ছে; আরেকটা হাত দিয়ে চোখ দুটো ডলছে, যেন এইমাত্র ঘুম থেকে জাগল।

কমোডর তীক্ষ্ণদৃষ্টিতে তাকিয়ে আছেন। ‘তুমি এখানে বন্দী। এটা বোঝো তো?’

মাথা ঝাঁকাল হাদী, ‘জী, হজুর।’

‘বন্দী হিসেবে আমার সব প্রশ্নের উত্তর দিতে বাধ্য তুমি,’ কমোডর এমন নরম সুরে কথাটা বলছেন, হাদী যেন একটা শিশু।

‘জী, হজুর।’

‘তাহলে এদিকে এসো,’ বলে হাদীকে নিয়ে একটা কেবিনেট-এর সামনে চলে এলেন কমোডর। কেবিনেটের মাথা কাঁচ দিয়ে ঢাকা, ভেতরে একটা চার্ট। চার্টটা রয়েছে খোলা একটা ফাইলে, পাতা ওলটাতেই আরেকটা চার্ট দেখা গেল, এটা তাকরির উপকূলের। ‘এখানে কায়দা খাঁড়ি,’ বললেন তিনি, ম্যাপের ওপর আঙুল রেখে। ‘এখন বলো, পানিতে ডোবা সব পাথরই কি চার্ট করা আছে?’

হাদী জবাব দিল না, কেমন যেন দিশেহারা দেখাচ্ছে তাকে।

‘আমার কথার জবাব দিচ্ছ না কেন? পাথরগুলো চার্ট করা আছে, নাকি নেই?’ কমোডর অধৈর্য হয়ে উঠছেন।

‘থাকতে পারে,’ বিড়বিড় করল হাদী, ‘আবার না-ও থাকতে পারে।’

‘এই ব্যাটা জাউলা, কমোডরের প্রশ্নের জবাব দে। হেঁয়ালি করলে মেরে তক্তা বানিয়ে ফেলব,’ মোসাড এজেন্ট বলল, হাদীর পিছনে এসে দাঁড়িয়েছে। গলার আওয়াজটা অত্যন্ত কর্কশ।

সম্ভ্রান্ত একটা ভাব ফুটে উঠল হাদীর চেহারা, কোণঠাসা পশুর মত দেখাচ্ছে তাকে। পিছন দিকে তাকিয়ে বলল, ‘আমার কিছু মনে পড়ছে না।’ চেহারা দেখে মনে হলো কেঁদে ফেলবে।

‘মনে পড়ছে না মানে?’ দাঁতে দাঁত চাপল মোসাড এজেন্ট।

‘বলতে পারছি না। মনে আসছে না।’ হঠাৎ ঘুরে অন্ধের মত দরজার দিকে টলতে টলতে এগোল হাদী, যেন একটা শিশু আতঙ্কে ভুগছে। ফোঁপাচ্ছে সে, চোখ বেয়ে পানি গড়াচ্ছে, পাশ কাটাবার সময় রানাকে যেন চিনতেই পারল না।

বয়স্ক একজন মানুষকে কাঁদতে দেখা খুবই দুঃখজনক ও বিব্রতকর। কিন্তু হাদীর কান্না এতটাই অবিশ্বাস্য যে স্তম্ভিত হয়ে গেল রানা।

গার্ডরা ছুটে এসে ধরে ফেলল তাকে, টলতে টলতে এক পাক ঘুরল সে। তারপর স্থির হয়ে দাঁড়িয়ে পড়ল, মুখ ঢাকল দু’হাতে। তবে ধীরে ধীরে ফোঁপানোর আওয়াজটা কমে এল।

রানা দেখল কমোডর ও মোসাড এজেন্ট, দু'জনেই হতভম্ব হয়ে পড়েছে। হবারই কথা। ও নিজেও কম বিস্মিত হয়নি। নিচু গলায় নিজেদের মধ্যে কিছুক্ষণ আলাপ করল ওরা, তারপর কমোডর হাদীর দিকে ফিরে বললেন, 'এদিকে এসো।'

কমোডর ডেস্কের পিছনে নিজের চেয়ারে বসলেন। তাঁর সামনে এসে দাঁড়াল হাদী। 'বুঝি, সাবমেরিনে সময়টা তোমার ভাল কাটেনি,' নরম সুরে বললেন কমোডর। 'সেজন্যে সত্যি আমি দুঃখিত। তবে এই তথ্যটা আমার খুব জরুরী দরকার। হয় তুমি তাড়াতাড়ি নিজেকে নিয়ন্ত্রণে আনো, তা না হলে তথ্যগুলো আমরা তোমার কাছ থেকে জোর করে আদায় করব। এইমাত্র তাকরির উপকূলের চার্ট দেখানো হয়েছে তোমাকে। ওটার মধ্যে কায়দা খাঁড়িও আছে। আমি জানতে চাইছি আমাদের এই চার্ট নিখুঁত কিনা।'

জবাবে ডেস্কের ওপর প্রচণ্ড এক ঘুসি মারল হাদী। 'আমাকে কোন প্রশ্ন করবেন না!' হিংস্র বাঘের মত গর্জে উঠল সে, সেটা শুধু রোমহর্ষকই নয়, হাদীর গলা বলে চেনাও গেল না। 'আপনারা বুঝতে পারছেন না? আমার কিছু মনে পড়ছে না। মনটা ফাঁকা হয়ে গেছে। আমার কান্না পাচ্ছে।'

কমোডর আর মোসাড এজেন্টের দিকে তাকিয়ে রানার মনে হলো, এরকম বিস্মিত লোক আগে কখনও দেখেনি সে। এতক্ষণ তারা বোধহয় ভাবছিল হাদী কৌতুক করছে বা কোন খেলা খেলছে।

করুণ দৃষ্টিতে হাদীও তাদের দিকে তাকিয়ে আছে। সে যেন আহত বা অবলা একটা পশু। 'দুঃখিত,' বিড়বিড় করল সে। 'আপনাদের আমি ভয় পাইয়ে দিয়েছি। কিন্তু তা আমি চাইনি। সমস্যাটা হলো...এই যে...এই যে, আমি কিছু মনে করতে পারছি না। সত্যি আমার খুব ভয় লাগছে।' হাত তুলে নিজের মাথাটা চেপে ধরল সে।

রানার দিকে তাকালেন কমোডর। 'আপনার বন্ধুর কি হয়েছে?' জানতে চাইলেন তিনি।

রানাকে স্বীকার করতে হলো, ও কিছু জানে না। 'সাবমেরিনে তো সুস্থই ছিল,' বলল ও। 'তবে কাল রাতে ওকে খুব মনমরা দেখেছি।' তারপর হঠাৎ কথাটা মনে পড়ে গেল। 'আমরা যখন বন্দী হই, ওর মাথায় রিভলবারের ব্যারেল দিয়ে বাড়ি মারা হয়েছিল। তাতে কোন ক্ষতি হয়ে থাকতে পারে। পরে, সাবমেরিনে, দু'একবার উত্তেজিত হয়ে উঠেছিল ও।'

তথ্যগুলো নিয়ে কিছুক্ষণ চিন্তা করলেন কমোডর। তারপর একজন গার্ডকে নির্দেশ দিয়ে বললেন, 'যাও, ওদের সাবমেরিনে কমান্ডার আর ডাক্তারকে ডেকে আনো।'

ডাক্তারই আগে পৌঁছল। হাদীর মাথার ক্ষতটা পরীক্ষা করে রিপোর্ট দিল, খুলির চামড়া কেটে ও ফুলে গেলেও, কোথাও ফাটেনি। মাথায় জোরাল আঘাতজনিত কারণে হাদী স্মৃতিভ্রংশে ভুগছে কিনা, এ-ব্যাপারে কিছু বলতে

অক্ষমতা প্রকাশ করল। কমোডর একই প্রশ্ন বারবার করায় অবশেষে সে বলল, 'সম্ভাবনা কম, তবে নিশ্চিতভাবে সত্যি কিছু বলা সম্ভব নয়।'

তারপর এল সাবমেরিন কমান্ডার। রিভলবারের ব্যারেল দিয়ে হাদীর মাথায় আঘাত করা হয়েছিল, ঘটনাটা স্বীকার করল সে। তারপর, সাবমেরিনে, হাদীকে স্বাভাবিক আচরণ করতে দেখা গেলোও, মাঝে-মাঝে তাকে বিষণ্ণ ও অন্যমনস্ক দেখা গেছে। দু'একবার বেসামাল হতেও দেখা গেছে। উদাহরণ হিসেবে বলল, সাবমেরিনের অস্তিত্ব রক্ষার প্রয়োজনে তার কাছ থেকে কিছু তথ্য চাওয়া হয়েছিল, উত্তরে গলা ছেড়ে হেসে উঠেছিল হাদী। তবে হাদী যে তাকে ঘুসি মেরে ফেলে দিয়েছিল, এই কথাটা চেপে গেল সে।

'ওদেরকে সেলে ফিরিয়ে নিয়ে যাও,' গার্ডদের নির্দেশ দিলেন কমোডর। অফিস থেকে বেরিয়ে আসছে ওরা, রানা শুনতে পেল কমোডর ডাক্তারকে নির্দেশ দিচ্ছেন, সে যেন হাদীর ওপর নজর রাখে।

সেলে ফিরে হাদীকে রানা বলল, 'ভাল অভিনয় করছ। তোমার প্রশংসা করতে হয়।'

রানার দিকে তাকাল হাদী। চোখে বিহ্বল দৃষ্টি।

'তোমার খেলাটা আসলে কি, বলবে আমাকে?'

'স্যার, আপনিও! আপনিও আমার কথা বিশ্বাস করছেন না?'

'হাদী, এটা তোমার উচিত হচ্ছে না। আমাকে তুমি সব কথা বলতে পারো।'

'স্যার, আপনার মাথা যদি পুরোপুরি ফাঁকা হয়ে যায়, কিছুই যদি মনে করতে না পারেন, আর তখন যদি কেউ বলে আপনি কোন খেলা খেলছেন, আপনার কেমন লাগবে?'

রানার তবু বিশ্বাস হলো না যে হাদীর স্মৃতিশক্তি নষ্ট হয়ে গেছে। 'আজ সকালে তো ভালই ছিলে তুমি।'

'তা হয়তো ছিলাম,' বলে নিজের বিছানায় শুয়ে পড়ল হাদী। 'কমোডর আমাকে প্রশ্ন করার পর বুঝতে পারলাম কি ঘটে গেছে।'

ব্যাপারটাকে রানা সিরিয়াস হিসেবে নিল আরও অনেক পরে, হাদী যখন দুপুরের খাওয়া আর বিকেলের চা-নাস্তা খেতে অস্বীকার করল। সারাটা দিনই বিছানায় পড়ে থাকল সে। বেশিরভাগ সময় মাথাটাকে ঢেকে রাখল দুই হাত দিয়ে। মাঝে মধ্যে গোঙাল, যেন স্মৃতি ফিরে পাবার চেষ্টায় ক্লান্ত হয়ে পড়েছে। দুই কি তিনবার উন্মত্ত আক্রোশে বালিশে ঘন-ঘন ঘুসি মারল।

রাতের খাবার দেয়া হলো। কিন্তু হাদী খাবে না। তার প্লেটটা গার্ডকে রেখে যেতে বলল বানা। হাদীর গায়ে-মাথায় হাত বুলিয়ে নিজের হাতে অল্প-অল্প করে খাওয়াতে চেষ্টা করল ও, এ যেন অসুস্থ কোন শিশুকে খাওয়াতে হচ্ছে। এক সময় প্লেটগুলো ফেরত নিতে এল গার্ড, রানা তাকে জিজ্ঞেস করল, 'ডাক্তারকে একটা খবর দেয়া যায় কি?'

রানা এবার সত্যি ভয় পেয়ে গেছে। এত কষ্ট করে খাওয়া হাদীকে, অথচ গলায় আঙুল দিয়ে সব বমি করে ফেলে দিয়েছে।

ডাক্তার এল আধ ঘণ্টা পর। উপুড় হয়ে নিজের বিছানায় শুয়ে রয়েছে হাদী। তবে ঘুমিয়ে পড়েনি। কি কি ঘটেছে ব্যাখ্যা করল রানা। ডাক্তার হাদীকে জিজ্ঞেস করল, 'বমি করলে কেন?'

'বমি পাচ্ছিল, তাই গলায় আঙুল দিতে বাধ্য হয়েছি,' বলল হাদী।

'এখন তোমার কেমন লাগছে?'

'কিছু ভাল লাগছে না।'

'সারাদিন তো কিছু খাওনি, খিদে পাচ্ছে না?'

'প্রচণ্ড খিদে পাচ্ছে, কিন্তু রুচি নেই। তাছাড়া, মনে হচ্ছে পেটে কিছু দিলেই সব আবার বেরিয়ে আসবে।'

রানার উদ্বেগ লক্ষ করে ডাক্তার কিছু গলায় আশ্বাস দিল, 'ভয় পাবার কিছু নেই।' তারপর ব্যাখ্যা করল, 'স্মৃতিশক্তি হারিয়ে ফেললে মানুষ ভয় পায়, তখন খিদে নষ্ট হওয়া বা বমি পাওয়াটা অস্বাভাবিক নয়। তাছাড়া, ভয় পাবার আরও তো কারণ আছে, তাই না? এখানে সে বন্দী। মৃত্যুভয়েও তো ভুগছে। সেজন্যেই সে কি ছিল বা কি করেছে, কিছুই মনে করতে পারছে না। ব্যাপারটা সত্যি দুঃখজনক। একমাত্র আপনিই ওকে সাহায্য করতে পারেন। ওকে অভয় দিন, সান্ত্বনা দিন। বাড়ির গল্প শোনান, ওর বন্ধুদের কথা, স্ত্রী আর বাচ্চাকাচ্চার কথা বলুন। বলা যায় না, এভাবে চেষ্টা করলে আবার হয়তো সব মনে পড়বে।'

একজোড়া স্লীপিং ট্যাবলেট দিয়ে চলে গেল ডাক্তার। ভদ্রলোক অত্যন্ত সদয়, রানা তাকে ধন্যবাদ জানাতে ভুল করেনি। সেলের গেট বন্ধ হতে হাদীর মেস জ্যাকেটের পকেট থেকে সিগারেটের প্যাকেট বের করল ও, বলল, 'ধরাও, ভাল লাগবে।'

সম্ভবত ডাক্তারের নির্দেশেই ধূমায়িত দু'কাপ কোকো দিয়ে গেল একজন মেইল নার্স, ঘাণটা ভারি চমৎকার। সে যখন ওদের দুই বিছানার মাঝখানের মেঝেতে ওগুলো রাখছে, বাইরে লাফ দিয়ে সিধে হলো সশস্ত্র গার্ড। লম্বা ও একহারা এক লোককে ওদের সেলের দিকে হেঁটে আসতে দেখা গেল। বেশ স্মার্ট মনে হলো, তবে চেহারায় রাগ-রাগ ভাব। 'এসব কি?' কর্কশ সুরে জানতে চাইল সে, আঙুল তুলে কাপ দুটো দেখাল।

পুরুষ নার্স ব্যাখ্যা করল, ডাক্তারের নির্দেশ। লোকটা তাকে বিদায় করে দিয়ে রানা ও হাদীকে হুকুম করল, 'স্ট্যান্ড আপ!'

রানা বিছানা ছেড়ে দাঁড়াল। কিন্তু হাদী শুয়েই থাকল, একচুল নড়ল না। 'শুনতে পাওনি? আমি না তোমাকে দাঁড়াতে বললাম?' আরবীতে গর্জে উঠল লোকটা। তার চেহারায় অকারণ আক্রোশ লক্ষ করে হাদীর কথা ভেবে শঙ্কিত হয়ে উঠল রানা।

হাদী তবু বিছানা ছাড়ছে না দেখে গার্ডের হাত থেকে বেয়োনেটটা নিয়ে

এগিয়ে এল লোকটা, ইচ্ছে করেই দুই বিছানার মাঝখানে রাখা ট্রে-র ওপর পা রাখল, তারপর বেয়োনেটের তীক্ষ্ণ ডগা দিয়ে খোঁচা মারল হাদীর নিতম্বে। লোকটার চোখের দিকে তাকিয়ে থাকায় সেখানে বিকৃত একটা আনন্দের ঝিলিক দেখতে পেল রানা।

ব্যথায় চৈঁচিয়ে উঠল হাদী, লাফ দিয়ে বিছানা থেকে নেমে পড়ল। রানার ভয় হলো, লোকটাকে না মেরে বসে সে। লোকটার দিকে তাকাল, দেখল সে-ও তাই আশা করছে, তাহলে আচ্ছামত টরচার করার একটা সুযোগ পেয়ে যাবে। কিন্তু হাদী কিছুই করল না, অভিমানী চেহারা নিয়ে তাকিয়ে থাকল শুধু। ‘আচ্ছা, তুমি তাহলে স্মৃতিশক্তি হারিয়ে ফেলেছ?’ খেঁকিয়ে উঠল লোকটা।

হাদী কিছু বলছে না।

‘তাহলে দেখতে হয় কিভাবে তোমার স্মৃতি ফিরিয়ে আনা যায়,’ বলল লোকটা। ‘এ-ব্যাপারে আমি একজন বিশেষজ্ঞ। কাল থেকে তুমি কাজে যাবে—তোমরা দু’জনেই।’ তারপর হাদীর প্রকাণ্ড শরীরটা খুঁটিয়ে দেখল সে। ‘তুমি তো একটা হাতি, একাই দশজনের খাবার খেয়ে ফেলবে, কাজেই কাজও করতে হবে দশজনের সমান।’

রানা বলল, ‘ও অসুস্থ।’

ঝট করে রানার দিকে ফিরল লোকটা। ‘প্রশ্ন না করলে কথা বলা নিষেধ।’ তার পিছু নিয়ে আরেকজন এসেছে, দাঁড়িয়ে আছে সেলের বাইরে। এই মোসাড এজেন্টই আজ সকালে ওদেরকে কমোডরের অফিসে নিয়ে গিয়েছিল। তাকে হিরুতে বলল, ‘কাল তুমি ওদেরকে ইউথারটিনাইনের খোলে কাজ দেবে।’ সেল থেকে বেরিয়ে যাচ্ছিল, কি মনে করে ফিরে এসে রানার সামনে দাঁড়াল। ‘নিজের যদি ভাল চাও, তোমার বন্ধুর স্মৃতি ফিরিয়ে এনে সাহায্য করো। তা না হলে এমন ব্যবস্থা করব, তুমিও কিছু মনে করতে পারবে না।’

রানা কিছু বলল না, আড়চোখে একবার শুধু ট্রে ওপর উল্টে পড়া কাপ দুটোর দিকে তাকাল। গিল লাগানো গেট ককশ আওয়াজ তুলে বন্ধ হয়ে গেল।

‘উনি কে?’ চেহারায় বোকা বোকা ভাব, জিজ্ঞেস করল হাদী।

রানা তাকে চেনে, বিসিআই হেডকোয়ার্টারের কমপিউটারে তার ফাইল ও ছবি আছে, তবে হাদীর প্রশ্নের উত্তর শুধু এইটুকু বলল, ‘সম্ভবত মোসাডের সিনিয়র কোন অফিসার, এখানকার বেসে ডিউটি দিচ্ছে।’

‘মোসাড কি?’ জিজ্ঞেস করল হাদী।

রানা বিস্মিত। ‘আজ সকালেও তুমি জানতে মোসাড মানে ইসরায়েলি ইন্টেলিজেন্স।’ তবে স্মৃতি হারিয়ে ফেললে মানুষের মস্তিষ্কে তার কি প্রভাব পড়বে, বলা কঠিন। ‘বাদ দাও। ডাক্তার যে ঘুমের ট্যাবলেট দুটো দিয়েছেন, ওগুলো তোমাকে স্মৃতি ফিরে পেতে সাহায্য করবে। মোসাড নিয়ে তোমাকে

কিছু চিন্তা করতে হবে না।' হাদীকে ধরে এনে বিছানায় শুইয়ে দিল ও, তারপর আধ ভাঙা একটা কাপের তলায় পাওয়া সামান্য একটু কোকোর সঙ্গে ট্যাবলেট দুটো গুঁড়ো করে মিশিয়ে খাইয়ে দিল। কোন প্রশ্ন বা আপত্তি না করেই খেলো হাদী। 'ডাক্তার আমাদেরকে আরও একটা জিনিস দিয়ে গেছেন,' বলল রানা, 'যদিও কথাটা সত্যি নয়। হাদীর পকেট থেকে পাওয়া সিগারেটের প্যাকেটটাই দেখাল ও, একটা সিগারেট বের করে গুঁজেও দিল ঠোটে। নতুন খেলনা পেয়ে একটা বাচ্চা ছেলে যেমন খুশি হয়ে ওঠে, হাদীও সেরকম খুশি হয়ে উঠল।

কিন্তু তারপর দেখা গেল দেশলাই নেই। ওদের কাপড়চোপড় গার্ডরা আগেই নিয়ে গেছে, বদলে পরতে দিয়েছে প্রায় অ্যাপ্রনের মত দেখতে লম্বা ফতুয়া, সঙ্গে নীল ট্রাউজার। গ্রিলের কাছে গার্ডের দৃষ্টি আকর্ষণ করল রানা, ইঙ্গিতে দেশলাই চাইল। দু'জন পাহারায় রয়েছে, দু'জনেই একযোগে মাথা নাড়ল। একজন আরবীতে বলল, 'সিগারেট খাওয়া নিষেধ।'

মাথা ঝাঁকাল রানা, তারপর হাদীকে দেখিয়ে বলল, 'কিন্তু, আমার সঙ্গী অসুস্থ। সিগারেট খেলে উপকার হবে।'

গ্যালারির এদিক ওদিক তাকিয়ে কেউ আছে কিনা দেখে নিল একজন গার্ড, তারপর পকেট থেকে একটা দেশলাই বের করে লোহার বারের ফাঁকে গুঁজে দিল।

নিজেদের সিগারেট ধরিয়ে দেশলাইটা ফেরত দেয়ার সময় রানা গার্ডকে জিজ্ঞেস করল, 'অফিসার লোক কেমন?'

'মি. হেবা দাহির? জানি না, জিজ্ঞেস করবে না,' বলে দূরে সরে গেল সে, অফিসার প্রসঙ্গে কোন আলাপ করতে চায় না।

নিজের বিছানায় বসল রানা, সিগারেটে টান দেয়ার ফাঁকে দেয়ালের সরু ফাটল চুইয়ে বেরিয়ে আসা পানি দেখছে।

নটার সময় গার্ডদের পালা বদল হলো। ইতিমধ্যে হাদী ঘুমিয়ে পড়েছে। ওর গায়ে কম্বল চাপিয়ে দিল রানা, নিজের বিছানায় ফিরে এসে শুয়ে পড়ল। আলোটা অসহ্য লাগায় কম্বল দিয়ে মুখটা ঢেকে ফেলল। তবে ঘুম এল আরও অনেক পরে। কম্বলটা কর্কশ, কেমন একটা গন্ধও আছে। শুয়ে শুয়ে ওপরের গ্যালারি থেকে ভেসে আসা পায়ের আওয়াজ শুনছে। সমস্ত ধ্বনি ও প্রতিধ্বনি ভোঁতা আর ফাঁপা লাগছে কানে, জেনারেটরের শব্দটাই শুধু স্পষ্ট চিনতে পারা যাচ্ছে। রানা ভাবছে; রানা এজেন্সির বৈরত শাখার সঙ্গে প্রতিদিন টেলিফোনে রুটিন যোগাযোগ রাখছিল ও, আজ সারাদিনে ওর ফোন না পেয়ে শাখা অফিসের লোকজন উদ্বিগ্ন হয়ে উঠবে। আরও হয়তো একটা দিন অপেক্ষা করবে ওরা, তারপর কি ঘটেছে জানার জন্যে তাকরিরে কাউকে পাঠাবে। বৈরত শাখা প্রধান হিসেবে কাজ করছে একটা মেয়ে, শায়লা শারমিন। শারমিনের অধীনে কারা কাজ করছে ওর কোন ধারণা নেই, তবে জানে যুদ্ধের প্রবল আশঙ্কা সৃষ্টি হওয়ায় ওর ঘনিষ্ঠতম বন্ধু ও বিসিআই-এর

অ্যাসিস্ট্যান্ট চীফ ডিরেক্টর সোহেল আহমেদও মধ্যপ্রাচ্যের কোথাও আছে। ওর খোঁজ পাওয়া যাচ্ছে না, এই খবরটা শারমিন তাকেই প্রথমে জানাবে। যে-ই তদন্ত করতে আসুক, তার সঙ্গে যদি লেবানীজ কন্স্টগার্ড শমসের লিবানের দেখা হয় তাহলে ওর আর হাদীর কপালে কি ঘটেছে জানতে পারবে সে। এখানে একটা সন্দেহ জাগল রানার মনে। শমসের লিবান বেঁচে আছে কিনা। এক বা দু'জন লোককে নিয়ে হেডল্যান্ডে থাকার কথা ছিল তার, কিন্তু তা কি সে ছিল? লেবানীজ টর্পেডো বোট যেভাবে সাবমেরিনটাকে অকস্মাৎ আক্রমণ করে বসল, তাতে তো মনে হয় সাবমেরিনটার জন্যে অপেক্ষা করছিল তারা। লেবানীজ নৌ-বাহিনীকে নিশ্চয়ই লিবানই সতর্ক করে দিয়েছিল। প্রশ্ন হলো, লিবানও কি ওই টর্পেডো বোটে ছিল? বোটটা কি ডুবে গেছে?

লিবান বেঁচে থাকলে বা সে যদি কাউকে কিছু বলে গিয়ে থাকে তাহলে আলাদা কথা, তা না হলে ওর আর হাদীর কপালে কি ঘটেছে সে-সম্পর্কে রানা এজেন্সির অপারেটর প্রায় কিছুই জানতে পারবে না।

নাহ্, বাইরে থেকে সাহায্য পাবার কোন আশাই বলতে গেলে নেই। যা করার ওকে একার চেষ্টায় করতে হবে। হাদী তো কোন সাহায্যে আসবেই না, সে বরং এখন থেকে একটা বোঝা হয়ে দাঁড়াবে। শুধু স্মৃতিশক্তি হারানোটাই সমস্যা নয়। রানার মনে হচ্ছে, তার সম্ভবত মস্তিষ্ক বিকৃতিও ঘটেছে। হাদীর প্রতিটি আচরণ এত বেশি শিশুসুলভ হয়ে উঠছে যে তাকে দেখে-শুনে রাখাটা একটা দায়িত্ব হিসেবে চেপে বসছে ওর কাঁধে। মোসাডকে যদি এই অসুস্থতা বিশ্বাস করানো না যায়, হাদীর অবস্থা কি দাঁড়াবে ভাবতে গিয়ে শিউরে উঠল রানা। মোসাডের ইন্টারোগেশন আর টরচার সম্পর্কে তিক্ত অভিজ্ঞতা আছে ওর। তাদের যদি সন্দেহ হয় হাদী অভিনয় করছে, নির্যাতন চালিয়ে ওকে মেরে ফেলবে।

নিজেকে রানা সাবধান করে দিল, হাদীর ওপর নির্যাতন হলে আপাতত প্রকাশ্যে ওর কোন চরম প্রতিক্রিয়া যেন না হয়। নিজেকে নিরীহ রিপোর্টার ও অসহায় বন্দী হিসেবে প্রমাণ করতে হবে। পানির তলার এই সাবমেরিন ঘাঁটি থেকে পালানো সহজ কাজ হবে না, তবে চোখ-কান খোলা রাখলে দু'একটা সম্ভাবনা ঠিকই বেরিয়ে আসবে। তারপর দরকার হবে নিখুঁত একটা প্ল্যান আর ঝুঁকি নেয়ার সাহস। সে সাহস ওর আছে। আর আছে অটল প্রতিজ্ঞা, জাহাজ তিনটেকে ডুবিয়ে দিয়ে যুদ্ধ বাধাবার ইসরায়েলি ষড়যন্ত্র প্রাণ থাকতে সফল হতে দেবে না সে। এখন শুধু ভাগ্য একটু সহায়তা করলেই হয়, মোসাড এজেন্টরা ওকে যেন চিনে না ফেলে।

পরদিন ভোর ছ'টায় ঘুম ভাঙানো হলো ওদের, কাজ দেয়া হলো ইউ-থারটিনাইনের খোলে। ডকে ভেসে আছে ওটা, গায়ে দাগ আর আবর্জনা। লোকজন যারা ওদের সঙ্গে কাজ করছে তাদের কথাবার্তা থেকে রানা জানতে পারল তুরস্কগামী একটা মিশরীয় বাণিজ্যিক জাহাজকে ডুবিয়ে দিয়ে

কাল রাতেই ঘাঁটিতে ফিরেছে ওটা। গায়ে পুরু হয়ে জমে আছে সামুদ্রিক ঘাস, সেটাই ওদেরকে পরিষ্কার করতে হচ্ছে।

ওদের গার্ড রাত তিনটের দিকে বদল হয়েছিল। আবার বদল হলো ন'টায়। গার্ড বরাদ্দ করে বা গার্ডের ওপর নজর রাখে যে পেটি অফিসার, লোকটার মনে দয়া রহম বলে কিছু নেই। হাদী কাজে একটু ঢিল দিলেই গার্ড তাকে ছুটে মারতে আসছে। অভিযোগের সূরে বলছে পেটি অফিসার যদি দেখে তুমি কাজ করছ না, তোমার তো যা হবার হবেই, আমারও বারোটা বাজবে। রানা ধরে নিল, এতটা নির্দয় হবার নির্দেশ গার্ড পেয়েছে মোসাদ এজেন্ট হেবা দাহিরের কাছ থেকে, পেটি অফিসারের মাধ্যমে।

এক সময় দেখা গেল ফাঁকি দেয়া তো দূরের কথা, কাজটা খুব আনন্দের সঙ্গে করছে হাদী। এই কাজের মধ্যে সে হয়তো নিজের স্মৃতি হারানোর দুঃখ আর শোক ভুলে থাকতে পারছে। রানা যেখানে চার ফুট পরিষ্কার করল, হাদী ওই একই সময় করল দশ ফুট। এগারোটার দিকে দম নেয়ার জন্যে একটু থামল রানা, অমনি বেয়োনেট হাতে ছুটে এল গার্ড। নিতম্বে তীক্ষ্ণ খোঁচাটা হলের মত বিধল, তবে অপমানটা আঙুন ধরিয়ে দিল সারা শরীরে। প্রতিবাদ না করে আবার কাজ শুরু করল সে।

বারোটার সময় লাঞ্চ খাবার জন্যে বিশ মিনিট বিরতি। তারপর আবার কাজ। দম ফেলার ফুরসত দেয়া না হলে এভাবে একটানা কাজ করা অসম্ভব। ক্রু বা রেটিংদের কোন অসুবিধে হচ্ছে না, কারণ তারা কাজ যতটুকু করছে তারচেয়ে বেশি করছে গল্প। লাঞ্চার দু'ঘণ্টা পর ব্যাথায় হাত আর কাঁধ অবশ হয়ে এল রানার, তবু কাজে এতটুকু ঢিল পড়তে দিল না প্রবল ইচ্ছেশক্তির জোরে, কারণ জানে নিজেকে অনুগত ও পরিশ্রমী গাধা-হিসেবে প্রমাণ করতে পারলে ভবিষ্যতে বিশেষ সুবিধে পাওয়া যেতে পারে। কিন্তু আর এক ঘণ্টা পর এমন ক্লান্ত হয়ে পড়ল, বুঝতে পারল মিনিট পাঁচেক বিশ্রাম নিতে না পারলে জ্ঞান হারিয়ে ফেলবে। কত রকম চালাকিই তো করা যায়, এখন যদি মই থেকে পড়ে যায় ও, কার কি বলার থাকবে? ভাগ্য ভালই বলতে হবে, মইটার নিচের ধাপে দাঁড়িয়ে কাজ করছিল, পা হড়কে পড়ে গেল নিচে। ভাগ্য আরও একটু ভাল বলতে হবে, শুধু পাঁজরে অপ্রীতিকর একটা ব্যথা পেল, আর কোথাও লাগেনি। মুখ তুলে তাকাল ও। সাবমেরিনের প্রকাণ্ড খোল ওর ওপর ঝুকে আছে। কিন্তু কোথায় ছিল কে জানে, হাতে বেয়োনেট নিয়ে ছুটে এল পেটি অফিসার। যে পাঁজরে রানা ব্যথা পেয়েছে সেটাতোই কষে লাথি মারল লোকটা, হুমকি দিয়ে বলছে এখনি মইয়ে চড়ে কাজ শুরু না করলে রক্তারক্তি কাণ্ড ঘটে যাবে।

এই সময় হাদীর প্রকাণ্ড শরীরটা দেখতে পেল রানা। শান্ত ভঙ্গিতে মই বেয়ে নেমে এল সে, আগে থেকে কিছু বুঝতে না দিয়ে দুম করে এক ঘুসি মেরে বসল পেটি অফিসারের নাকে। দূরে ছিটকে পড়ল লোকটা, ভাঙা নাক থেকে দরদর করে রক্ত ঝরছে। তারপর, গার্ড ছুটে আসার আগেই, মই বেয়ে

নিজের কাজে ফিরে গেল সে।

নিজের পায়ে দাঁড়াল রানা। গার্ডকে হতভম্ব দেখাচ্ছে। ক্রু আর রেটিংদের মধ্যে অনেকেই ঘটনাটা ঘটতে দেখেছে, তারা গার্ডকে নিয়ে কৌতুক শুরু করল। একজন বলল, 'তুমি পুলিশ ডাকছ না কেন?' হো-হো করে হেসে উঠল সবাই। কোন সন্দেহ নেই, এদের মনে নরম একটা স্থান দখল করে নিয়েছে হাদী। তাদের কথাবার্তা থেকে এ-ও জানা গেল, পেটি অফিসারকে কেউই তেমন সহ্য করতে পারে না।

পেটি অফিসার ছিটকে পড়ার পর আর নড়ছে না। গার্ডদের একজন এক সময় বলল, ডাক্তারকে খবর দিতে যাচ্ছে সে। হাদী নির্বিকার চিত্তে নিজের কাজ করে যাচ্ছে, যেন কিছুই ঘটেনি। ব্যাপারটা এরকম নয় যে ঘটনাটার সঙ্গে জড়িত নয় বলে ভান করছে সে। দেখে মনে হলো, সে যে একজন ইসরায়েলি পেটি অফিসারকে ঘুসি মেরে ফেলে দিয়েছে, এ-সম্পর্কে তার কোন ধারণাই নেই। ওদের মাথার ওপর ডকসাইডে কিছু লোক ভিড় জমিয়েছে। সবাই একযোগে কথা বলছে, কারও কথাই বোঝা যাচ্ছে না, চাপা পড়ে যাচ্ছে মেশিনারির গর্জনে। আর সব ডক থেকেও লোকজন দেখতে আসছে কি ঘটেছে। প্রথম সারির লোকজন পিছন থেকে ঠেলা খাচ্ছে দেখে বোঝা গেল প্রতি মুহূর্তে ভিড় আরও বাড়ছে।

পেটি অফিসারের সাহায্যে কেউ এগোচ্ছে না। অগত্যা রানাকেই যেতে হলো। ডকের পাশে, খানিকটা পানির ওপর পড়ে আছে লোকটা। কাপড়চোপড় এরইমধ্যে সব ভিজে গেছে। রানার ভয় লাগল, মরে যায়নি তো? পালস দেখল। না, চলছে, তবে গতি খুব ধীর। শরীরটা পরীক্ষা করল রানা, নাকে বাদে আর কোথাও কোন আঘাতের চিহ্ন নেই। ডকের এক পাশে ধাক্কা খেলেও, হাত দুটো উঁচু করে রাখায় মাথাটা শক্ত কিছু র সঙ্গে বাড়ি যায়নি।

বেকায়দা ভঙ্গিতে পড়ে আছে, যতটা সম্ভব আরামপ্রদ ভঙ্গিতে শোয়াল তাকে রানা। একটু পরই ডাক্তারকে নিয়ে ফিরে এল গার্ড। ইস্পাতের মই বেয়ে ডকে নামার সময় ডাক্তারের চশমার কাঁচ থেকে ইলেকট্রিক আলো প্রতিফলিত হতে দেখল ও।

পেটি অফিসারকে অল্পক্ষণ পরীক্ষা করল সে, বলল, 'ওর কিছু হয়নি।' দু'জন লোককে নির্দেশ দিয়ে বলল, 'ওকে ওর বার্থে রেখে এসো।'

পেটি অফিসারকে মই বেয়ে তোলা হচ্ছে, রানার দিকে ফিরল ডাক্তার। 'কি ঘটেছে?' ইংরেজিতে জানতে চাইল। বলল রানা। মাথা নাড়ল ডাক্তার। 'ওর খুব বিপদ।'

ডকসাইডে ভিড় করা লোকজন হঠাৎ চুপ করে গেল, আকস্মিক নিস্তব্ধতা রীতিমত ধাক্কার মত লাগল। মুখ তুলল রানা। মোসাড অফিসার হেবা দাহির পৌছে গেছে। লোকজন সব ছায়ার মত মিলিয়ে যেতে লাগল। মই বেয়ে ডকে নেমে এল দাহির। 'কি ঘটেছে? গুনলাম,' ইঙ্গিতে হাদীকে দেখাল, 'ও

নাকি আমাদের একজন গার্ড অফিসারকে ঘুসি মেরে বেহঁশ করে দিয়েছে? সত্যি নাকি?' হিফ্ৰ ভাষায় কথা বলছে সে, চোখের দৃষ্টিতে ব্যাকুল আগ্রহ অতি মাত্রায় নগ্ন ও স্পষ্ট। তার রেকর্ড জানে রানা, এই মুহূর্তে বুঝতেও পারছে, লোকটা সত্যিকার একজন স্যাডিস্ট।

‘ঠিকই শুনেছেন,’ জবাব দিল ডাক্তার, ‘তবে সে ঠিক বুঝে কাজটা করেনি...’

‘বুঝে করেছে, কি না বুঝে করেছে তা আমি জিজ্ঞেস করিনি,’ ধমক দিল দাহির। গার্ডের দিকে তাকাল সে। ‘এই হাতিটাকে গার্ড-রুমে ধরে নিয়ে যাও। ট্রাইয়াঙ্গেলের সঙ্গে বাঁধো। মুসলিম বন্দী ইসরায়েলি অফিসারের গায়ে হাত তোলে, এত স্পর্ধা! ওকে আমি উচিত শাস্তি দেব। মোসলানকে ডাকো। ইম্পাতের কাঁটা বসানো চাবুকটা সঙ্গে করে আনতে বলবে। কয়েক মিনিট পর আসছি আমি।’ একটু থেমে রানার দিকে তাকাল, ইঙ্গিতে ওকে দেখিয়ে গার্ডকে আবার বলল, ‘একেও সঙ্গে করে নিয়ে যাও, দৃষ্টান্তমূলক শাস্তি কাকে বলে চাক্ষুষ করবে।’

স্যালুট করে ঘুরে দাঁড়াল গার্ড, একই সঙ্গে রানাকে ইঙ্গিত করল পিছু নেয়ার। হাদীকে ওরা মই থেকে নামিয়ে আনল, ডক গ্যালারি হয়ে রাস্পম্বেয়ে ওপরে তুলল, গার্ড-রুমে নিয়ে যাচ্ছে। সেদিকে বিষণ্ণ দৃষ্টিতে তাকিয়ে থাকল রানা। এই দৃশ্য কি বিশ্বাস করার মত? অবোধ শিশুর মত মাথা দুলিয়ে আপন মনে হাসছে হাদী।

ওদের পিছু পিছু এল রানা, তলপেটে অসুস্থকর শূন্য একটা ভাব। ডক ছেড়ে বেরিয়ে আসছে, পিছন থেকে ডাক্তারের গলা ভেসে এল কানে। ‘আপনি আসলে ভয় দেখাচ্ছেন, তাই না? আপনি কি আর সত্যি সত্যি অসুস্থ একজন লোককে ইম্পাতের চাবুক দিয়ে মারবেন!’

‘মারব মানে? আপনি কি বলছেন ডাক্তার! আমি তো ওকে মেরে ফেলতে চাইছি!’ দাহিরের গলা।

‘কিন্তু মি. দাহির, ও অসুস্থ। শুধু যে স্মৃতি শক্তি হারিয়ে ফেলেছে, তা নয়, ওর মাথায় গুণ্ডগোলও দেখা দিয়েছে। অন্যায় করেছে, তা ঠিক, কিন্তু সে-সম্পর্কে ওর কোন ধারণাই নেই...’

‘আরে, থামুন তো! ইচ্ছে হলে টরচার করার সময় আপনি ওখানে থাকতে পারেন,’ বলল দাহির। ‘আমি প্রমাণ করব, এ-সব ওর অভিনয়। কাজ না করার ফন্দি।’

উত্তরে আরও কিছু বলল ডাক্তার, কিন্তু দূরে সরে আসায় তা আর রানা শুনতে পেল না। ডাক্তারের ভূমিকায় কৃতজ্ঞবোধ করল ও, ভেবে ভাল লাগল যে মানবিক গুণ সম্পন্ন অন্তত একজন মানুষ এখানে আছে।

তবে এ-ও সত্যি যে ডাক্তারের কথায় হাদীকে দাহির ছেড়ে দেবে না। আর সব জায়গার মতই, মোসাডের নির্দেশই এখানে আইন। রানা নিশ্চিতভাবে বুঝতে পারছে, হাদীর স্মৃতিভ্রংশ ও মস্তিষ্ক বিকৃতির ব্যাপারটা

দাহির বিশ্বাসই করছে না হাদীর জন্যে ভয়ে বুকটা ওর কাঁপছে, কারণ ইস্পাতের কাঁটা লাগানো চাবুকের বাড়ি হজম করা যে কি কঠিন, সে রক্তাক্ত অভিজ্ঞতা ওর নিজেরই হয়েছে একবার। পিঠের মাংস ফালি ফালি হয়ে যায়। যে-ক'বার চাবুক মারার কথা, সাধারণত ততবার মারার দরকার হয় না, তার আগেই বন্দী মারা যায়। তেল আবিবে মোসাড হেডকোয়ার্টারে রানার বেঁচে যাওয়ার ঘটনাটা ছিল বিরল ব্যতিক্রম। তাছাড়া, পিঠের পেশী শক্ত করে তুলে এ-ধরনের আঘাতে যতটা সম্ভব কম ক্ষতিগ্রস্ত হবার ট্রেনিং নেয়া ছিল ওর।

রানার গোটা অস্তিত্বের ভেতর থেকে একটা বিষাদ উঠে আসছে। গার্ড-রুমে নিয়ে এসে হাদীর কাপড় খোলা হলো, তারপর ভারী লোহার ট্রাইয়াঙ্গেলের সঙ্গে বাঁধা হলো তাকে। ওর মনে হলো, হাদী যতটুকু কষ্ট পাবে, ও তারচেয়ে কম ভুগবে না। যা কিছু ঘটছে, সেজন্যে নিজেকেই সম্পূর্ণ দায়ী করল ও। মনে হলো, এরকম করণ ও ভয়াবহ দৃশ্য কমই দেখেছে রানা। হাদী এখন হাসছে না, তবে এতটুকু উদ্বিগ্নও সে নয়। অনুগত, অবোধ পশুর সঙ্গে তার কোন পার্থক্য নেই। কি ঘটতে চলেছে সে-সম্পর্কে তার কোন ধারণা আছে বলে মনে হলো না। নগ্ন অবস্থায় তার দৈহিক কাঠামো আরও বিশাল দেখাচ্ছে। রানা উপলব্ধি করল, হাদী যদি একবার খেপে ওঠে, খালি হাতে গার্ড-রুমের সবাইকে খুন করতে পারবে। চিৎকার করে বলতে ইচ্ছে করল ওর, হাদী, তা-ই করো! রুখে দাঁড়াও, মেরে ফেলো সবাইকে! কিন্তু না, চেষ্টা করে কোন লাভ নেই।

লম্বা ও চৌকো একটা বাস্র থেকে ইস্পাতের কাঁটা লাগানো চাবুকটা বের করল একজন নাবিক। লোকটা দীর্ঘদেহী, পেশীবহুল শরীর। সাদা কোট খুলে ফেলল সে, শার্টের আস্তিন গুটাল। তার ঘাড়ের নিচের দিকে ঘামে ভেজা চুল বৈদ্যুতিক আলোয় চকচক করছে। ট্রাইয়াঙ্গেলের পজিশন ঠিক করে নিল সে, চাবুকের বাড়ি যাতে দেয়ালে না লাগে। ইতিমধ্যে গার্ডের সংখ্যা বাড়িয়ে ছয়জন করা হয়েছে। প্রথম যে মোসাড এজেন্টের সঙ্গে ওদের দেখা হয়েছিল, তাকেই পরিস্থিতি নিয়ন্ত্রণের মধ্যে রাখার দায়িত্ব দেয়া হয়েছে। চাবুক হাতে নাবিক নিজের পজিশনে দাঁড়াচ্ছে, গার্ড-রুমের ভেতর পিন-পতন নিস্তরঙ্গতা নেমে এল। দেয়াল ঘড়িটা টিক-টক-টিক-টক আওয়াজ করছে। ওরা সবাই হেঁচকা দাহিরের জন্যে অপেক্ষায় রয়েছে।

চার

‘দরজা বন্ধ করো!’ সেলে ঢুকেই গর্জে উঠল দাহির। দৃঢ় পায়ে হেঁটে এসে ট্রাইয়াঙ্গেলের এক পাশে দাঁড়াল। সরু মুখ ঘামে চকচক করছে, চোখ দুটো যেন স্বচ্ছ কাচ। ‘গার্ডদের অফিসারকে কেন তুমি আঘাত করলে?’ হাদীকে

আব্বীতে জিজ্ঞেস করল সে।

হাদী জবাব দিল না। সে যেন কথাটা শুনতেই পায়নি।

ঠাস করে তার গালে চড় মারল দাহির। চড়টা সে হাতের উল্টোপিঠ দিয়ে মেরেছে, ফলে হীরে বসানো সোনার আঙটি হাদীর গালে গেঁথে গেল। 'জবাব দে, কুত্তার বাচ্চা!' হুঙ্কার ছাড়ল সে।

হাদীর চেহারা য় কোন বিকার নেই।

'এর পিঠের ছাল তোলো!' হুকুম করল দাহির। 'চাবুক চালাও! চামড়ার সঙ্গে যেন মাংসও উঠে আসে!' কি এক বিকৃত উত্তেজনায় কাঁপছে সে।

নিজের পজিশন আবার ঠিকঠাক করে নিল নাবিক লোকটা, দূরত্বটুকু আরেকবার দেখে নিল। নিজের অজান্তেই চোখ বুজল রানা। বাতাসে শিস কাটল ইম্পাতের তিন প্রস্থ ফালি, থ্যাচ করে মাংসে আঘাত করার শব্দ হলো। চোখ খুলতেই হাদীর পিঠে তিনটে লাল রেখা দেখতে পেল রানা, প্রতিটি রেখার ওপর এক ইঞ্চি ব্যবধানে একটা করে গভীর গর্ত তৈরি হয়েছে। রেখা তিনটে আর গর্তগুলো থেকে রক্ত বেরিয়ে এল, ঢাকা পড়ে গেল সব লাল রঙে, সেই রঙ হাদীর নিতম্বে গড়িয়ে নেমে আসছে।

'এবার আমার প্রশ্নের জবাব দেবে তো?' জিজ্ঞেস করল দাহির। 'গার্ডদের অফিসারকে কেন তুমি আঘাত করলে?'

তবু হাদী কথা বলছে না। অসুস্থ বোধ করছে রানা, সেই সঙ্গে মনটার বিদ্রোহ হয়ে ওঠাও দমন করতে পারছে না। হাদী সুস্থ মানুষ হলে নিজের ওপর নিয়ন্ত্রণ রাখা হয়তো সম্ভব ছিল। কিন্তু অসুস্থ, বোধশক্তিরহিত একজন মানুষকে এভাবে নির্যাতন করা হলে তা মেনে নেয়া পাপ বলে মনে হলো ওর। কি করবে ও, এরকম পরিস্থিতিতে প্রতিবাদ করার জন্যে অপেক্ষায় থাকলে হাদীকে বাঁচানো যাবে না। আবার ঠিক এই মুহূর্তে প্রতিবাদ করলে হাদীর বদলে ওকেই হয়তো টাইয়্যাঙ্গেলে বেঁধে চাবুক মারা হবে।

তা মারে মারুক, তবু মুখ বুজে এই অন্যায় অত্যাচার রানা মেনে নেবে না।

নাবিক লোকটা দাহিরের নির্দেশ পাবার অপেক্ষায় রয়েছে। আর রানা রয়েছে হাদীর পিঠে আরেকটা চাবুক মারার অপেক্ষায়। সিদ্ধান্ত নিয়ে ফেলেছে ও—আর মাত্র একটা আঘাত পেতে দেবে হাদীকে, তারপর প্রতিবাদ করবে। যদিও মনের ভেতর থেকে তাগাদা আসছে, দেরি কেন, এখনি প্রতিবাদ করো।

'মারো! আবার মারো!' গর্জে উঠল দাহির।

নাবিক চাবুক তুলল। রানা এক পা সামনে বাড়ল। ওকে নড়তে দেখে দ্রুত কাছে সরে এল দু'জন গার্ড।

রানার ওপর নাবিকের দৃষ্টি পড়েছে। তার দৃষ্টি অনুসরণ করে রানার দিকে তাকাল দাহির। সে কিছু বলতে যাবে, এই সময় কঠিন ও কর্তৃত্বের সুরে কে যেন বলে উঠল, 'থামো! চাবুক নামাও!'

রানার পেশীতে টিল পড়ল।

‘কে ওকে চাবুক মারার নির্দেশ দিল?’ গার্ড-রুমে ঢুকে ভারী গলায় জানতে চাইলেন ঘাঁটির কমান্ড্যান্ট, কমোডর। তাঁর গলায় রাগ ও ঘৃণা, সবার কানেই সেটা বাজল।

অকস্মাৎ একটা উত্তেজনা বোধ করল রানা।

‘আমি নির্দেশ দিয়েছি,’ বলল দাহির, পা বাড়িয়ে কমোডরের সামনে এসে দাঁড়াল। ‘আপনি আমার নির্দেশ চ্যালেঞ্জ করছেন?’ প্রশ্নটা উচ্চারণ করার মধ্যে নেকড়ের খেঁকিয়ে ওঠার ভাবটুকু স্পষ্ট। নিজের অধিকার ও ক্ষমতা সম্পর্কে অত্যন্ত সচেতন মনে হলো তাকে।

কমোডর তার প্রশ্নের জবাবই দিলেন না। গার্ডদের তিনি বললেন, ‘লোকটাকে ট্রাইয়ালসেল থেকে খোলো।’

দাহির এক পা সামনে বাড়ল। মুহূর্তের জন্যে রানা ভয় পেল, কমোডরকে না মেরে বসে লোকটা। তার কপালের পাশের একটা শিরা সাংঘাতিক লাফাচ্ছে। ‘গার্ড অফিসারদের একজনকে ঘুসি মেরেছে কুত্তাটা!’ চিৎকার করার সময় গলার রং ফুলে উঠল। ‘চাবুক তাকে খেতেই হবে। এই ঘাঁটির আইন-শৃঙ্খলা দেখার দায়িত্ব আমাকে দেয়া হয়েছে। ইসরায়েল দীর্ঘজীবী হোক!’ জার্মান নাৎসীদের মত ডান হাত তুলে লম্বা করল সে।

দেশপ্রেমের এই মহড়া প্রদর্শন কমোডরের মধ্যে কোন প্রতিক্রিয়া সৃষ্টি করল না। ‘এখানে আমি কমান্ডে আছি,’ শান্ত, কিন্তু দৃঢ় কণ্ঠে বললেন তিনি। গার্ডদের দিকে তাকালেন। ‘লোকটাকে নামিয়ে আনো।’

‘আমি নির্দেশ দিয়েছি ওই কুত্তাটাকে চাবুক মারা হবে!’ দাহিরকে হিস্ট্রিয়ারাও রোগীর মত দেখাচ্ছে।

কমোডর তাকে গ্রাহ্যই করছেন না। গার্ডরা ইতস্তত করেছে দেখে কান ফাটানো বোমার মত আওয়াজ বেরুল তাঁর গলা থেকে, ‘নামাও লোকটাকে!’ জাদুর মত কাজ হলো, গার্ডরা ছুটল ট্রাইয়ালসেল থেকে হাদীকে খোলার জন্যে। কয়েক সেকেন্ডের মধ্যে মুক্ত হয়ে গেল হাদী।

‘আপনি নিজের সীমা ছাড়ালেন, কমোডর। আপনি আমাকে অপমান করলেন। আমাকে চ্যালেঞ্জ করলেন।’ রাগে ও অপমানে থরথর করে কাঁপছে দাহির। ‘এই কুত্তাটা আর ওই শুয়োরটা,’ ইঙ্গিতে রানাকে দেখাল সে, ‘ইরাকী স্পাই। একজন সব ভুলে যাবার ভান করছে, আরেকজন রিপোর্টারের মিথ্যে অভিনয় করছে।’

কমোডর তার দিকে তাকাচ্ছেনই না।

‘আমি আরও সন্দেহ করছি,’ বলে চলেছে দাহির, ‘ওরা আমাদের এই গোপন ঘাঁটির সন্ধানে ছিল, বন্দীও হয়েছে স্বেচ্ছায় ও কৌশলে। এখন,’ বড় করে শ্বাস টানল সে, ‘আপনি যদি আমার কাজে বাধা দেন, মোসাদ হেডকোয়ার্টারে আপনার বিরুদ্ধে রিপোর্ট করব আমি। তার ফল কি দাঁড়াবে আপনি জানেন তো?’

ঘুরে দাহিরের মুখোমুখি হলেন কমোডর। ‘তিন মাস হলো আপনি আমার কাজে বাধা সৃষ্টি করছেন, আমার অনেক গুরুত্বপূর্ণ সিদ্ধান্ত বাতিল করে দিচ্ছেন। আইন-শৃঙ্খলা সম্পর্কে শিশুসুলভ আইডিয়া খাটাতে গিয়ে আমার লোকজনকে আতঙ্কের মধ্যে রেখেছেন আপনি। আপনার দৃষ্টিতে, আপনি নিজে ছাড়া আর সবাই হয় টেরোরিস্ট নয়তো স্পাই। এটা একটা সাবমেরিন বেস, মোসাডের ইন্টারোগেশন সেন্টার নয়। এখন থেকে নিরেট কোন প্রমাণ যোগাড় করতে পারলে তবেই কাউকে আপনি জেরা করতে পারবেন, তা-ও প্রথমে আমার অনুমতি নিতে হবে। আরও একটা কথা, এখন থেকে এই বেস থেকে যে রিপোর্টই যাক, আমাকে না দেখিয়ে তা পাঠানো যাবে না।’

‘এর জন্যে আপনাকে পস্তাতে হবে, কমোডর,’ দাঁতে দাঁত চাপল দাহির।

‘আমি তা মনে করি না।’

‘কথা দিলাম, আমি আপনার চাকরি খাব। মোসাড হেডকোয়ার্টারে আপনাকে ইন্টারোগেট করা হবে। আমার বসকে আমি জানাব, আপনি আসলে ইরাকী স্পাই, শয়তান সাদ্দাম হোসেনের টাকা খেয়ে ইসরায়েলের বিরুদ্ধে ষড়যন্ত্র করছেন।’

‘আমাদের হাতে অনেক কাজ, আপনার প্রলাপ শোনার সময় নেই,’ বললেন কমোডর। ‘তিনটে বোটের মিলিত হবার সময় দ্রুত এগিয়ে আসছে, অথচ প্রস্তুতি চলছে টিমে তালে। আমরা কাজ করছি, আর আপনি বাধা দিচ্ছেন। যেহেতু ইসরায়েল একটা যুদ্ধে জড়াতে যাচ্ছে, সবাইকেই কিছু না কিছু কাজ করতে হবে। কিন্তু আপনি তো কোন কাজেরই উপযুক্ত নন। চেষ্টা করলে হয়তো শুধু রান্নাবান্নার কাজটা শিখতে পারবেন। ইউ-টোয়েন্টিফোরে রিপোর্ট করুন, আজই। ওদের কুক অসুস্থ, তার কাজটা আপনাকে দেয়া হলো।’

‘ঠিক আছে, আমিও দেখে নেব,’ বলে আরও অপমান হওয়া থেকে বাঁচার জন্যে গার্ড-রুম ছেড়ে ঝড়ের বেগে বেরিয়ে গেল দাহির, সঙ্গী মোসাড এজেন্ট কারমালও পিছু নিল তার।

একজন আদালীকে নির্দেশ দিলেন কমান্ডার, ‘কমান্ডার হারবিকে ডাকো। মেসে পাবে।’

আদালী চলে গেল। কমোডর ডাক্তারকে ডেকে বললেন, ‘আমি চাই এই বন্দীর আপনি বিশেষ যত্ন নেবেন।’ হাদীকে ইস্তিতে দেখালেন। ‘ওদের দু’জনকেই এই গ্যালারির আরেক দিকে ট্রান্সফার করুন।’ ফ্লেক্সকাট দাড়িতে হাত বুলাবার সময় ক্ষীণ হাসি ফুটল ঠোঁটে। ‘ভিজ়ে, স্নাতসেঁতে সেলগুলো হেবা দাহিরের নির্দেশে তৈরি করা হয়েছিল। দৈয়াল থেকে এত বেশি পানি ঝরে, সেলের মেঝে সব সময় ভেজা থাকে। দাহির আর তার সঙ্গীদের আমরা ওই সেলে শুতে দিতে পারি, কারণ তারা সুস্থ-সবল মানুষ। অসুস্থ কোন মানুষকে ওই সেলে কোনমতেই থাকতে দেয়া যায় না। আপনার কি মনে হয়,

ডাক্তার, দাহিরের রান্না কেমন হবে?’

‘আমার ধারণা খাবারে ইচ্ছে করে লবণ কম বা বেশি দেবে,’ হাসি চেপে বলল ডাক্তার।

‘সেক্ষেত্রে কমান্ডার মুসকাকে আমি বলে দেব, তিনি যেন কোন রকম শয়তানি সহ্য না করেন,’ বললেন কমান্ডার। ‘বেশি বাড়াবাড়ি করলে দাহিরকে আমি অ্যারেস্ট করার নির্দেশ দেব।’

গার্ড-রুমের দরজা খুলে গেল, আদালীর পিছু পিছু একজন ন্যাভাল অফিসার ভেতরে ঢুকল। ‘এই যে, হারবি,’ বললেন কমান্ডার। ‘তোমাকে একটা কাজ দিচ্ছি, আমার বিশ্বাস কাজটা তুমি উপভোগ করবে। হেবা দাহির আর তার তিন সঙ্গীকে নির্দিষ্ট দায়িত্ব পালন থেকে অব্যাহতি দেয়া হয়েছে, তারা এখন থেকে ক্রুদের মত যখন যে কাজে লাগে সে-ই কাজ করবে। হেবা দাহিরকে ইউ-টোয়েন্টিফোরের কুক করা হয়েছে। বাকি তিনজনকে তোমার পছন্দ মত কাজ দাও।’

‘ভেরি ওড, কমান্ডার,’ হেসে ফেলে তাড়াতাড়ি ফিরে গেল কমান্ডার হারবি। আদালীকে নিয়ে কমান্ডারও বেরিয়ে গেলেন। এগিয়ে এসে হাদীর একটা হাত ধরল ডাক্তার। তাকে নিয়ে দরজার দিকে এগোচ্ছে, রান্নার দিকে ফিরে ইঙ্গিত করল। রান্না ওদেরকে অনুসরণ করল।

প্যালেস্টাইন জবরদখল করার পর ইসরায়েলি নেতারা যতই যুদ্ধংদেহি ভাব দেখাক, গোটা দেশে শান্তিপ্রিয় ইহুদির সংখ্যা কম নয়। আইজাক রবিন আর সিমন পেরেজ সেই দলেই পড়েন। তাঁদের আন্তরিক চেষ্টাতে যুক্তরাষ্ট্রের মধ্যস্থতায় ইয়াসির আরাফাতের সঙ্গে শান্তি চুক্তি সই করা সম্ভব হয়েছিল। সেই চুক্তিতে প্যালেস্টাইনের স্বায়ত্তশাসন নিশ্চিত করা হয়েছে, যা প্রকারান্তরে স্বাধীনতারই নামান্তর। কিন্তু চরমপন্থী ইহুদিরা ব্যাপারটা মেনে নিতে পারেনি। ফলে আততায়ীর গুলিতে আইজাক রবিন নিহত হলেন। শান্তির পক্ষে ছিলেন সিমন পেরেজও। কিন্তু চরমপন্থীদের কাছে নির্বাচনে হেরে গিয়ে তিনি এখন দৃশ্যপট থেকে সরে গেছেন। ইসরায়েলের প্রধানমন্ত্রী এখন নেতানিয়াহু। তাঁর আমলে মোসাদ মাত্রা ছাড়িয়ে বেপরোয়া হয়ে উঠেছে। হেবা দাহিরের আচরণ সে-কথাই আরেকবার প্রমাণ করল। এই সব কথা ভাবছে রান্না, তবে ইসরায়েলিদের দেশপ্রেম সম্পর্কে ওর মনে কোন সন্দেহও নেই। ডাক্তার, কমান্ডার, দু’একজন কমান্ডার শান্তিপ্রিয় মানুষ বটে, কিন্তু দেশের স্বার্থে কর্তৃপক্ষের সমস্ত নির্দেশই তাঁদেরকে মেনে চলতে হবে। কমান্ডার এরই মধ্যে উল্লেখ করেছেন তিনটে বোট মিলিত হবার সময় দ্রুত এগিয়ে আসছে, অথচ প্রস্তুতি চলছে টিমে তালে।

রাষ্ট্রে রাষ্ট্রে শত্রুতা বা যুদ্ধের এটাই সবচেয়ে খারাপ দিক, শান্তিপ্রিয় ভাল মানুষকেও দুনিয়াটাকে নরক বানাবার কাজে লাগিয়ে দেয়া যায়। তারাও মানুষ খুন করে, নিজেরাও খুন হয়ে যায়।

এ এমন এক পরিস্থিতি, দীর্ঘশ্বাস ফেলা ছাড়া কারও কিছু করার থাকে

না।

গ্যালারির আরেকদিকে ছোট একটা আরামদায়ক সেলে ওদেরকে নিয়ে এলো ডাক্তার, গার্ড-রুমের দরজার প্রায় উল্টোদিকে সেটা। এক লোককে ডেকে ব্যাগটা আনতে বলল সে। হাদীর পিঠের ক্ষতগুলোয় ব্যাভেজ বেঁধে দিল, অ্যান্টিসেপটিক মলম লাগাবার পর। অ্যান্টি-টিটেনাস ইঞ্জেকশন দেয়ার পর পেইন-কিলার দুটো ট্যাবলেটও খেতে দিল। খানিক পরই হাদীর পিঠের ব্যথা কমে গেল। ডাক্তারকে একবার শুধু সে জিজ্ঞেস করল, 'আমাকে ওরা মারল কেন?'

'ভুল করে মেরেছে বা মেরে ভুল করেছে,' জবাব দিল ডাক্তার। 'তবে এখন থেকে কেউ আর তোমার গায়ে হাত তুলবে না।' চলে গেল সে।

একটু পরই রাতের খাবার নিয়ে এল একজন গার্ড। খেতে বসে রানা বলল, 'তুমি আজ ভাগ্যের জোরে বেঁচে গেছ, হাদী। ভাবতেও পারিনি শেষটায় ভাগ্যটা সহায় হবে। এখন কেমন লাগছে তোমার?'

'পিঠে খুব ব্যথা,' বলল হাদী।

'দুঃখিত। তবে আরও ভয়ঙ্কর কিছু ঘটতে পারত। ভাল কথা, তোমাকে আমার ধন্যবাদ দেয়া উচিত, কিন্তু দিতে পারছি না। একটু বিশ্রাম পাবার আশায় ইচ্ছে করে মই থেকে পড়ে গিয়েছিলাম আমি। পেটি অফিসার আমাকে মারছিল, মারতই, তুমি কেন তাকে ঘুসি মারতে গেলে?'

'আনন্দ পাবার জন্যে,' হাদীর সরল জবাব।

হাদীকে তীক্ষ্ণদৃষ্টিতে লক্ষ করল রানা। চোখ বুজে হাসছে সে। মানসিক ভারসাম্য হারিয়ে ফেলার লক্ষণগুলো স্পষ্ট। 'কাজটা তোমার বোকামি হয়ে গেছে। এ-ধরনের বিপজ্জনক ঝুঁকি আর কখনও নেবে না, ঠিক আছে? এরপর কাউকে মারলে ওরা তোমাকে ছাড়বে না।'

'সেজন্মেই কি ওরা আমাকে চাবুক মারছিল?'

'তা-ও তোমার মনে নেই?'

'কি জানি,' বলল হাদী। 'আমি ভাবলাম, মজা পাবার জন্যে মারছে।'

তার দিকে তাকিয়ে থাকল রানা। বোধশক্তি বা চিন্তাশক্তি আংশিক হলেও হারিয়ে ফেলেছে হাদী। আগের সেই সতর্কতা তার মধ্যে একেবারেই নেই। ভোঁতা হয়ে গেছে লোকটা, এমনকি নড়াচড়ার মধ্যেও হাবাগোবা ভাব।

আলো নিভিয়ে বিছানায় শুয়ে পড়ল রানা। সেলটা বেশ গরম, কম্বলগুলোও ছেঁড়া নয়, তাসভেঁও সহজে ঘুম এল না চোখে। সারাটা দিন শরীরটার ওপর প্রচণ্ড ধকল গেছে, দিনের শেষে উদ্বেগ-উত্তেজনাও কম ছিল না। মানসিক ভারসাম্য হারিয়ে নির্বোধ হয়ে ওঠা একটা লোক ওর পক্ষ নিয়ে কিছু একটা করতে গিয়ে নিজের প্রাণ খোয়াতে বসেছিল, কথাটা যতবার ভাবছে ততবার দুঃখে কাতর হয়ে পড়ছে ও। নেহাতই ভাগ্যগুণে এ-যাত্রা বেঁচে গেছে সে, অথচ উপলব্ধি করতে পারছে না কি ঘটে গেছে।

হাদী একটা সমস্যাও বটে। চোখ-কান খোলা রেখে ইসরায়েলি ষড়যন্ত্র ব্যর্থ করার প্ল্যান তৈরি করতে হলে তাকে নিয়ে ওর ব্যস্ত থাকা চলবে না। এখন পর্যন্ত এমন কিছু ওর চোখে পড়েনি যা দেখে পালাবার সম্ভাবনা উঁকি দেয় মনে। নিজেকে রানা এই বলে সন্তুনা দিল, আজ ভাল ঘটনাও একটা ঘটেছে। হেবা দাহির আর তার সঙ্গীরা ওদের ওপর খুব একটা কড়া নজর রাখতে পারবে না। যদিও ওর সম্পর্কে রিপোর্ট চেয়ে দাহির যদি মোসাড হেডকোয়ার্টার তেল আবিবে বার্তা পাঠাতে চায়, কমোডর তাতে বাধা দেবেন বলে মনে হয় না।

দেখা যাক কালকের দিনটা কেমন কাটে।

পরদিন সকাল সাতটা থেকে ইউ-থারটিনাইনের খোলে কাজ শুরু করল ওরা। পিঠের ক্ষতে গায়ের ফতুয়া ঘষা খাওয়ায় ব্যথা পাচ্ছে হাদী, সেটা খুলে ফেলতে হলো। নড়াচড়ায় আড়ষ্টতা থাকলেও, আজও সে নিমগ্ন চিন্তে একাই দশজনের কাজ করছে। এ-ধরনের কাজ করে রানা অভ্যস্ত নয়, তবু গতকালের চেয়ে আজ কাজটা অনেক সহজ লাগছে।

সকাল এক সময় সন্ধ্যা হলো, সন্ধ্যা হলো ভোর। দিনে দশ ঘণ্টা করে কাজ করছে ওরা, মাঝখানে বিশ মিনিট বা আধ ঘণ্টার জন্যে লাঞ্চ খাবার বিরতি। খোল ধোয়ার কাজ থাকে শুধু যখন কোন সাবমেরিন দীর্ঘ পথ পাড়ি দিয়ে ঘাঁটিতে ফিরে আসে। জরুরী তাগাদা থাকলে রেটিংদের পুরো দলকে ওদের সঙ্গে লাগিয়ে দেয়া হয়, তাতে সময় লাগে মাত্র কয়েক ঘণ্টা। তা না হলে কাজটা শুধু ওদের দু'জনকে করতে হয়, সময় লেগে যায় দেড় থেকে দু'দিন। খোল ধোয়ার কাজ না থাকলে ক্যান্টিনে কাজ পায় ওরা—বাসনকোসন ধোয়, আলুর খোসা ছাড়ায়। কোন সাবমেরিন যখন অভিযানে বেরবার জন্যে তৈরি হয়, স্টোর-রুম থেকে রসদ তুলতে হয় তাতে।

হেবা দাহির আর তার তিন সঙ্গীর বিরুদ্ধে কমোডর শাস্তিমূলক ব্যবস্থা নিয়েছেন ঠিকই, তবে ওদের নীরব সমর্থকও আছে। মোসাড এজেন্টরা এখন আর কাউকে সরাসরি বিরক্ত করতে পারছে না, এমন কি খুব কমই তাদেরকে এদিক ওদিক ঘুর-ঘুর করতে দেখা যায়, কিন্তু কয়েকজন জুর আচরণ দেখে রানার সন্দেহ হলো তারা ওদের দু'জনের ওপর নজর রাখছে। স্বভাবতই আরও সতর্ক হয়ে গেল ও।

সারাদিন হাড় ভাঙা পরিশ্রমের পর রাতের খাবার খেয়েই ঘুমিয়ে পড়ে ওরা। সকালে উঠেই কাজে লেগে যায়। দিনের পর দিন এভাবে কাটছে। তারপর রানা লক্ষ করল, লোকগুলো আর আগের মত ওদের গতিবিধির ওপর নজর রাখছে না। গার্ডের সংখ্যাও কমে গেল, এখন মাত্র একজন লোক ওদেরকে পাহারা দেয়। একজন অফিসার সমস্ত কাজের তত্ত্বাবধায়ক হিসেবে থাকে, ওদেরকে তার দায়িত্বে ছেড়ে দেয়া হয়। আসলে ফেটিগ পার্টির চার্জে

আছে সে। ফেটিগ পার্টি গঠিত হয় ঘাঁটিতে উপস্থিত সাবমেরিনগুলোয় কাজ করার জন্যে কত লোক লাগবে তা জানার পর। প্রতিটি সাবমেরিন থেকেই সদস্য নেয়া হয়। পদ্ধতিটা ভালই, পালা করে সবাইকে ফেটিগ পার্টিতে কাজ করতে হয়, একই বোটের সবার পালা শেষ না হলে কোন লোককে দ্বিতীয়বার বাছাই করা হয় না। ঘাঁটির সাধারণ একটা নিয়ম হলো, সাবমেরিন ক্রুদের যতটা সম্ভব বেশি বিগ্রাম দিতে হবে। কিন্তু তা আসলে সম্ভব হয় না। সাবমেরিনগুলো ক্রুদের জন্যে যেমন আরামদায়ক নয়, তেমনি ঘাঁটির কোয়ার্টারও নয়। আর কাজের তো কোন শেষ নেই। স্নায়ুর ওপর সবচেয়ে বেশি চাপ ফেলে সূর্য বা দিনের আলোর অনুপস্থিতি। গোটা ব্যাপারটাই তো আভ্যুত্থান। তার ওপর মেশিনারি ও ঠোঁকাঠুকির বিদঘুটে শব্দ সারাক্ষণ প্রতিধ্বনি তুলছে।

রানা আর হাদী বাদে ফেটিগ পার্টির সব সদস্যই ডিউটির পর যেভাবে তাদের ইচ্ছে সময় কাটাতে পারে। তবে ওদের দু'জনের মত তাদেরকেও ডিউটি দেয়ার জন্যে তৈরি থাকতে হয় যদি কোন সাবমেরিন ঘাঁটিতে ফিরে আসে বা ঘাঁটি থেকে রওনা হয়। এর মানে হলো, ফেটিগ পার্টিকে প্রায়ই রাতের বেলা ঘুম থেকে তুলতে হয়, কারণ শুধু অন্ধকারেই সাবমেরিনগুলো ঘাঁটিতে ঢুকতে বা বেরতে পারে।

ইউ-টোয়েন্টিফোর রওনা হবার সময় সেদিন রাতে রানাকেও ঘুম থেকে তোলা হলো। সারাদিন গাধার খাটনি খাটার পর মাঝরাতে ঘুম ভাঙলে মেজাজের অবস্থা কি হয় তা আর বলার অপেক্ষা রাখে না। তবে সাবমেরিনে পৌঁছানোর পর কৌতূহল আর আনন্দে প্রায় নেচে উঠল মনটা। কারণ আর কিছুই নয়, দু'জন গার্ডের পাহারায় মোসাদ এজেন্ট হেবা দাহিরকে আসতে দেখা গেল। এর আগে কোন মানুষের চোখে এতটা নির্ভেজাল আতঙ্ক দেখেছে কিনা, রানা মনে করতে পারল না। গার্ডদের সঙ্গে বন্ধ উন্মাদের মত ধস্তাধস্তি করেছে সে। রানা নিশ্চিত, বাবুর্চি হিসেবে পুরোপুরি অযোগ্য বিবেচিত হবে সে, তার হাতের রান্না খেয়ে ইউ-টোয়েন্টিফোরের সবাই পেটের পীড়ায় ভুগবে। ক্রুরা লাইন দিয়ে দাঁড়াল তাকে দেখার জন্যে, কোন শব্দ না করলেও সবার মুখে চওড়া হাসি ফুটে উঠেছে। পরিষ্কার বোঝা যাচ্ছে, সাবমেরিন সার্ভিসে মোসাদ কোন ভূমিকা রাখুক, এটা কারও কাম্য নয়। এর পিছনে যথেষ্ট যুক্তিও আছে। হেবা দাহির কমোডর থেকে শুরু করে সবার ওপর খবরদারি করত, তার নিজস্ব আইন মেনে চলতে বাধ্য করত। আর্মিতে বা নেভীর কোন বিশাল যুদ্ধ জাহাজে সম্ভব হলেও হতে পারে, কিন্তু কোন সাবমেরিন বা সাবমেরিন ঘাঁটিতে এটা কাজ করবে না।

সাবমেরিন সার্ভিস অন্যান্য সার্ভিসের চেয়ে সম্পূর্ণ আলাদা, কারণ ঝুঁকি আর বিপদ এখানে অনেক বেশি। মর্যাদা বা ঐতিহ্য বড় কোন প্রসঙ্গ নয়, এই সার্ভিসে কাজ করার সুযোগ পাওয়া মানেই হলো হিরো বনে যাওয়া। আর একজন হিরো সব সময় শৃঙ্খলা বা ডিসিপ্লিনের উর্ধ্বে। এই সার্ভিসে শুধু দক্ষতা

বিবেচনা করা হয়, অন্য কিছু নয়। প্রশ্নটা অস্তিত্ব রক্ষার। প্রতিটি নাবিক ও জুর হাতে গোটা সাবমেরিনের ভাল-মন্দ নির্ভর করে। এ-ধরনের পরিস্থিতিতে ডিসিপ্লিন স্বতস্ফূর্তভাবে এসে যায়, বাইরে থেকে আরোপ করার দরকার পড়ে না। কিন্তু তারা যখন ঘাঁটিতে ফিরে আসে, বিশেষ করে এ-ধরনের একটা ঘাঁটিতে, জুরা বিশ্রাম পাবে বলে আশা করে, শৃঙ্খলা রক্ষার নামে সস্তা বিধি-নিষেধ মেনে চলতে তারা রাজি নয়।

আর সেজন্যেই ইউ-টোয়েনটিফোরের জুরা দাহিরকে উষ্ণ অভ্যর্থনা জানাল। এতদিন সে ওদেরকে গালিগালাজ আর হুকুম করেছে, রুটিন কাজের অজুহাত দেখিয়ে ঘণ্টার পর ঘণ্টা জেরা করেছে, উঁচু গলায় বলে বেড়িয়েছে ঘাঁটিতে তার কথামত চলতে হবে সবাইকে। এখন জুরা তাকে হুকুম করবে, রান্না খারাপ হলে গালিগালাজ করবে। দাহির তো আতঙ্কিত হবেই।

জুদের সঙ্গে রানাও লাইনে দাঁড়িয়ে ছিল। ওকে দেখতে পেয়ে হঠাৎ শান্ত হয়ে গেল দাহির। ব্যাপারটা টের পেয়ে গার্ডরাও টিল দিল একটু। সোজা হেঁটে এসে রানার সামনে দাঁড়াল সে। 'কমোডরের এত সাহস নেই যে আমার মেসেজ পাঠানো বন্ধ করতে পারেন। মোসাদ হেডকোয়ার্টারে তোমার সম্পর্কে তথ্য চেয়ে মেসেজ পাঠিয়েছি আমি। ফিরে এসেই জবাবটা পেয়ে যাব। তখন জানা যাবে, সত্যি তুমি মিশরীয় কোন দৈনিকের রিপোর্টার, নাকি ইরাকের একজন স্পাই।'

রানার মনে ঝড় উঠল, তবে নিজেকে আশ্বাস দিল এই বলে যে দাহির সম্ভবত মিথ্যে কথা বলছে। কমোডর তার কোন মেসেজ তেল আবিবে পাঠাবেন বলে মনে হয় না। আর যদি পাঠানও, ওর কাভার এত দুর্বল নয় যে তদন্ত করলেই ফাঁস হয়ে যাবে। ও শুধু বোকা-বোকা ভাব করে একটু হাসল, কথা বলল না।

ওরা হয়তো দাহিরের প্রতি খানিকটা অবিচারই করে ফেলেছে। কিংবা সে হয়তো নিজের ভবিষ্যৎ বুঝে ফেলেছে। যেভাবেই ব্যাপারটাকে দেখা হোক, দু'দিন পর একটা মিশরীয় টর্পেডো বোটের আক্রমণে ইউ-টোয়েনটিফোর সাইপ্রাসের কাছাকাছি ডুবে যায়।

পাঁচ

রানা আর হাদীর জীবন একেবারে দুর্বিষহ হয়ে উঠেছে, ব্যাপারটা তা নয়। একথা সত্যি যে অমানুষিক পরিশ্রম করতে হচ্ছে ওদেরকে, তার ওপর ভেন্টিলেশন সিস্টেম থাকা সত্ত্বেও বাতাসের গুণগত মান মোটেও ভাল নয়। তবে সন্দের দিকে, কাজ থেকে নিজেদের কোয়ার্টারে ফেরার পর, পড়ার জন্যে ইংরেজি ম্যাগাজিন পাওয়া যায়। ডাক্তার ওদেরকে একটা দাবার বোর্ড

আর ঘুঁটিও যোগাড় করে দিয়েছেন। তবে খেলার প্রতি হাদীর তেমন আগ্রহ নেই। ম্যাগাজিন থেকে গল্প আর ফিচার পড়ে হাদীকে শোনায়ে রান্না। ব্যাপারটা সে উপভোগ করে। কিন্তু বিস্ময়কর ব্যাপার হলো, তাকরির উপকূল, কায়দা খাঁড়ি, মুয়াক্কা খাঁড়ি, শয়তানের তাওয়া বা জনপন্নীদের আস্তানা সম্পর্কে রান্না যখন কথা বলে, হাদী কিছুই বুঝতে পারে না। অথচ রান্নার জানা আছে, এই সব জায়গার প্রতি সত্যিকার ভালবাসা আছে হাদীর মনে। তাকরির উপকূলে জন্মেছে সে, বড় হয়েছে, সারাটা জীবন এই জায়গা ছেড়ে খুব কমই বাইরে গেছে। অথচ এমন ভোলাই ভুলেছে, একটা জায়গার নাম পর্যন্ত তার পরিচিত বলে মনে হয় না। এমন কি রান্নাকে সে কোন প্রশ্ন পর্যন্ত করে না। তার বেশিরভাগ সময় কাটে সাধারণ একটা টেবিল নাইফ নাড়াচাড়া করে। কাঠের টুকরো চেঁছে খুদে মডেল বোট তৈরি করাতেই তার যত আনন্দ। এ যেন অবচেতন মনের কারসাজি বা কৌতুক, যে জীবন মনে করতে পারে না তারই প্রতিচ্ছবি তৈরি করাচ্ছে ওকে দিয়ে। তার এই কাজে কেউ বাধা দেয় না। ডাক্তার বরং উৎসাহিত করে। তার ধারণা, এর ফলে হাদী তার স্মৃতিশক্তি ফিরেও পেতে পারে। মাঝে মধ্যে হাদী তার ক্যাম্প বেডের পায়ায় নিজের নাম খোদাই করার কাজে ঘন্টার পর ঘন্টা কাটিয়ে দেয়, যেন ভয় পাচ্ছে নামটাও না এক সময় ভুলে যায়।

যত দিন যাচ্ছে লোকজনের সঙ্গে আরও অবোধে মেনামেশার সুযোগ পাচ্ছে ওরা। হাদী তো রীতিমত জনপ্রিয় হয়ে উঠল। সবাই তাকে নিয়ে কৌতুক করে, হাদী তাতে কিছু মনেও করে না। তার প্রকাণ্ড শরীর আর অবিশ্বাস্য শক্তি বিস্মিত ও মুগ্ধ করে সবাইকে। তারপর যখন জানা গেল সে সরল তো বটেই, বিপজ্জনক বা ক্ষতিকরও নয়, সন্ধের পর ডাক আসতে লাগল মেসে। প্রথম প্রথম হাদীকে একা ডাকা হত। ক’দিন পর রান্না জুদের জানাল, ডাক্তারের নির্দেশে সে তার বন্ধু হাদীর ওপর নজর রাখছে, কাজেই সন্ধের পর মেসে ওকে নিয়ে যেতে হলে তাকেও ওর সঙ্গে যেতে হবে। সহজেই রাজি হয়ে গেল তারা, কারণ রান্নাকেও তারা সোজা-সরল ভালমানুষ হিসেবে জানে। হাদীর মত রান্নাকেও বিয়ার খেতে দেয়া হলো। রান্না নিল না, বদলে কফি চাইল। বিয়ার বা মদ হাদীও স্পর্শ করে না—বলা ভাল করত না—কিন্তু এখন দেখা যাচ্ছে যে যা দিচ্ছে সব সে গিলে ফেলছে। এ যেন দেখেও বিশ্বাস করার মত ঘটনা নয়। জীবনে যে কখনও মদ খায়নি, ক্যান ক্যান বিয়ার খেয়েও তার মধ্যে কোন প্রতিক্রিয়া লক্ষ করা গেল না। এমনকি হুইস্কি খেয়েও নিজেকে পুরোপুরি নিয়ন্ত্রণে রাখতে পারছে হাদী। ব্যাপারটা বিস্ময়কর বললেও কম বলা হয়। জুরা হাদীকে নিজেদের পয়সায় বিয়ার বা হুইস্কি খাওয়ায় বিনা স্বার্থে নয়, তাকে দিয়ে সার্কাসের ট্রেনিং পাওয়া জানানোয়ারের মত খেলিয়ে নেয়। স্নেহ দৈহিক শক্তি প্রদর্শন করে তাদেরকে আনন্দ দেয় সে। দু’জন মাঝারি আকৃতির নাবিককে দুই হাত ধরে শূন্যে তুলে ফেলতে পারে, মুঠোয় থাকে তাদের নিতম্ব ঢাকা ট্রাউজার বা হাফ প্যান্ট। সে বিয়ার ও হুইস্কি খেয়েও মাতলামি করছে না, এটাও তাদেরকে মুগ্ধ করে।

হাদীকে ওরা সার্কাসের জন্তু বানিয়ে ফেলায় রানার মনে ঘৃণার উদ্বেক হলেও, নিজেকে এই বলে সান্ত্বনা দিল যে সন্ধের পর সেল থেকে বাইরে বেরুবার যে সুযোগটা হাতে এসেছে সেটাকে কাজে লাগাতে হবে।

এই সুযোগেই ঘাঁটির কোথায় কি আছে জেনে নিতে পারল রানা। তবে শুধু তিনটে গ্যালারিতে আসা-যাওয়া করার স্বাধীনতা পেল ওরা, কোন ডক বা রিপেয়ার ও মিউনিশন ডিপোয় যেতে নিষেধ করে দেয়া হলো। নির্দেশ না পেয়ে ওখানে ঢুকলে কঠিন শাস্তি পেতে হবে। তাসত্ত্বেও ডিউটি দেয়ার সময় সুযোগ বুঝে ঘাঁটির অনেক নিষিদ্ধ এলাকায় অনুপ্রবেশ করল রানা। এক সময় প্রায় পুরো ঘাঁটিটাই দেখা হয়ে গেল ওর। জিজ্ঞেস করলে চোখ বুজে বলে দিতে পারবে কোথায় কি আছে, যা শুধু এসপিওনাঙ্গে ট্রেনিং পাওয়া একজন মানুষের পক্ষেই সম্ভব। একদিন একটা গ্যালারির পিছনে বিশাল এক শেড দেখল ও, গেট বন্ধ, কোন জানালা নেই, শুধু হাতুড়ির বাড়ির শব্দ আর মেশিনারির গুঞ্জন ভেসে আসছে। ওই শব্দ শুনেই বুঝতে পারল রানা ভেতরে কি হচ্ছে। মনের পর্দায় যখন পরিষ্কার একটা ছবি ফুটে উঠল, খসড়া একটা নকশা তৈরি করল রানা। পরে, আরও তথ্য পাবার পর, নকশাটায় কিছু পরিবর্তন আনতে হলো।

ইহুদি জাতি দুনিয়ার সেরা সব বিজ্ঞানী উপহার দিয়েছে। এই জাতির প্রতি এক ধরনের শ্রদ্ধাবোধ আছে রানার মধ্যে। অন্তত বিজ্ঞানে তাদের অবদান অস্বীকার করার কোনোই উপায় নেই। হাজার হাজার বছর ধরে তাদের ওপর যে নির্যাতন চালানো হয়েছে তা-ও মেনে নেয়ার মত নয়। খুঁটিনাটি সমস্ত বিষয়ে ইহুদিরা তীক্ষ্ণ নজর রাখতে পারে, রানা জানত। কিন্তু এই তীক্ষ্ণ নজর কাকে বলে সেটা সত্যিকার অর্থে উপলব্ধি করতে পারল ঘাঁটিটা সম্পর্কে পরিষ্কার একটা ধারণা পাওয়ার পর। গোটা ব্যাপারটা এক কথায় অবিশ্বাস্য। ঘাঁটিটা তৈরি করতে দু'বছর সময় লেগেছে ওদের, খরচ হয়েছে পাঁচ হাজার কোটি টাকা। স্বয়ংসম্পূর্ণ ইকুইপমেন্ট আনা হয়েছে সাবমারসিবল বার্জে করে। কাঁচা মালও আনা হয়েছে, ঘাঁটিতে বসে ইকুইপমেন্ট তৈরি করার জন্যে। এগুলোর পরিমাণ ও সংখ্যা এত বেশি যে সাবমারসিবল বার্জের পুরো একটা বছরকে ব্যবহার করতে হয়েছে।

এখানে আসার পরপরই ডক সেকশনটা পরীক্ষা করার সুযোগ পায় রানা। লগ্না একটা গুহার ভেতর সাবমেরিনগুলো মাখাচাড়া দেয়। হেভী হলিজ গিয়ার সাবমেরিনকে টানার কাজে ব্যবহার করা হয়। মেইন গুহার চওড়া অংশটা থেকে বেরিয়ে গেছে সাতটা ডক এরিয়া। হলিজ গিয়ার সম্পর্কে পুরোপুরি ধারণা পেয়েছে রানা আরও পরে, জানতে পেরেছে কিভাবে কাজ করে ওটা।

প্রথম কথা, কোন অবস্থাতেই একটা সাবমেরিন দিনের আলোয় বা চাঁদের আলোয় ঘাঁটিতে ঢুকতে পারবে না। গুহার জলময় মুখ থেকে বেরিয়ে হলিজ গিয়ার একটা পাইলনকে ঘিরে রেখেছে, তীর থেকে একশো গজ দূরে

সাগরের তলায় শক্ত ভিত নিয়ে খাড়া হয়ে আছে পাইলনটা। অনুকূল পরিস্থিতিতে কাঁচের এক ধরনের একটা বল ওই পাইলন থেকে ছাড়া হয়—এ-ধরনের বল জেলেরা তাদের জালে ব্যবহার করে। বলটায় হালকা ফসফোরেসেন্ট পেইন্টের প্রলেপ দেয়া আছে, সাধারণ একটা রশির সাহায্যে পাইলনের সঙ্গে যুক্ত। রশির অপর অংশের সঙ্গে তীরের বৈদ্যুতিক সংযোগ আছে। কাঁচের বলে জোরাল টান পড়লে—বলের ব্যয়ান্সি যথেষ্ট নয়—হলিড গিয়ার কন্ট্রোল রুমে একটা বেল বেজে ওঠে। ঘাঁটিতে ঢুকতে ইচ্ছুক একজন সাবমেরিন কমান্ডারকে বলে টান দিয়ে মোর্স সঙ্কেত পাঠাতে হয়, সঙ্কেতের সাহায্যে তার বোটের সংখ্যা আর নিজের নাম জানাতে হয়। অনুমতি নেই এমন কোন লোক টান দিলে সঙ্গে সঙ্গে মুক্ত করে দেয়া হয় বলটাকে।

সাবমেরিন থেকে পাঠানো সঙ্কেত নির্ভুল হলে ছোট একটা বয়া পানির তলা থেকে ছাড়া হয়, তাতে একটা টেলিফোন থাকে। ঘাঁটির সঙ্গে তখন সরাসরি কথা বলতে পারে সাবমেরিন কমান্ডার। মেইন বয়ার সঙ্গে হকের সাহায্যে আটকানো হয় সাবমেরিনের বো, তারপর সাবমেরিন পানির তলায় ডুব দেয়। সঠিক পজিশনে ডুব দেয়ার জন্যে সতর্কতা প্রয়োজন—তীরের সঙ্গে সমান্তরাল রেখায় থাকতে হবে সাবমেরিনকে। এর কারণ হলো, যে লোহার ক্রেডলে নামবে সাবমেরিন সেটা একটা রেলপথের শেষ মাথায় তৈরি করা হয়েছে, রেলপথটা নেমে এসেছে জলময় পাহাড়-প্রাচীরের গা বেয়ে সাগরের তলায়। এই পদ্ধতি বাস্তবায়িত করতে ইসরায়েলি এঞ্জিনিয়ারদের অনেক মেধা খরচ করতে হয়েছে, তাতে কোন সন্দেহ নেই। সাগরের তলায় ছড়িয়ে থাকা পাথর এত বেশি যে রেলপথের সাহায্য নেয়া ছাড়া অক্ষত অবস্থায় একটা সাবমেরিনকে ঘাঁটিতে তুলে আনা সম্ভব হত না।

ঘাঁটিতে তিনটে গ্যালারি। প্রথমটা ডক লেভেলে। ভিজ়ে সেনগুলো এই লেভেলেই। গ্যালারিটা অর্ধবৃত্তাকার, সাবমেরিন ডকগুলোকে ঘিরে আছে। প্রতিটি ডকের উল্টোদিকে একটা টানেল, চলে গেছে আরও চওড়া গুহার দিকে। ওদিকে স্টোর-রুম আছে, ইম্পাভের দরজা লাগানো। গ্যালারির দুই প্রান্ত তীক্ষ্ণ বাক ঘুরে ডক থেকে দূরে সরে গেছে, শেষ মাথায় বিশাল আকারের দুটো গুহা, কড়ি দিয়ে মজবুত করা। একটা গুহার পাশেই রয়েছে র‍্যাম্প, উঠে গেছে আপার গ্যালারিতে, ওখানে আছে দৈত্যাকার জেনারেটর, আর সামনে ইলেকট্রিক ফার্নেস সহ একটা স্বয়ংসম্পূর্ণ ফাউন্ড্রি। আরও খানিকটা এগোলে পাওয়া যাবে সারি সারি ওজর্কশপ, লেদ আর মেশিন টুলসে ভর্তি। সাবমেরিনের যে-কোন পার্টস প্রয়োজন অনুসারে তৈরি করা হয় এখানে। বাঁকা গ্যালারির অপর প্রান্তের প্রকাণ্ড গুহায় রয়েছে বিরাট ফুয়েল ও মিউনিশন স্টোর। ফুয়েল রাখা হয়েছে বড় আকৃতির ট্যাঙ্কে। তামা-পিতল, ইম্পাৎ, সীসা, জিঙ্ক ও ম্যাঙ্গানিজ সহ অন্যান্য প্রয়োজনীয় মেটেরিয়ালও মজুদ রাখা হয়েছে।

ওপরের গ্যালারি দুটো বাঁকা নয়, সোজা; একটার ওপর আরেকটা।

এগুলো ক্রুদের কোয়ার্টার। রানার হিসেবে, এখানে সাতশো লোকের জায়গা হবে। ঘাঁটিতে কাজ করছে একশোর কিছু বেশি লোক। সাবমেরিনগুলো বেশিরভাগই গভীর সমুদ্রে চলাচলের উপযোগী, কোনটার ক্রুর সংখ্যাই ষাটজনের কম নয়। স্যাঁতসেঁতে ভাব এড়াবার জন্যে এই গ্যালারিগুলোর মেঝে আর দেয়াল সিমেন্ট করা হয়েছে। ওগুলোর পিছন দিকে আছে ফুড স্টোর।

ঘাঁটিতে কোন ওয়্যায়েরলেস ট্রান্সমিটার নেই, ফলে সরাসরি তেল আবিবের সঙ্গে বেতার যোগাযোগ সম্ভব নয়। ওয়্যায়েরলেস ট্রান্সমিটার থেকে কোন মেসেজ ব্রডকাস্ট করা হলে লেবানীজ আর্মি বা নৌ-বাহিনী সেটার উৎস খুঁজে বের করে ফেলতে পারে, সম্ভবত এই ভয়েই যোগাযোগের এই মাধ্যম রাখা হয়নি। তেল আবিব থেকে নির্দেশ পাবার জন্যে আলাদা কোন ওয়েভলেংথও নেই। তবে নির্দেশ ঠিকই আসে। সাধারণ ইসরায়েলি দর্শকদের জন্যে তেল আবিব রেডিও স্টেশন থেকে ইংরেজিতে যে খবর পড়া হয় তারই মধ্যে থাকে সেই নির্দেশ। খবরের ভাষা এমনভাবে সাজানো হয়, কোড ল্যাংগুয়েজ-এর ভূমিকা পালন করে সেটা। নিয়ম জানা থাকলে কোড ভাঙা খুবই সহজ। এই পদ্ধতিতে নির্দেশ আসছে, এটা রানা জানতে পারে আকস্মিকভাবে—হিব্রু ভাষায় নিজেদের মধ্যে কথা বলছিল দু'জন নাবিক, কাছাকাছি দাঁড়িয়ে থাকায় শুনে ফেলেছিল। পদ্ধতিটা সত্যি ভাল, তবে কোড ভাঙার নিয়মটা এখনও ওর জানার সুযোগ হয়নি।

রানার একটা ধারণা ছিল যে যুদ্ধ বাধলে বা যুদ্ধ বাধাবার জন্যে ইসরায়েলিরা এই আন্ডারগ্রাউন্ড সাবমেরিন বেস ব্যবহার করবে। এখানে আসার ক'দিন পরই ওর এই ধারণা ভুল প্রমাণিত হলো।

ওয়্যায়েরলেস-রুমের আদালী যখনই হাতে চক নিয়ে ক্যান্টিনে ঢোকে, ক্রুদের মধ্যে সঙ্গে সঙ্গে উত্তেজনার ঢেউ বয়ে যায়। ক্যান্টিনে একটা ব্ল্যাক-বোর্ড আছে, চক দিয়ে তাতে লেখা হয় ঘাঁটির সাবমেরিনগুলো কোথায় কোন দেশের ক'টা বাণিজ্যিক জাহাজ ডোবাল। এই নিয়ে ক্রুরা বাজিও ধরে। কেউ বাজি ধরে জাহাজের সংখ্যার ওপর, আবার কেউ জাহাজের ওজন বা সেটা কত বড় তার ওপর। রানার কাছে ব্যাপারটা পরিষ্কার হয়ে গেছে, ইসরায়েলিরা তাদের শত্রু রাষ্ট্রের অর্থনীতি দুর্বল করে দিচ্ছে গভীর সাগরে পণ্যবাহী জাহাজ ডুবিয়ে দিয়ে। ব্ল্যাকবোর্ডে লেবানন, মিশর, সৌদি আরব, লিবিয়া, আলজিরিয়া ও তিউনেশিয়ার জাহাজ তো আছেই, এমনকি ভারতীয়, পাকিস্তানী ও চীনের জাহাজও আছে।

কিন্তু তারপর ঘটনার মোড় একটু ঘুরে গেল। প্রথম হপ্তার শেষ দিক চারটে সাবমেরিন তিন দিন ধরে কোন জাহাজ ডোবাবার ঘটনা রিপোর্ট করল না। রিপোর্ট করল না মানে, তেল আবিব থেকে প্রচারিত ইংরেজি খবরে এসম্পর্কিত কোন খবর থাকল না। দশ দিন পর দেখা গেল সাতটা সাবমেরিন তিন বা চারদিন ধরে কোন রিপোর্ট করছে না।

রানা আর হাদী ঘাঁটিতে পৌছানোর চারদিন পর ইউ-ফরটিসেভেন ফিরে এল, সরাসরি ঠুঁতো খাওয়ায় সেটার আফটার ডেক ফাঁক হয়ে গেছে। ভেতরে পানি তো ঢুকেছেই, মাঁরাও গেছে আটজন লোক। তিন দিন পর ইউ-টোয়েনটিওয়ান ডকে ভিড়ল, মোচড় খেয়ে ফালি ফালি হয়ে গেছে ব্রিজ, ভেঙে চুরমার হয়ে গেছে ফরওয়ার্ড গান ও এ. এ. গান, নিহত হয়েছে বারোজন, আহত হয়েছে নয়জন। ওদের বোট, ইউ-থারটিফোর সহ, তিনটে বোট মেরামত করতে হবে।

এইসব ঘটনায় ঘাঁটির পরিবেশও বদলে গেল। ইসরায়েলি নৌ-কর্তৃপক্ষ এ-ধরনের ক্ষয়-ক্ষতির জন্যে প্রস্তুত ছিল বলে মনে হয় না। দুই হপ্তার মধ্যে সাতটা সাবমেরিন নিখোঁজ, এটা অস্বাভাবিক ঘটনা। সব মিলিয়ে সতেরোটা সাবমেরিন, তার মধ্যে তিনটে অকেজো হয়ে পড়ে আছে। এ-সব খবর ছড়িয়ে পড়তে সময় লাগে না। জুরা বুঝতে পারল, তাদের সময়ও ঘনিয়ে আসছে। তারা উদ্বিগ্ন হয়ে উঠছে বুঝতে পেরে ক্যান্টিন থেকে ব্ল্যাকবোর্ডটা নামিয়ে ফেলা হলো।

মোসাদ এজেন্ট হেবা দাহিরের বিরুদ্ধে কমোডর আয়ান পেরেজ চরম শাস্তিমূলক ব্যবস্থা কেন নিয়েছেন, এতদিনে ব্যাপারটা পুরোপুরি উপলব্ধি করতে পারল রানা। এই ঘাঁটি ইসরায়েলের কোথাও হলে ঘটনাটা ঘটত না। ঘটতে পেরেছে বিদেশের মাটিতে সীমাবদ্ধ একটা জায়গার ভেতর ওরা সবাই আটকা পড়া অবস্থায় থাকতে বাধ্য হওয়ায়। তিন মাসেরও বেশি দিন কমোডরের খাড়ে চাপিয়ে দেয়া হয় দাহিরকে। বাকি দুনিয়ার সঙ্গে বিচ্ছিন্ন হয়ে আছেন কমোডর, ঘাঁটিটাকেই তাঁর গোটা জগৎ বলে মেনে নিয়েছেন। ইসরায়েল বা মোসাদ তাঁর কাছে এখন আর কোন নিরেট বাস্তবতা নয়।

ব্ল্যাক বা. স্কোর বোর্ড সরিয়ে নেয়ার পর থেকে ঘাঁটির পরিবেশে অস্বস্তিকর একটা টেনশন দেখা দিল। ইউ-ফরটিওয়ান রওনা হবে রাতে, রানার মনে হলো জুরা না যেতে অস্বীকার করে বসে। ডকে যখন নেমে এল তারা, প্রায় সবাইকে হতাশ ও ক্লান্ত দেখাল। কিছু লোককে দেখে মনে হলো বিদ্রোহ করবে।

পরিবেশটা সামলে নিল ইউ-ফরটিওয়ানের কমান্ডার। অত্যন্ত শক্ত-সমর্থ কাঠামো, পা দুটো বাঁকা, র‍্যাম্প বেয়ে ডকে নেমে এলো হাসিতে উজ্জ্বল চেহারা নিয়ে। কমোডরও রয়েছেন পাশে, তাঁকে নিজের বীরত্বের গল্প শোনাচ্ছে কমান্ডার—সুয়েজ ক্যানেল থেকে বেরতেই একটা মিশরীয় জাহাজকে কিভাবে তার জুরা ডোবাল। মিশরীয়দের বোকামি এমন হাস্য-রসাত্মক ভঙ্গিতে বর্ণনা করল, জুরা বক্ত্রিশ পাটি দাঁত বের করে হাসতে লাগল, তারপর উঠে পড়ল সাবমেরিনে।

এক হপ্তা পর ইউ-ফরটিওয়ানকে ডুবিয়ে দিল মিশরীয় একটা টর্পেডো বোট।

ইউ-ফরটিওয়ানের পর বেশ কিছুদিন আর কোন সাবমেরিন ঘাঁটি ত্যাগ করেনি। সেই থেকে যে-ক'টা বোট ফিরে এল, সবগুলো ডেকে ভেসে থাকল, জুদের বলা হলো বিশ্রাম নিতে।

রানার মনে আছে আমেরিকান, ব্রিটিশ আর জাতিসংঘের জাহাজ তিনটে পরম্পরের কাছাকাছি পৌঁছবে রবিবার বাইশে ফেব্রুয়ারি, ১৩ঃ৩০ ঘটায়। এ-ও ভোলেনি যে জাতিসংঘের জাহাজটায় বাংলাদেশী সৈনিকরা আছে। তবে বাংলাদেশী সৈনিকরা মারা যাক বা না যাক, জাহাজগুলো ইসরায়েলিরা ডুবিয়ে দিতে পারলে যুদ্ধটা শুধু মধ্যপ্রাচ্যে ইঙ্গ-মার্কিন জোট আর ইরাকের মধ্যে সীমাবদ্ধ থাকবে না বলেই ওর বিশ্বাস। তৃতীয় বিশ্বযুদ্ধ বেধে যাবার আশঙ্কাটা সত্যি উড়িয়ে দেয়া যায় না। রানা উপলব্ধি করছে, ওর কাঁধে খুব ভারী একটা দায়িত্ব চেপেছে। যেভাবেই হোক সাবমেরিনগুলোকে ঘাঁটি থেকে বেরুতে বাধা দিতে হবে। চিন্তাটা আরেক সমস্যার মুখোমুখি দাঁড় করাল ওকে—নিজের জীবন বিসর্জন দেয়া। বন্ধ একটা জায়গার ভেতর এতগুলো লোকের বিরুদ্ধে একা কিছু করতে যাওয়া মানে মৃত্যুকে আলিঙ্গন ছাড়া আর কিছু নয়। অথচ ঠিক তাই করতে হবে ওকে।

সেই রাতে রানা ঘুমাতে পারল না। অন্ধকারে শুয়ে চিন্তা করছে। রাত তিনটের দিকে গার্ড বদল হবার আওয়াজ পেল। খুবই ক্লান্ত বোধ করছে, তবু একটা প্ল্যান তৈরি না করে ঘুমাতে চাইছে না। একবার ভাবল হাদীর সঙ্গে ব্যাপারটা নিয়ে আলোচনা করতে পারলে হত, কিন্তু নাক ডেকে ঘুমাচ্ছে সে। তাছাড়া, তার যে মানসিক অবস্থা, ধরে নেয়াই ভাল সে কোন সাহায্যে আসবে না। বরং তাকে কিছু না জানানোই উচিত হবে। যে লোক প্রায় পাগল হয়ে গেছে তার মুখ থেকে কখন কি বেরোয় কে বলতে পারে। আবার এ-ও সত্যি, রানা যখন যা করতে বলেছে, অক্ষরে অক্ষরে তা পালন করেছে হাদী, একটি বারও আপত্তি বা অমান্য করেনি।

স্বভাবতই হাই এক্সপ্লোসিভের কথা ভাবছে রানা। ঘাঁটিতে ওগুলো প্রচুর পরিমাণে আছে। প্রশ্ন হলো, ওগুলোর কাছে যাবার উপায় কি। আচ্ছা, ওগুলো যদি নাগালের মধ্যে পাওয়া যায়, তখন কি করবে ও? দুটো সম্ভাবনার কথা ভাবছে—এক, মিউনিশন স্টোরে আগুন ধরিয়ে গোটা ঘাঁটি উড়িয়ে দেয়া; দুই, বিস্ফোরণ ঘটিয়ে ঘাঁটিতে প্রবেশ করার পথটা বন্ধ করা। দুটোর মধ্যে শেষটাই বেশি পছন্দ হলো। তাতে করে, যত ক্ষীণই হোক, বেঁচে যাবার একটা আশা থাকে। তবে এটোর খারাপ দিক হলো, সাবমেরিনগুলো অক্ষত অবস্থায় রক্ষা পেয়ে যাবে।

তারপর রানা ভাবল, এটাকে খারাপ দিক বলে মনে না করাই উচিত। প্রবেশপথ পরিষ্কার করে কমান্ডাররা সাবমেরিন নিয়ে সাগরে বেরিয়ে যাবে, এটা ঘটার সম্ভাবনা নেই বললেই চলে। ঘাঁটিতে ঢোকান বা বেরুবার নির্দিষ্ট একটা এঞ্জিনিয়ারিং পদ্ধতি আছে, প্রবেশপথ বিস্ফোরিত হলে সেই পদ্ধতিও অকেজো হয়ে যাবে, ফলে কমান্ডাররা সাবমেরিন নিয়ে বেরুতে পারবে না।

বরং কয়েকটা সাবমেরিন পেয়ে যাবে লেবানন। ওদের কোন সাবমেরিন নেই, কাজেই দরকারও।

এ-ধরনের আশা ও প্রত্যাশা নিয়ে ঘুমিয়ে পড়ল রানা। কিন্তু তারপরই, বোধহয় আধঘণ্টাও পেরোয়নি, গার্ডের চিংকার শোনা গেল, 'ফেটিগ!'

বিছানা ছাড়তে বাধ্য হলো ওরা। রানার হাতঘড়িতে তখন পাঁচটা। ডকে এসে দেখল ঘাঁটিতে ঢুকছে সাবমারসিবল বার্জ। বার্জটাকে এই প্রথম দেখছে রানা। ছোট একটা স্টীমারের মত দেখতে। এ-ধরনের কোস্টাল বার্জ টেমস নদীতে দেখেছে রানা, জ্বালানি তেল বহন করে। সাইপ্রাস আর তেল আবিবের মধ্যে আসা-যাওয়া করে এটা, প্রতি জার্নিতে লেবানন উপকূলের এই ঘাঁটিতে ঢোকে, প্রতিবার সাইপ্রাস আর তেল আবিবে নোঙর ফেলে খালি ট্যাঙ্ক নিয়ে। কোন সন্দেহ নেই, কাগজ-পত্র সবই ভুয়া বা জাল।

ছ'টার খানিক পর নিজেদের সেলে ফিরে এল ওরা। চোখ বুজে বিছানায় শুয়ে আছে রানা, গার্ড-রুম থেকে ভেসে আসা কাপ-পিরিচ ঠোকাঠুকির আওয়াজ শুনছে। ছ'টার দিকেই কফি দেয়া হয় ওদেরকে। চোখ বুজে চিন্তা করছে রানা। ঘাঁটির প্রবেশপথ বন্ধ করার সবচেয়ে ভাল উপায় হলো ডেপথ চার্জ। কিন্তু ডেপথ চার্জ কোথাও পাওয়া যাচ্ছে না। আরেকটা উপায় হলো, ইউ-টোয়েন্টিওয়ানের আফটার টর্পেডো ফায়ার করা। সাবমেরিনটা চার নম্বর ডকে পড়ে আছে। সাতটা ডকের ঠিক মাঝখানে চার নম্বর ডক, সাবমেরিনের পিছনটা সরাসরি মূল গুহার দিকে ফেরানো। কাজেই টর্পেডোটা আঘাত হানবে গুহার এমন একটা অংশে, যার ঠিক নিচেই রয়েছে জলময় প্রবেশপথ। গুহা ধসে পড়ার পরিমাণ যদি কমও হয়, তবু পরিষ্কার করানোর জন্যে ডাইভার দরকার হবে ওদের, তা না হলে রেললাইনের ওপর ক্রেডলটা সাবলীলভাবে আসা-যাওয়া করতে পারবে না। কাজটা শেষ করতে ডাইভারদের সময় লাগবে। এমন কি রেলপথও বেকে যেতে পারে, সোজা না করা পর্যন্ত ক্রেডল আসা-যাওয়া করতে পারবে না।

তবে সমস্যা আছে। টর্পেডোগুলো মাস্কাতা আমলের, রাশিয়ার তৈরি, ইসরায়েলিরা কিনেছে ব্ল্যাকমার্কেট থেকে। এগুলোর ব্যবহার আজকাল প্রায় উঠেই গেছে, কাজেই ট্রেনিঙের সময় রানা শেখেনি কিভাবে এসব অপারেট করতে হয়।

আরেকটা সমস্যা হলো, ডক গেটগুলো খোলা আর সাবমেরিনটাকে ভাসমান অবস্থায় থাকতে হবে। কিন্তু এই মুহূর্তে ওটা শুকনো একটা ডকে রয়েছে, ডকের পানি সরিয়ে ফেলা হয়েছে অনেক আগেই।

বাকি থাকল গানগুলো। ইউ-টোয়েন্টিওয়ানের আফটার সিক্স ইঞ্চ গান ভাল অবস্থাতেই আছে, তবে রানা নিশ্চিত নয় একটা ছয় ইঞ্চি শেল পাথরের কতটুকু ক্ষতি করতে পারবে। তাছাড়া, শেল পাবে কোথায় ও? গার্ডকেই বা ফাঁকি দেবে কিভাবে?

সেলের তালায় চাবি ঢোকানোর আওয়াজ হলো, দরজা খুলে ভেতরে মাথা গলাল একজন পেটি অফিসার। 'ডিউটি!' হাঁক ছাড়ল সে। তাড়াতাড়ি

কাপড় পরে নাস্তা সারল রানা, ইউ-টোয়েন্টিওয়ানের আফটার গান দখল করার উত্তেজনার প্রাণ মাথায় নিয়ে শুরু করল দিনের কাজ। প্রবেশপথ বন্ধ করার এটাই সবচেয়ে বাস্তবসম্মত পন্থা বলে ভাবছে ও। আজ বৃহস্পতিবার, ফেব্রুয়ারির উনিশ তারিখ। রুদ্ভো রবিবার, বাইশে ফেব্রুয়ারি, দুপুর দেড়টায়। এর মানে হলো সাবমেরিনগুলো ঘাঁটি ছেড়ে বেরিয়ে যাবে শনিবার রাতে। এখন থেকে শনিবার সন্ধ্যা পর্যন্ত ওর হাতে সময় আছে, এরই মধ্যে জেনে নিতে হবে গানগুলো কিভাবে কাজ করে, শেল হাতে পাবার উপায় কি ইত্যাদি। এ এক ভয়ঙ্কর দায়িত্ব। সারাক্ষণ চিন্তা করছে বলে কাজে টিল পড়ল, সেজন্যে বেশ কয়েকবার ধমকও খেতে হলো ওকে।

পুরোটা সকাল স্টীভিডর হিসেবে কাজ করতে হলো ওদেরকে। স্টোর বার্জ থেকে রসদ ও অন্যান্য মালামাল নামিয়ে ট্রলিতে সাজাতে হলো, ট্রলিগুলোকে ঠেলে ঘাঁটির বিভিন্ন স্টোর-রুমে পৌঁছে দিতে হলো, কিছু গেল প্রতিটি ডকের পিছনের স্টোর-রুমে, পরে ওখান থেকে সাবমেরিনে তোলা হবে। বাকিগুলো গেল আপার গ্যালারি দুটোর কয়েকটা স্টোরে, ঘাঁটির লোকজন ব্যবহার করবে। বার্জে আর স্টোর-রুমগুলোয় কাজ করছে প্রায় পঞ্চাশজনের মত লোক। রসদ চুরি হতে পারে, এ আশঙ্কা থাকায় গার্ডের সংখ্যা বাড়ানো হয়েছে। কাজ ছেড়ে এদিক ওদিক তাকানোর ফুরসতই পেল না রানা।

তবে লাঞ্চার পর ছোট্ট একটা সুযোগ পাওয়া গেল। চার নম্বর ডকে নিয়ে যাওয়া হলো ওদেরকে। এখানে কিছু লোক একটা মোবাইল অটোমেটিক ড্রিল নিয়ে কাজ করছে। আবর্জনা সরাবার জন্যে কোদাল আর ঝাড়ু দেয়া হলো ওদের। আসল ঘটনাটা কি ঘটছে বুঝতে রানার সময় লাগল না। চার নম্বর ডকের সাবমেরিন থেকে ফরওয়ার্ড গান সরিয়ে ফেলতে হবে, কারণ তা না হলে তুবড়ে যাওয়া ডেকপ্লেট মেরামত করা সম্ভব নয়। ফরওয়ার্ড গানও ক্ষতিগ্রস্ত হয়েছে, সেটারও মেরামতি দরকার। ওঅর্কশপ এঞ্জিনিয়াররা ডকসাইটেই সেটা মেরামত করবে। ওরা ওখানে পৌঁছানোর আগেই মাউন্টিং থেকে বোল্টগুলো খুলে ফেলা হয়েছে। তবে ডকসাইটে ওটাকে ঝোলাবার জন্যে একটা ডেরিক খাড়া করতে হবে। ডেরিকের একটা পা ডকের উল্টোদিকের গায়ে ঠেকিয়ে রাখা যাবে, কিন্তু ডেরিকের ছোট আরও দুটো পা স্থির রাখার জন্যে ডকের মেঝেতে গর্ত করতে হচ্ছে।

প্রথমে ছোট পকেটটা তৈরি করতে দশ মিনিট লাগল। গ্র্যানিট এখানে লোহার মতই শক্ত, ড্রিলের ডগা থেকে চারদিকে পাথরের টুকরো ছুটছে। কিন্তু দ্বিতীয় গর্তটা খুব সহজেই খোঁড়া গেল, কারণ ওখানে একটা ফল্ট বা ফাটল আছে, দেখে মনে হয় জায়গাটায় পাথরের স্তর বেশ নরমও। কোদাল দিয়ে আবর্জনা টেনে আনার সময় রানা লক্ষ করল, গর্ত থেকে আসলে লাইমস্টোন উঠে এসেছে। জিয়োলজিকাল ফরমেশন সম্পর্কে এক-আধটু যার ধারণা আছে তার কাছে ব্যাপারটা বেশ ইন্টারেস্টিং বলে মনে হবে। পাথরগুলো খুব ভালভাবে পরীক্ষা করল রানা। তাকরির উপকূলে প্রচুর খনি

আছে, যদিও বেশিরভাগই পরিত্যক্ত। এ-ধরনের দু'একটা পরিত্যক্ত খনিতে ঢুকেছেও রানা, টানেলের দেয়ালে ঠিক এই জাতের লাইমস্টোনই দেখেছে।

গর্তটা বেশ গভীর আর একটু লম্বা করে খোঁড়া হলো, ফলে পাথরের স্তরে ফাটলটা কোন দিকে গেছে আন্দাজ করতে সুবিধে হলো রানার। কৌতূহলই এই কাজে উৎসাহ যোগাল ওকে। মেইন গ্যালারি হয়ে উল্টোদিকের স্টোর গ্যালারির দিকে চলে গেছে ফাটলটা, ক্রমশ চওড়া হয়ে।

এরপর রানা গানের ওপর মনোযোগ দিল। ওরা আবর্জনা সরাবার কাজ সুষ্ঠুভাবে শেষ করল দেখে গার্ডরা খুশি, তারা এখন কৌতূহল নিয়ে গানটাকে ডকসাইটে ঝোলাবার কাজ দেখছে।

ডেরিকের লম্বা পা থেকে ঝুলছে ওটা, চেইনের শেষ মাথায়, ধীরে ধীরে নেমে আসছে ডকসাইটে, রানার কাছ থেকে মাত্র কয়েক ফুট দূরে। অস্ত্রটা পরীক্ষা করার যথেষ্ট সময় পাওয়া গেল। ব্রিচ মেকানিজম কিভাবে কাজ করে বুঝতে পারল ও, শুধু বুঝতে পারল না কিভাবে ফায়ার করা হয়। শেল হাতে পাওয়াটা এখনও একটা সমস্যা মনে হচ্ছে। অস্ত্রের নিচে কোথাও ম্যাগাজিন আছে, জানে ও, কিন্তু জানে না লিফট কিভাবে কাজ করে।

হঠাৎ রানার মনে পড়ল, যুবা বয়েসে লেবানীজ নৌ-বাহিনীতে কাজ করেছে হাদী।

‘তুমি জানো, কামানটা কিভাবে কাজ করে?’ নিচু গলায় জানতে চাইল ও।

রানার দিকে দ্রুত তাকাল হাদী। তারপর ভুরু কঁচকাল। ‘মনে হচ্ছে জানা উচিত,’ ধীরে ধীরে বলল। ‘কিন্তু কিছুই মনে পড়ছে না।’ এদিক ওদিক মাথা নাড়ল সে। এ-ব্যাপারে তার কোন আগ্রহ আছে বলে মনে হলো না।

কিভাবে ফায়ার করতে হয়, নিজের চেষ্টায় সেটা জানতে হবে রানাকে। ব্যারেলটাকে খুলতে দেখল ও, খুলতে আর বন্ধ করতে দেখল ব্রিচ, হ্যাডগিয়ারের সাহায্যে ফায়ারিং পজিশন অলটার করতে দেখল, কিন্তু তারপরও বুঝতে পারছে না কিভাবে ওটা ফায়ার করা হয়।

ঠিক এই সময় দূর থেকে কে যেন চিৎকার করে বলল, ‘ইমার্জেন্সী!’

ওদের দু'জন গার্ড অনিশ্চিত ভঙ্গিতে পরস্পরের দিকে তাকাল। চিৎকারটা আরও কাছে সরে এল, গলাটাও অন্য কোন লোকের। একটাই শব্দ, ‘ইমার্জেন্সী!’

সবাই যে যার কাজ ফেলে স্থির হয়ে গেছে, কান পেতে অপেক্ষা করছে। গ্যালারির পাথুরে মেঝেতে ভারী বুটের ছুটোছুটি ধ্বনিত-প্রতিধ্বনিত হচ্ছে। ডক সাইটেও অস্থির হয়ে উঠল লোকজন। চারদিক থেকে আরও লোক ছুটে আসছে। আবার সেই চিৎকার শোনা গেল, ‘ইমার্জেন্সী!’ তারপর বেজে উঠল কান ঝালাপালা করা বেল।

‘ইমার্জেন্সী অ্যালার্ম বেল!’ একজন এঞ্জিনিয়ার বলল, হতভম্ব দেখাচ্ছে তাকে।

আরেকজন এঞ্জিনিয়ার রুদ্ধশ্বাস জবাব দিল, 'হ্যাঁ, তারমানে অ্যাকশন স্টেশন!'

এরপর ডকসাইট থেকে সবাই গ্যালারির একটা প্রান্ত লক্ষ্য করে ছুটল। ওদের একজন গার্ডও পিছু নিল। দ্বিতীয় গার্ড ইতস্তত করে কি যেন বলল, ইঙ্গিতে ওদেরকে দেখিয়ে। কিন্তু প্রথম গার্ড থামল না।

ডকসাইট খালি হয়ে গেছে। রানা ও হাদীর সঙ্গে এখন মাত্র একজন গার্ড। এরকম সুযোগ আর পাওয়া যাবে কিনা সন্দেহ। হাদীর দিকে তাকাল রানা। নির্লিপ্ত, ঠাণ্ডা চেহারা, যেন অস্বাভাবিক যে ঘটনাটা ঘটছে সে-ব্যাপারে তার কোন ধারণাই নেই। গার্ড তাকিয়ে আছে ডকের শেষ মাথায় গ্যালারির দিকে, যদিও সেদিকে কাউকে দেখা যাচ্ছে না। আপার গ্যালারি দুটো থেকে শোরগোলের শব্দ ভেসে আসছে, কান পেতে শুনছে সে। অফিসাররা চিৎকার করে নির্দেশ দিচ্ছে, রাইফেলের বাঁট বাড়ি খাচ্ছে পাথরে, এ-সব রানাও শুনতে পাচ্ছে। গোটা ঘাঁটি জুড়ে এখনও চলছে লোকজনের ছুটোছুটি।

গার্ড নড়ছে না, এখনও ডকের শেষ মাথায় তাকিয়ে। ধীরে ধীরে গ্যাঙওয়ার দিকে সরে আসছে রানা, এইপথে সাবমেরিনে ওঠা যাবে। প্রায় পৌঁছে গেছে, এই সময় চোখের কোণ দিয়ে ওকে দেখে ফেলল গার্ড, চোখের পলকে কোমরের হোলস্টার থেকে হাতে চলে এল রিভলভারটা। 'হল্ট!'

গার্ডের ঠিক পিছনে রয়েছে হাদী। ব্যাপারটা কি স্রেফ কাকতালীয়? প্রবল এক উত্তেজনার মুহূর্তে রানা ভাবল, গার্ডকে কাবু করতে যাচ্ছে সে। তারপরই গ্যালারি থেকে ডকের শেষ মাথায় বেরিয়ে এল ছুটন্ত লোকজন। দুই সারিতে মার্চ করে ডকেই আসছে তারা। তারপর আরও কয়েকটা লাইন দেখা গেল, রেটিংরা অন্যান্য ডকের দিকে যাচ্ছে। ওদের গার্ডের পেশীতে টিল পড়ল।

সুযোগটা হাতছাড়া হয়ে যাচ্ছে।

রেটিংরা সবাই পুরোপুরি সশস্ত্র, প্রতি দলের সঙ্গে একজন করে অফিসার রয়েছেন। ইউ-টোয়েন্টিওয়ানের জুরাও এক লাইনে ফিরে এল। ইমার্জেন্সী অ্যালার্ম বেল বেজে ওঠার সঙ্গে সঙ্গে সবাইকে অস্ত্র নিয়ে যার যার কোয়ার্টারের বাইরে রিপোর্ট করতে হয়েছিল। এখন প্রত্যেকে তার সংশ্লিষ্ট ডকে ফিরে এসেছে, পরবর্তী নির্দেশের অপেক্ষায় থাকবে। প্রতি সাবমেরিন থেকে দশজন করে লোককে ইমার্জেন্সীর সময় বেস গার্ডদের সঙ্গে ডিউটি দিতে হয়। অ্যালার্মের শব্দ পাওয়া মাত্র গার্ড-রুমে রিপোর্ট করেছে তারা। শেষ সাবমেরিনটা ঘাঁটি ছেড়ে নিরাপদে বেরিয়ে না যাওয়া পর্যন্ত ঘাঁটি রক্ষার দায়িত্ব পালন করতে হবে তাদেরকে। সবগুলো সাবমেরিন চলে যাবার পর—তাতে কয়েক ঘণ্টা সময় লাগতে পারে, কারণ ডক জলমগ্ন করার জন্যে জোয়ারের অপেক্ষায় থাকতে হবে—ঘাঁটির অংশবিশেষ ধ্বংস করার দায়িত্বও তাদের। ঘাঁটিতে সাদ্দাম হোসেনের ছবি আছে, গোলা-বারুদ আর

আগ্নেয়াস্ত্রের বাক্সের গায়ে লেখাগুলো আরবী হরফে, এ-সব বেশিরভাগ রাশিয়ার তৈরি হলেও, লেখাগুলো পড়লে বোঝা যাবে সবই আরব-আমিরাত, সিরিয়া, লিবিয়া অথবা জর্দান থেকে এসেছে। এই কৌশলের একটাই কারণ, ঘাঁটির অস্তিত্ব যদি কোনদিন প্রকাশ হয়ে পড়ে তাহলে সবাই জানবে এটা ইরাকীদের ছিল। তাসত্ত্বেও, ঘাঁটিতে কিছু কিছু এমন জিনিস আছে যা দেখলে পরিষ্কার হয়ে যাবে এখানে ইসরায়েলিরা ছিল। শুধু ঘাঁটিতে নয়, সাবমেরিনগুলোতেও তা আছে। এগুলো ধ্বংস করাই তাদের কাজ, অচল সাবমেরিন সহ। সবশেষে তাদেরকে আত্মহত্যা করতে হবে। কোন অবস্থাতেই আত্মসমর্পণ করা যাবে না। এরা সবাই সুইসাইড স্কোয়াড-এর সদস্য, তাতে কোন সন্দেহ সেই। আত্মহত্যাও এমনভাবে করতে হবে, একটা লাশও যাতে সনাক্ত করা না যায়। কয়েকশো টন হাই এক্সপ্লোসিভ আর বিপুল পরিমাণ ফ্যুয়েল অয়েল বিস্ফোরিত হলে সনাক্তকরণের কোন প্রশ্ন থাকে না।

একটা আন্ডারগ্রাউন্ড ঘাঁটিতে এ-ধরনের কঠিন ইমার্জেন্সী রেগুলেশন কেন দরকার, রানা বুঝতে পারল না। এটা তো পরিষ্কারই যে আন্ডারগ্রাউন্ডের প্রবেশপথের ওপর পাহাড়-প্রাচীর কামানের গোলায় ধসিয়ে দেয়া ছাড়া অন্য কোনভাবে সাগর থেকে এই ঘাঁটি আক্রমণ করা সম্ভব নয়। এরকম ভাবারও কোন কারণ নেই যে ঘাঁটি ছেড়ে চলে যাবার সময় সাবমেরিনগুলোকে লেবানীজ বা মিশরীয় টর্পেডো বোট দেখে ফেলবে, তারপর টর্পেডো ছুঁড়ে ডুবিয়ে দেবে, কারণ বেরিয়ে যাবার সময় প্রতিটি সাবমেরিনের সঙ্গে একটা করে বয়া থাকে, হলিজ গিয়ারের সঙ্গে অটোমেটিক কাপলিং-এর দ্বারা যুক্ত সাবমেরিন সারফেসে না উঠেও ওটাকে রিলিজ করে দিতে পারে—অর্থাৎ ঘাঁটি থেকে বেরিয়েই সারফেসে ওঠার দরকার নেই, পানির নিচে দিয়ে ইচ্ছে মত যতদূর খুশি চলে যেতে পারবে। তার ওপর একজন লুক-আউটও আছে। আপার গ্যালারির একটা গুহা চলে গেছে পাহাড়-প্রাচীরের কিনারা পর্যন্ত, রানা ও হাদীর সেলের ঠিক পিছন দিয়ে। ঘাঁটির বাইরে আশপাশে কোন যুদ্ধ-জাহাজ আছে কিনা সাবমেরিন কমান্ডারকে তা আগেই জানিয়ে দিতে পারে লুক-আউট।

এর তাৎপর্য হলো, সাগর নয়, ডাঙা থেকে আক্রমণের আশঙ্কা করা হচ্ছে। প্রশ্ন হলো, ডাঙার দিক থেকে যদি ঘাঁটিতে ঢোকার কোন পথ থাকে, তাহলে বেরিয়ে যাবার কোন পথ কেন থাকবে না? চিন্তাটা রানার মনে আশা ও পুলক জাগিয়ে তুলল। এখন জানার চেষ্টা করতে হবে সেই পথটা কোথায়।

ওদের দ্বিতীয় গার্ড ফিরে এল। ‘ওদেরকে ওদের সেলে রেখে আসতে হবে,’ প্রথম গার্ডকে বলল সে। ছুটোছুটি করায় ঘেমের গেলো লোকটা, রীতিমত হাঁপাচ্ছে।

‘কি ঘটল?’ প্রথম গার্ড জানতে চাইল।

‘জানি না...এখনও কিছু ঘটেনি। মিনিট কয়েক আগে গার্ড-রুমের ইমার্জেন্সী অ্যালার্ম বেজে উঠেছিল। কি ঘটেছে দেখার জন্যে আটজনকে পাঠানো হয়েছে। এসো, আগে ওদেরকে সেলে ভরি। তারপর গার্ড-রুমে রিপোর্ট করতে হবে। ইমার্জেন্সী গার্ডদের তলব করা হয়েছে, সবাইকে স্ট্যান্ড বাই অবস্থায় থাকতে বলা হয়েছে।’

ওদেরকে মার্চ করতে বলা হলো। ইতিমধ্যে আবার ডকসাইট খালি হয়ে গেছে। ইউ-টোয়েনটিওয়ানের জুরা নিজেদের স্টেশনে চলে গেছে। জোয়ার শুরু হয়েছে, কলকল ছলছল শব্দে ভরে উঠছে ডক। কমান্ডার আর ফাস্ট অফিসার ব্রিজে দাঁড়িয়ে। সাগরে বেকবোর জন্যে এখনও তৈরি নয় সাবমেরিন, তবু কমান্ডরের নির্দেশে বেরিয়ে যাবার প্রস্তুতি চলছে।

গ্যালারিতে নামার ও র‍্যাম্প বেয়ে ওঠার সময় নিজেদের মধ্যে কথা বলছে গার্ডরা, কান পেতে শুনছে রানা।

প্রথম গার্ড, ‘আমরা কি আক্রান্ত হয়েছি?’

দ্বিতীয় গার্ড, ‘আমি জানি না।’

প্রথম গার্ড, ‘কিন্তু তাহলে এত ছুটোছুটি কিসের? অ্যালার্মটাই বা কে বাজাল?’

দ্বিতীয় গার্ড, ‘এখনও কেউ কিছু বলতে পারছে না। তবে তদন্ত করে দেখার জন্যে লোক পাঠানো হয়েছে।’

প্রথম গার্ড, ‘ব্যাপারটা তাহলে হয়তো ফলস অ্যালার্ম?’

দ্বিতীয় গার্ড, ‘হতে পারে।’

প্রথম গার্ড, ‘ধরো আক্রান্ত হলাম—তখন আমরা কি করব?’

দ্বিতীয় গার্ড, ‘আমি কে—কমান্ডার আয়ান পেরেজ? আমাকে কেন জিজ্ঞেস করছ!’

প্রথম গার্ড, ‘কি ঘটবে আমি জানি। আমরা সাবমেরিন সার্ভিসের লোক নই, আমাদেরকে আনা হয়েছে সুইসাইড স্কোয়াড থেকে। সবাইকে পালাবার সুযোগ করে দেয়াই আমাদের কাজ। সবাই চলে গেলে এগজিট গ্যালারি উড়িয়ে দেব আমরা, নিজেরা ভেতরে আটকা পড়ব।’

ওদেরকে সেলে ঢুকিয়ে তালা লাগিয়ে দেয়া হলো। বুটের শব্দ শোনা গেল, সেলের উল্টোদিকের গার্ড-রুমে যাচ্ছে গার্ডরা। তারপর অপার্থিব একটা নিশ্চরতা নেমে এল গোটা ঘাঁটিতে। ইউ-টোয়েনটিওয়ান রওনা হবার প্রস্তুতি নিচ্ছিল, দেখে এসেছে রানা, তা বোধহয় স্থগিত করা হয়েছে। এ সম্পূর্ণ নতুন এক অভিজ্ঞতা—কোথাও কোন শব্দ নেই, নেই কোন নড়াচড়া। সমস্ত মেশিনারি, এমনকি জেনারেটরগুলোও থামিয়ে দেয়া হয়েছে। এক ধরনের হতাশায় ছেয়ে গেল রানার মন। উত্তেজক কিছু একটা ঘটছে। এমন কিছু, যা ওদের জীবনের ওপর গুরুতর প্রভাব ফেলতে পারে। অথচ সেলের ভেতর আটকা পড়ে আছে ওরা, জানার উপায় নেই কি ঘটছে। ব্যাপারটা পুরোপুরি অ্যান্টি-ক্লাইমেক্স।

হাদীর দিকে তাকান রানা, বিছানায় পাথুরে মূর্তির মত বসে আছে। তবে সে-ও বোধহয় কান পেতে আছে, কিছু শুনতে পাবার আশায়। হয়তো বুঝতে পারল রানা তাকিয়ে আছে। ঘাড় ফিরিয়ে জানতে চাইল, 'কি ঘটছে, স্যার?'

'বুঝতে পারছি না,' জবাব দিল রানা। সেলের মেঝেতে পায়চারি শুরু করল ও। কিন্তু জায়গাটা এত ছোট, খানিক পর ফিরে এসে বিছানায় বসে পড়ল আবার।

সময় বয়ে চলেছে। নিস্তব্ধতা কাটছে না। ওরাও নড়ছে না। এভাবে পনেরো মিনিট পার হলো।

কল্পনার চোখে কয়েকটা দৃশ্য দেখছে রানা। ঘাঁটির পিছন দিকে কোথাও আন্ডারগ্রাউন্ড টানেল আছে। সেই টানেল ধরে ভেতরে ঢুকতে চেষ্টা করছে লেবানীজ আর্মির লোকজন। গার্ডরা তাদেরকে ঠেকাবার জন্যে যুদ্ধ করছে। এই ফাঁকে সাবমেরিনগুলো একে একে বেরিয়ে যাবার প্রস্তুতি নিচ্ছে, সময়টা এখন দিন হলেও। ডকগুলোয় পাঁচটা সাবমেরিন আর একটা বার্জ আছে, বেরিয়ে যেতে কতক্ষণ সময় নেবে ওগুলো? তিন ঘণ্টা? চার ঘণ্টা? তারপর কি ঘটবে? ওরা কি ঘাঁটিটা পুরোপুরি ধ্বংস করে দেবে?

অটুট নিস্তব্ধতা স্নায়ুর ওপর ভারী বোঝার মত চেপে বসছে।

তারপর হঠাৎ কয়েকজনের গলা শোনা গেল। একটা দরজা বন্ধ হবার শব্দ ভেসে এল। তারপর আবার সেই নিস্তব্ধতা। আরও দশ মিনিট পার হলো। গার্ড-রুমের দরজা খোলার আওয়াজ পেল রানা, বুট পায়ে কারা যেন ছুটছে গ্যালারির দিকে। কিছুক্ষণের মধ্যেই বহু লোকের মৃদু গুঞ্জন ভেসে এল দূর থেকে। তারপর বুটের শব্দ। আবার চালু হয়ে গেল জেনারেটর। মিনিট পাঁচেকের মধ্যে ঘাঁটির পরিবেশ স্বাভাবিক হয়ে উঠল।

'ব্যাপারটা কি ছিল বোঝা গেল না,' বলল রানা, কৌতূহলে মরে যাচ্ছে। 'হয়তো ফলস অ্যালার্ম। কিংবা রিহার্সেল।'

হাদী কথা বলল না, তবে কান পেতে কি যেন শোনার চেষ্টা করছে। রানার ইচ্ছে হলো কথা বলে তার মনটা হালকা করে, কিন্তু শুরু করেও থেমে গেল, হাদী যেন এ জগতেই নেই।

চুপচাপ বসে থাকল দু'জন। সাড়ে চারটের একটু পর গিল খুলে গেল। ভেতরে কেউ তাকাল, মুহূর্তের জন্যে রানা শুধু তার নাক আর চোখ দেখতে পেল, আবার বন্ধ হয়ে গেল গিল। বাইরে পাথুরে মেঝেতে বুটের শব্দ, ওদের ডান দিকের সেলের দরজা খুলল ও বন্ধ হলো। কারা যেন ফিসফাস করছে, কিন্তু পাথুরে দেয়াল এত নিরেট আর মোটা যে ভাষাটা ধরতে পারল না। ডান দিকের সেলের দরজা বন্ধ হবার আওয়াজটা খুব জোরাল লাগল কানে, তালায় চাবি ঘোরানোর শব্দও শোনা গেল। একটু পর গার্ড-রুমের দরজাও বন্ধ হলো।

আরও পনেরো মিনিট কাটল। হাদীর মধ্যে একটা অস্থিরতা দেখা যাচ্ছে।

একবার রানার মতই সেলের মেঝেতে পায়চারি শুরু করল সে; কিন্তু ছোট্ট জায়গায় প্রকাণ্ড শরীর নিয়ে হাঁটতে অসুবিধে হওয়ায় আবার বিছানায় বসে পড়ল। ইতিমধ্যে রানা আরেকটা সম্ভাবনা নিয়ে ভাবছে। ঘাঁটিতে বিদ্রোহ দেখা দেয়নি তো? ব্যাপারটা অসম্ভব নয়। ঘাঁটির লোকজন নিরাপদ বোধ করছে না। কেউ তারা খুশি নয়। ইউ-ফরটিওয়ানের রওনা হবার মুহূর্তটা মনে পড়ে গেল ওর। কমান্ডার পরিস্থিতিটা কোন রকমে সামাল দিতে পেরেছিল।

তবে বিদ্রোহ না করার পিছনেও একটা কারণ আছে। তা হলো, গত কয়েকদিন ধরে সবাই খুব উত্তেজনার সঙ্গে অপেক্ষা করছে বড় অপারেশনটার জন্যে—ব্রিটিশ, আমেরিকান ও জাতিসংঘের জাহাজ তিনটেকে ডুবিয়ে দিয়ে মধ্যপ্রাচ্যে যুদ্ধের আগুন জ্বালিয়ে দেয়া হবে। এ-ধরনের ভয়ঙ্কর ও গুরুত্বপূর্ণ কোন অপারেশনের আগে বিদ্রোহ করার কথা নয়। না।

সম্ভাবনাটা বাতিল করে দিল রানা, আর ঠিক সেই মুহূর্তে বিস্ফোরণের ভেঁতা একটা আওয়াজ ভেসে এল দূর থেকে। দূরে হলেও, যে পাথর কৈটে ওদের সেল তৈরি করা হয়েছে সেটা কেঁপে উঠল। পরমুহূর্তেই আরেকটা বিস্ফোরণ ঘটল। তারপর আবার সব নিস্তব্ধ। দু'জনেই ওরা নিজেদের অজান্তে লাফ দিয়ে দাঁড়িয়ে পড়েছিল। ঘাঁটির লোকেরা কি সাবমেরিনগুলোকে বাতিল লোহায় পরিণত করছে? আপন মনে মাথা নাড়ল রানা। দুটো সাবমেরিন ধ্বংস করার জন্যে বিস্ফোরণ ঘটানো হলে তার আওয়াজ আরও অনেক গুণ বেশি হত। অ্যামুনিশন স্টোরেও আগুন দেয়া হয়নি। আওয়াজ দুটো অনেক দূর থেকে এসেছে। তাহলে কি সাগর থেকে ঘাঁটির প্রবেশমুখে কামানের গোলা ছোঁড়া হয়েছে?

গার্ড-রুমের দরজা খোলা হলো, পায়ের শব্দ পাওয়া যাচ্ছে। তারপর ওদের বাম দিকের সেলের দরজা খোলা হলো। কারা যেন ফিসফাস করছে। সেলটার দরজা বন্ধ হলো, তালাও দেয়া হলো, পায়ের আওয়াজ ফিরে এল গার্ড-রুমের দিকে। আবার নীরব হয়ে গেল আশপাশের পরিবেশ। উদ্বেগে ক্লান্ত হয়ে পড়ছে রানা। বিছানায় বসার জন্যে নিজের ওপর জোর খাটাতে হলো, উত্তেজনা নিয়ন্ত্রণে রাখার চেষ্টা করছে।

হাদী দরজার কাছে দাঁড়িয়ে। মুখ তুলে তার দিকে তাকাল রানা। স্থির হয়ে আছে হাদী, বিশাল শরীর দরজার গায়ে হেলান দেয়া। তবে চেহারায়ে জ্যান্ত ভাব, নিশ্চাণ মূর্তির মত লাগছে না। রানা বুঝতে পারল, কি যেন শোনার চেষ্টা করছে সে। কান পাতল ও। কিন্তু কিছু শুনতে পেল না। বিছানায় ফিরে এসে দেয়ালে কান ঠেকাল হাদী। দেখাদেখি রানাও তাই করল। কিন্তু তবু কিছু কানে আসছে না। নিজের বিছানায় ফিরে এল ও, ভাবছে হাদীকে আর কতক্ষণ এই টেনশনে ভুগতে হবে। এভাবে চলতে থাকলে সে না পুরোপুরি পাগল হয়ে যায়।

একটা ম্যাগাজিন তুলে নিয়ে পড়তে শুরু করল রানা। কিন্তু পড়ায় মন বসাতে পারছে না। মাঝে মধ্যে চোখ তুলে তাকাচ্ছে। হাদী এখনও পাথুরে

দেয়ালে কান ঠেকিয়ে অপেক্ষা করছে।

এক সময় ম্যাগাজিন রেখে দিল রানা। ‘কিছু শুনছ?’ জানতে চাইল।

‘না। আপনি, স্যার?’

মাথা নাড়ল রানা। আবার ম্যাগাজিনটা তুলে নিল।

পাঁচ মিনিট পর নক হলো দরজায়। চোখ তুলল রানা। ওখানে দাঁড়িয়ে রয়েছে হাদী, আঙুলের উল্টোপিঠ দিয়ে ড্রাম বাজাচ্ছে দরজায়। বাইরের গ্যালারিতে পায়ের শব্দ হলো। থেমে গেল হাদী। গার্ড-রুমের দরজা বন্ধ হবার শব্দ শুনে আবার শুরু করল।

‘হাদী, এখানে এসে বসো, তোমাকে আমি একটা গল্প পড়ে শোনাই,’ বলল রানা।

জবাব না দিয়ে হাত লম্বা করল হাদী, নিজের বিছানায় পড়ে থাকা প্লেট থেকে একটা চামচ তুলে নিল। এবার ওই চামচ দিয়ে গ্রিলের গায়ে বাড়ি মারতে শুরু করল সে। তার এই পাগলামি রানার স্নায়ুতে আঘাত করছে।

‘কি বললাম, এদিকে এসে বসো,’ বলল রানা।

ঘাড় ফিরিয়ে রানার দিকে তাকাল হাদী। বক্ত্রিশ পাটি দাঁত বের করে নিঃশব্দে হাসছে। ‘স্যার,’ জিজ্ঞেস করল সে, ‘আপনি যে পত্রিকার রিপোর্টার, কি যেন নাম সেটার?’

‘মর্নিং নিউজ,’ বলল রানা। ‘কেন?’

কিন্তু জবাব না দিয়ে আবার সে গ্রিলে চামচ ঠুকতে শুরু করল, তবে এবার মৃদু শব্দে। তারপর হঠাৎ থেমে গেল, কুকুরের মত মাথাটা একদিকে কাত করে কি যেন শোনার চেষ্টা করছে।

সামান্য হলেও নার্ভাস বোধ করছে রানা। রাতের খাবার আসতে আরও দু’ঘণ্টা বাকি। তার আগে ডাক্তারকে খবর পাঠানো সম্ভব বলে মনে হয় না।

এই সময় হঠাৎ ওর দিকে ঘাড় ফেরাল হাদী। ‘এখানে একটা পেন্সিল আছে,’ বলল সে। ফতুয়ার পকেট থেকে দেড় ইঞ্চি লম্বা একটা পেন্সিল বের করে ওর দিকে ছুঁড়ে দিল সে। ‘আমি যা বলব, লিখুন।’ গ্রিলে আবার চামচ ঠুকতে শুরু করল। খানিক পর থামল, কান পেতে আছে। ‘আ-মি,’ ফিসফিস করল, ‘এ-খা-নে বিরতি এ-সে-ছি বিরতি—,’ বানান করে করে শব্দগুলো উচ্চারণ করছে সে, ধীরে ধীরে, মাঝে মধ্যে দুটো হরফের মাঝখানে দীর্ঘ বিরতি নিচ্ছে। ‘স-ঙ্গে বিরতি মা-নু-ষ বিরতি আ-ছে।’ লোহার গ্রিলে আবার চামচ ঠুকল সে। ‘বা-তি-ল বিরতি তি-ন-জ-ন বিরতি মা-ই-না-র—’

রানা নিখোঁজ হবার তিনদিন পর তাকরির উপকূলে পৌঁছুল শায়লা শারমিন, রানা এজেন্সির বৈরুত শাখা থেকে। উপকূলে আসলে কি ঘটেছে সে-সম্পর্কে একটা রিপোর্ট বৈরুতে থাকতেই পেয়েছে সে, লেবানীজ নৌ-বাহিনীর হেডকোয়ার্টারের সঙ্গে যোগাযোগ করে।

লেবানীজ নৌ-বাহিনী আগেরই খবর পেয়েছিল যে বিদেশী কোন রাষ্ট্রের

একটা সাবমেরিন উপকূলে ভিড়বে, উদ্দেশ্য সম্ভবত একজন স্পাইকে তীরে পৌঁছে দেয়া। সাবমেরিনটার অপেক্ষায় একটা লেবানীজ টর্পেডো বোট উপকূলে অপেক্ষা করছিল। সাবমেরিন পানির ওপর মাথা তুলেই একটা রাবার বোট ছেড়ে দেয়। টর্পেডো বোট রাবার বোটকে ধাক্কা দেয়ার চেষ্টা করে, একই সঙ্গে ফায়ার ওপেন করে সাবমেরিনকে লক্ষ্য করে। সাবমেরিন থেকেও গুলি করা হয়। রাবার বোটকে ধাক্কা মারা সম্ভব হয়নি, আরোহীরা সাবমেরিনে উঠে পড়ে। টর্পেডো বোট থেকে এবার একটা টর্পেডো ছোঁড়া হয়, কিন্তু লাগাতে পারেনি। সাবমেরিন তলিয়ে যায়। সঙ্গে সঙ্গে ছুটে এসে ওই জায়গায় ডেপথ চার্জ করে টর্পেডো বোট। কিছুক্ষণ পর পানিতে তেল ভেসে উঠতে দেখে জুরা ধরে নেয় সাবমেরিন ধ্বংস হয়ে গেছে। তীরে সাবমেরিনের অপেক্ষায় ছিল মাসুদ রানা নামে একজন মিশরীয় রিপোর্টার ও স্থানীয় জেলে আল হাদী। দু'জনেই তারা নিখোঁজ হয়েছে।

তাকরিরে এসে দু'দিন তদন্ত চালিয়েই রিপোর্টে কোথায় ভুল আছে ধরে ফেলল শারমিন। সাবমেরিনটা কাউকে নামাতে আসেনি, বরং আগের রাতে নামানো এক লোককে তুলে নিতে এসেছিল। তথ্যটা সে কোস্টগার্ড শমসের লিবানের স্ত্রীর কাছ থেকে পেল। শমসের লিবানই নৌ-বাহিনী হেডকোয়ার্টার বৈরুতকে সাবধান করে দিয়েছিল। তার স্ত্রীর কাছ থেকে আরও জানা গেল, রানা ও হাদী মুয়াক্কা খাঁড়ির মুখে, পাহাড়-প্রাচীরের মাথায় অপেক্ষা করছিল, আগের রাতে সাবমেরিন থেকে নামা বিদেশী লোকটাকে ফিরতে দেখলে পাকড়াও করার উদ্দেশ্যে। স্থানীয় পুলিশের ধারণা, দু'জনেই ধরা পড়ে গেছে সাবমেরিন থেকে নেমে আসা লোকজনের হাতে। নিশ্চয় সাবমেরিনেই তাদেরকে তোলা হয়। পুলিশ ও স্থানীয় লোকজন সন্দেহ করছে, ডেপথ চার্জের ফলে সাবমেরিনটা ধ্বংস হয়নি।

সাবমেরিনের রাবার বোট যেখানে ভিড়েছিল, মুয়াক্কা খাঁড়ির সেই জায়গাটা দেখল শারমিন। পাহাড়ের উল্টোদিকের ঢালে জেলেদের গ্রামেও গেল, দেখে এল দোস্তানা নামের কটেজটা। প্রথম রাতে সাবমেরিন থেকে নেমে আসা লোকটা এই দোস্তানা কটেজটা কোথায় জানতে চেয়েছিল রানার কাছে।

শমসের লিবান টর্পেডোবোটে ছিল, এখন সে হাসপাতালে। সাবমেরিনের গোলায় ক্ষতবিক্ষত হয়ে যায় টর্পেডোবোট, ডুবতে ডুবতে কোন রকমে টিকে গেছে। শমসের লিবান এমন শক পেয়েছে, কোন কথাই বলতে পারছে না। ডাক্তাররা বলছেন, সে হয়তো জীবনে আর কথাই বলতে পারবে না। রানা আর হাদী দ্বিতীয় রাতে যেখানে অপেক্ষা করছিল সেই জায়গাটা দেখে এসেছে শারমিন। মাটিতে ধস্তাধস্তির চিহ্ন দেখে তারও ধারণা হলো, রানা ও হাদীকে বন্দী করে সাবমেরিনের একটা বোটে তোলা হয়, বোটটা সাবমেরিনে পৌঁছতেও পারে। তারপর জানা গেল ওটা ছিল কলাপসিবল রাবার বোট, ঘটনার পরদিন উপকূল থেকে কয়েক মাইল দূরে পাওয়া গেছে।

ঘটনার দিন রাতেই দোস্তানার ভাড়াটে জামালু দীনকে গ্রেফতার করা হয়েছে। বছর দুই হলো তাকরির উপকূলে আছে সে। বৈরুতের একটা ব্যাঙ্কে চাকরি করত, ওই বছর দুয়েক আগেই অবসর নিয়েছে। স্থানীয় লোকজনের কাছ থেকে জানা গেল প্রায়ই সে দোস্তানা ছেড়ে কোথায় যেন চলে যেত, ফিরতে অনেক সময় বিশ-পঁচিশ দিন লেগে যেত। স্থানীয় নয়, এমন অনেক লোক তার সঙ্গে দেখা করতেও আসত দোস্তানায়।

স্থানীয় পুলিশ জামালু দীনকে গ্রেফতার করে বৈরুতের সেন্ট্রাল জেলে পাঠিয়ে দিয়েছে, সেখানে তাকে জেরা করেছে লেবানীজ ইন্টেলিজেন্স। রানা এজেন্সির বৈরুত শাখা থেকে টেলিফোনে রিপোর্ট পেল শারমিন, জামালু দীন কোন তথ্য দিতে রাজি হয়নি। তবে ইন্টারোগেশন এখনও চলছে।

সব মিলিয়ে পরিস্থিতি খুবই হতাশাবাঞ্জক। শারমিনের তদন্ত এগোতে চাইছে না। লেবানীজ ইন্টেলিজেন্সে লোকবল এতই কম যে তাকরিরে তারা নিজেদের কাউকে পাঠাতে পারছে না। স্থানীয় পুলিশ সাহায্য করেছে তাকে, কিন্তু তা যথেষ্ট বিবেচিত হচ্ছে না। শারমিন অবশ্য হাল ছাড়তে রাজি নয়, তদন্ত চালিয়ে যাচ্ছে। জামালু দীনকে বৈরুতে পাঠিয়ে দেয়া হলেও, গত পাঁচ দিন ধরে তার সম্পর্কে তথ্য সংগ্রহের আশায় গোটা এলাকা চষে ফেলছে সে।

তারপর এক হোটেলের একজন ওয়েটার ওকে এমন একটা তথ্য দিল, রীতিমত উল্লসিত বোধ করল শারমিন। হোটেলটার নাম আল হাফা কফি হাউস। এখানে প্রায়ই আসা-যাওয়া করত জামালু দীন। খুব ধনী এক ভদ্রলোক বৈরুত বা অন্য কোন বড় শহর থেকে এখানে আসত তার সঙ্গে দেখা করার জন্যে। ভদ্রলোকের নাম হুসাফ জেরোম। ব্যস, এইটুকুই, ওয়েটার এর বেশি কিছু বলতে পারল না। শারমিন তার কাছ থেকে হুসাফ জেরোমের চেহারার বর্ণনা জেনে নিল।

পরদিন স্থানীয় পুলিশ স্টেশনে এসে ইন্সপেক্টর কায়সুল কারাম-এর সঙ্গে দেখা করল শারমিন। হুসাফ জেরোমের চেহারার বর্ণনা শুনে উত্তেজিত হয়ে উঠল ইন্সপেক্টর। তবে মুখ খোলার আগে খবর পাঠাল 'দ্য ডেইলি লেবানন'-এর স্থানীয় সংবাদদাতা জাকির হোসেনকে। ইন্সপেক্টরের চিঠি পেয়ে আধ ঘণ্টার মধ্যে পুলিশ স্টেশনে হাজির হলো জাকির হোসেন, বগলদাবা করে কয়েকটা পুরানো খবরের কাগজ নিয়ে এসেছে।

পরিচয় পর্ব শেষ হতেই পরিস্থিতিটা ব্যাখ্যা করল ইন্সপেক্টর কায়সুল কারাম। তারপর জিজ্ঞেস করল, 'আপনার কি মনে পড়ে, হুসাফ জেরোম নামে এক ভদ্রলোক কাফায় একটা টিন মাইন কিনেছিলেন? বছর দুই আগের ঘটনা, আপনাদের পত্রিকায় সম্ভবত খবরটা বেরিয়েছিল, ভদ্রলোকের ছবি সহ।'

স্থানীয় সংবাদদাতা পুরানো কাগজ ঘেঁটে একটা কপি আলাদা করল। দেখা গেল প্রথম পৃষ্ঠাতেই খবরটা বেরিয়েছিল, হুসাফ জেরোমের ছবি সহ।

ভদ্রলোকের কোম্পানীর নাম ছিল জেরোম মাইন লিমিটেড। তাকরির উপকূলে, কাফা এলাকায়, একটা টিন মাইন কেনেন তিনি।

জাকির হোসেন জানাল, 'কিন্তু সে টিন মাইন তো আঠারো মাস পর বন্ধ হয়ে গেছে।'

'বন্ধ হয়ে গেছে? কেন?' জানতে চাইল ইন্সপেক্টর।

জাকির হোসেন বলল, 'তা বলতে পারব না। তবে ব্যাপারটা রহস্যময়ই বটে, কারণ জেরোম মাইন কোম্পানী লিমিটেড লালবাতি জ্বলেছে বলে তো শোনা যায়নি।'

শারমিন বলল, 'আমাকে একটু সাহায্য করুন, প্লীজ। আমাকে জানান মাইনটা কাফার ঠিক কোথায়, আর বিশ্বস্ত ও পরিশ্রমী দু'তিনজন মাইনারের নাম-ঠিকানা দিন। মাইনটার ভেতর আমি একবার ঢুকতে চাই।'

জাকির হোসেন হাঁ করে তাকিয়ে আছেন দেখে ইন্সপেক্টর কায়সুল কারাম বলল, 'মিস শারমিনের ধারণা, যে বিদেশী সাবমেরিনটাকে টর্পেডোবোট ডেপথ চার্জ করে ডুবিয়ে দেয়া হয়েছে বলে কাগজে লেখালেখি হচ্ছে তা আসলে ডোবেনি।'

'তা যদি না-ও ডুবে থাকে, তার সঙ্গে মাইনটার কি সম্পর্ক?' জানতে চাইল জাকির হোসেন।

শারমিন বলল, 'দেখুন, লেবানন সরকারের অনুমতি নিয়ে আমি একটা কনফিডেনশিয়াল ব্যাপারে এই এলাকায় তদন্ত করতে এসেছি। আপনাদের সব প্রশ্নেরই উত্তর আমি দেব, তবে এখনি নয়। আমার মনে একটা সন্দেহ দেখা দিয়েছে, এখনও জানি না সেটা ভিত্তিহীন কিনা, কাজেই এখনি আমি কিছু বলতে পারব না।'

সংবাদদাতা ও ইন্সপেক্টর, দু'জনেই তার এই ব্যাখ্যা মেনে নিয়ে সাহায্য করতে রাজি হলো। ইন্সপেক্টর তিনজন মাইনারের নাম বলল—আহুদ, সাজিদ আর সুলতান। আরও জানাল, 'তিনজনই প্রাক্তন সৈনিক, সৎ ও বিশ্বস্ত, ওদের নামে কোন পুলিশ রেকর্ড নেই।'

দু'দিন পর আহুদকে নিয়ে কাফায় চলে এল শারমিন। খুসলান আর আসলান, এই দুই খনির মাঝখানে জেরোম টিন মাইন। সবগুলোই পরিত্যক্ত। এলাকায় কোন লোকবসতি নেই।

প্রথম দিনটা টিন মাইনের আশপাশে ঘুরে বেড়াল ওরা। পাহাড়-প্রাচীরের মাথার কাছাকাছি সরু একটা কার্নিসের ওপর মাঝাতা আমলের রেললাইন ছিল এককালে, তার কিছু কিছু চিহ্ন এখনও রয়ে গেছে আধ মাইল জুড়ে। পাহাড়-প্রাচীরের একশো গজ সামনে টিন মাইনের মুখ অর্থাৎ মেইন শ্যাফট, কাজেই শারমিনের ধারণা হলো রেললাইনটা এই মাইন কোম্পানীরই ছিল। মেইন শ্যাফটের কাছে পাথুরে পাঁচিল আছে, দেখে খুব পুরানো মনে হলো না। পাঁচিলটা তুলে মাইনে ঢোকার পথ বন্ধ করে দেয়া হয়েছে।

পরদিন আবার এল ওরা। রশির মই বেয়ে পাঁচিলের মাথায় উঠল

শারমিন। শোয়া অবস্থায় উঁকি দিয়ে তাকাতে দেখতে পেল উল্টোদিকে পাঁচিলটা একশো ফুট খাড়া নেমে গেছে। তারপর শুরু হয়েছে টানেল। টানেলের ভেতর থেকে অদ্ভুত একটা শব্দ ভেসে আসছে—যেন ভেতরে কোথাও জলপ্রপাত আছে।

এদিকের পাহাড়-প্রাচীরের গায়ে পাথুরে পাঁচিল শুধু এই একটা নয়, বহু। অর্থাৎ অনেকগুলো খনিই পরিত্যক্ত ঘোষণার পর পাঁচিল তুলে ভেতরে ঢোকান পথ বন্ধ করে দেয়া হয়েছে। তবে আহদের মুখে শারমিন শুনল, জেরোম টিন মাইন ছাড়া বাকি সবগুলো পরিত্যক্ত মাইন বিস্ফোরণের সাহায্যে ভরাট করে ফেলা হয়েছে। কি কারণে কে জানে জেরোম টিন মাইন ভরাট করা হয়নি।

পরদিন হোটেলে শারমিনের সঙ্গে দেখা করল স্থানীয় সংবাদদাতা জাকির হোসেন। গত দু'দিনে জেরোম টিন মাইন সম্পর্কে প্রচুর তথ্য সংগ্রহ করেছে সে। তার কথা থেকে জানা গেল, টিন মাইনটার নাম ছিল দর্দ মেসি। স্থানীয় লোকজন ওটাকে ভিজ়ে মাইন বলে। বহু বছর আগে দর্দ মেসিতে একটা ধস নামে, তাতে খনির ত্রিশজন শ্রমিক মারা যায়। সেই থেকে প্রায় বিশ বছর খনিটা পরিত্যক্ত অবস্থায় পড়ে ছিল। দু'বছর আগে দর্দ মেসি কিনে নেন হুসাফ জেরোম। ভদ্রলোক লেবানীজ, তবে ইহুদি।

তার সময়ে, প্রায় আঠারো মাস, দর্দ মেসি বা জেরোম টিন মাইন থেকে অত্যন্ত ভাল আয় হয়েছে। এর কারণ হিসেবে বলা হয় যে হুসাফ জেরোম খনির ভেতর সম্পূর্ণ নতুন একটা স্তর আবিষ্কার করেন, এবং সেই স্তরের ভেতর দীর্ঘ একটা টানেল পেয়ে যান তিনি। লোকমুখে শোনা গেছে, এই টানেল নাকি সাগরের তলায় গিয়ে শেষ হয়েছে। দর্দ মেসি সেজন্যেই 'ভিজ়ে খনি'। স্থানীয় খনি শ্রমিকদের জন্যে ভিজ়ে খনি দুঃসংবাদ, কারণ ভিজ়ে খনির টানেল বা শ্যাফট যখন তখন ধসে পড়তে পারে।

হুসাফ জেরোম খনিটা কেনার আঠারো মাস পর ঘটলও ঠিক তাই। আন্ডারসী শ্যাফট হঠাৎ ধসে পড়ে, ফলে মারা যায় চল্লিশজন মাইনার। সেই থেকে জেরোম টিন মাইন পরিত্যক্ত। ক্ষতিপূরণ দেয়ার ভয়েই সম্ভবত হুসাফ জেরোম লেবানন ছেড়ে পালিয়ে যান।

তথ্যগুলো পেয়ে চিন্তায় পড়ে গেল শারমিন। এ-ধরনের একটা বিপজ্জনক মাইনে তার ঢোকাটা উচিত হবে কিনা বুঝতে পারছে না। তাছাড়া—আহদ, সাজিদ আর সুলতানও কি ঢুকতে চাইবে?

সেদিনই প্রসঙ্গটা নিয়ে ওদের তিনজনের সঙ্গে আলোচনা করল শারমিন। প্রস্তাবটা দেয়ার সময় পারিশ্রমিকের অঙ্কটা জানাতেও ভুলল না—মাথা পিছু এক হাজার ডলার। তবে ওরা তিনজন যে শুধু টাকার লোভে মাইনে ঢুকতে রাজি হলো, তা নয়। একটা মেয়ে যেখানে মাইনে ঢুকতে ভয় পাচ্ছে না সেখানে তারা পুরুষ হয়ে ভয়ে পিছিয়ে আসে কিভাবে, লোকে কাপুরুষ ভাবে না!

দু'দিন পর কাউকে কিছু না জানিয়ে ওরা চারজন জেরোম টিন মাইনে ঢুকল। এমন ভৌতিক পরিবেশ জীবনে কখনও দেখেনি শারমিন। ভেতরে ঢোকার জন্যে পাঁচিল ভাঙতে হয়নি, পাহাড়-প্রাচীর আর পাঁচিলের মাঝখানে ফাঁক থাকায় রশি বেয়ে নামা গেছে। ভেতরটা স্নাতস্নাতে আর বাতাসে গুমোট ভাব প্রকট। লোয়ার লেভেলে নামার পর ওদের গাইড আহুদ খুব নার্ভাস হয়ে পড়ল, দেখাদেখি সাজিদ ও সুলতানও। এদের মধ্যে একমাত্র আহুদই এর আগে জেরোম টিন মাইনে কাজ করেছে। মাইনের ভেতরে কি আছে না আছে সে-সম্পর্কে অনেক অবিশ্বাস্য গল্প শারমিনকে শুনিয়েছে সে। শারমিন শুধু শুনেই গেছে, বিশ্বাস করছে কি করছে না তা তার চেহারা দেখে বোঝা যায়নি। একটা নয়, একাধিক জলপ্রপাতের বর্ণনা দিয়েছে আহুদ। তার ভাষায়, বিশ-ত্রিশ বছর আগে প্রথমবার যখন দর্দ মেসিতে মাইনাররা কাজ শুরু করে তখন অনেক ছোট ছোট গুহা ভেঙে একাধিক বড় গুহা তৈরি করা হয়েছিল। তৈরি করা হয়েছিল বিভিন্ন স্তর বিশিষ্ট গ্যালারি। সে-সব গ্যালারিতে শমিক মাইনারদের ঢোকার অনুমতি ছিল না বলে শুনেছে আহুদ। জেরোম সাহেব মাইনটা কেনার পরও এই নিষেধাজ্ঞা বহাল ছিল। কাজেই গ্যালারিগুলোর শেষ মাথায় গুহাগুলো সত্যি সত্যি সাগরের তলায় বেরিয়েছে কিনা তা তার জানা নেই।

সঙ্গে করে ওরা শুধু এক কয়েল রশি, দুটো ইলেকট্রিক টর্চ আর কিছু স্যান্ডউইচ নিয়ে এসেছে। সালোয়ার-কামিজের ওপর ওড়না পরে তাকরির উপকূলে আসে শারমিন, তবে মাইনে ঢুকছে ট্রাউজার আর টি-শার্ট পরে, মাথায় লোহার হেলমেটও আছে। রানার মত ওরও একই কাভার—মিশরীয় একটা দৈনিক পত্রিকার রিপোর্টার।

শ্যাফটের লোয়ার লেভেলে নামার পর অদ্ভুত যে শব্দটা বাইরে থেকে শোনা গিয়েছিল সেটা অকস্মাৎ শতগুণ বেড়ে গেল। অথচ বিভিন্ন টানেল ধরে এগোবার সময় দেখা গেল সামনে ধস নেমে বন্ধ হয়ে আছে পথ। প্রতিবারই শাখা টানেল পাওয়া গেল, ফলে কোন বাধাই ওদেরকে দমাতে পারছে না। তবে আহুদ বারবার নিষেধ করছে শারমিনকে, আর এগোনো উচিত হবে না। কিন্তু শারমিন নাছোড়া-বান্দা, অন্তত গ্যালারিগুলো না দেখে ফিরবে না সে।

প্রায় সাত-আট বার টানেল বদলে চওড়া একটা গুহায় ঢুকল ওরা, এখান থেকে অনেকগুলো শাখা টানেল বেরিয়েছে। সবচেয়ে চওড়া শাখা টানেল ধরে এগোল ওরা। এই টানেলের শেষ মাথায় পাওয়া গেল প্রথম জলপ্রপাত। ঠিক জলপ্রপাত বলা চলে না, কারণ পানি এখানে ঝরে পড়ছে ফোঁটায় ফোঁটায়, তবে ফোঁটাগুলোর সংখ্যা কয়েক লাখের কম হবে না। ভিজে গেল ওরা, সিকি মাইলের মত এগিয়ে শুকনো টানেলে পৌঁছুল। টানেল এখান থেকে ক্রমশ ওপরে উঠতে শুরু করেছে।

সন্দের খাবার আর টর্চের ব্যাটারি শেষ হয়ে আসায় পরদিন মাইন থেকে বেরিয়ে আসতে বাধ্য হলো ওরা। দু'দিন পর আবার ঢুকল। এবার

স্যান্ডউইচ, পানি, টর্চ ইত্যাদি বেশি করে আনা হয়েছে।

প্রথম অভিযান যেখানে শেষ হয়েছিল সেখান থেকে আবার শুরু হলো নতুন পথে যাত্রা। কিছু দূর যেতেই টানেলের সমতল মেঝেতে পানি দেখল ওরা। এই পানিতে হাঁটু পর্যন্ত ডুবে গেল। সামনে পড়ল পাথুরে পাঁচিল। পাঁচিলটা পরীক্ষা করে দেখা গেল তাতে ফাটল ধরাতেই মেঝেতে পানি জমেছে।

টানেলটা এখানে খুবই চওড়া, কিন্তু পানিতে ডোবা। এখান থেকে কোন শাখা টানেল বেরিয়েছে কিনা পরীক্ষা করার জন্যে হাঁটাহাঁটি করছে ওরা, এই সময় আহুদ প্রায় ডুবে মরতে যাচ্ছিল। টানেলের এক অংশে মেঝে বলে কিছু নেই। ভাগ্যিস সে সাঁতার জানত, তা না হলে তলিয়ে যেত গভীর অতলে। মেঝের কিনারায় দাঁড়িয়ে নিচে পাথর ফেলা হলো, নিচ থেকে কোন শব্দ উঠে এল না—অর্থাৎ তলাটা অনেক গভীরে।

খনির একটা লেভেল হঠাৎ একটা খাদে কেন নেমে গেল, এর কোন সদুত্তর আহুদও দিতে পারল না। সে জানাল, খনির এতটা ভেতরে আগে কখনও আসেনি সে। যাই হোক, খানিকটা পিছিয়ে এসে সরু অন্য একটা টানেলে ঢুকল ওরা, সেখান থেকে উঠে এল অন্য এক লেভেলে। এই লেভেলের শেষ মাথায় পাওয়া গেল কয়েকটা গ্যালারি। গ্যালারির শেষ মাথায় একটা ফ্রস-সেকশন। ওরা ডান দিকের একটা পথ বেছে নিল। এটা অসম্ভব লম্বা একটা টানেল, ক্রমশ চওড়া হয়ে গেছে। পরিবেশটা ভৌতিক বললেও কম বলা হয়। চওড়া হবার পর অসংখ্য শাখা টানেল বেরিয়েছে দু'দিকে, ওদের পায়ের শব্দ শতগুণ জোরালভাবে প্রতিধ্বনিত হচ্ছে। বাতাস অত্যন্ত গরম। কয়েকটা চওড়া গুহায় পৌঁছল ওরা, পাশ কাটিয়ে এল কয়েক স্তরে তৈরি করা একাধিক গ্যালারি। মাঝে মাঝেই থমকে দাঁড়িয়ে কি যেন শোনার চেষ্টা করছে আহুদ। এক সময় শারমিন তাকে জিজ্ঞেস করল, 'আপনি কি ভূতের ভয় পাচ্ছেন?' কিন্তু আহুদ হাসল না। আরও যেন গভীর হয়ে উঠল। কিছুক্ষণ পর নতুন একটা শব্দ শোনা গেল—এটা সত্যিকার একটা জলপ্রপাত হবারই সম্ভাবনা। আর ঠিক এই সময় শারমিনের সন্দেহ হলো, ওদেরকে অনুসরণ করা হচ্ছে। সব আওয়াজই যে ওদের পায়ের শব্দের প্রতিধ্বনি, এখন আর তা বিশ্বাস করতে পারছে না সে। তবে এরই মধ্যে খনির আরও এক স্তর নিচে নেমে এসেছে ওরা। আহুদ জানাল, এটাই সর্বশেষ স্তর। এদিকে সিলিঙ সুরক্ষিত রাখার জন্যে কড়ি আর বাঁশ ব্যবহার করা হয়েছে, তবে বেশিরভাগই পচে গেছে।

সামনে পড়ল পাঁচিল তুলে বন্ধ করা নতুন একটা শ্যাফট। বাম দিকে বাঁক ঘুরে একটা গ্যালারি এলাকায় ঢুকল ওরা। জায়গাটা ঢালু হয়ে ডান দিকে ঘুরে গেছে। রেললাইনের কিছু অংশ এখনও অক্ষত দেখা গেল। জলপ্রপাতের শব্দ এখানে আরও তীব্র হয়ে বাজছে কানে, যেন সরু একটা গিরিখাদ থেকে বিপুল জলরাশি নেমে আসছে।

এক পর্যায়ে গ্যালারিটা আরও প্রশস্ত হলো, তিনটে শাখা তিন দিকে চলে গেছে। আহুদ ইতস্তত করে ডান দিকের শাখাটা বেছে নিল। পানির আওয়াজ আরও বাড়ছে। এদিকের গ্যালারি খুব মজবুত, প্রায় সাত ফুট উঁচু, সাত ফুট চওড়া। গ্যালারির কোথাও কোথাও সিমেন্টের স্তর তৈরি করে পানি ঠেকানোর ব্যবস্থা করে হয়েছে। তারপর একটা বাক ঘুরতেই রোমহর্ষক জলপ্রপাতটা দেখতে পেল ওরা। গোটা ছাদ স্বেচ্ছ ধসে পড়েছে, গ্যালারি থেকে সামনে যাবার পথটা বিশাল সব পাথরের টুকরোয় ঢাকা।

মেইন গ্যালারি যেখানে শাখা বিস্তার করেছে সেখানে ফিরে এল ওরা। আরেকটা শাখা ধরে রওনা হলো, কিন্তু ত্রিশ ফুটও এগোতে পারল না, আরও একটা জলপ্রপাতের সামনে পড়ে গেল। শারমিন ধারণা করল, রক ফরমেশনে সিরিয়াস কোন ফল্ট না থেকেই পারে না। আহুদ পাথুরে আবর্জনার গায়ে টর্চের আলো ফেলে কি যেন খুঁজছে। কিছু না পেয়ে দেয়ালগুলো পরীক্ষা করতে শুরু করল। তারপর স্থির হয়ে গেল সে, কান পেতে কি যেন শুনছে। শব্দটা শারমিনও পেল। মনে হলো জলপ্রপাতের পিছন থেকে আসছে। তবে কিসের শব্দ বোঝা গেল না। কেউ কি ড্রিল করছে? নাকি সামনে কোথাও জেনারেটর চলছে?

‘চলুন, ফিরে যাই,’ বলল শারমিন। ‘স্বীকার করছি, আমার ভয় লাগছে।’

‘এখানে কেউ এসেছিল,’ বিড়বিড় করল আহুদ, ‘মাইন বন্ধ হবার পর। শারমিনকে ভয় পেতে নিষেধ করল সে। ‘এই জলপ্রপাত কৃত্রিম, মানুষের সৃষ্টি—কেউ চেয়েছে সামনে কোন মানুষ যাতে যেতে না পারে। জলপ্রপাতগুলো পাথর ধসিয়ে তৈরি করা হয়েছে। পাথরগুলো পরীক্ষা করে দেখুন, ডিনামাইট ফাটিয়ে নামানো হয়েছে ওগুলো।’

‘এখন তাহলে কি করব আমরা?’

‘দু’দিন পর আমরা আবার আসব,’ জবাব দিল আহুদ। ‘এই জলপ্রপাতের ভেতর দিয়েই পথ করে নিতে হবে।’

সেদিন সন্দের খানিক আগে জেরোম টিন মাইন থেকে বেরিয়ে এল ওরা। সবাই খুব ক্লান্ত। ঠিক হয়েছে কালকের দিনটা বিশ্রাম নিয়ে পরশু আবার আসবে ওরা।

ছয়

অকস্মাৎ উত্তেজনার রোমাঞ্চ অনুভব করল রানা, বুঝতে পারল হাদী আসলে কি করছে। মোর্স সঙ্কেতের মাধ্যমে কারও সঙ্গে আলাপ করছে সে। কিন্তু সত্যিই কি আলাপ করছে? নাকি ব্যাপারটা ভারসাম্য হারিয়ে ফেলা মস্তিষ্কের একটা খেয়াল? তার উচ্চারিত শব্দ দিয়ে সাজানো লেখাটা পড়ল রানা—

‘আমি এখানে তিনজন মাইনারকে সঙ্গে নিয়ে এসেছি। সম্প্রতি খনন করা হয়েছে, এরকম টানেল ধরে এগোবার সময় দেখি পাথর ধস আর জলপ্রপাত বাধা হয়ে দাঁড়াচ্ছে। পাথর ধস সরিয়ে পথ করে নিই আমরা। তারপর ধরা পড়ে যাই ইসরায়েলি সশস্ত্র সৈনিকদের হাতে। ওরা এগজিট গ্যালারির মুখে পাঁচিল তুলে দিয়েছে। এই জায়গাটা আসলে কি?’

হাদীর দিকে তাকাল রানা। গ্রিলের বারে এখনও চামচ ঠুকছে সে, এবার জবাব দিচ্ছে।

লেখাটার ওপর আরেকবার চোখ বুলাল রানা। ব্যাপারটা ওর ধারণার সঙ্গে মিলে যায়। সাগরের নিচে এই ঘাঁটিটা একটা মাইনের অংশ। ‘জিজ্ঞেস করো, কে সে? পরিচয় কি?’ ফিসফিস করল ও।

‘নিজের পরিচয় আগেই দিয়েছেন, এখন জানতে চাইছেন আমাদের পরিচয়,’ জবাব দিল হাদী। ‘বলছেন, উনি একজন রিপোর্টার, কায়রো থেকে প্রকাশিত মর্নিং নিউজে কাজ করেন। এর মানে হলো, স্যার, ওই পত্রিকা থেকে আপনার খোঁজে কাউকে পাঠানো হয়েছে।’

রানা কথা না বলে নিঃশব্দে বুকে টেনে নিল হাদীকে। হাদী হতভম্ব, কিন্তু স্ট্রেস্‌দিকে রানার খেয়াল নেই। চামচটা তার হাত থেকে নিয়ে গ্রিলে ঠুকছে ও, নিজেই মেসেজ পাঠাচ্ছে— ‘আমি মাসুদ রানা, আমার সঙ্গে সাবেক লেবানীজ নাবিক আল হাদী। তুমি কে?’

জবাব এল, ‘মাসুদ ভাই, রানা এজেন্সির বৈরুত শাখা থেকে এসেছি, আমি শায়লা শারমিন। আপনি কি আহত?’

‘ধন্যবাদ, শারমিন। না, আমি বহাল তব্বিতেই আছি, তবে তোমাদের মতই বন্দী। কিন্তু এখানে পৌঁছুলে কিভাবে?’

‘দোস্তানার জামালু দীন ইসরায়েলি এজেন্ট, তাকে গ্রেফতার করে বৈরুতে পাঠিয়ে দেয়া হয়েছে। তার সম্পর্কে তদন্ত করতে গিয়ে একটা সূত্র পেয়ে যাই, সেই সূত্র ধরে এই খনির সন্ধান পেয়েছি। এই খনি কাফা থেকে চার মাইল দক্ষিণে।’

‘আমরা তাকরির উপকূলেই আছি,’ হাদীর দিকে ফিরে বলল রানা। তারপর আবার মোর্স সঙ্কেতের মাধ্যমে শারমিনকে জিজ্ঞেস করল, ‘তুমি খনিতে ঢুকেছ, এ-খবর আর কেউ জানে কিনা?’

‘স্থানীয় পুলিশ ইন্সপেক্টর আর এলাকার একজন সংবাদদাতা জানে। কিন্তু ইসরায়েলিরা টানেল ধসিয়ে দিয়ে সমস্ত পথ বন্ধ করে দিয়েছে, ফলে দেখে মনে হবে পাথর ধসে আটকা পড়েছি আমরা। মাসুদ ভাই, এই জায়গাটা কি? আপনার কোন প্ল্যান আছে কিনা?’

কিন্তু রানা জবাব দিতে পারল না, বাইরে থেকে বুটের আওয়াজ ভেসে এল। দু’জন গার্ড রাতের খাবার নিয়ে আসছে।

খেতে বসে রানা বলল, ‘জানো তো, হাদী, আমাদের হাতে সময় আছে খুব বেশি হলে শনিবার রাত পর্যন্ত।’

মুখভর্তি খাবার, কথা না বলে মাথা ঝাঁকাল হাদী।

তাকে খুঁটিয়ে লক্ষ করছে রানা। 'দৌস্তানা কটেজে কে থাকত, তোমার মনে আছে?'

'ইয়ে... লোকটার নাম বোধহয় জামালু দীন, তাই না?'

'তোমার স্মরণশক্তি দেখতে পাচ্ছি খুব খারাপ নয়—সব বোধহয় আবার মনে পড়ছে?'

'তা পড়ছে,' বলে নিঃশব্দে হাসল হাদী, চোখে কৌতূকের ঝিলিক।

তবু নিশ্চিত হতে পারছে না রানা। ওর মত সচেতন একজন মানুষকে সামান্য একজন জেলে অস্কার পাবার যোগ্য অভিনয় করে ধোঁকা দিয়েছে, মেনে নিতে কষ্ট হবারই কথা। এক বা দু'দিন নয়, প্রায় দুই হপ্তা হতে চলল দু'জন ওরা সারাক্ষণ একসঙ্গে রয়েছে। কাজেই আরও একটা প্রশ্ন করল রানা, 'তাকরির উপকূলের কোস্টগার্ডের নামটা মনে করতে পারো?'

চিন্তিত দেখাল হাদীকে। 'দাঁড়ান, স্যার, একটু ভাবতে দিন।' তারপর একটু কৌতূকের হাসি হেসে জিজ্ঞেস করল, 'নামটা কি শমসের লিবান?'

ইঠাৎ পরম স্বস্তিবোধ করল রানা। হাঁপ ছেড়ে বলল, 'বলোনি কেন যে অভিনয় করছ?'

'অভিনয়ের আমি কি বুঝি, স্যার?' সবিনয়ে বলল হাদী। 'আপনি যদি জানতেন যে আমি অভিনয় করছি, তাহলে আপনার সামনে কি অভিনয় করতে পারতাম? বিশ্বাস করুন আর নাই করুন, সত্যি কথা বলছি, স্যার—নিজেকেও আমার বোঝাতে হয়েছে যে আমি পাগল হয়ে গেছি।'

হাসিটা চেপে রাখতে ব্যর্থ হলো রানা। 'নিজেও জানো না কত বড় অভিনেতা তুমি। দুনিয়ার সব বড় অভিনেতা যা করেন, তুমিও ঠিক তাই করেছ। কিন্তু উদ্দেশ্যটা কি ছিল?'

'ওরা যে তথ্য আমার কাছে চাইছিল সেগুলো না দেয়ার মতলব। তাছাড়া, আরও সাহায্যে আসবে বলে ভেবেছিলাম।'

'এসেছে কি?'

'এসেছে, স্যার।' হাতছানি দিয়ে নিজের বিছানার দিকে রানাকে ডাকল হাদী। 'ছুরি দিয়ে কাঠ কাটতে দেখে আমাকে কেউ বাধা দেয়নি, কারণ আমি তো ওদের চোখে একটা পাগল। তাতে লাভ হয়েছে এই,' বলে খাটটা কাত করে দেয়াল ঘেঁষা পায়টা রানাকে দেখাল। খাটের এই পায় দরজার কাছ থেকে সবচেয়ে দূরে। পায়ের ভেতর দিকে সে তার নাম খোদাই করেছে, তারই একটা হরফে ছুরির ডগা দিয়ে চাড়া দিতে নাম খোদাই করা পুরো অংশটা আলাদা হয়ে খুলে এল। পায়ায় একটা গর্ত তৈরি হয়েছে, গর্তের ভেতর শুয়ে রয়েছে একটা চাবি। খুলে আসা অংশটা জায়গামত বসিয়ে চাপ দিতে আবার খাপে খাপে আটকে গেল। সন্দেহ নিয়ে কেউ না খুঁজলে গর্তটার অস্তিত্ব প্রকাশ পাবে না।

'কিসের চাবি ওটা?'

‘এই সেলের।’

‘কোথেকে পেলেন?’

বিছানায় বসে খাবারের প্লেটটা কোলে তুলে নিল হাদী। ‘এদিকে সব মিলিয়ে চারটে সেল। প্রত্যেকটাতে একই ধরনের তালা। গত সোমবারের কথা মনে আছে, নিজেদের মধ্যে মারামারি করায় কয়েকজন রেটিংকে সেলগুলোয় আটকে রাখা হয়েছিল মাথা ঠাণ্ডা করার জন্যে? গার্ডরা সবগুলো তালায় একই চাবি ব্যবহার করল। আরেকটা জিনিস লক্ষ করি আমি, মাঝে মধ্যে গার্ড-রুমে ফিরিয়ে না দিয়ে তালাতেই ওরা রেখে দেয় চাবি।’

‘আর সেই চাবি তুমি চুরি করেছ?’

‘করেছি,’ হাসি চেপে বলল হাদী। ‘তবে প্রথমে তৈরি করি খাটের পায়ার গর্তটা, চাবি লুকানোর জায়গা। চাবিটা হাতে পাই গর্ত তৈরি করার দু’দিন পর, পাশের সেলের তালায় বুলছিল। দু’ঘণ্টা পর ওটার খোঁজ পড়ে। মনে পড়ে, স্যার, বুধবার রাতে গার্ড এসে আমাদের সেল তন্নতন্ন করে খুঁজে গেল?’

‘হ্যাঁ। কিন্তু দরজায় ওরা বোল্ট লাগায়নি কেন?’

‘গার্ড সম্ভবত চাবি হারানোর ঘটনা শাস্তি পাবার ভয়ে রিপোর্ট করেনি।’

হাতে চাবি থাকা মানে রাতের যে-কোন সময় সেল থেকে বেরুতে পারা। রানা চিন্তা করছে। কিন্তু বেরিয়ে করবেটা কি? সবগুলো স্টোরে তালা দেয়া থাকে, সেগুলোর চাবি ওদের কাছে নেই। তাছাড়া, ফুয়েল আর অ্যামুনিশন-এর কাছাকাছি যাওয়াও সম্ভব নয়। গার্ডরা প্রতি ঘণ্টায় পালা করে টহল দেয়। জটিলতা আরও বেড়ে গেছে শারমিন মাইনার তিনজনকে নিয়ে ধরা পড়ে যাওয়ায়। এখন যদি ঘাঁটিটা রানা উড়িয়ে দেয়, ওদের দু’জনের সঙ্গে ওই চারজনও মারা যাবে।

এই একই চিন্তা হাদীর মাথাতেও খেলছে। ‘আপনার শায়লা শারমিন কেমন মেয়ে? মানে, তার যোগ্যতা কি?’

‘খুব সুন্দরী,’ বলে হেসে ফেলল রানা। ‘স্নেফ একজন রিপোর্টার, তাও মেয়ে—তবে কারাতে-কুংফু বা আনআর্মড কমব্যুট জানে বোধহয়।’ হাদীকে নিজের আসল পরিচয় যেমন দেয়নি ও, শারমিনের আসল পরিচয়ও দিচ্ছে না। তবে শারমিন পুরোদস্তুর ট্রেনিং পাওয়া এজেন্ট নয়। রানা এজেন্সির বৈরুত শাখায় সে আসলে শিক্ষানবিস হিসেবে কাজ করছিল। কাজেই তার কাছ থেকে খুব একটা সাহায্য আশা না করাই ভাল।

‘তাহলে কিভাবে কি করব আমরা?’ জানতে চাইল হাদী।

‘আগে সিদ্ধান্ত নাও, মরতে রাজি আছ কিনা।’ রানা সিরিয়াস।

‘আপনি বলছেন কি, স্যার! দেশের জন্যে মরব না তো কিসের জন্যে মরব?’ হাদীকে আহত দেখাল। ‘আপনি বললে আজ রাতেই বেরিয়ে পড়ি। টহলে বেরোয় মাত্র দু’জন গার্ড। ওদেরকে কাঁবু করা কঠিন হবে না। ওদের কাছে চাবি থাকে, সেগুলো নিয়ে অ্যামুনিশন স্টোরে চলে যাব, উড়িয়ে দেব

ঘাঁটি।’

‘শুনতে সহজ মনে হচ্ছে, কিন্তু যদি নিঃশব্দে গার্ডদের কাবু করতে না পারি?’ জিজ্ঞেস করল রানা।

‘ঝুঁকি তো নিতেই হবে, স্যার। ওরা চোঁচামেচি শুরু করলেও হাতে আমরা প্রচুর সময় পার।’

‘বিকল্প কোন উপায় আছে কিনা ভাববে না? স্বেচ্ছ আত্মহত্যা করবে? সাবমেরিনে সিম্ব ইঞ্চ গান আছে, ওগুলোর কথা ভাবছিলাম আমি,’ বলল রানা। ‘ওগুলো তো তুমি চালাতে জানো, তাই না? ইউ-টোয়েনটিওয়ানের আফটার গান ক্ষতিগ্রস্ত হয়নি। সাবমেরিনটার পিছন দিকটা মেইন-গুহার দিকে তাক করা আছে। ওই কামান থেকে একটা গোলা ছুঁড়লে আন্ডারওয়াটার এন্ট্রান্স ধসে পড়ে পুরোপুরি ব্লক হয়ে যাবে। একটা সাবমেরিনও আর বেরুতে পারবে না। লাভটা চিন্তা করে দেখো।’

মাথা নাড়ল হাদী। ‘স্যার, সাবমেরিনগুলোকে ধ্বংসই করতে হবে। কারণ আন্ডারওয়াটার প্রবেশপথ আমরা যদি ব্লক করে দিইও, ওরা হয়তো পাহাড়-প্রাচীর ভেঙে বেরিয়ে যাবার পথ করে নিতে পারবে। সাবমেরিনগুলোকে ধ্বংস করার একটাই রাস্তা—ঘাঁটিটাকে উড়িয়ে দেয়া।’

‘শোনো! শারমিন সঙ্গে করে তিনজন মাইনারকে এনেছে। কামানের গোলা ছোঁড়ার পর আমরা যদি ওদেরকে মুক্ত করতে পারি, আর তারপর শাবল দিয়ে পাঁচিল ভেঙে খনিতে ঢুকতে পারি, তাহলে ওরা যে পথে আজ বিকেলে এখানে এসেছে সেই পথ ধরে পালানো যায়।’

মুখে কিছু না বললেও, হাদীর চেহারাই জানিয়ে দিল রানাকে সে কাপুরুষ ভাবছে। তারপর হেসে উঠল সে। ‘তাকরির উপকূলের একটা টিন খনিতে পাথর ধস কি রকম হয়, আপনার কোন ধারণা আছে, স্যার? আমাদের সামনে প্রথম যে গ্যালারিটা পড়বে সেটারই হয়তো একশো ফুট ছাদ ধসে পড়েছে। পাথরগুলো শক্ত গ্র্যানিট, স্যার। আকারে বিশাল। আর আপনি চাইছেন তিনজন মাইনারের সাহায্যে ওগুলো সরিয়ে পথ বের করবেন?’

‘ঘাঁটিতে মোবাইল ড্রিল আছে, হাদী,’ মনে করিয়ে দিল রানা।

‘তা আছে,’ হাসি থামিয়ে বলল হাদী। ‘কিছুক্ষণ চিন্তা করল সে। ‘সমস্যা হলো, স্যার, ওরা জানবে কোন পথে পালিয়েছি আমরা। জানার সঙ্গে সঙ্গে ধাওয়া করবে।’ মাথা নাড়ল। ‘একজনও বাঁচব না, স্যার।’

‘পিছু নিতে সময় লাগবে ওদের,’ বলল রানা। ‘আমরা ওদেরকে এখানে ব্যস্ত রাখার ব্যবস্থা করে রেখে যাব। তাছাড়া, আমাদের পিছনে এগজিট গ্যালারি আংশিক হলেও ব্লক করে দিতে পারব আমরা। তখন আমাদের হাতে অস্ত্রও থাকবে।’

‘আপনার প্ল্যান আমার ঠিক মাথায় ঢুকছে না, আরও ব্যাখ্যা করুন।’

‘পালাবার কথা বলছি বটে, কিন্তু সেটা একেবারে শেষ পর্যায়ে,’ বলল রানা। ‘গার্ডদের কাবু করার পর অস্ত্র আর ইকুইপমেন্ট দখল করব আমরা,

তারপর কামান। কামানের পিছনে যদি গানার থাকে, তাকেও কাবু করতে হবে। এ-সব যদি সম্ভব হয়, ঘাঁটি আমাদের নিয়ন্ত্রণে চলে আসবে, তখন যেটা ভাল মনে হয় সেটা করা যাবে। কিন্তু যদি গার্ডদের কাবু করতে না পারি বা ওরা যদি অ্যালার্ম বাজাবার সুযোগ পেয়ে যায়, তখন পালানোর চেষ্টা করা ছাড়া আর কোন উপায় থাকবে না। এবার বুঝতে পারছ?'

বেশ কয়েক মুহূর্ত কথা বলল না হাদী। তারপর ধীরে ধীরে মাথা নাড়ল। 'হ্যাঁ, আপনার সঙ্গে আমি একমত।'

খালি প্লেট নিতে এল গার্ড। ইঙ্গিতে বিছানাটা দেখিয়ে হিফ্র ভাষায় সে বলল, 'যতটা পারো ঘুমিয়ে নাও। আজ রাতে দুটো সাবমেরিন আসছে।' রানার মুখের সামনে দুটো আঙুল খাড়া করে উচ্চারণ করল, 'বোটস।'

রানা মাথা ঝাঁকতে হাসিমুখে ফিরে গেল লোকটা।

'ভাগ্য ভালই বলতে হবে যে দুটোই আজ রাতে ফিরে আসছে,' বলল রানা। 'তারমানে কাল রাতে আমাদেরকে কোন কাজ করতে হবে না। অবশ্য যদি প্ল্যান মত আজ রাতে ইউ-ফরটিসেভেন বেরিয়ে যায়।'

বাইরের আলো নিভে যেতে দরজার সামনে চলে এল রানা, আবার যোগাযোগ করল শারমিনের সঙ্গে। ইতিমধ্যে রাত দশটা বেজে গেছে। শারমিনের সঙ্গে বার্তা বিনিময় হতাশ করে তুলল রানাকে। যে মাইন গ্যালারিতে মাইনারদের নিয়ে শারমিন পৌছেছিল, ঘাঁটির সঙ্গে সেটা সংযুক্ত হয়েছে গার্ড-রুম থেকে বেরুনো একটা টানেলের মাধ্যমে। পাথুরে একটা দেয়াল ভাঙছিল ওরা, জানত না সেটা গার্ড-রুমের দেয়াল। তখনই ধরা পড়ে যায় ওরা। আরও দুঃসংবাদ হলো, মাইন গ্যালারিটা নতুন করে ধসিয়ে দেয়া হয়েছে, লম্বায় প্রায় দুশো ফুট।

অর্থাৎ গার্ড-রুম হয়ে গ্যালারিতে ঢুকতে হবে, তার আগে ভাঙতে হবে দেয়ালটা। গ্যালারিতে শুধু ঢুকলেই হবে না, দুশো ফুট জুড়ে পড়ে থাকা পাথর সরিয়ে পথ করে নিতে হবে।

গভীর রাত পর্যন্ত ইলেকট্রিক ওয়েল্ডিং মেশিন ও অন্যান্য মেশিনারির যান্ত্রিক গুঞ্জন শুনতে পেল ওরা। এত রাতে সাধারণত এ-ধরনের শব্দ পাওয়া যায় না। ব্যাপারটা কি? 'ওরা কি ইউ-টোয়েনটিওয়ান মেরামত করছে?'

মাথা ঝাঁকাল হাদী। 'আমার তাই ধারণা, স্যার। হি, আমি অনেক দেরি করে ফেলেছি।'

রাত বারোটায় ওদেরকে ডাকা হলো। দুটো সাবমেরিনের একটা পৌছেছে। মার্চ করিয়ে তিন নম্বর ডকে আনা হলো ওদের। ভেজা, স্নাতসেতে পরিবেশে মিনিট পনেরো অপেক্ষা করতে হলো, ডাংকি এঞ্জিনের কর্কশ শব্দ মেইন কেভ বা মূল গুহায় প্রতিধ্বনি তুলছে। অপেক্ষার এই সময়টায় গুরুত্বপূর্ণ কিছু তথ্য পেল রানা। ইউ-ফরটিসেভেন মেরামতের কাজ বন্ধ করে দেয়া হয়েছে, কারণ সোমবার রাতের আগে ওটা বেরুবার জন্যে তৈরি হতে পারবে না। ঘাঁটির সমস্ত এঞ্জিনিয়ারিং দক্ষতা কাজে লাগানো

হয়েছে ইউ-টোয়েনটিওয়ান মেরামতে, লোকমুখে ছড়িয়ে পড়েছে কাল দুপুরের মধ্যে অ্যাকটিভ সার্ভিসের জন্যে রেডি রাখতে হবে ওটাকে—কাল মানে শুক্রবার। অর্থাৎ রানার ধারণাই সত্যি হতে যাচ্ছে, সাবমেরিন বহর বেরিয়ে যাবে শুক্রবারে, শনিবার রাতে নয়।

আরেকটা কথা ছড়িয়ে পড়ল। যে সাবমেরিনটা আসছে সেটা হারকিউলিস নামে একটা মিশরীয় বাণিজ্যিক জাহাজকে ডুবিয়ে দিয়েছে। এই দ্বিতীয় সাবমেরিনটাও নাকি ঘাঁটিতে ঢোকার জন্যে অপেক্ষা করছে বাইরে। অর্থাৎ আর মাত্র কয়েক ঘণ্টার মধ্যে ইসরায়েলের কমপক্ষে ছ'টা সমুদ্রগামী সাবমেরিন এই ঘাঁটিতে থাকবে, আরও থাকবে স্টোর বাজটা।

তথ্যগুলো হাদীকে জানাল রানা। কিন্তু তার মন্তব্য শোনার সুযোগ ঘটল না, কারণ হঠাৎ ডকের পানিতে একটা আলোড়ন জাগল, বড় একটা ঢেউ ডুবিয়ে দিল ডকসাইট। মূল গুহায় উথলে উঠল পানি, মেটালের সঙ্গে মেটালের ঘষাঘষি আর ধাক্কাধাক্কিতে কর্কশ শব্দ হলো, তারপর শোনা গেল দীর্ঘক্ষণ স্থায়ী উল্লাস ধ্বনি। দুটো সাবমেরিনের একটা মূল গুহার সারফেসে উঠে আসছে।

একঘেষে আওয়াজ তুলে ডিজেল-এঞ্জিন লাগানো টাগ মেইন কেভে ঘুরে বেড়াল, কয়েক মিনিট পর তিন নম্বর ডকের উল্টোদিকে সাবমেরিনের বো দেখা গেল। ডকসাইটে ছুঁড়ে দেয়া হলো এক প্রস্থ রশি, হাত থেকে হাতে চলে যাচ্ছে সেটা। সবার হাতে রশিটা পৌছানোর পর অমসৃণ পাথরে পা বাধিয়ে টানতে শুরু করল ওরা। ধীরে ধীরে ডকে উঠে এল সাবমেরিনটা। বোট-হুক হাতে রেটিংরা অপেক্ষা করছে, ডকসাইটে সাবমেরিনের গা যাতে ঘষা না খায়।

সাবমেরিন বাঁধা হতেই জুরা যে যার কোয়ার্টারে ফিরে গেল। রানা ও হাদীকে নিয়ে যাওয়া হলো চার নম্বর ডকে, ওখানে ইউ-টোয়েনটিওয়ান ভেসে রয়েছে। ইলেকট্রিক ট্রলিতে করে ওটার সিন্স ইঞ্চ গান ফাউন্ড্রিতে নিয়ে যাওয়া হয়েছিল, মেরামতের পর ফিরিয়ে আনা হয়েছে ডকে, সাবমেরিনে তোলার জন্যে সাহায্য দরকার।

হাড় ভাঙা পরিশ্রমের কাজ। প্রথমে ওটাকে পুলিতে তুলতে হলো। পুলিগুলো স্টীল ডেরিকের সঙ্গে যুক্ত। তোলার পর দোল খাওয়াতে হলো, নির্দিষ্ট পজিশনে আনার জন্যে। কাজটা চলার সময় ছোট্ট একটা দুর্ঘটনা ঘটল। ইউ-টোয়েনটিওয়ানের কমান্ডার ঘাঁটিতে সদ্য আগত ইউ-টোয়েনটিসেভেনের ফার্স্ট অফিসারকে অভ্যর্থনা জানাতে এসেছে, পরস্পরের ব্যক্তিগত বন্ধু তারা। ফার্স্ট অফিসারকে তার কোয়ার্টারে পৌছে দিয়ে আবার সে গ্যালারি থেকে নেমে এলো, নিজের বোটে এঞ্জিনিয়াররা কি রকম কাজ করছে দেখার জন্যে। একটা চুরুট ধরিয়েছে, যদিও ডকে বা ডকসাইটে ধূমপান করা নিষেধ। সবাই তখন ডেরিকে ঝুলন্ত কামানটাকে দোল খাইয়ে নির্দিষ্ট পজিশনে আনার জন্যে গায়ের ঘাম ঝরাচ্ছে। দেখাদেখি সেও হাত

লাগাল সবার সঙ্গে ।

যাই হোক, কাজটা তখনও শেষ হয়নি, তিন মিনিটের বিশ্রাম পেল ওরা । ব্যথায় আড়ষ্ট পিঠ সিধে করছে ওরা, এই সময় কে যেন ধমকের সুরে বলল, 'আগে রশিগুলো খোলো, তারপর বিশ্রাম ।'

আবার শুরু হলো রশি ধরে টানাটানি । একটা রশি অনেকেই ধরেছে, তাদের সঙ্গে রানাও কমান্ডার পিছিয়ে যাবার সময় পেল না, রশিটা লাফিয়ে উঠল । মুখেই লাগত, কিন্তু কমান্ডার মাথাটা পিছিয়ে নিল ঝট করে । মুখে নয়, রশিটা লাগল চুরুটে ।

ডক সাইটে হেঁড়া ন্যাকড়া আর কন্সলের টুকরো ছড়িয়ে আছে, সে-সবের ভেতর কোথায় পড়ল চুরুটটা কেউ খেয়াল করল না । কিন্তু মাত্র দু'মিনিট পরই কেউ একজন চোঁচিয়ে উঠল, 'কি যেন পুড়ছে!'

জ্বালানি তেলে ভেজা চারপাশের ন্যাকড়া থেকে ধোঁয়া উঠছে দেখে হতভম্ব হয়ে গেল সবাই, শুধু রানা বাদে । রশিটায় ও-ই ঝাঁকি দিয়েছিল, চুরুটটা কোথায় পড়েছিল তা-ও দেখেছে ও, কিন্তু ভুলেও আর সেদিকে তাকায়নি । শুধু যে ধোঁয়া উঠছে তা নয়, হঠাৎ ডেরিকের একটা পায়ের কাছে কি যেন দপ করে জ্বলে উঠল । এক মুহূর্তের জন্যে স্থির পাথর হয়ে রইল সবাই । তারপর একজন এঞ্জিনিয়ার ছুটে গিয়ে বুট পরা পা ঘন ঘন ঠুকে আগুনটা নেভাতে চেষ্টা করল । কিন্তু শিখাগুলো তো নিভলই না, বরং তার তেলে ভেজা ওভারঅলের নাগাল পেয়ে গেল ।

সাবমেরিন কমান্ডার তার জ্যাকেট খুলে এঞ্জিনিয়ারের জ্বলন্ত পায়ে জড়িয়ে দিল । এক সেকেন্ডের জন্যে ধোঁয়া আর আগুনের কথা সবাই যেন ভুলে থাকল । সে আগুন ইতিমধ্যে সশব্দ হয়ে উঠেছে, প্রবল আঁচ অনুভব করে পিছাতে শুরু করেছে লোকজন । আরও ভীতিকর ব্যাপার হলো, ডকসাইটেরও কোথাও কোথাও আগুন ধরে গেছে । এঞ্জিনিয়ারের ট্রাউজারের আগুন নিভিয়ে কমান্ডার এবার তার জ্যাকেটের ঝাপটা ও বুটের আঘাতে আশপাশের শিখাগুলো নেভাবার চেষ্টা করছে ।

ইতিমধ্যে সবাই কাশতে শুরু করেছে । ধোঁয়া খুব ঘন হয়ে গেছে, এত ঘন যে আগুনের শিখাগুলোকে অস্পষ্ট দেখাচ্ছে । অতি ব্যস্ততার সঙ্গে আগুন নেভাচ্ছে কমান্ডার, খকখক করে কাশছেও, কপালে চকচক করছে ঘাম । তারপর হঠাৎ মনে হলো হাঁটুর নিচে পা নেই, ঢলে পড়ল কমান্ডার । ন্যাকড়ার স্তূপ থেকে টেনে সরিয়ে আনা হলো তাকে । দু'জন লোক আশপাশের আগুন নিভিয়ে ফেলল ।

ডাক্তারকে ডেকে পাঠানো হলো । কমান্ডারের সেবা-যত্ন ও চিকিৎসা চলছে, জ্ঞান ফিরতে সময় নিল সে । আরও অদ্ভুত একটা ব্যাপার লক্ষ করা গেল—যারা আগুনের খুব কাছাকাছি ছিল তারা সবাই অসুস্থ বোধ করেছে । তাদের মধ্যে একজন জ্ঞান হারিয়ে ফেলল, তবে ডকসাইট থেকে একটু দূরে সরিয়ে নিতে আবার জ্ঞান ফিরে এল তার । রানারও শ্বাসকষ্ট হচ্ছে, মাথা

ঘুরছে, যেন মদ খেয়ে মাতাল হয়ে পড়েছে ও। হাদীও অভিযোগ করল, সে সুস্থবোধ করছে না।

দ্বিতীয় সাবমেরিনটা আসছে, কাজেই এক নম্বর ডকে যাবার নির্দেশ দেয়া হলো। চিৎকার করে নির্দেশটা দিল ফেটিগ অফিসার ডকের শেষ মাথা থেকে। কয়েকজন তার নির্দেশ মত এক নম্বর ডকের দিকে এগোল, কিন্তু বেশিরভাগই হাঁপাচ্ছে আর হাঁপানোর কারণ নিয়ে নিজেদের মধ্যে তর্ক করছে। নির্দেশটা রিপিট করা হলো। কিন্তু সেটা পালন না করে ইউ-টোয়েন্টিওয়ানে উঠে পড়ল রানা, কামানটাকে সঠিক পজিশনে নামানোর কাজে এঞ্জিনিয়ারদের সঙ্গে হাত লাগাল। ওর দেখাদেখি হাদীও। ওরা ওদের গার্ডদের সঙ্গে যোগাযোগ হারিয়ে ফেলেছে। কামানটাকে ওটার মাউন্টিঙে বসানো হলো। কাজটা শেষ হতে তিন মিনিটের মত লাগল। এরইমধ্যে আশপাশটা ভাল করে দেখে নিল ওরা। তবে যা দেখল তাতে হতাশই হতে হলো। এমন কি ব্যবহারের জন্যে জড়ো করা অ্যামুনিশনও ডকের নিচে রাখা হয়। আর আর্মারড অ্যামুনিশন ট্রাকের নাগাল পাওয়া বা ওটা থেকে কিছু বের করা সম্ভবই নয়।

ওদের গার্ডরা ওদেরকে খুঁজে নিল। ডকসাইটে নামার সময় রানা দেখল কমান্ডার এতক্ষণে নিজের পায়ে দাঁড়িয়েছে। সাদা হয়ে গেছে চেহারা, কাপড়চোপড় নোংরা। এখনও সে শ্বাসকষ্টে ভুগছে। ডাক্তারকে 'অ্যাসফিকসিয়েশন' শব্দটা উচ্চারণ করতে শুনল রানা, পুরো বাক্যটা কানে এল না। ওদেরকে মার্চ করিয়ে এক নম্বর ডকে নিয়ে আসা হলো। ফেটিগ পার্টি এরইমধ্যে মোটা রশি হাতে নিয়ে অপেক্ষা করছে, গাঢ় রঙের ছুঁচালো সাবমেরিন বো নাক গলাচ্ছে ডকে। নিজেদের পজিশনে দাঁড়াবার সময় রানাকে হাদী জিজ্ঞেস করল, 'কমান্ডারের ব্যাপারটা কি?'

‘শ্বাসকষ্টে ভুগছিল।’

‘সে তো দেখতেই পেলাম, স্যার। কমবেশি সবাই আমরা ভুগেছি। কিন্তু কি কারণে?’

‘কি করে বলব।’ বলতে না পারলেও, রানা ধারণা করল ন্যাকড়া আর আবর্জনার স্তূপে ক্ষতিকর কিছু একটা ছিল। রশি টানার নির্দেশ আসতে আর কোন কথা হলো না।

সাবমেরিন বাঁধার কাজ শেষ হতে সেলে ফিরিয়ে আনা হলো ওদেরকে। দরজা বন্ধ হতেই হাদী বলল, ‘স্যার, আফটার গান দখল করেও কোন লাভ নেই। শুধু যে অ্যামুনিশন পাব না, তা নয়।’

‘আর কি সমস্যা?’

‘ব্রিজে উঠে যে-ই একজন গার্ডকে দেখলাম, অমনি মনে পড়ে গেল বেসে আসার পর থেকে দু'জন গার্ড প্রতিটি সাবমেরিনকে দিন-রাত পাহারা দেয়। একজন ছিল ব্রিজে, আরেকজন বোর দিকে।’

গম্ভীর হয়ে গেল রানা। কামান ব্যবহার করতে না পারলে ঘাঁটি থেকে

সাবমেরিন বহরের বেরিয়ে যাওয়া ঠেকানো যাবে না। হাতে সময় আছে আর মাত্র চব্বিশ ঘণ্টা, যা করার এরই মধ্যে করতে হবে। আন্ডারওয়াটার এন্ট্রান্স ধসিয়ে না দিয়ে খনির টানেল ধরে পালাতে চেষ্টা করতে পারে ওরা, কিন্তু সেটা হবে স্বেচ্ছ কাপুরুষতা ও দায়িত্ব এড়িয়ে যাওয়া। রবিবার দুপুর দেড়টায় ব্রিটিশ, আমেরিকান আর জাতিসংঘের জাহাজ তিনটেকে ইসরায়েলিরা যদি ডুবিয়ে দিতে পারে, তার ভয়ঙ্কর ফলাফল যা-ই হোক না কেন, তার দায় রানাকেই বহন করতে হবে। সব জানার পরও ও যদি কিছু না করে, নিজেকে কোনদিন ক্ষমা করতে পারবে না।

‘স্যার?’ ডাকল হাদী। ‘আমি বলি কি, আজ রাতটাই যখন সময় পাচ্ছি, চলুন গার্ডদেরই কাবু করি...’

তার কথা শেষ হলো না, মাথা নাড়ল রানা। ‘ঘাঁটিতে আজ সারারাত কাজ হবে। মেরামতের কাজে সবাই কেমন ব্যস্ত দেখলে না? সবগুলো সাবমেরিনে সাপ্লাই তোলা হচ্ছে। উঁহঁ, আমাদেরকে সুযোগের অপেক্ষায় থাকতে হবে। এখন সেলের বাইরে যারাই আমাদেরকে দেখবে, ভাববে, আমাদের মতলবটা কি। কিন্তু যদি দিনের বেলা বেরুই, এই ধরো চা খাবার সময়, কেউ কোন সন্দেহ করবে না। ভাববে আমরা ফেটিং পার্টিতে আছি।’

ক্লান্ত শরীর, খাওয়াদাওয়া শেষ করে বিছানায় উঠতেই ঘুম এসে গেল। একটা স্বপ্ন দেখে ঘুম ভেঙে গেল রানার। স্বপ্নে দেখল ডকসাইটে ডেরিক বসানোর সময় লাইমস্টোনের যে স্ট্রাটাম স্তর আবিষ্কার করেছিল, তাতে আগুন ধরে গেছে। ঘুমটা ভেঙে যেতে অদ্ভুত একটা উত্তেজনা আর রোমাঞ্চ অনুভব করল রানা। স্বপ্নটার তাৎপর্য বুঝতে পারছে ও। মৃদু ধাক্কা দিয়ে হাদীর ঘুম ভাঙাল ও। ‘শোনো! তুমি জানো লাইমস্টোন গরম হয়ে উঠলে কি ঘটে? কার্বন ডাইঅক্সাইড ছাড়ে, রয়ে যায় শুধু ক্যালসিয়াম অক্সাইড।’

‘তো কি হলো?’

‘বুঝতে পারছ না? বাতাসের জায়গা দখল করতে পারলে কার্বনডাই অক্সাইড বিযুক্ত হয়ে ওঠে—অক্সিজেনের অভাবে শ্বাসকষ্ট শুরু হয়। ইউ-টোয়েন্টিওয়ানের কমান্ডার অক্সিজেনের অভাবেই জ্ঞান হারিয়ে ফেলেছিল।’

রানার মনে পড়ল, চার নম্বর ডক হয়ে উল্টোদিকের স্টোরের গুহা পর্যন্ত লাইমস্টোনের একটা স্তর আছে, স্টোরে ঢোকান মুখে সেটা পাঁচ ফুটের মত চওড়া হয়ে গেছে। ভেজা আবর্জনার স্তূপ লাইমস্টোনের এই স্তরের ওপরই ছিল, আগুন লাগায় কার্বনডাই অক্সাইড ছাড়ছিল। ব্যাখ্যাটা শোনার পর হাদীকে মাথা ঝাঁকাতে দেখল রানা।

‘আপনি তাহলে বলছেন ওই লাইমস্টোনে বড় একটা আগুন ধরানো দরকার?’ জানতে চাইল সে।

‘আমাকে আরও চিন্তা করতে দাও।’ সাবমেরিন রিফুরেলিঙের সময় তেল

ও পেট্রলের ট্যাঙ্ক স্টোর থেকে বেরিয়ে আসে। রানার সঙ্গে একটা দেশলাই আছে। পেট্রলের একটা ড্রাম যেভাবে হোক ফুটো করতে হবে, দেখতে হবে পেট্রল যাতে লাইমস্টোনের স্তরে পড়ে। সুযোগ পাওয়া গেলে লাইমস্টোন খুঁড়ে আগুনের চারপাশে জড়ো করতে হবে। সেজন্যে কোদাল আর শাবল দরকার। খেয়াল রাখতে হবে আগুনের শিখা যেন ছড়িয়ে না পড়ে—কারণ ডকসাইটে ও ডক গ্যালারিতে যথেষ্ট পরিমাণে তেল আছে। আরও একটা কথা ভুলে গেলে চলবে না, নিজেদের নিরাপত্তা। কার্বনডাইঅক্সাইডে ওরা যদি অসুস্থ হয়ে পড়ে তাহলে সব ভেসে যাবে।

রানা মাথা চুলকাচ্ছে দেখে হাদী জানতে চাইল, ‘কার্বনডাই অক্সাইডের ক্ষতি করার ক্ষমতা কতটুকু?’

‘কোল গ্যাসের মত ওটাকে ঠিক বিষাক্ত বলা চলে না,’ জবাব দিল রানা। ‘পরিবেশ থেকে অক্সিজেন সরিয়ে ফেলে বা খেয়ে ফেলে আর কি। কি রকম প্রতিক্রিয়া হয় তা তো তুমি দেখেছই। প্রথমে আচ্ছন্ন বোধ করে মানুষ, তারপর জ্ঞান হারায়। তাজা বাতাসে নিয়ে যাও তাকে, একটু পর আবার সুস্থ হয়ে উঠবে। তবে পরিস্থিতিটা বেশিক্ষণ স্থায়ী হলে মানুষ মারাও যেতে পারে।’

‘আমাদের অক্সিজেন সিলিভার দরকার হবে, কোথায় পাব?’ জানতে চাইল হাদী।

রানার মনের প্রশ্নই উচ্চারণ করছে হাদী। শারমিন আর তিনজন মাইনারের কথাও ওরা ভোলেনি। ঘাঁটিতে অক্সিজেন সিলিভার অনেকই আছে, কিন্তু সেগুলো হাতে পাবার উপায় কি? একের পর এক প্রশ্ন করে যাচ্ছে হাদী, যে-সব প্রশ্নের উত্তর রানার জানা নেই। এভাবেই রাত ভোর হয়ে এল।

সাত

সকালে নাস্তা খেতে বসে রানাকে হাদী জিজ্ঞেস করল, ‘স্যার, কোন প্ল্যান তৈরি হলো?’

মাথা নাড়ল রানা। ‘কোন সুযোগ দেখতে পেলেই সেটাকে কাজে লাগাতে হবে।’ নার্ভাস ও হতাশ বোধ করছে ও। এখনও কোন প্ল্যান তৈরি হয়নি, অথচ যা কিছু করার আগামী বারো ঘণ্টার মধ্যে করতে হবে।

নাস্তা শেষ হতে হাদীর খাটের পায়া থেকে চাবিটা বের করল রানা।

‘স্যার?’

‘কাজে লাগতে পারে, তাই সঙ্গে রাখছি,’ জবাব দিল রানা।

খানিক পর গার্ড এসে সেল থেকে বের করল ওদের, নিয়ে এল কিচেন পরিষ্কার করতে। এখানের কাজ শেষ হতে নিয়ে আসী হলো ডকে। কাজ

দেয়া হলো, স্টোররুম থেকে রসদ নিয়ে তুলতে হবে ইউ-ফিফটিফোরে, কাল রাতে যেটা এক নম্বর ডকে ভিড়েছে। রানার মনটা একটু খুশি হয়ে উঠল, কারণ এক নম্বর ডক অ্যামুনিশন স্টোরের সবচেয়ে কাছে। জিরো-আওয়ার ঘনিজে আসছে, পরিস্থিতিও যেন ওদের অনুকূলে চলে আসছে, এ-সব ভেবে উত্তেজিত হয়ে উঠছে ও।

ডকের উল্টোদিকে এক নম্বর স্টোর-রুম, সেখান থেকে রসদ নিয়ে আসছে ওরা। মেইন গ্যালারি পার হয়ে বৈদ্যুতিক আলোয় আলোকিত টানেলে ঢুকতে হাচ্ছে ওদেরকে, এই টানেলই চলে গেছে সোজা স্টোরে। টানেলের দুই প্রান্তে দরজা আছে, ইস্পাতের পাত দিয়ে তৈরি। দরজাগুলো খোলা, তালায় চাবি ঝুলছে। সেগুলো বন্ধ করে তালায় চাবি ঝোলানো এক সেকেন্ডের ব্যাপার। ইউ-ফিফটিফোরের একজন অফিসার আর তার অধীনে চারজন লোক কাজ করছে স্টোরে, ওদেরকে আটকে রাখা কোন সমস্যা নয়। সমস্যা নয় ওদেরকে যে দু'জন গার্ড পাহারা দিচ্ছে তাদেরকে কাবু করাও। কিন্তু আরও দু'জন গার্ড সাবমেরিন পাহারা দিচ্ছে, তাদেরকে কিভাবে কাবু করবে? সাবমেরিনের ডেকেও কিছু লোক কাজ করছে, রসদ নিয়ে কনিং টাওয়ার হয়ে নিচে নামছে বা ওপরে উঠছে। অ্যামুনিশন স্টোরের বাইরেও গার্ড আছে, তাদেরকেও তো কাবু করতে হবে। অ্যামুনিশন স্টোরে রানা বা হাদী কখনও ঢোকেনি। শুধু বাছাই করা কিছু লোককে ভেতরে ঢুকতে দেয়া হয়। তবে স্টোরটার মুখ পর্যন্ত যাবার সুযোগ হয়েছে রানার। প্রবেশের মুখে বিশাল একটা স্টীল বাল্কেডে তৈরি কঁরা হয়েছে, ঘাঁটিতে কোন দুর্ঘটনা ঘটলে তার আঁচ যাতে অ্যামুনিশন স্টোরে না পৌঁছায়। এই বাল্কেডের গায়ে দরজা আছে, শুধু মিউনিশন ট্রলি ঢোকানোর মত চওড়া। টানেলের মুখে, দু'পাশে দু'জন গার্ড সারাক্ষণ দাঁড়িয়ে আছে, এই টানেল মেইন ডক-গ্যালারিকে ছাড়িয়ে এক নম্বর ডকে প্লাশ কাটিয়েছে।

পরিস্থিতি আশাপ্রদ নয়, তবু সান্ত্বনা এইটুকু যে অ্যামুনিশন ডিপোর কাছাকাছি আসার সুযোগ পেয়েছে ওরা। ওদের সঙ্গে নতুন তিনজন লোক কাজে হাত দিল, গায়ে পরিষ্কার ফতুয়া আর নীল ট্রাউজার। তাদেরকে একজন পেটি অফিসার ও দু'জন গার্ড পাহারা দিচ্ছে। রানা বুঝতে পারল এরা মাইনার, শারমিনের সঙ্গে ধরা পড়েছে।

পেটি অফিসার ও অতিরিক্ত দু'জন গার্ড পরিস্থিতি আরও জটিল করে তুলল। তিনজনই অত্যন্ত সতর্ক নজর রাখছে মাইনারদের ওপর। তবে, রানা ভাবল, ওদের দলের সদস্য সংখ্যা এখন বেড়ে গেছে—দু'জন থেকে পাঁচজনে।

একবার ওদেরকে ফাউন্ড্রিতে যেতে হলো, কনিং টাওয়ারের হ্যাচটা আনার জন্যে। হ্যাচে নতুন রাবার জয়েন্টিং রিঙ লাগানো হয়েছে। ফাউন্ড্রিটা ডক গ্যালারির শেষ মাথায়। গোটা গ্যালারি আর প্রায় সবগুলো ডকে লোকজন অত্যন্ত ব্যস্ততার সঙ্গে কাজ করছে, বিশেষ করে তিন আর চার নম্বর ডকে। চার নম্বর ডক পেরুবার সময় রানা দেখল ইউ-টোয়েন্টিওয়ানে

মোবাইল ট্যাঙ্ক থেকে পানি ভরা হচ্ছে, একই সঙ্গে একটা মিউনিশন ট্রাক থেকে সাবমেরিনের ডকে তোলা হচ্ছে অনেকগুলো টর্পেডো। এ. এ. কামানে এখনও কাজ করছে কয়েকজন এঞ্জিনিয়ার।

লোকজন কি নিয়ে আলোচনা করছে শোনার চেষ্টা করল রানা। দেখা গেল আলোচ্য বিষয় মাত্র দুটো। এক, ঘাঁটিতে একটা সুন্দরী মেয়ে এসেছে। ইমার্জেন্সী অ্যালার্ম সম্পর্কে কোন ব্যাখ্যা দেয়া হয়নি, তবে সবাই জানে যে মেয়েটার সঙ্গে কয়েকজন পুরুষকেও বন্দী করা হয়েছে ঘাঁটিতে। আরেকটা বিষয় হলো, কয়েক ঘণ্টার মধ্যে বড় একটা অপারেশনে বেরুবে সাবমেরিন বহর। অবশ্য অভিযানটা কি সে-সম্পর্কে কারও কোন ধারণা নেই।

সকাল প্রায় এগারোটার দিকে ঘর ঝাড়ু দেয়ার কাজে ফিরে যেতে হলো রানা ও হাদীকে। তারপর আবার ডকে আনা হলো, এবার ইউ-টোয়েন্টিওয়ানে রসদ তুলতে হবে। ওদের সঙ্গে যোগ দিল তিনজন বন্দী মাইনার। ডকসাইটে নানা ধরনের বাস্তব দেখা গেল, ভেতরে শুকনো মাংস ও অন্যান্য খাবারের ক্যান আছে। চিনি, লবণ, কফির প্যাকেট স্তুপ হয়ে আছে এক পাশে। মার্জারিন আর বিস্কিটের টিনও আছে। এসব চার নম্বর স্টোর থেকে নিয়ে এসেছে মাইনাররা। একটা ট্রলিতে করে ডকে নিয়ে আসা হলো তেলের বিশাল এক ট্যাঙ্ক। পেট্রলের একটা ট্যাঙ্কও আনা হয়েছে। তবে রিফুয়েলিং অপারেশন এখনও শুরু হয়নি।

কয়েকজন ক্রু আর কুক না আসা পর্যন্ত ওদেরকে অপেক্ষা করতে হলো। আফটার হ্যাচ খোলা হতে সাবমেরিনের গহবরে নামল তারা। হাদী একাই পারত, তবু তার সঙ্গে হাত লাগাল ওরা, ছোট একটা গ্যাংওয়ে টেনে এনে ডকসাইট আর সাবমেরিনের মাঝখানে ফেলা হলো। ওদের কাজ হলো ডকের রসদ সাবমেরিনে তোলা, তারপর রশিতে বেঁধে আফটার হ্যাচ দিয়ে নিচে নামানো।

প্রায় বারোটা বাজে। প্রথম লাঞ্চের সময় হয়ে এসেছে। ঘাঁটিতে যখন লোক সংখ্যা বেশি থাকে, কিচেন স্টাফের সুবিধের জন্যে দু'বার লাঞ্চ পরিবেশন করা হয়। প্রথমবার বারোটায়, দ্বিতীয় বার সাড়ে বারোটায়।

কাজ শুরু হয়েছে বেশিক্ষণ হয়নি, হ্যাচে একটা বাস্তব নামাবার সময় হাদী লক্ষ করল ডকের বাস্তবগুলোর কাছে রানা যখন পৌছেছে, প্রায় একই মুহূর্তে পৌছেছে একজন মাইনারও। হাদী ঠিক ধরতে পারল না, তবে সন্দেহ হলো মাইনারকে কি যেন বলল রানা। এরপর বেশ কিছুক্ষণ রানার সঙ্গে হাদী কথা বলার সুযোগ পেল না, তবে খেয়াল করল মাইনার তিনজন বাস্তবগুলো সাবমেরিনে তুলে ডকসাইটের এক জায়গায় জড়ো করেছে। একটার ওপর একটা রাখা হচ্ছে ওগুলো, ফলে একটা পাঁচিল তৈরি হচ্ছে।

এরপর হাদীও দু'একটা করে বাস্তব এনে আলাদা একটা পাঁচিল তৈরি শুরু করল। এক সময় রানাকে পাশ কাটাল সে, নিচু গলায় নির্দেশ পেল, 'স্ট্যান্ড

বাই ।’

কয়েক মিনিট পর গ্যালারির দিক থেকে একটা নির্দেশ ভেসে এল । হাতঘড়ি দেখল রানা । বারোটো বাজে । সাবমেরিনের এক মাথা থেকে আরেক মাথা পর্যন্ত চোখ বুলাল ও । সাদা ইউনিফর্ম পরা লোকজন গ্যালারি হয়ে র‍্যাম্পের দিকে চলে যাচ্ছে, ওপরের গ্যালারিতে উঠবে । সবগুলো ডক প্রায় খালি হয়ে গেল । সাবমেরিন থেকে নামার সময় নিজেদের গার্ড দু’জনকে দেখতে পেল রানা—কয়েকটা বাক্সের পাশে দাঁড়িয়ে গল্প করছে । একজন হেলান দিয়ে আছে বাক্সের একটা পাঁচিলে । সাবমেরিনে এখন একজন মাত্র গার্ড, কনিং টাওয়ারের ফরওয়ার্ড ডেকে দাঁড়িয়ে । অপর গার্ড সাবমেরিনের ভেতর, সম্ভবত অ্যামুনিশন সাজিয়ে রাখতে জুদের সাহায্য করতে গেছে ।

শেল ভর্তি একটা অ্যামুনিশন ট্রলি দেখা গেল, ডকসাইটে দাঁড়িয়ে আছে । ডকসাইট থেকে আরেকটা গ্যাংওয়ে বসানো হয়েছে সাবমেরিনে, এই শেলগুলো ফরওয়ার্ড হ্যাচ দিয়ে নিচে নামানো হবে । এই মুহূর্তে বিশটা শেল সহ ট্রলিটা ডকসাইটে নিঃসঙ্গ দাঁড়িয়ে, আশপাশে কেউ নেই । ওখানে যারা ছিল তারা ট্রলির অর্ধেক শেল নিয়ে সাবমেরিনের ভেতর চুকেছে । আশপাশে লোক বলতে মাইনারদের একজন গার্ড আর একজন পেটি অফিসার । না, কাছাকাছি দু’জন রেটিংও দাঁড়িয়ে আছে ।

সাবমেরিন থেকে রানা নেমে আসতেই ওর পিছু নিল হাদী । ওদের গার্ডরা খোশগল্লে মশগুল । বাক্সগুলোর দিকে এগোচ্ছে ওরা, তাদের একজন ঘাড় ফিরিয়ে একবার তাকাল । তারপর আবার গল্প জুড়ে দিল । রানা ও হাদী দুটো বাক্স ধরল, কিন্তু তুলল না । দম দেয়া একজোড়া পুতুলের মত একযোগে নড়ে উঠল ওরা, পিছন থেকে গার্ড দু’জনের গলা পেঁচিয়ে ধরে টেনে আনল সদ্য তৈরি পাঁচিলের আড়ালে ।

‘ওদের ভাঁজ করা হাতের চাপে গার্ডদের গলা থেকে কোন শব্দ বা বাতাস বেরুতে পারল না, দু’জনেই জ্ঞান হারিয়ে নেতিয়ে পড়ল । ‘ইউনিফর্ম পরে নাও,’ হাদীকে বলল রানা, ইঙ্গিতে দীর্ঘদেহী গার্ডকে দেখাল ।

হাদী ইতস্তত করল না । ঢিল ছোঁড়া হয়ে গেছে, এখন আর পিছিয়ে যাবার উপায় নেই । রানার আগে সে-ই ইউনিফর্ম পরা শেষ করল । কাঁধে একটা বাক্স তুলে নিয়ে সাবমেরিনের দিকে হাঁটতে শুরু করল সে । রানাও ইউনিফর্ম পরল, তারপর নিজেদের পরিত্যক্ত কাপড়চোপড় পরিয়ে দিল গার্ডদের । কয়েকটা বাক্স টেনে এনে অচেতন গার্ডদের গায়ে চাপাচ্ছে, এই সময় ফিরে এসেছে হাদী ।

‘ডেকে বেরিয়ে পেটি অফিসারকে ডাকো,’ নির্দেশ দিল রানা । ‘লোকটার নাম সালকিন ।’

বাক্সগুলোর পিছন থেকে বেরিয়ে এসে হাদী ডাক দিল, ‘সালকিন! সালকিন!’

পেটি অফিসার সঙ্গে সঙ্গে চলে এল । পিছিয়ে বাক্সগুলোর আড়ালে সরে

এল হাদী। অচেতন গার্ডগুলোর পায়ে কয়েকটা বাস্ত্র পড়ে আছে, হাঁটু গেড়ে তাদেরকে পরীক্ষা করছে রানা। বন্দীরা অসুস্থ হয়ে পড়েছে বা দুর্ঘটনায় পড়েছে ভেবে পেটি অফিসারকে উদ্বিগ্ন দেখাল। ‘কি হয়েছে?’ জানতে চাইল সে। হাদী জবাব দিল তার মাথায় সবগে একটা বাস্ত্র নামিয়ে এনে।

জ্ঞান হারিয়ে লুটিয়ে পড়ল পেটি অফিসার। বাকি থাকল দু’জন রেটিং। অবশ্য সাবমেরিনের কনিং টাওয়ারেও একজন গার্ড আছে, তাকেও কাবু করতে হবে। নিজেদের তৈরি বাস্ত্রের পাঁচিলের মাথার ওপর দিয়ে উঁকি দিল রানা। এখান থেকে গার্ডটীর ডান হাতের সাদা ইউনিফর্মটুকু শুধু দেখা যাচ্ছে। ডকের শেষ মাথা থেকে রসদ নিয়ে মাইনার তিনজনকে এগিয়ে আসতে দেখা গেল, সামনে রয়েছে ওদের গার্ড।

‘এখন কি করব, স্যার?’ জানতে চাইল হাদী।

হোলস্টার থেকে পেটি অফিসারের রিভলবারটা বের করছে রানা, জবাব দিল, ‘ওরা কাছাকাছি এলে ডাক দেবে, পেটি অফিসারকে দেখিয়ে পা আঁধা ধরতে বলবে। বাকি যা করার আমি করব।’ অচেতন গার্ড দু’জনকে টেনে সরিয়ে আনল ও, গায়ে কয়েকটা বাস্ত্র চাপিয়ে ঢেকে দিল ওদেরকে।

পেটি অফিসারের মাথাটা কোলে নিয়ে বসে আছে হাদী। পায়ের আওয়াজ কাছাকাছি আসতে হিফ্র ভাষায় রেটিং দু’জনকে ডাক দিল। ‘পেটি অফিসার জ্ঞান হারিয়ে ফেলেছে। এসো তোমরা, আমাকে সাহায্য করো।’ পায়ের শব্দ দ্রুত হলো তার পিছনে, কিন্তু ঘাড় ফিরিয়ে তাকাতে সাহস পেল না।

‘কি হয়েছে?’ একজন রেটিং জিজ্ঞেস করল।

‘জানি না, তুমি ওর পা ধরো,’ বলল হাদী।

লোকটা এগিয়ে এসে পেটি অফিসারের পা ধরল। দ্বিতীয় রেটিং দাঁড়িয়ে আছে, তার ধারণা হাদী পেটি অফিসারের হাত ধরবে। পেটি অফিসারের শাটের বোতাম খুলতে শুরু করল হাদী, বলল, ‘দাঁড়িয়ে আছ কেন, ওর হাত দুটো ধরো—এখান থেকে সরিয়ে নিয়ে যাই।’

এক মুহূর্ত ইতস্তত করে এগিয়ে এল দ্বিতীয় লোকটা, পেটি অফিসারের বগলের নিচে হাত গলাল। ঠিক সেই মুহূর্তে অসুস্থকর একটা শব্দ হলো, ধাতব কিছু দিয়ে খুলি ফাটানোর আওয়াজ। পেটি অফিসারের পা ধরে থাকা লোকটা ঢলে পড়তেই রানাকে দেখতে পেল হাদী, দ্বিতীয় রেটিঙের দিকে রিভলবার তাক করছে।

সিধে হলো হাদী, লাফ দিয়ে সামনে এগোল, বিশাল দুই হাত দিয়ে চেপে ধরল লোকটার গলা। লোকটা ধস্তাধস্তি করারও সুযোগ পেল না, জ্ঞান হারিয়ে ফেলল। ‘ইউনিফর্মগুলো পরে ফেলো,’ মাইনারদের নির্দেশ দিল রানা, পাঁচিলের আড়াল থেকে উঁকি দিয়ে দেখল ডকসাইট সম্পূর্ণ খালি পড়ে আছে। তবে সাবমেরিনের গার্ড কনিং টাওয়ারের সামনে এখনও পাহারা দিচ্ছে। ‘এদিকে কেউ এলে কি করতে হবে তোমরা জানো।’ হাদীকে ইঙ্গিত করল ও, কাঁধে একটা বাস্ত্র তুলে নিয়ে ওর পিছু নিল সে। সাবমেরিনের দিকে যাচ্ছে

ওরা।

আফটার গানের সামনে এসে থামল দু'জন। 'গার্ডকে এখানে আনতে হবে,' ফিসফিস করল হাদী। 'আপনি স্যার ভান করুন, যেন কামানে কোন ক্রটি দেখা দিয়েছে। মুখটা ঘুরিয়ে রাখবেন, যাতে আলো না পড়ে।'

হিফ্র ভাষায় ডাক দিল রানা, 'গার্ড! গার্ড!'

ফাঁপা ইস্পাতের ওপর বুটের আওয়াজ হলো। ওদের গার্ডের সঙ্গে রিভলবার ছিল, কিন্তু রেটিং যারা সাবমেরিন পাহারা দেয় তাদের কাছে রাইফেল থাকে, সঙ্গে ফিট করা বেয়োনেট। লোকটা কাছে চলে এসেছে বুঝতে পেরে কামানের পাশে টেলিস্কোপ সাইটটা ইঙ্গিতে দেখাল রানা। 'কে যেন এটা ভেঙে ফেলেছে।'

সাইটে চোখ রাখল গার্ড। পিছন থেকে হাদী তার নাকের নিচে ঘুসি মারল। লোকটাকে রানা পড়ে যেতে দিল না, পড়ার আগেই ধরে ফেলল, তারপর কোন শব্দ না করে শুইয়ে দিল ডেকে। 'জলদি!' বলেই মই বেয়ে ব্রিজে উঠতে শুরু করল, পিছু নিল হাদী।

মইয়ের মাথায় ওঠার আগে একবার থামল ওরা। ডকের শেষ মাথায় গ্যালারি ধরে কেউ একজন কোথাও যাচ্ছে। দৃষ্টি ফিরিয়ে এনে বাস্তবের পাঁচিলটার দিকে তাকাল রানা। মাইনার তিনজন ইউনিফর্ম পরতে ব্যস্ত। আপাতত বিপদের কোন ভয় নেই, বুঝতে পেরে মইয়ের মাথায় ব্রিজে উঠে এল ও, কনিং টাওয়ারের হ্যাচ গলে নেমে এল নিচে। হাদী ওর ঠিক পিছনেই আছে। কন্ট্রোল রুমকে পাশ কাটিয়ে এল ওরা, নিঃশব্দে সামনে এগোচ্ছে, দু'জনের হাতেই রিভলবার। হাদী একটু ইতস্তত করে সামান্য পিছিয়ে পড়ল, ইঙ্গিতে সামনে থাকতে বলল রানাকে। একটা বান্ধহেডে পৌছেছে ওরা। ওটার সামনে রানা ওদের শেষ গার্ডটাকে দেখতে পেল, রাইফেল ভর্তি একটা রাসকে হেলান দিয়ে গুন গুন করে সুর ভাজছে। হাতে রিভলবার, ভেতরে ঢুকল রানা। পায়ের আওয়াজ পেয়ে তড়াক করে লাফ দিয়ে সিঁধে হলো লোকটা, রানাকে একজন অফিসার ধরে নিয়েছে। তার রাইফেলের বাঁট স্টীল প্লেটে বাড়ি খেলো। 'রাইফেলটা দাও,' হিফ্রতে বলল রানা। এক পা এগিয়ে হাত বাড়াল, ছিনিয়ে নিল রাইফেলটা। লোকটা বাধা দিল না, ইতিমধ্যেই দেখে নিয়েছে রিভলবার হাতে তাকে কাভার দিচ্ছে হাদী।

'আফট-এ নিয়ে যান ওকে, স্যার,' বলল হাদী।

গ্যাংওয়ে ধরে নেমে এল ওরা, কন্ট্রোল রুম আর ওয়ার্ড-রুমকে পাশ কাটাল, ঢুকে পড়ল স্টোরেজ চেম্বারে। এখানে ওরা যে বাক্সগুলো হ্যাচের ভেতর দিয়ে নিচে নামিয়েছিল সেগুলো সাজিয়ে রাখা হচ্ছে। তিনজন রেটিং আর একজন অফিসার কাজ করছে। ওদেরকে দেখেই পাথর হয়ে গেল সবাই। কারও হাতে কোন অস্ত্র নেই।

'স্যার, ওদেরকে বলুন কেউ একটু শব্দ করলেই আমি গুলি করব। নরম, অনুরোধের সুরে বলুন। খোদার কসম, মানুষ খুন করতে আমি পছন্দ করি না।'

হাসি চেপে হাদীর কথাগুলো ভাষান্তর করল রানা।

‘এবার স্যার, আপনি ওই হ্যাচ দিয়ে ওপরে উঠে যান,’ বলল হাদী। ‘আমাদের আগের সব গার্ডকে এখানে ফেলার ব্যবস্থা করতে পারেন কিনা দেখেন।’

ওখান থেকেই মই বেয়ে ডেকে উঠে এল রানা। মাইনারদের আগেই বলা ছিল, ওর সঙ্কেত পেয়ে অচেতন পেটি অফিসার আর গার্ডদের কাঁধে তুলে ছুটে আসছে সাবমেরিনের দিকে। সঙ্কেত দিয়েই সাবমেরিনের সামনের দিকে ছুটল রানা, আফটার গানের পাশে পড়ে থাকা গার্ডটাকে টেনে আনল মইয়ের মাথায়। মাইনাররা বোঝা কাঁধে নিয়ে পৌছুতেই হ্যাচ থেকে নিচে ফেলে দেয়া হলো অচেতন লোকগুলোকে। তারপর ওপর থেকে বন্ধ করে দেয়া হলো হ্যাচ কাভার। প্রায় সঙ্গে সঙ্গে ভেতরে থাকা লোকগুলো সেটা খোলার চেষ্টা করল। দু’জন মাইনারকে ভারী কিছু একটা পাওয়া যায় কিনা দেখার জন্যে ডকসাইটে পাঠাল রানা। তারা ছোট একটা ফর্জ নিয়ে এল। ডকের এক পাশে পড়ে ছিল ওটা, কয়েক হানড্রেডওয়ায়েট ওজন হবে। হ্যাচের ঢাকনিতে সেটা চাপিয়ে দেয়া হলো।

ইতিমধ্যে হাদীর জন্যে উদ্বিগ্ন হয়ে উঠেছে রানা। ‘সাবমেরিনের ভেতর থেকে এখনও সে উঠে আসেনি। দ্বিতীয় দফা লাঞ্চ শুরু হতে আর বেশি দেরি নেই, যে-কোন মুহূর্তে ডকে লোকজন এসে পড়বে। তাছাড়া, স্টোর-রুমের লোকজন ভাবতে পারে বন্দীরা বাস্র নিতে আসছে না কেন। সামনে, কনিং টাওয়ারের দিকে ছুটল রানা। মই বেয়ে ব্রিজে উঠছে, হ্যাচের কিনারায় হাদীর মাথা দেখা গেল। একটা লাইট মেশিন গান আর কয়েকটা ম্যাগাজিন নিয়ে এসেছে সে।

‘ট্রলিটা কামানের পাশে নিয়ে এসো,’ নির্দেশ দিল রানা।

ইতস্তত করছে হাদী। ‘শেলগুলো এই গানে ফিট করবে তো?’

‘জানি না,’ বলল রানা। ‘দেখতে হবে।’

একজন মাইনারকে ইঙ্গিত করে লাফ দিয়ে ডকসাইটে নামল হাদী, তারপর শান্ত পায়ে হেঁটে এল ট্রলিটার কাছে। দু’জন মাইনার সাহায্য করল ওকে, গ্যাংওয়ায়ে দিয়ে ট্রলিটাকে ওরা আফটার গানের পাশে তুলে আনবে।

ডক ধরে ট্রলিটাকে টেনে আনছে ওরা, হঠাৎ পিছন থেকে একটা চিৎকার ভেসে এল। ডকের শেষ মাথায়, স্টোর-রুমের দরজায় একজন অফিসার দাঁড়িয়ে। আবার চিৎকার করল, ‘বন্দীদের তোমরা কোথায় পাঠিয়েছ?’ আরেকজন লোককে দেখা গেল, গ্যালারিকে পাশ কাটিয়ে কোথাও যাচ্ছিল, অফিসারের গলা শুনে দাঁড়িয়ে পড়েছে।

হাদী ভাবল, সব শেষ। তবে জবাব দিতে দেরি করল না, ‘লফটেন্যান্ট বললেন নতুন বাস্র আনার আগে ডক থেকে সমস্ত বাস্র সরিয়ে ফেলতে হবে। এই শেলগুলোও ডক থেকে সরাতে বলেছেন তিনি।’

অফিসার ইতস্তত করে কাঁধ ঝাঁকালেন। ‘ঠিক আছে, তাড়াতাড়ি সারো। তোমাদের লাঞ্চার সময় হয়ে এসেছে।’ স্টোর-রুমে ঢুকে পড়ল সে।

দাঁড়িয়ে পড়া লোকটাও চলে গেল।

ইতিমধ্যে মাইনাররা ছোট গ্যাংওয়েটাকে টেনে এনে সাবমেরিনের গায়ে লাগিয়েছে। ওপরে, কামানটার ওপর ঝুঁকে রয়েছে রানা। ডেকে উঠে আসছে হাদী, দেখতে পেল কামানের মাজল ধীরে ধীরে নিচু হচ্ছে। রানার চোখ সাইটে, মাজলটা মেইন কেভের শেষ প্রান্তের দিকে তাক করেছে ও। হাদী কাছে এসে দেখল, ব্রিচ খুলে ফেলছে রানা। তার হাত থেকে একটা শেল নিয়ে ভেতরে ভরল ও। খাপে খাপে বসে গেল সেটা। ব্রিচ বন্ধ করে পিঠ সিঁধে করল, তাকাল হাদীর দিকে। 'সব ঠিক আছে। এখন শুধু কর্ড ধরে টান দিলেই গোলা বেরিয়ে যাবে।' ইঙ্গিতে ট্রিগার কর্ডটা দেখাল হাদীকে। 'তারপর ব্রিচ খুলতে হবে—এভাবে। খরচ করা শেল বেরিয়ে আসবে, নতুন শেল ভরে আবার টান দিতে হবে কর্ডে।'

দু'জন মাইনার শেলগুলো বয়ে আনছে, নামিয়ে রাখছে কামানের নিচে।

'তোমরা মেশিন-গান চালাতে জানো?' তাদেরকে জিজ্ঞেস করল রানা।

'দু'জনেই আমরা আর্মিতে ছিলাম,' জবাব দিল আহুদ। তারপর গর্বের সঙ্গে বলল, 'আমিই মিস শারমিনকে পথ দেখিয়ে খনির ভেতর এনেছি।'

'ধন্যবাদ,' বলে হাদীর দিকে ফিরল রানা। 'সবচেয়ে কঠিন আর জরুরী কাজটা এখনও বাকি। তুমি এখানকার চার্জে থাকো। সাবমেরিনে নেমে যেখানে আমরা আমাদের দ্বিতীয় গার্ডকে দেখেছিলাম সেখানে সব রকম অস্ত্রই আছে—রাইফেল, হ্যান্ড-গ্রেনেড, রিভলবার। যার যা খুশি বেছে নিতে পারো। যখন দেখবে ডক নিজেদের নিয়ন্ত্রণে রাখা যাচ্ছে না, শুধু তখন ফায়ার করবে। আমি শারমিনকে আনতে যাচ্ছি।'

'স্যার, আপনি আমাদের লীডার,' প্রবল বেগে মাথা নেড়ে বলল হাদী। 'আপনাকে আমরা কোথাও যেতে দিতে পারি না। মিস শারমিনকে আমি নিয়ে আসতে যাচ্ছি।'

'পাগলামি করো না, হাদী...'

হেসে ফেলল হাদী। 'পাগলামিই তো করব, স্যার! ওরা এখনও সবাই আমাকে পাগল-ছাগল বলে জানে, কাজেই আমারই ধরা পড়ার সম্ভাবনা সবচেয়ে কম। দিন, চাবিটা দিন।'

হাদীর কথায় যুক্তি আছে। এক সেকেন্ড ইতস্তত করে চাবিটা তার হাতে গুঁজে দিল রানা। তারপর বলল, 'শারমিনকে এখানে নিয়ে এসে সম্ভবত কোন লাভ নেই। এরপর যা ঘটবে, ঘাটির একটা প্রাণীও বাঁচবে না।'

মাথা নাড়ল হাদী। 'লাভ আছে, স্যার। এঞ্জিন-রুমে তিনজন এঞ্জিনিয়ারকে দেখে ভেতরে আটকে রেখে এসেছি আমি। আমাদেরকে শুধু ডক ডুবিয়ে দিয়ে সাবমেরিনটাকে ভাসাতে হবে। আর মাত্র এক ঘণ্টা পর জোয়ার। এদিকের কাজ তাড়াতাড়ি সারতে পারলে পালিয়ে যাওয়ার একটা সুযোগ পাব। মেইন কেভে পৌঁছতে পারলে সাবমেরিন নিয়ে ডুব দেব আমরা,

আভার-সী এন্ট্রান্স দিয়ে খোলা সাগরে বেরিয়ে যাব।’

রানা তর্কের মধ্যে গেল না, তিন্তু একটু হাসল শুধু।

হাদী জানতে চাইল, ‘আপনার অন্য কোন প্রস্তাব আছে? ভুলে যাবেন না, স্যার, মাইন ব্লক করে দেয়া হয়েছে।’

‘ঠিক আছে, যাও তুমি, আগে শারমিনকে নিয়ে এসো।’

আট

হাদী চলে যাবার পর আহুদকে কামানের কাছে পাহারায় রেখে সুলতানকে নিয়ে কনিং টাওয়ারের হ্যাচ বেয়ে সাবমেরিনের ভেতর নামল রানা। তিন্তু সেই হাসির রেশটুকু এখনও ওর ঠোঁটে লেপ্টে আছে। এই সাবমেরিন চালাতে ষাটজন লোক দরকার, অথচ হাদী ভাবছে ওরা দু’তিনজন মিলে চেষ্টা করলে এটাকে এর নিজস্ব শক্তির সাহায্যে ওহার জলমগ্ন মুখ দিয়ে বের করে নিয়ে যেতে পারবে। ঠিক সচেতন কোন উদ্দেশ্যে নয়, হাতে কিছু খেনেড রাখতে চাইছে ও। ম্যাগাজিন রুমে এসে ওরা তিনজন চারটে করে খেনেড ভরল পকেটে, দুটো রাইফেল আর বেশ কিছু অ্যামুনিশন নিল। সাবমেরিনের ডেকে উঠে এসে পাশাপাশি সাজিয়ে রাখল ওগুলো। ঘড়িতে এখন বারোটা পঁচিশ। আর পাঁচ মিনিট পর প্রথম দফা লঞ্চার সময় পার হয়ে যাবে। ইতিমধ্যে হাদীর ফিরে আসার কথা না? তাকে অবশ্য টপ গ্যালারিতে উঠতে হবে। গার্ড-রুমের দরজা যদি খোলা থাকে, কেউ দেখে ফেলার ভয়ে সেনের তালা খুলতে ভয় পাবে সে।

এই সময় ডকের শেষ মাথা থেকে কে যেন চৈঁচিয়ে উঠল, ‘গার্ড! কুত্তাগুলোকে বলো বাস্তুগুলো এখান থেকে নিয়ে যাক।’

কনিং টাওয়ারের আড়াল থেকে উঁকি দিল রানা। স্টোর-রুমে যাবার টানেলের মুখে এক লোক দাঁড়িয়ে রয়েছে। ও জবাব দিল, ‘এখানকার কাজ শেষ হলেই ওদেরকে আমি পাঠিয়ে দিচ্ছি।’

তারপরই রানার বুক ছ্যাৎ করে উঠল। টানেলের মুখে একজন অফিসার হাজির হলেন। দেখেই চিনতে পারল ও—ইউ-টোয়েনটিওয়ানের কমান্ডার। লোকটার সঙ্গে কথা বলছে সে। ডেকে পড়ে থাকা বাস্তুগুলো তাকে দেখাল লোকটা। মাথা ঝাঁকাল কমান্ডার, ডক ধরে সাবমেরিনের দিকে হেঁটে আসছে।

‘কামানের পিছনে দাঁড়াও,’ বিড়বিড় করল রানা, দ্রুত টানা-হ্যাঁচড়া করে খেনেড আর রাইফেলগুলো চোখের আড়ালে সরিয়ে ফেলল। তারপর মাইনার দু’জনকে নিয়ে গুঁড়ি মেরে বসে থাকল, অপেক্ষা করছে।

গ্যাংওয়ের নিচে থামল কমান্ডার। কনিং টাওয়ারের ঠিক সামনে রয়েছে মাইনার আহুদ, মুখ তুলে তার দিকে তাকাল। আহুদ এক চুল নড়ছে না।

চোখ নামিয়ে আবার গ্যাংওয়ের দিকে তাকাল কমান্ডার। কামানের মাউন্টিঙের ফাঁক-ফোকর দিয়ে কোন রকমে তার চেহারাটা দেখতে পাচ্ছে রানা। গ্যাংওয়ের পজিশন লক্ষ করে বিস্মিত হয়েছেন সে। কয়েক সেকেন্ড ইতস্তত করে গ্যাংওয়ে ধরে সাবমেরিনের ওপর উঠল, পিছন দিকে চলে যাচ্ছে। খানিক আগে লোড করা একটা রাইফেল তুলে নিল রানা, বড়ো আঙুল দিয়ে সৈফটি ক্যাচ অফ করল। যুদ্ধটা অসমই হবে, তবে শুরু হতে চলছে। হ্যাচের ঢাকনির ওপর ফর্জ চাপা দেয়া আছে, এখনি সেটা দেখে ফেলবে কমান্ডার। আড়াল থেকে বেরিয়ে এসে দ্রুত তার পিছু নিল রানা, হাতে বাগিয়ে ধরা রাইফেল। ফর্জের ওপর ঝুঁকল কমান্ডার। তারপর দু'হাতে ধরে ওটাকে তুলতে চেষ্টা করল। রানা পঞ্চাশ ফুট দূরে। ডেকে একটা হাঁটু গেড়ে রাইফেলটা কাঁধে ঠেকাল। 'আপনাকে ঘিরে ফেলা হয়েছে,' হিষ্কাতে বলল। 'হাত দুটো মাথার পিছনে রাখুন। নড়বেন না।'

ঝট করে সিধে হল কমান্ডার, এতটুকু ইতস্তত না করে হাত বাড়াল রিভলভারের দিকে। রানার কিছু করার নেই, ট্রিগার টান দিতে হলো। বন্ধ ওহার ভেতর গুলির আওয়াজটা কানের পর্দা ফাটিয়ে দেয়ার উপক্রম করল। হোলস্টার ছুঁয়েই স্থির হয়ে গেল কমান্ডারের হাত, তারপর হাঁটু জোড়া ভাঁজ হয়ে গেল। লোকটা মারা গেছে কিনা দেখার জন্যে থামল না রানা। তবে ঘুরে সামনের দিকে ছোট্টার সময় তার পতনের আওয়াজটা শুনতে পেল। 'ম্যান দ্যাট গান!' অর্ডার দিল ও।

সাজিদ কামানের পাশে পজিশন নিচ্ছে, ফিরে এল রানা। 'হ্যান্ড-গ্রেনেড।' সুলতানের দিকে আঙুল তাক করল। 'তুমি তিন নম্বর ডকে নজর রাখো। আমি পাঁচ নম্বরটা দেখব। গ্যালারির দুই দিকই ব্লক করে রাখতে হবে।' রানার কথা শেষ হওয়া মাত্র কয়েকটা গ্রেনেড নিয়ে লাফ দিয়ে ডকে পড়ল সুলতান।

তিনটে গ্রেনেড নিয়ে রানাও লাফ দিল। রাইফেলটা রেখে এসেছে ও, তবে কোমরে গুঁজে রেখেছে রিভলবারটা। ডক ধরে ছুটছে ওরা, গ্যালারি থেকে কয়েকজন লোককে ছুটে বেরিয়ে আসতে দেখা গেল। দু'জন পাঁচ নম্বর ডকের দিকে চলে গেল। কিন্তু আরও তিনজন দাঁড়িয়ে পড়ল, তারপর ছুটে এল ওদের দিকে। ভাগ্য ভাল যে ওরা রেটিং, সঙ্গে কোন অস্ত্র নেই। রানা গুলি করতেই ঘুরে গেল তারা, যে যেদিকে পারল ছুটে পালাল। ফাঁকা গুলি করেছিল রানা, কাউকে লাগেনি।

টানেলের মুখে আরও কিছু লোক বেরিয়ে এসেছে। তবে কারও কাছেই অস্ত্র নেই, ওদেরকে দেখে পিছিয়ে গেল। ওরা দু'জন ইতিমধ্যে ডকের প্রায় শেষ মাথায় চলে এসেছে, সুলতানের সঙ্গে একই সমান্তরাল রেখায় রয়েছে রানা। এই সময় দু'জনেই দেখতে পেল তিন নম্বর ডক থেকে গার্ডদের একজন বেরিয়ে এল। হাতে রাইফেল আছে, কিন্তু ওদের গায়ে সাদা ইউনিফর্ম দেখে অনিশ্চিত ভঙ্গিতে দাঁড়িয়ে থাকল, কিছু করছে না। 'পিছাও!' হিষ্কাতে ধমক দিল রানা। নিজের ডক পাহরা দাও। ওরা বিদ্রোহ

করেছে।'

ওরা কারা জিজ্ঞেস করল না, লোকটা রানার নির্দেশ পালন করল। কিন্তু সুলতানকে নিয়ে গ্যালারির কাছাকাছি আসার পর রানা দেখল ওই গার্ড আরও দু'জনকে সঙ্গে নিয়ে তিন নম্বর ডকের মুখে দাঁড়িয়ে আছে, হাতের রাইফেল ওদের দিকে তাক করা। 'পিন খোলো,' সুলতানকে বলল রানা। গার্ড তিনজনকে তার দায়িত্বে ছেড়ে দিয়ে ওদের নিজেদের আর পাঁচ নম্বর ডকের মাঝখানে গ্যালারির যে অংশটুকু পড়ে, সেদিকে মনোযোগ দিল ও। অন্যান্য ডক আর গ্যালারির সামনের দিকে স্টোর-রুম থেকে লোকজনকে বেরিয়ে আসতে দেখা গেল। দু'জন সম্ভবত একই সময়ে গ্রেনেড ছুঁড়েছে, কারণ ঘুরে গিয়ে পাশাপাশি ছুটছে ওরা, বাতাসে শিস কেটে কানের পাশ দিয়ে বেরিয়ে যাচ্ছে রাইফেলের বুলেটগুলো।

অকস্মাৎ বিকট এক বিস্ফোরণের শব্দ হলো। প্রথমে একটা, তারপর আরেকটা। ওদের পায়ের নিচে পাথরে মেঝে কেঁপে উঠল, গরম বাতাসের প্রচণ্ড ঝাপটায় ছটকে পড়ল দু'জনেই। ডকসাইটের শক্ত পাথরে মুখ থুবড়ে পড়ল রানা, একটা হাত কুশন হিসেবে থাকায় কপালটা চৌচির হলো না। নাকের ভেতরটা তরল আর গরম রক্তে ভরে উঠল। পাথরে চিড় ধরতে শুরু করায় রোমহর্ষক একটা আওয়াজ শুনতে পেল ওরা। টলতে টলতে সিধে হলো, সামনে এগোবার সময় হোঁচট খাচ্ছে। ওদের পিছনে পাথরে চিড় ধরার আওয়াজটা ভয়ঙ্কর হয়ে উঠল। ঘাড় ফেরাতেই রানা দেখল ওদের আর তিন নম্বর ডকের মাঝখানে গ্যালারির পুরো ছাদ খসে পড়ছে। মুহূর্তের জন্যে গার্ডদের দেখতে পেল, ঘুরে গিয়ে ছুটছে; পরমুহূর্তে সেখানে পাথরের স্তূপ তৈরি হতে দেখল, ধুলোর মেঘের ভেতর অস্পষ্ট।

সুলতান হাপাচ্ছে, তার বাম চোখের নিচে কুৎসিত একটা ক্ষত। ধুলো সরে যেতে শুরু করল। রানা দেখল, তিন নম্বর ডকে যাবার গ্যালারি সম্পূর্ণ রুদ্ধ হয়ে গেছে। তবে ডান দিকে, অর্থাৎ ওদের আর পাঁচ নম্বর ডকের মাঝখানে কি ঘটেছে দেখতে পাচ্ছে না ও। মেঝেতে অবশ্য প্রচুর আবর্জনা ছড়িয়ে রয়েছে।

ছুটে ডকে ফিরে এল রানা, হাতে একটা গ্রেনেড। বিস্ফোরণের ধাক্কায় বেশিরভাগ ইলেকট্রিক বাল্ব ভেঙে গেছে। তবে আধো অন্ধকারেও একজন অফিসারের সাদা ইউনিফর্ম চিনতে পারল ও, স্টোর-রুম থেকে টানেলে বেরিয়ে এল। তার টর্চের আলো রানাকে প্রায় অন্ধ করে দিল। 'কি ঘটেছে?' জিজ্ঞেস করল সে, রানাকে ঘাঁটির একজন গার্ড ধরে নিয়েছে। তারপর গ্রেনেডটা দেখতে পেল। 'তোমার উদ্দেশ্য কি?'

আর কোন উপায় নেই, পিন খুলে গ্রেনেডটা টানেলে ছুঁড়ে দিল রানা, লাফ দিয়ে সরে এল এক পাশে। রিভলবারের বুলেটটা রানার মাথার আধ ইঞ্চি দূর দিয়ে ছুটে গেল। এক সেকেন্ড পর একটা চোখ-ধাঁধানো আলো ঝলসে উঠল, প্রায় একই সঙ্গে শোনা গেল বিস্ফোরণের আওয়াজ। কিন্তু মেঝেতে পড়েও টচটা জ্বলছে, মুহূর্তের জন্যে টানেলটা ভেসে থাকল চোখের

সামনে। দেখা গেল গোটা ছাদ নেমে আসছে। এক সেকেন্ড বুলে থাকল ওটা, খসে পড়ছে শুধু ছোট ছোট পাথরগুলো। তারপর সগর্জনে খসে পড়ল, সেই সঙ্গে অন্ধকার হয়ে গেল গোটা দৃশ্যটা।

পকেট থেকে ইমার্জেন্সী টর্চ বের করে জ্বালান রানা, গার্ডদের সবার পকেটেই একটা করে থাকে। জায়গাটা পুরোপুরি ধ্বংস হয়ে গেছে। ডকের শেষ মাথা ফাটা ও ভাঙা পাথরের একটা স্তূপে পরিণত হয়েছে। পাথরের বেশিরভাগই লাইমস্টোন। হঠাৎ রানা সচেতনভাবে উপলব্ধি করল গ্রেনেডগুলো কেন সঙ্গে রাখতে ইচ্ছে হয়েছিল ওর।

ওর নাগালের মধ্যে এখন প্রচুর লাইমস্টোন আছে। আর ওর পিছনের ডকে আছে অয়েল স্টোরেজ ট্যাঙ্ক আর ছোট একটা পেট্রল ট্যাঙ্ক। এদিকটা থেকে বেশ কিছুক্ষণ কেউ ওদেরকে আক্রমণ করতে পারবে না। তিন নম্বর ডকের দিক থেকেও কোন বিপদের ভয় নেই। এক, দুই আর তিন নম্বর ডকে সব মিলিয়ে পঁচিশ থেকে ত্রিশজন লোক কাজ করছিল। ডকে আর অ্যামুনিশন ও ফ্যুয়েল স্টোরে। সবাই তারা ছাদ ধসে পড়ায় আটকা পড়েছে। ঘাঁটির বাকি লোকের সঙ্গে যোগ দিতে হলে খোলা ডকের শেষ মাথা থেকে সাঁতার কেটে আসতে হবে তাদেরকে।

বিপদ আসবে পাঁচ নম্বর ডক থেকে। ইস, আপার গ্যালারিতে ওঠার র‍্যাম্পটা যদি উড়িয়ে দিত! কোন সন্দেহ নেই, ঘাঁটির সব লোক এখন ছুটে চুকে পড়ছে পাঁচ, ছয় আর সাত নম্বর ডকে।

কান পাতল রানা। গ্যালারির ছাদ থেকে এখনও কিছু কিছু পাথর খসে পড়ছে, মেঝেতে ধসে পড়া পাথরের স্তূপও নড়াচড়া করছে, সে-সব শব্দকে ছাপিয়ে অস্পষ্টভাবে লোকজনের চিৎকার ভেসে আসছে ডকের খোলা প্রান্ত থেকে। আবর্জনার ওপর চড়ল রানা, ওদের আর পাঁচ নম্বর ডকের মাঝখানে খসে পড়া পাথরগুলো পরীক্ষা করল। ওদিকের গ্যালারি মেঝে থেকে সিলিং পর্যন্ত নিরেট পাথর ছিল। খসে পড়া পাথরের স্তূপ দেখে রানার ধারণা হলো, এ-সব পরিষ্কার করতে কয়েক ঘণ্টা লেগে যাবে, কাজেই এদিক থেকে আক্রান্ত হবার কোন ভয় নেই। কোন কোন পাথরের টুকরো এত বড়, মোবাইল ড্রিল ব্যবহার করলেও ভাঙতে প্রচুর সময় লাগবে।

আবর্জনার চূড়া থেকে সুলতানের পাশে নেমে এল রানা। ক্ষতটার রক্ত তার সারা মুখে লেপ্টে গেছে। 'এসো,' বলেই ছুটল ও। 'মেশিন-গানটা সাবমেরিনের পিছনে নিয়ে যেতে হবে।'

গ্যাংওয়ে বেয়ে সাবমেরিনে উঠে এল ওরা। এখানে ওদের জন্যে অপেক্ষা করছে সাজিদ আর আল্হদ। আল্হদকে কামানের কাছে থাকতে বলল রানা। সংক্ষেপে বুঝিয়ে দিল আক্রান্ত না হলে গোলা ছোঁড়ার দরকার নেই। ওর সঙ্গে হাত লাগাল সুলতান, লাইট মেশিন-গানটা ধরাধরি করে সাবমেরিনের পিছন দিকে নিয়ে এল। ম্যাগাজিন, রাইফেল আর কয়েকটা গ্রেনেড নিয়ে ওদের পিছু নিল সাজিদ।

লাইট মেশিন-গানের চারপাশে কাঠের কয়েকটা বাস্ত্র সাজিয়ে ব্যারিকেড

তৈরি করল ওরা। মেশিন-গান ঠিকমত কাজ করবে কিনা জানার জন্যে সাজিদ এক পশলা গুলি করল। সব ঠিক আছে। লাভ হলো এই যে সাজিদ তার টার্গেট মিস করেনি। মেইন কেভে ভাসছিল হলিজ গিয়ার বয়া, তার টার্গেট ছিল ওই বয়ার মাথাটা।

সাজিদকে লাইট মেশিন-গানের কাছে রেখে সুলতানকে নিয়ে কনিং টাওয়ারে ফিরে এল রানা। ইতিমধ্যে ওর মাথায় যে প্ল্যানটা তৈরি হচ্ছিল সেটা আরও পরিষ্কার হয়ে গেছে। ডকের শেষ মাথা নিজেদের দখলে রাখতে হবে, আর সেজন্যে আরও অস্ত্র ও অ্যামুনিশন দরকার ওদের। ওর প্ল্যানটা হলো হাদী আর শারমিনের সঙ্গে যোগাযোগ করা বা মিলিত হওয়া, তারপর ঘাঁটি ছেড়ে বেরিয়ে যাওয়া। জোয়ারের সময় সাবমেরিন নিয়ে পালিয়ে যাবার যে সম্ভাবনাটা ছিল, এখন আর সেটা নেই। হাদী আর শারমিনকে রেখে পালিয়ে যাবার কোন প্রশ্নই ওঠে না। তাছাড়া, শুধু সাবমেরিনের এঞ্জিনের ওপর নির্ভর করে আভার-সী এগজিট দিয়ে বেরুতে চাওয়াটা নেহাতই বোকামি হবে। আরও সমস্যা আছে। ওদের সাবমেরিন মেইন কেভে পৌছানো মাত্র ঘাঁটির বাকি সব সাবমেরিন থেকে ওদেরকে গুলি করা হবে—ওদের সাবমেরিন ডুব দেয়ার আগেই ওটাকে ডুবিয়ে দেয়া হতে পারে। তাতে হয়তো আভার-সী এগজিট ব্লক হয়ে যাবে, এ-কথা সত্যি; কিন্তু রানার প্ল্যান বা ইচ্ছে, আভার-সী এগজিট বন্ধ করা, সেই সঙ্গে সবাইকে নিয়ে পালিয়ে যাওয়া।

সাবমেরিনের ম্যাগাজিন রুমে চারবার আসা-যাওয়া করল ওরা। প্রথমে নিয়ে এল আরও একটা লাইট মেশিন-গান, চারটে ম্যাগাজিন আর কিছু গ্রেনেড। এ-সবই সাবমেরিনের পিছন দিকে জড়ো করা হলো। দ্বিতীয়বার নিয়ে এল আরও একটা লাইট মেশিন-গান, কামানের পাশে বসানোর জন্যে। তারপর আনল চারটে রাইফেল, প্রয়োজনীয় ম্যাগাজিন সহ। সবশেষে প্রচুর গ্রেনেড।

শেষ বোঝাগুলো নিয়ে সাবমেরিনের ওপরে উঠে এসেছে ওরা, খুদে ডিজেল-এঞ্জিন বসানো ট্যাংক-এর কর্কশ আওয়াজ ঢুকল কানে। পিছন দিকে ছুটল ওরা, একই সময়ে সাজিদ লাইট মেশিন-গান থেকে ফায়ার ওপেন করল। অর্ধেক দূরত্ব পেরিয়ে এসেছে ওরা, এই সময় রানা দেখল ছোট একটা কালো কি যেন উড়ে আসছে। জিনিসটা ইউ-টোয়েন্টিওয়ানের ঠিক পিছনে পড়ল। প্রায় সঙ্গে সঙ্গে পানির বড় একটা স্তম্ভ খাড়া হলো, শোনা গেল ভোঁতা একটা গর্জন।

ডাইভ দিয়ে প্যাকিং কেসগুলোর আড়ালে চলে এল ওরা। সুলতান স্পায়ার মেশিন-গানটা দখল করল, রানা তুলে নিল একটা অটোমেটিক রাইফেল। ডেক ভিজে গেছে, ভিজে গেছে সাজিদের ইউনিফর্ম। পরিষ্কার বোঝা যাচ্ছে ইসরায়েলিরা কি করতে চেয়েছিল। ডকের প্রবেশমুখে পাথরের বড়সড় একটা ধস নামাতে পারলে ওদেরকে তারা পুরোপুরি ফাঁদে আটকে ফেলতে পারবে। কিন্তু তাদের সমস্যা হলো, ডকের প্রবেশমুখে আঘাত

করতে হলে যেখান থেকে গ্যেনেড ছুঁড়তে হবে সেখানে তারা বেরিয়ে আসতে পারছে না, এলেই ওদের গুলি খেতে হবে। তবে পানির নিচে গ্যেনেডের বিস্ফোরণ ডকের ফ্লাড গেটের ক্ষতি করেছে বলে মনে হলো, কারণ ওদের নিচে থেকে ঘড় ঘড় আওয়াজ উঠে আসছে, ডকে পানি ঢোকার শব্দ, অথচ জোয়ার শব্দ হতে এখনও খানিকটা দেরি আছে।

টাগ এঞ্জিনের আওয়াজ খুব কাছে চলে এসেছে। পাঁচ নম্বর ডকের প্রবেশমুখের ঠিক বাইরে রয়েছে ওটা, দুটো ডকে আলাদা করে রাখা পাথুরে পাঁচিলের বাড়তি অংশটুকুই শুধু ওটাকে আড়াল করে রেখেছে। টাগের এঞ্জিন হঠাৎ গর্জে উঠল। সাজিদ একটা গ্যেনেড হাতে নিল। পাঁচিলের আড়াল থেকে বোটটা নাক বের করতেই পিন খুলে ফেলল সে। ডেকে একটা হাঁটু গেড়ে রাইফেল তুলল রানাও। টাগ বোট পিছনে ফেনা তুলে পাঁচিলের আড়াল থেকে তীর বৈগে বেরিয়ে এল।

সাইটে চোখ রেখে ট্রিগারে টান দিল রানা। পাশ থেকে গর্জে উঠল সুলতানের মেশিন-গান। রানা ঠিক দেখল না, শুধু অনুভব করল সাজিদ হাত উঠু করে গ্যেনেড ছুঁড়ছে। বোটের হুইল ধরে থাকা লোকটা গুলি খেয়ে ঢলে পড়ল। দ্বিতীয় লোকটা গ্যেনেড ছুঁড়তে যাচ্ছিল, সে-ও প্রথমে স্থির হয়ে গেল, তারপর কাত হয়ে পড়ে গেল পানিতে। প্রায় একই মুহূর্তে প্রচণ্ড এক বিস্ফোরণে দুটুকরো হয়ে গেল টাগ। সঙ্গে সঙ্গে ডুবে গেল সেটা, পানিতে ভেসে থাকল তিনটে লাশ আর কিছু আবর্জনা।

এক সেকেন্ড পর একটা মেশিন-গান গর্জে উঠল, সাত নম্বর ডক থেকে। লক্ষ্যস্থির করতে পারছে না, কারণ সর্বশেষ বিস্ফোরণে ডকের অবশিষ্ট আলো নিভে গেছে। তবে খানিক পরই একটা সার্চলাইট জ্বালল তারা। ডকের আরও পিছন দিকে সরে আসতে হলো ওদেরকে। এ-ছাড়া কোন উপায় নেই। ইসরায়েলিরা হতাহতের ঝুঁকি নিতে পারে, ওরা পারে না। রানার নির্দেশে প্যাকিং কেস দিয়ে আরেকটা অর্ধবৃত্তাকার ব্যারিকেড তৈরি করা হলো।

নতুন ব্যারিকেডের আড়ালে আহুদকে ডেকে নিয়ে রণকৌশল নিয়ে আলোচনা করল রানা। ওর প্ল্যানটা ব্যাখ্যা করার পর বলল, ‘এতে কাজ হতে পারে, আবার না-ও হতে পারে। তবে ঝুঁকিটা আমাদের নিতেই হবে। আর যদি তোমাদের কারও কোনও প্ল্যান থাকে তো বলো।’ কেউ কথা বলল না। সবাই জানে, ফাঁদে পড়ে গেছে ওরা। ধরা পড়া এখন স্নেহ সময়ের ব্যাপার। প্রায় ছয়শো লোকের বিরুদ্ধে ওরা মাত্র চারজন। আর আত্মসমর্পণ করলে যে সঙ্গে সঙ্গে গুলি করে মেরে ফেলা হবে তাতে কোন সন্দেহ নেই। ‘ভাটার পানি নেমে যাবার আগে ওরা যদি একটা সাবমেরিনও ভাসাতে পারে, এই ডক এক মিনিটও নিজেদের দখলে রাখতে পারবে না। সিঙ্গ ইঞ্চ গানের একটা শেল ডকের মুখে লাগুক, ইহজগতে আমাদের ভবিষ্যৎ বলে কিছু থাকবে না। কিন্তু তারা যদি জোয়ারটাকে কাজে লাগাতে না পারে, আমরা অন্তত আরও দশ ঘণ্টা টিকে থাকতে পারব।’

কেউ দ্বিমত পোষণ করছে না।

‘যাই ঘটুক না কেন,’ আবার বলল রানা। ‘যত মূল্যই দিতে হোক, এই বেসের আভারওয়াটার এন্ট্রাস বন্ধ করে দিতে হবে।’ ‘সংক্ষেপে ইসরায়েলি নৌ-বাহিনীর প্ল্যানটা ওদেরকে ব্যাখ্যা করল ও—এখন থেকে মাত্র কয়েক ঘণ্টার মধ্যে ইসরায়েলি সাবমেরিন ব্রিটিশ, আমেরিকান ও জাতিসংঘের তিনটে জাহাজ ডুবিয়ে দেবে। তাৎপর্যটাও ব্যাখ্যা করল—ঘটনার জন্যে দায়ী করা হবে ইরাককে, ফলে আলোচনার মাধ্যমে সঙ্কট কাটিয়ে ওঠার আর কোন সুযোগ থাকবে না, ব্রিটেন আর আমেরিকা ইরাককে ধুলোর সঙ্গে মিশিয়ে দেবে। সবশেষে বলল, ‘আমি আভার-ওয়াটার এন্ট্রাস বন্ধ করার কাজটা এখনই শুরু করতে চাই।’

সবাই ওরা সমর্থন করল প্রস্তাবটা।

রানার মনে পড়ল, প্রত্যেক সাবমেরিনের সঙ্গে কোলাপসিবল রাবার বোট আছে। ইসরায়েলিরা যদি জোয়ারের সুযোগ নাও নিতে পারে, সাত নম্বর ডকের আড়াল থেকে গুলি করে ওদের ডকের প্রবেশমুখ বন্ধ করে দিতে পারবে। কথাটা শুনে সাজিদ প্রস্তাব দিল সাবমেরিনের পিছনে গিয়ে মেশিন-গানের গুলিতে সার্চলাইটটা নিভিয়ে দিয়ে আসবে সে। ‘অপেক্ষা করো,’ বলল রানা। ‘আগে আমরা এই গানটা ফায়ার করি।’

গানটা অপারেট করার দায়িত্ব আহুদকে দিয়ে ইউ-টোয়েনটিওয়ানের ব্রিজে উঠে এল রানা। সাবমেরিনের সার্চলাইট জেলে ঘোরাল, চোখ-ধাঁধানো উজ্জ্বল আলোয় উদ্ভাসিত হয়ে উঠল পিছন দিকটা, সেই সঙ্গে গোটা মেইন কেভ বা মূল গুহা। সাগরের দিকটায় ছাদ ক্রমশ নিচে নেমে গেছে, এক পর্যায়ে অদৃশ্য হয়ে গেছে পানির তলায়। ওদিকের পানি কালো, তেল চকচকে একটা ভাব আছে।

‘সাইটে কোন ক্রটি নেই তো?’ জিজ্ঞেস করল রানা।

‘কোথাও কোন ক্রটি নেই, স্যার,’ জবাব দিল আহুদ।

ব্রিজের রেইলটা শক্ত করে আঁকড়ে ধরল রানা। ‘ফায়ার!’

ট্রিগার কর্ড ধরে টান দিল আহুদ। প্রচণ্ড এক বিস্ফোরণ ঘটল। রানার পা দুটো ডেক ছেড়ে শূন্যে উঠে পড়ল, রেইলিং ধরে না থাকলে ছিটকে পড়ে যেত। খালি ডকের পাথুরে গায়ে ঘষা খেলো সাবমেরিন। প্রায় একই মুহূর্তে চোখ ধাঁধানো আলো ঝলসে উঠল মেইন কেভের ছাদে, ঠিক যেখানে ছাদটা পানির তলায় অদৃশ্য হয়ে গেছে। তারপর বন্ধ জায়গার ভেতর যে বিস্ফোরণের আওয়াজটা হলো, তার ধাক্কায় সমস্ত শরীর অবশ হয়ে গেল রানার। মুখে আঘাত করল গরম বাতাস। সার্চলাইটের আলোয় রানা দেখল গুহার শেষ প্রান্তের পুরো ছাদ সগর্জনে ধসে পড়ছে।

গুধু ছাদ ধসে পড়েনি, রানার চারদিকের পাথর প্রচণ্ড এক ঝাঁকি খেয়েছে, সেই ঝাঁকির রেশ এখনও পুরোপুরি মিলিয়ে যায়নি। বড় আকৃতির কয়েকটা পাথরের টুকরো সাবমেরিনের ডেকেও পড়ল। কম করেও মূল গুহার ত্রিশ গজ

খসে পড়েছে। প্রকাণ্ড আকারের পাথর পানিতে পড়ছে, ফলে বেসিনে বিশাল ঢেউ উঠছে। সাবধান করার জন্যে চেষ্টায়ে উঠল রানা, তবে কেউ শুনতে পেয়েছে বলে মনে হলো না। পানির দশ ফুট উঁচু একটা পাঁচিল ডেকের দিকে ছুটে আসছে। খালি ডকে উঠে পড়ল তরল পাঁচিলটা, ডেকের নাগাল পেয়ে গেল। বাধা পেয়ে ঘোড়া যেমন পিছনে পায়ে ভর দিয়ে উঁচু হয়, সাবমেরিনও তাই করল। কনিং টাওয়ারের ব্রিজে হাত-পা ছড়িয়ে পড়ে গেছে রানা। সাবমেরিন উঁচু হচ্ছে, রেইলটা ছাদে বাড়ি খেলো রানার ঠিক মাথার ওপরে, সেই সঙ্গে নিভে গেল সার্চলাইট। তারপর সাবমেরিনের বো ডেকের শেষ মাথার সঙ্গে প্রচণ্ড এক ধাক্কা খেলো।

বার কয়েক উঁচু-নিচু হয়ে, ডকসাইটে বারবার ধাক্কা খেয়ে, অবশেষে স্থির হলো সাবমেরিন। এখনও ওটা ভেসে রয়েছে। কানে তাল লেগে আছে, তাসত্ত্বেও ডেকের ফাড গেট থেকে সবগে পানি ঢোকার অস্পষ্ট আওয়াজ পেল রানা। ধীরে ধীরে সিধে হ'লো ও। চারদিক অন্ধকার, কিছুই দেখা যাচ্ছে না। তবে চিংকার চেঁচামেচির আওয়াজ পাওয়া যাচ্ছে।

'স্যার, মি. রানা? আপনি ঠিক আছেন তো?' কামানের দিক থেকে জিজ্ঞেস করল কেউ।

'হ্যাঁ,' বলল রানা। 'তুমি?' উত্তরের অপেক্ষায় থাকল না, মই বেয়ে কনিং টাওয়ার থেকে নেমে এল। ওখানেই অন্ধকারে দাঁড়িয়ে থাকল। ডেকের শেষ প্রান্তে ক্ষীণ আলোর আভা। তারমানে বিস্ফোরণে সব আলো নিভে যায়নি। ওর চারদিকে সব কিছু অন্ধকারে ঢাকা, কিন্তু ডক যেখানে মেইন কেভে বেরিয়েছে সেখানে আলোর একটা অর্ধবৃত্ত। সেই আলোর উল্টোদিকে কামানের গাঢ় কাঠামো আর লোকজনের নড়াচড়া অস্পষ্ট হলেও ধরা পড়ল চোখে। পকেট থেকে টর্চটা বের করে জ্বালল ও। আলোর দিকে চোখ ফেরাতে মাইনারদের মুখ সাদা দেখাল। তবে সবাই ওরা অক্ষত। কামানের পাশে মেশিন-গান, রাইফেল ও অ্যামুনিশনও ঠিকঠাক আছে।

হাতে অটোমেটিক রাইফেল নিয়ে পিছন দিকে চলে এল ওরা। আফটার হ্যাচের ওপর ফর্জটা আগের জায়গাতেই আছে, এক চুল নড়েনি, তবে পানির তোড়ে প্যাকিং কেসের ব্যারিকেডটা ভেসে গেছে। ডেকে ছোট বড় পাথরের টুকরো ভর্তি। ডকসাইট এখনও অগভীর পানিতে ডোবা, সেখানে প্যাকিং কেসগুলো ভাসছে।

ডেকের খাড়া একটা পোলের সঙ্গে আটকে রয়েছে একটা মেশিন-গান, সেটাকে তুলে আনা হলো। দ্বিতীয়টা পাওয়া গেল না। ম্যাগাজিনগুলো যেখানে ছিল সেখানেই আছে। ডক সাইট থেকে একটা অটোমেটিক রাইফেল উদ্ধার করা হলো। প্যাকিং কেসগুলো পানি থেকে তুলে এনে দ্রুত আবার ব্যারিকেড তৈরি করল ওরা। দুটো গ্যাংওয়েই ভেঙে টুকরো টুকরো হয়ে গেছে, প্যাকিংকেসগুলোকে রশি দিয়ে বেঁধে সাবমেরিনের ঢালু গায় তুলতে হলো।

ম্যাগাজিন রুমে আবার একবার যেতে হলো রানাকে। অক্সিজেন

মাস্কগুলো আগেই দেখে গিয়েছিল, এবার সেগুলো খুঁটিয়ে পরীক্ষা করল। ফেস মাস্ক সহ বড় আকৃতির এয়ার ব্যাগ, এয়ার ব্যাগটা স্ট্যাপ দিয়ে কোমরে আটকাতে হয়, সঙ্গে আছে ছোট আকৃতির অক্সিজেন সিলিন্ডার।

একটা থলেতে ভরে বেশ কিছু গ্লেভ নিয়ে সাবমেরিনের ডেকে ফিরে এল রানা। চারদিক আলোয় আলোকিত হয়ে আছে। ছয় নম্বর ডকের সাবমেরিন থেকে সার্চলাইট জ্বালা হয়েছে। চিৎকার-চেষ্টামেচির কারণটা এতক্ষণে ধরতে পারল ও। তেল চকচকে কালো পানিতে, মেইন কেভের কাছে, উঁচু-নিচু হচ্ছে তিনটে কলাপসিবল রাবার বোট, তার মধ্যে দুটো উপুড় হয়ে আছে। রানা বলল, 'ওরা হামলা করতে যাচ্ছিল, এই সময় কামান দাগি আমরা।'

সুলতান বলল, 'স্যার, এখন আমরা এই জায়গা অনেকক্ষণ নিজেদের দখলে রাখতে পারব।'

'কি দেখে বলছ কথটা?' জানতে চাইল রানা।

'ওরা এখন আর বোট নিয়ে সাবমেরিনের পিছন দিকে আসতে পারবে না। আপনি স্যার ডকের তলায় ঘসটানির আওয়াজ শুনতে পাচ্ছেন না?'

সুলতান ঠিকই বলছে। ব্যস্ত থাকায় এতক্ষণ ব্যাপারটা খেয়াল করেনি রানা। ডকে পানি উঠে এলেও, ভাটার টান পড়ায় সাবমেরিনের তলা মেঝেতে ঘষা খাচ্ছে। 'ঈশ্বরকে সেজন্যে ধন্যবাদ!' বলল ও। ইসরায়েলিরা ওদের সুযোগ হারিয়ে ফেলেছে। ওদের জন্যে যেটা সবচেয়ে বড় বিপদ ছিল, সেটা কেটে গেছে। অন্য কোন সাবমেরিন থেকে হামলা আসার আগে হাতে দশ ঘণ্টা সময় পাবে ওরা। ওখানে দাঁড়িয়ে সেই মুহূর্তে সিদ্ধান্ত নিল রানা, যত ভয়াবহ মূর্তি নিয়ে যে-বিপদই হাজির হোক, ওর প্ল্যান যদি ব্যর্থও হয়, অন্য কোন সাবমেরিন ঘাঁটি ছেড়ে বেরিয়ে যাবার আগে ওরাই ওদের সাবমেরিন নিয়ে বেরিয়ে যাবার চেষ্টা করবে। তা-ও যদি সম্ভব না হয়, লড়াই করে মরবে ওরা, ফ্যারিং স্কোয়াডের সামনে দাঁড়াবে না। যেহেতু ওরা অ্যাকশনে আছে, মৃত্যুর মুখোমুখি হওয়াটা সহজ বলে মনে হচ্ছে।

হাদীর কথা মনে পড়ল। কি করছে ও? বেঁচে আছে তো?

সুলতানকে নিয়ে ডকসাইটে নেমে এল রানা। পানি এরইমধ্যে নেমে গেছে। দেয়ালের কাছে কোদাল আর শাবল পাওয়া গেল, কাল ডেরিক খাড়া করার সময় কাজে লাগানোর পর সরানো হয়নি। ওগুলো নিয়ে ডকের শেষ প্রান্তে চলে এল ওরা, গ্যালারি যেখানে ব্লক হয়ে আছে। আবর্জনার মাঝখানে একটা জায়গা পরিষ্কার করা হবে। কাজ করার সময় অটোমেটিক রাইফেলগুলো নাগালের মধ্যে থাকল, ডকের খোলা প্রান্ত থেকে আক্রমণ এলে ঠেকাতে হবে।

হাত দিয়ে পাথর সরানো অসম্ভব পরিশ্রমের কাজ। একটা পথ তৈরি করে এগোচ্ছে ওরা, পাথরগুলো তুলে পিছনে ফেলছে। আধ ঘণ্টা পর আবর্জনার ভেতর যে বেসিনটা তৈরি করতে চাইছে রানা সেটা আকৃতি পেতে শুরু করল। কোন বিরতি ছাড়া নিঃশব্দে কাজ করে যাচ্ছে দু'জন। বারবার ঝুঁকে

লাইমস্টোনের ভারী টুকরো তুলে ছুঁড়ে ফেলতে হচ্ছে, ব্যাথায় ভেঙে যেতে চাইছে কোমর। ধসে পড়া পাথরের স্তূপে চড়ে টুকরোগুলো নিজেদের পিছনে ফেলছে, ফলে পিছনে বেসিনের কিনারা ক্রমশ উঁচু হচ্ছে। ব্যাথা তো করছেই, হাতের পেশী কাঁপতে শুরু করল। নাকে-মুখে ধুলো ঢোকায় দু'জনেই কাশছে।

আরও কিছুক্ষণ পর দম নেয়ার জন্যে থামল ওরা। হাতঘড়ি দেখল রানা। তিনটে বেজে কয়েক মিনিট। এই মুহূর্তে ও দাঁড়িয়ে আছে বিশাল এক বৃত্তাকার পাথরে প্রাচীরের পিছনে। ছাদটা, এবড়োখেবড়ো, ওর মাথা থেকে মাত্র দশ ফুট ওপরে—মোটোও নিরাপদ নয়, যে-কোন মুহূর্তে খসে পড়তে পারে। ওদের তিন দিকে ভাঙা লাইমস্টোনের স্তূপ প্রায় ছাদ ছুঁয়েছে। শুধু ডকগুলোর দিকে ক্রমশ ঢালু হয়ে আছে ধসে পড়া পাথর, সেগুলো স্তূপাকারে সাজিয়ে পাথরের একটা ট্যাঙ্ক তৈরি করেছে ওরা। সেটাও ইতিমধ্যে ওদের মাথা সমান উঁচু হয়ে উঠেছে। পায়ের আঙুলে ভর দিয়ে উঁচু হলো রানা, পাঁচিলের মাথা ছাড়িয়ে দৃষ্টি চলে গেল ডকের খোলা প্রান্তের দিকে। সার্চলাইট এখনও আলোকিত করে রেখেছে মেইন কেভ, উজ্জ্বল আভায় ডকের ভিজে দেয়ালগুলো চকচক করেছে, ওদের সাবমেরিনের কনিং টাওয়ারটাকে গাড় একটা ছায়ার মত লাগছে দেখতে।

আবার কাজ শুরু করতে যাবে রানা, দেখল আড়ষ্ট ভঙ্গিতে দাঁড়িয়ে আছে সুলতান, কান পেতে কি যেন শোনার চেষ্টা করছে। পাথর গড়িয়ে পড়ার আওয়াজ, রানাও শুনতে পেল। তারপর কানে এল লোকজনের ফিসফাস। ওদের ডক আর পাঁচ নম্বর ডকের মাঝখানে পাথর ধস যেখানে গ্যালারি ব্লক করে দিয়েছে, তার পিছন থেকে আসছে শব্দগুলো। তারপর স্পষ্ট শোনা গেল পাথরে কৌদাল আর শাবলের সংঘর্ষ। 'ওরা পাথর সরিয়ে পথ তৈরি করছে,' ফিসফিস করল সুলতান।

'কতক্ষণ লাগবে?' জানতে চাইল রানা।

ধসে পড়া পাথরগুলোর দিকে তাকাল সুলতান। ওদিকের গোটা গ্যালারির ব্লক হয়ে আছে। 'নির্ভর করে গভীরতার ওপর,' বলল সে। 'এক ঘণ্টার আগে কাজটা শেষ করতে পারবে বলে মনে হয় না।'

'ওড!' বলল রানা। 'তার আগেই আমাদের কাজ শেষ হয়ে যাবে। তারপর আমরা ওদের আসার অপেক্ষায় থাকব।' আবার ওরা কাজ শুরু করল।

কিন্তু মাত্র দশ মিনিট পরই গর্জে উঠল একটা মেশিন-গান। ডকের খোলা প্রান্তের দিক থেকে এল আওয়াজটা। মুহূর্তের মধ্যে নিজেদের তৈরি প্রাচীরের মাথায় উঠে এল ওরা, রাইফেল তুলে নিয়ে ডকসাইট ধরে ছুটল যত জোরে পারা যায়।

ভোঁতা একটা বিস্ফোরণ ঘটল, সাবমেরিনের পিছনে খাড়া হলো পানির একটা স্তম্ভ। সাবমেরিনে উঠল ওরা, রানা দেখল প্যাকিং কেস দিয়ে তৈরি ব্যারিকেডের পিছন থেকে খানিকটা উঁচু হলো একটা মাথা, এক মুহূর্ত পর

আরেকটা জোরাল-গর্জন শোনা গেল, মেইন কেভের ছাদ থেকে পানিতে খসে পড়ল বেশ কিছু পাথর। সেই মুহূর্তে নিভে গেল সার্চ লাইটটা।

প্যাকিং কেসের পিছনে ডাইভ দিল ওরা, হাতে রাইফেল। 'কি ঘটল?' জানতে চাইল রানা।

'ওরা একটা ভেলা তৈরি করেছিল,' জবাব দিল আহুদ। 'প্যাকিং কেস সাজিয়ে আড়ালও তৈরি করেছিল। শালাদের রাইফেল তো ছিলই, থেনেডও ছুঁড়ছিল। ভেলাটাকে সাজিদ উড়িয়ে দিয়েছে।'

'গুড ওঅর্ক!' প্রশংসা করল রানা। 'সাজিদ, তুমি কি ওদেরকে আরও আধ ঘণ্টা ঠেকিয়ে রাখতে পারবে?'

সাজিদ কথা বলছে না। মেশিন-গানের পিছনে পড়ে আছে সে। হাত দিয়ে তার মুখ স্পর্শ করল রানা। তাজা রক্তে ভিজ়ে গেল ওর আঙুল। হাত দিয়ে আড়াল করে টর্চ জ্বালল ও। দাড়ি না কামানো শ্যামলা চোয়াল হাঁ হয়ে আছে, জ্যাকেটটা ভিজ়ে গেছে রক্তে। বুলেটটা লেগেছে গলায়।

অসুস্থ বোধ করল রানা। বিদেশী একটা মেয়েকে খনির ভেতর ঢুকতে সাহায্য করতে এসে অকালে প্রাণ হারাল লোকটা। তবে সাল্লানা এইটুকু যে খনিতে ঢোকার পর স্বদেশের মাটিতে চরম শত্রু ইসরায়েলিদের হাতে বন্দী হয় সে, দেশের সার্বভৌমত্ব রক্ষার জন্যে লড়াই করার সময় শহীদ হয়েছে।

ওরা চারজন ছিল, হয়ে গেল তিনজন। ভেলাটা উড়িয়ে দেয়ার বিনিময়ে নিজের প্রাণ বিসর্জন দিয়েছে সাজিদ। কিন্তু একের পর এক আরও ভেলা আসবে। 'বেসিনটা আরও তিন ফুট গভীর করা দরকার। কাজটা তুমি একা করতে পারবে, সুলতান? এদিকটা দখলে রাখার জন্যে আহুদের সঙ্গে থাকতে চাই আমি।'

'যাচ্ছি,' সিধে হলো সুলতান।

'কাজ শেষ হলেই চিৎকার করে জানাবে,' বলল রানা, নিজের টর্চটা ধরিয়ে দিল তার হাতে। সাবমেরিনের ডেক ধরে দ্রুত অদৃশ্য হয়ে গেল সুলতান।

এরপর লাশ নিয়ে আহুদ আর রানা পরবর্তী আক্রমণের অপেক্ষায় বসে থাকল। আবার সার্চলাইট জ্বালল ইসরায়েলিরা। একজন রেটিং মেইন কেভের পানিতে নেমে আহত একজন লোককে উদ্ধার করল। দু'জনেই অদৃশ্য হয়ে গেল পাশের ডকে, সেই সঙ্গে নিভে গেল সার্চলাইট। পাঁচ, ছয় আর সাত নম্বর ডকের মুখে আলোর আভা ছিল, সেগুলোও একে একে অদৃশ্য হয়ে গেল। ওদের নিজেদের ডকের বাম দিকে সব কিছু গাঢ় অন্ধকারে মোড়া। শুধু ডান দিকে এক, দুই আর তিন নম্বর ডকের মুখে এখনও আলোর আভা দেখা যাচ্ছে। খানিক পর হিরু ভাষায় একজন অফিসার চিৎকার করে উঠল। তারপর একে একে ওগুলোও নিভে গেল। সব কিছু কালো পর্দায় ঢাকা পড়ে গেল। কিছুই দেখা যাচ্ছে না, এমন কি সামনের প্যাকিং কেসগুলোও নয়।

‘ব্যাটারা অন্ধকারে হামলা চালাবে,’ ফিসফিস করল আহুদ।

‘কান পেতে থাকো,’ বলল রানা।

সময় বয়ে চলেছে অসম্ভব ধীর গতিতে। মাঝে মধ্যে হিফ্ ভাষায় নির্দেশ ভেসে আসছে, পাথরের ওপর বুটের শব্দও শোনা যাচ্ছে। আর পাঁচ নম্বর ডকের ওদিক থেকে খসে পড়া পাথর সাফ করার আওয়াজ।

বিশ মিনিট পার হলো। নতুন ধরনের একটা আওয়াজ ঢুকল কানে। হাতুড়ি দিয়ে ঠোকাঠুকির শব্দ। ‘আরেকটা ভেলা বানাচ্ছে,’ ফিসফিস করল আহুদ।

এই সময় ওদের নিজেদের ডকের শেষ প্রান্ত থেকে একটা টর্চ জ্বলে উঠেই নিভে গেল, দেখতে পেয়ে রানা বলল, ‘সুলতান আমাকে ডাকছে। ফিরতে দেরি করব না।’ সাজিদের টর্চটা নিয়ে সাবমেরিনের ডেক ধরে ছুটল ও।

লাফ দিয়ে ডকে নামল রানা। তারপর ছুটল। অয়েল ট্যাঙ্কের কাছে ওর সঙ্গে মিলিত হলো সুলতান। ‘স্যার, পাথর সরিয়ে পথ করে নিয়েছে ওরা, আর মাত্র কয়েক ফুট পরিষ্কার করতে পারলেই...’

‘ঠিক আছে, এসো, পাম্প করে তেল ঢালি।’

লাইমস্টোনের বেসিন্টি যথেষ্ট গভীর হয়েছে কিনা তা আর এখন দেখার সময় নেই হাতে। টুলিতে চাপানো অয়েল ট্যাঙ্কটা আবর্জনার স্তুপের কাছে নিয়ে এল ওরা। ক্যানভাস পাইপটা আবর্জনার ওপর দিয়ে ওদের তৈরি প্রাচীরের ওপর তুলল সুলতান, পাইপের খোলা মুখ বেসিনের দিকে ঝুলে থাকল। রানা ছুটে এল ছোট পেট্রল ট্যাঙ্কের কাছে। দুটো ট্যাঙ্কেই হ্যান্ড পাম্প ফিট করা আছে। আড়াল করা টর্চের আলোয় দেখল কালো ক্রুড অয়েল হুড়হুড় করে বেরিয়ে আসছে, ছড়িয়ে পড়ছে পাথরের ওপর। পাঁচ নম্বর ডকের ওদিক থেকে কথা বলার ও পাথর সরানোর আওয়াজ পাচ্ছে ও। যে-কোন মুহূর্তে বেরিয়ে আসবে ইসরায়েলিরা।

পেট্রল ট্যাঙ্কের কাছে ফিরে এসে পাম্প শুরু করল রানা, অটোমেটিক রাইফেলটা পাশে পড়ে আছে। ট্যাঙ্কটা অর্ধেক খালি করার পর সুলতানকে সাহায্য করার জন্যে এগোল ও। তার সাহায্য দরকার নেই দেখে এদিক ওদিক তাকাল, এক প্রস্থ লোহার পাইপ আর কিছু ন্যাকড়া দেখতে পেয়ে তুলে নিল। পাইপটার মাথায় পেট্রলে ভেজানো ন্যাকড়া জড়িয়ে মশাল বানাল। ইতিমধ্যে ইসরায়েলিদের পাথর সরানোর আওয়াজ আরও জোরাল হয়ে উঠেছে।

সিধে হলো সুলতান। অয়েল ট্যাঙ্ক খালি হয়ে গেছে। প্রাচীর ঘেরা বেসিনে টর্চের আলো ফেলল রানা। তেল ভালভাবেই জমে আছে ওখানে। ঠিক তখনই বিশ্বয়সূচক আওয়াজ ঢুকল কানে। ইসরায়েলিরা টর্চের আলো দেখতে পেয়েছে। ইতিমধ্যে পেট্রল ট্যাঙ্কে কাজ শুরু করেছে সুলতান, বেসিনে পেট্রল পড়ার আওয়াজ পাচ্ছে রানা। ইসরায়েলিরা যেখানে বেরিয়ে আসবে সেখানে তাকিয়ে আছে ও, হাতের রাইফেলও সেদিকে তাক করা।

ডেকের খোলা প্রান্ত থেকে মেশিন-গানের এক পশলা গুলি হলো। ঝট করে ঘাড় ফেরাল রানা। আরেকটা হামলা? ওদিকে কোন আলো নেই। আহুদ কি কোন ভুল করে বসেছে? তারপর, অস্পষ্টভাবে, আহুদের গলা ভেসে এল। কার সঙ্গে কথা বলছে সে? মনে হলো পাশের ডেকের ইসরায়েলিদের উদ্দেশে কিছু বলছে। 'জলদি!' সুলতানকে তাগাদা দিল ও।

'প্রায় শেষ,' জবাব দিল সুলতান।

তারপর আহুদের কণ্ঠস্বর বন্ধ জায়গার ভেতর ধ্বনিত-প্রতিধ্বনিত হতে শুরু করল, 'স্যার, মি. রানা! স্যার, মি. রানা!' কি কারণে কে জানে, আতঙ্কিত মনে হলো তাকে।

পকেট থেকে দেশলাই বের করে সুলতানের হাতে গুঁজে দিল রানা। 'কাজ শেষ হলেই মশালটা জ্বালবে, ছুঁড়ে দেবে বেসিনে। যাই ঘটুক না কেন, তার আগে কোনভাবেই যেন ওরা বেরিয়ে আসতে না পারে।'

'মি. রানা, স্যার!' আবার চেষ্টা চল আহুদ।

সাবমেরিনের ঢালু গা বেয়ে ডেকে উঠে এল রানা। স্টীল প্লেটে ওর পায়ের শব্দ ফাঁপা শোনাচ্ছে। টর্চ নিভিয়ে দিয়ে ছুটেছে ও, প্যাকিং কেসের আড়ালে পৌঁছে জানতে চাইল, 'কি হয়েছে?'

'শালারা মিস শারমিন আর হাদীকে জিম্মি করেছে।'

'ওহ্ গড!'

'বলছে, দু'জনকে বেঁধে মেশিন-গানারের শীল্ড হিসেবে বসিয়ে রাখা হয়েছে। এখন যদি আমরা সারেভার'না করি, ওরা আক্রমণ করবে। আপনার সঙ্গে পরামর্শের কথা বলে ব্যাটীদের আমি অপেক্ষা করতে বলেছি।'

এই সময় পাশের ডেকের সাবমেরিন থেকে সার্চলাইট জ্বলে উঠল। এতক্ষণে ব্যাপারটা উপলব্ধি করল রানা। পাঁচ নম্বর ডেকের মুখ থেকে খানিক সামনে একটা ভেলা ভাসছে, তাতে হাঁটু গাড়া অবস্থায় পিছমোড়া করে বেঁধে রাখা হয়েছে শারমিন আর হাদীকে, পাশাপাশি। দু'জনের মাঝখান থেকে বেরিয়ে আছে একটা সাবমেশিন-গানের ব্যারেল। শারমিন আর হাদীকে আঘাত না করে ওদের পক্ষে গুলি করা সম্ভব নয়। রানা দেখল, বাঁধন খোলার চেষ্টায় আড়ষ্ট হয়ে আছে হাদীর প্রকাণ্ড শরীর। চওড়া কপাল চকচক করছে ঘামে। শারমিনকে সুস্থ ও সতেজ লাগছে, তবে যে ভঙ্গিতে বেঁধে রাখা হয়েছে, খুব কষ্ট পাচ্ছে সে। ভেলাটা ধীরগতিতে ভেসে আসছে ওদের দিকে। রানা আন্দাজ করল, ওটার পিছনে সাঁতার কাটছে অন্তত দু'জন রেটিং।

'তোমরা কি সারেভার করবে?' কমোডর আয়ান পেরেজের গলা চিনতে পারল রানা। 'নাকি বন্ধুদের মৃত্যুর মুখে ঠেলে দেবে?'

'কি শর্তে?' সময় পাবার জন্যে জিজ্ঞেস করল রানা।

'কোন শর্ত নেই,' তীক্ষ্ণ, কঠিন জবাব এল।

'স্যার, স্যার, বোকামি করবেন না!' চিৎকার করছে হাদী। 'এরা আপনাকে গুলি করবে।' তার পিছনে একটা হাত উঁচু হতে দেখল রানা। হঠাৎ ঝাঁকি খেলো হাদী। বেয়োনেট দিয়ে খোঁচা মারা হয়েছে তাকে।

‘মাসুদ ভাই, আপনাদের কাজ আপনারা করুন,’ শারমিনের গলা ভেসে এল। ‘আমাদের কথা চিন্তা করতে হবে না। এরা এমনিতেও গুলি করবে আমাদের।’

আর ঠিক তখনি রানার পিছনের ডকে একটা গুলি হলো।

নয়

ঝট করে ঘুরে তাকাতেই দূরে সুলতানের কাঠামোটা টলতে দেখতে পেল রানা, হাতে ধরা মশালটা দাউ দাউ করে জ্বলছে। মশালের আলোয় বেশিনের মাথায় একজন ইসরায়েলিকেও দেখা যাচ্ছে। তারপর সুলতানের হাত সচল হয়ে উঠল, মশালটা ধনুকের মত বাঁকা হয়ে উড়ে যাচ্ছে। পাথুরে বেসিনে পড়ল সেটা। দুপ করে রোমহর্ষক একটা শব্দ হলো, ক্রুড অয়েলের ওপরে জ্বলি থাকা পেট্রোলে আগুন ধরতেই আলোকিত হয়ে উঠল গোটা ডক। তারপর চোখের পলকে ডকের পুরো শেষ প্রান্তটা জ্বলে উঠল। বেসিনের মাথায় উঠে আসা ইসরায়েলির কি পরিণতি হলো বোঝা গেল না। সম্ভবত আকস্মিক আঁচই পুড়ে গেছে সে। পাঁচ নম্বর ডকের পাথর ফস সরিয়ে পথ বের করা হয়েছে, ফলে ওদিক থেকে বাতাস আসছে, সেই বাতাস আগুনটাকে দ্রুত ছড়িয়ে পড়তে সহায়তা করল। তীব্র বাতাসের বিকট গর্জনের মত শোনাচ্ছে অগ্নিশিখার আওয়াজ। তার গেলাপী আলোয় ডকটসাইট ধরে সুলতানকে টলতে টলতে এগিয়ে আসতে দেখল রানা, ডকের দেয়ালে তার ছায়া পড়েছে।

হঠাৎ ভেলা থেকে মেশিন-গান গর্জে উঠল। রানার নির্দেশে প্যাকিং কেসের আড়াল থেকে বেরিয়ে সাবমেরিনের ডেক ধরে চোঁ-চোঁ দৌড় দিল আহুদ। নিজেদের মেশিন-গান থেকে ফায়ার ওপেন করল রানা। ভেলার পাশে লক্ষ্যস্থির করল ও, শারমিন আর হাদীর কাছ থেকে যথেষ্ট দূরে। ভেলার কোন ক্ষতি করা ওর উদ্দেশ্য নয়, গানারের মনোযোগ সাবমেরিনের দিকে ধরে রাখতে চায়, সুলতান যাতে নিরাপদে ডকে পৌঁছতে পারে।

আহুদ সাবমেরিন থেকে নেমে যেতেই ব্যারিকেডের আড়াল থেকে বেরিয়ে ডেক ধরে ছুটল রানা, কনিং টাওয়ারে পৌঁছতে হবে ওকে। আগুনের আভায় এদিকটাও আলোকিত হয়ে আছে, ভেলা থেকে ওকে পরিষ্কার দেখতে পাচ্ছে গানার। ও যে এভাবে ছুটবে, সেজন্যে গানার যেন তৈরিই ছিল। আড়াল থেকে বেরুতেই পিছনে গর্জে উঠল মেশিন-গান। ঝাঁক-ঝাঁক বুলেট, কেন যে একটাও লাগছে না, একমাত্র ঈশ্বরই বলতে পারবেন। তারপর বাঁ হাতে একটা ঝাঁকি খেলো রানা, তীক্ষ্ণ ব্যাখাটাও সঙ্গে সঙ্গে অনুভব করল। তবে থামেনি রানা, এক ছুটেই কনিং টাওয়ারের আড়ালে পৌঁছে গেল।

ইতিমধ্যে সাবমেরিনের ডেকে উঠে পড়েছে সুলতান, তবে ডান হাতটা

নাড়তে পারছে না। আগুনের আত্মায় যন্ত্রণায় কাতর মুখ বিকৃত হয়ে আছে। ডেকে উঠতে তাকে সাহায্য করেছে আহুদ। 'ভেতরে চোকো!' নির্দেশ দিল রানা। মই বেয়ে বিজে উঠে যাচ্ছে আহুদ, পিছু নিল সুলতান। রানাও উঠছে, কিন্তু মইয়ের রেইল মুঠোর ভেতর ধরতেই অকস্মাৎ ব্যথা পেয়ে চোঁচিয়ে উঠল। ওর বাঁ হাত কজির ঠিক ওপরে ভেঙে গেছে, রক্ত ঝরছে সেখান থেকে।

কনিং টাওয়ারের বিজে উঠে এসে দ্রুত একবার চারদিকে চোঁখ বুলাল রানা। ভেলার এক কৌণ দেখা যাচ্ছে, ধীর গতিতে এগিয়ে আসছে ডকের শেষ প্রান্তে। আরেক প্রান্তে ওদের জালা আগুনটা দাউ দাউ করে জ্বলছে। কনিং টাওয়ারের হ্যাচ দিয়ে নিচে নামল রানা, ঢাকনিটা বন্ধ করে দিল ভেতর থেকে।

নিচে নেমে কন্ট্রোল রুমে চলে এল রানা, আহুদ এখানে সুলতানের ডান হাতে ব্যাভেজ বেঁধে দিচ্ছে। ছুটল রানা, পিছন দিকের স্টোর-রুম বান্ধহেউের সামনে চলে এল। টেনে সেটাকে পিছিয়ে আনল ও। বন্দী ইসরায়েলিরা প্যাকিং কেসের ওপর বসে আছে। ওর হাতে রিভলবার, ধমক দিয়ে সবাইকে এঞ্জিন রুমে ঢোকাল, তারপর বাইরে থেকে বন্ধ করে দিল হ্যাচটা। ওখান থেকে স্টোর-রুমে চলে এল। মই বেয়ে হ্যাচের দিকে উঠছে, ওর মাথার ওপর ডেক থেকে সন্তর্পণে হাঁটাহাঁটির অম্পষ্ট আওয়াজ শুনতে পেল। সাবমেরিনের ওপর পৌঁছে গেছে ইসরায়েলিরা। হ্যাচটা নাগালের মধ্যে আসতেই ভেতর থেকে আটকাবার ব্যবস্থা করল ও। আর একটা হ্যাচ ভেতর থেকে আটকানো বাকি আছে, যে হ্যাচ দিয়ে অ্যামুনিশন নিচে নামানো হয়েছিল। সাবমেরিনের সামনের দিকে হেঁটে এসে সেটাও আটকাল রানা। ফেরার সময় আচ্ছন্ন বোধ করল ও, পিছনে রক্তের একটা ধারা ফেলে আসছে।

কন্ট্রোল রুমে ফিরে এসে দেখল জ্যাকেটটা আবার পরছে সুলতান। 'এখন ভাল তো?' জিজ্ঞেস করল ও।

'স্যার! আপনার হাত।' ওর দিকে তাকিয়েই আঁতকে উঠল আহুদ।

'হ্যাঁ, কজির ওপরটা ভেঙে গেছে,' বলল রানা। 'দেখো কিছু করতে পারো কিনা।'

রানার ইউনিফর্মের আঙ্গিন গুটিয়ে ওপরে তুলল আহুদ, নিজের শার্ট ছিঁড়ে কনুইয়ের ওপরটা শক্ত করে বেঁধে দিল। 'একটা স্প্লিন্টও দরকার,' বলে একটা চার্ট রুলার ভেঙে অর্ধেক করল। পরবর্তী পাঁচটা মিনিট খুব ভুগতে হলো রানাকে। বুলেটটা হাড়গুলোকে নিজস্ব জায়গা থেকে সরিয়ে দিয়ে গেছে, সেগুলো আবার জোড়াতালি দিয়ে জায়গামত বসাতে হচ্ছে আহুদকে। 'স্যার, আপনার ভাগ্য ভাল যে আপনি মাইনারদের সঙ্গে আছেন,' কজির ওপর রুলারটা বসিয়ে আরেকটা ব্যাভেজ বেঁধে দিল সে। 'সবাই ভাঙা হাড় জায়গা মত বসাতে পারে না।'

কৃতজ্ঞচিত্তে ধন্যবাদ জানাল রানা। পা দুটো টলমল করছে দেখে চার্ট টেবিলে বসে পড়ল।

‘এখন কি হবে, স্যার?’ জানতে চাইল আহুদ।

‘অপেক্ষা করব। অপেক্ষা করব আর প্রার্থনা করব—লাইমস্টোনে আগুনটা ভালভাবে ধরার আগে কেউ যাতে সাবমেরিনের ভেতর ঢুকতে না পারে।’

বেশ কিছুক্ষণ কেটে গেল। মাথার ওপর থেকে হাঁটাহাঁটির আওয়াজ ভেসে আসছে। ইসরায়েলিরা যে হতভম্ব হয়ে পড়েছে তাতে কোন সন্দেহ নেই। কি ভাবছে তারা? একবার দেখেছে ডক দখলে রাখার জন্যে প্রাণপণ চেষ্টা করেছে ওরা, তারপর দেখেছে হঠাৎ বড় একটা আগুন জ্বালিয়ে সাবমেরিনের ভেতর লুকিয়ে পড়েছে। কল্পনার চোখে রানা দেখতে পেল, পাঁচ নম্বর ডক আর সাবমেরিনের মাঝখান বারবার আসা-যাওয়া করছে ভেলাটা, প্রতিবার নতুন নতুন লোক বয়ে আনছে। আগুনটাকে নিয়ে কি করবে তারা? নেভাবার চেষ্টা করবে? ওদের ডকে যদি ফায়ার-ফাইটিং ইকুইপমেন্ট নিয়ে আসতেও পারে, এখন আর ওই আগুন নিভিয়ে ফেলা সম্ভব বলে মনে হয় না।

সাবমেরিন অসম্ভব গরম হয়ে উঠছে। ওদের জ্বালানো আগুনই দায়ী। রানা কল্পনা করল, সাবমেরিনের বো প্লেট আগুনের তীব্র আঁচে লালচে হয়ে উঠছে। ওরা যদি সাবমেরিনের ভেতর বেশিক্ষণ থাকতে বাধ্য হয়, এটাই হয়ে উঠবে মৃত্যু-ফাঁদ—জ্বলন্ত একটা তন্দুর।

অক্সিজেন সাপ্লাইয়ের কি ব্যবস্থা আছে সাবমেরিনে, দেখার জন্যে রানার পিছু নিয়ে কন্ট্রোল রুম থেকে বেরিয়ে এল ওরা। মাথার ওপর ইসরায়েলিরা ছুটোছুটি করছে। সাবমেরিনের ভেতর বাতাস উত্তপ্ত হয়ে উঠছে। ডেক থেকে আসা সমস্ত শব্দ ভেঁতা আর ফাঁপা শোনাচ্ছে ওদের কানে। গুমোট ভাবটা এত দ্রুত বাড়ছে কেন? ভেতরের সব অক্সিজেন এরই মধ্যে তো খরচ হয়ে যাবার কথা নয়। রানা ধরে নিল আগুন ধরা লাইমস্টোন কার্বন ডাইঅক্সাইড ছাড়ছে বাতাসে, সেই বাতাস ফাঁক-ফোকর দিয়ে ভেতরে ঢুকছে। হ্যাচগুলো পুরোপুরি এয়ারটাইট হয়ে ওঠে শুধু যখন বাইরে থেকে পানির চাপ লাগে।

আহুদকে অক্সিজেন সাপ্লাইয়ের সুইচ অন করতে বলে গ্যাংওয়ে ধরে ম্যাগাজিন রুমে চলে এল রানা। মোট পাঁচটা অক্সিজেন মাস্ক বাছাই করল ও, সিলিন্ডারগুলো পরীক্ষা করে দেখে নিল অক্সিজেন আছে কিনা। আহুদ আর সুলতানের কাছে ফিরে এল ও, এসেই শুনতে পেল কনিং টাওয়ারের দিকে হিসহিস একটা আওয়াজ হচ্ছে। কন্ট্রোল রুমে চলে এল ওরা। এখানে আওয়াজটা আরও জোরাল; আসছে হ্যাচ থেকে। ‘আওয়াজ শুনে মনে হচ্ছে—’ চিন্তিত দেখাল আহুদকে, ‘—অক্সি-অ্যাসেটিলিন কাটার।’

‘ঠিক ধরেছ,’ বলল রানা। ‘আগন্তুকদের কচুকাটা করার জন্যে তৈরি থাকো।’

কনিং টাওয়ারের হ্যাচের দিকে তাকিয়ে আছে ওরা, ধাতব ঢাকনি এক জায়গায় লালচে হয়ে উঠতে দেখল। আধো অন্ধকারে প্রথমে জ্বলন্ত

সিগারেটের মত লাগল দেখতে, তারপর ধীরে ধীরে চওড়া আর সাদাটে হয়ে উঠছে। কিছুক্ষণ পরই তরল লোহা ওদের পায়ের সামনে ঝরে পড়তে শুরু করল, তারপর দেখা গেল কাটারের শিখা।

কাটার আর কার্বনডাই অক্সাইডের মধ্যে জোর প্রতিযোগিতা শুরু হয়েছে। রানার মাথায় নানা প্রশ্ন। আঙুনটা কি নিভিয়ে ফেলা হয়েছে? না, নিভিয়ে ফেলা হলে সাবমেরিন এত গরম হয়ে উঠত না।

হ্যাচের বড় একটা অংশ লালচে হয়ে উঠেছে। সাদাটে রেখাটা একটা বৃত্ত তৈরি করছে। কাটারের শব্দ এখন খুব বেশি। কাটার থেকে বেরিয়ে আসা শিখাটা যেন সম্মোহিত করে ফেলেছে রানাকে, চোখ ফেরাতে পারছে না।

‘কি করব আমরা? লড়ব, নাকি সারেভার করব?’ জানতে চাইল সুলতান।

‘রানা মাথা ঠাণ্ডা রেখে চিন্তা করতে পারছে না। ওর কি কোথাও ভুল হয়েছে? লাইমস্টোন থেকে কার্বন ডাইঅক্সাইড বেরুচ্ছে না? তারপর হঠাৎ দেখল কাটারের শিখা নড়ছে না। ‘কাটার নড়ছে না!’ ফিসফিস করল ও। মুখ তুলে তাকিয়ে থাকল সবাই। কাটার যেখানে হ্যাচ কাটছিল, ওখানের সাদাটে ভাবটুকু ধীরে ধীরে মিলিয়ে যাচ্ছে। হ্যাচের অনেকটা জায়গা লালচে হয়ে উঠেছিল, তা-ও আবার কালো হতে শুরু করেছে। ধীরে ধীরে অক্সিজেন-অ্যাসেটিলিন র্লোয়ার থেমে গেল।

‘আল্লাকে ধন্যবাদ!’ হাঁফ ছাড়ল রানা। ‘শোনো!’ কোথাও এতটুকু শব্দ নেই। সাবমেরিনের এক প্রান্ত থেকে আরেক প্রান্ত পর্যন্ত হেঁটে এল ও। ওপরের ডেক থেকে কোন আওয়াজ আসছে না। কন্ট্রোল রুমে ফিরে এসে আহুদকে বলল, ‘তুমি আর আমি বাইরে বেরুব, শারমিন আর হাদীকে নিয়ে আসতে হবে।’

অক্সিজেন মাস্ক পরে নিল ওরা। হাতে দস্তানা পরে হ্যাচটা খুলল আহুদ। সঙ্গে এক জোড়া অতিরিক্ত অক্সিজেন মাস্ক নিয়েছে রানা। মই বেয়ে কনিং টাওয়ারের মাথায় উঠে এল ওরা। আঙুনটা এখনও গর্জন করছে, ডকের পাথুরে দেয়াল চাটছে টকটকে লাল শিখাগুলো। হ্যাচের ঢাকনি তাড়াতাড়ি বন্ধ করে দিল ওরা, তা না হলে ভেতরের বাতাস বিসাক্ত হয়ে উঠবে। ঢাকনি বন্ধ করার সময় অ্যাসেটিলিন কাটারের শরীরটা চিৎ হয়ে গেল। দৃশ্যটা বীভৎস। র্লোয়ার থেকে বেরিয়ে আসা শিখায় মুখ খুবড়ে পড়েছিল লোকটা, মুখটা এমন পুড়ে গেছে যে চেনার কোন উপায় নেই।

অবিশ্বাস্য দৃশ্য দেখা গেল সাবমেরিনের ডেকে। কম করেও বিশজন ইসরায়েলি অচেতন হয়ে পড়ে আছে। সবাই জ্ঞান হারিয়েছে, নাকি কেউ কেউ মারাও গেছে? পরীক্ষা করার সময় নেই, ছুটে সাবমেরিনের পিছন দিকে চলে এল ওরা। এদিকে দুটো কলাপসিবল রাবার বোট বাঁধা রয়েছে। তার একটায় একজন ইসরায়েলি বৈঠা হাতে বসে আছে। অসুস্থ সে, তবে পুরোপুরি অচেতন নয়। তবে দ্বিতীয় বোটটায় ওরা যখন উঠছে, লোকটা কাত হয়ে পড়ে গেল।

বোটের রশি খুলল রানা, আহদের হাতে বৈঠা। পাঁচ নম্বর ডকে চলে এল ওরা। এদিকের দৃশ্য আরও বিস্ময়কর। গোটা ডকে ইসরায়েলি নাবিকরা ছড়িয়ে আছে। আহদ বৈঠা চালাচ্ছে ঠিকই, তবে হতবিস্বল ও আতঙ্কিত দেখাচ্ছে তাকে।

পাঁচ নম্বর ডকের ফ্লাড গেটে বোট ভিড়াল ওরা। ডকসাইটে নামল আহদ। রানা বোটে বসে থাকল। কিছুক্ষণ পরই আহদকে ফিরতে দেখা গেল, অচেতন হাদীকে টেনে নিয়ে আসছে। ভারী শরীরটা বোটে তুলতে তাকে সাহায্য করল রানা।

শারমিনকে আনা হলো কাঁধে তুলে। তিন মিনিটও পার হয়নি, চার নম্বর ডকে ফিরে আসছে ওরা। আহদ বৈঠা চালাচ্ছে, রানা অক্সিজেন মাস্ক পরাল শারমিন আর হাদীকে। তারপর এক হাতে ওদের বাঁধনগুলো খুলে দিল। নাকের সামনে নির্ভেজাল অক্সিজেন পেয়েই জ্ঞান ফিরে পেতে শুরু করল হাদী। পুরোপুরি জ্ঞান ফিরে পেয়ে প্রথমই সে মুখ থেকে অক্সিজেন মাস্কটা খুলে ফেলতে চেষ্টা করল। বাধ্য হয়ে পা দিয়ে তার হাত চেপে ধরতে হলো রানাকে।

ওদের নিজেদের ডকে ভিড়ল বোট। ইতিমধ্যে বোটের মেঝেতে উঠে বসেছে হাদী, একার চেষ্টাতেই সাবমেরিনে উঠতে পারবে। জ্ঞান ফিরে পেয়ে শারমিনও নড়াচড়া করছে। তাকে অবশ্য কাঁধে করেই সাবমেরিনের ডকে তুলতে হলো।

সাবমেরিনের ভেতরে নেমে নিজের অক্সিজেন মাস্ক খুলে বাকি সবাইকেও খুলে ফেলতে বলল রানা। কনিং টাওয়ারের হ্যাচে যে বৃত্তাকার সরু ফাঁক তৈরি হয়েছে, সুলতান সেটা টেপ দিয়ে বন্ধ করে দিল। তবে সাবমেরিনের ভেতর এত গরম যে এখানে বেশিক্ষণ থাকা যাবে না। সুলতান কোথেকে একটা ব্যান্ডির বোতলও যোগাড় করে আনল।

এক ঢোক ব্যান্ডি খাওয়ার পর আচ্ছন্ন ভাবটা কাটিয়ে উঠল শারমিন, জানতে চাইল, 'আমি কোথায়?' রানা সব কথা সংক্ষেপে ব্যাখ্যা করতে অনিশ্চিত ভঙ্গিতে হাসল সে, তারপর বলল, 'এখান থেকে কোনদিন যদি বেরুতে পারি, সবাইকে তাহলে বলতে পারব মাসুদ রানা স্বয়ং আমাকে বাঁচিয়েছেন।'

'কিন্তু উল্টোটাই বরং বেশি সত্যি,' বলল রানা। 'তোমরা খনিতে না ঢুকলে আমরা জানতেই পারতাম না যে ঘাঁটি থেকে বেরুবার আরও একটা পথ আছে।'

হাদী হঠাৎ জিজ্ঞেস করল, 'সাজিদ কোথায়?'

'সে মারা গেছে,' বলল রানা।

অনেকক্ষণ কেউ কোন কথা বলল না।

ইতিমধ্যে সবাই প্রায় পুরোপুরি সুস্থ হয়ে উঠেছে, কাজেই রানা বলল, 'এবার ঘাঁটির পিছন দিক দিয়ে কেটে পড়ার আয়োজন করতে হয়।' সবাই আবার অক্সিজেন মাস্ক পরে নিল। প্রত্যেককে একটা করে স্পেয়ার নিতে

বলল রানা। সাবমেরিনের একটা অক্সিজেন সিলিভারও সঙ্গে রাখা হলো, যদি কাজে লাগে। রানার নির্দেশে এঞ্জিন-রুমের দিকে চলে গেল সুলতান, হ্যাচের বোল্ট খুলে রেখে আসবে সে, ঢাকনির ওপর শুধু একটা প্যাকিং ক্রেস চাপাবে। ওখানে যাদেরকে আটকে রাখা হয়েছে, রানা চায় না গরমে মারা পড়ুক তারা।

পাঁচ নম্বর ডকে বোট ভিড়িয়ে ডকসাইটে নামল ওরা। ভৌতিক পরিবেশ, গা ছম ছম করে উঠল। চারদিকে মানুষ পড়ে আছে, একজনও নড়ছে না। কয়েকজনকে পরীক্ষা করল রানা, একজনও মারা যায়নি। ডকের শেষ প্রান্তে একটা মোবাইল ড্রিল পাওয়া গেল, গ্যালারির পাথর ধস সরিয়ে ওদের ডকে ঢোকার কাজে ব্যবহার করা হয়েছিল। আরও এক জোড়া অক্সিজেন সিলিভার, কয়েকটা শাবল আর কৌদাল পাওয়া গেল। ড্রিলের ওপর তোলা হলো সব। ছয় আর সাত নম্বর ডককে পাশ কাটিয়ে অপার গ্যালারিতে চলে এল ওরা। রাস্প আর গ্যালারি দুটোয় অচেতন লোকের সংখ্যা এত বেশি, এগোবার পথ নেই। কোথাও কোথাও স্তূপ হয়ে আছে মানুষ, সরিয়ে পথ করে নিতে হলো।

অবশেষে গার্ড-রুম আর সেলগুলোর কাছে পৌঁছল ওরা। হাদী আর সুলতান সামনে থাকল, রাইফেল বাগিয়ে ধরে দরজা খুলল তারা। কিন্তু ভেতরে কেউ নেই, গার্ড-রুম খালি। সুলতান সরাসরি এগোল, থামল রাইফেল র্যাকের সামনে। র্যাকটা ধরে ঠেলতেই সিমেন্ট করা পাঁচিলের পুরো একটা অংশ সরে গেল একপাশে, নিচে রোলার লাগানো আছে। দেয়াল না থাকায় সামনে দেখা যাচ্ছে কালো একটা গহ্বর।

ইতস্তত করছে ওরা, পরস্পরের দিকে অনিশ্চিত ভঙ্গিতে তাকাচ্ছে। ওরা কি প্রাণের ঝুঁকি নিয়ে খনির ভেতর ঢুকবে? এ-কথা জানা সত্ত্বেও যে শারমিন আর মাইনাররা ধরা পড়ার পর ইসরায়েলিরা খনির কয়েকটা টানেল বিস্ফোরণের সাহায্যে ধসিয়ে দিয়েছে? খনির ভেতর ঢুকলেই শুধু হবে না, ঢোকার পর বিস্ফোরণ ঘটিয়ে গার্ড-রুম ধসিয়ে দিতে হবে, তা না হলে জ্ঞান ফিরে পাবার পর পিছু নেবে ইসরায়েলিরা।

‘আমি শুনেছি সাগরের দিকে এক ধরনের লুকআউট আছে...’, মাস্কের ভেতর থেকে ভোঁতা শোনা শারমিনের গলা।

‘তা আছে,’ বলল রানা, ‘কিন্তু সেটা পেরিস্কোপ টাইপের একটা ব্যাপার—পাথর থেকে বেরিয়ে আছে স্নেফ একটা পাইপ। ওদিক থেকে সাগরে বেরুবার কোন উপায় নেই।’

‘ভেন্টিলেশন?’

মাথা নাড়ল রানা। ‘তুমি কি বলো, হাদী?’

‘খনিই একমাত্র পথ,’ জবাব দিল হাদী।

‘আমিও তাই বলি,’ সায় দিল রানা। ‘প্রথমে খাবার আর পানি দরকার। আর দরজাটা সব সময় বন্ধ রাখো, খনির বাতাস দূষিত হতে দেয়া যাবে না।’

রোলার লাগানো দেয়াল ফিরিয়ে আনা হলো আগের জায়গায়। আহুদ আর সুলতান এখানে পাহারায় থাকল। শারমিন আর হাদীকে নিয়ে খাবার

আর পানি আনতে বেকল রানা। কাছাকাছি কিচেনে দু'জন কুককে পড়ে থাকতে দেখা গেল। একজন টেবিল থেকে অর্ধেক ঝুলছে, আরেকজন মুখ খুঁড়ে পড়ে আছে স্টোভের ওপর। তেল শেষ হয়ে যাওয়ায় স্টোভটা নিভে গেছে, তবে লোকটার মুখ পোড়াবার পর। বড় একটা প্যাকিং কেসে পাঁচজনের এক গুঁটা চলার মত খাবার আর পানির বোতল ভরল ওরা, কেসটা টেনে এনে গার্ড-রুমের সামনে ড্রিল ট্রলিতে তুলল। সবাইকে টর্চ, গ্রেনেড, অটোমেটিক রাইফেল ও স্পেশাল ম্যাগাজিন নিতে বলল রানা। প্রস্তুতি নেয়া শেষ হতে খনিতে ঢুকল সবাই।

ভেজা স্যাঁতসেতে টানেলটা অন্ধকার, ভেতরে পা রাখতেই গা ছম-ছম করে উঠল। রানার মনে হলো নিজেদের কবরে পা রাখল, কারণ জানে পাথর ধস পেরিয়ে খনি থেকে বেরুনো প্রায় অসম্ভবই। ওদের পিছনে গার্ড-রুমের রোলার লাগানো দেয়াল জায়গা মত বসিয়েই অক্সিজেন মাস্ক খুলে ফেলল ওরা। খনির ভেতরটা গরম ও গুমোট। টর্চের আলোয় পথ দেখে গ্যালারি ধরে এগোল ওরা, উঁচু-নিচু মেঝেতে ঝাঁকি খাচ্ছে ড্রিল ট্রিলি। মাত্র দুশো গজ এগোবার পরই প্রথম পাথর ধসের সামনে পড়ল ওরা। এই ধসের পাথর সরিয়েই ভেতরে ঢুকেছিল শারমিন আর তার সঙ্গীরা। হাত তুলে কিছু একটা দেখাল সে। এক প্রস্থ তার, বড় আকৃতির পাথরের একটা স্তূপের দিকে চলে গেছে। বোঝাই যায়, এই তারে টান পড়াতেই ঘাঁটির ভেতর ইমার্জেন্সী অ্যালার্ম বেজে উঠেছিল। পাথর ধসের ভেতর যে ফাঁকটা ওরা তৈরি করেছিল সেটা এত ছোট যে ট্রিলিটাকে ঢোকানো সম্ভব নয়। ফাঁকটাকে চওড়া করা হবে কিনা, এই নিয়ে তর্ক করল ওরা। রানা বলল, পাথর সরাতে হলে সময় নষ্ট হবে, তারচেয়ে ড্রিলটাকে ছেড়ে যাওয়াই ভাল। পরে দরকার হলে ফিরে এসে নিয়ে যাওয়া যাবে। ট্রিলিতে যে-সব জিনিস-পত্র তোলা হয়েছিল, সব নামিয়ে সরু ফাঁক দিয়ে পার করা হলো। কাজটা শেষ হবার পর রানা দেখল ওর হাতের ক্ষতটা থেকে নতুন করে রক্ত বেরুচ্ছে।

পাথর ধসের ওপারে সবাই পৌঁছানোর পর আহদকে রানা জিজ্ঞেস করল, 'গার্ড-রুমটা উড়িয়ে দিয়ে টানেলের মুখ বন্ধ করা দরকার। তুমি যাবে, নাকি আমি? কয়েকটা গ্রেনেড ছুঁড়লেই কাজ হবে।'

'আমিই যাব,' বলল সুলতান।

'কিন্তু সাবধান, গ্রেনেড ছুঁড়েই নিরাপদ দূরত্বে সরে আসতে হবে। আর রোলার লাগানো দেয়ালটা যতটা সম্ভব কম খুলবে। গার্ডরুমে যতক্ষণ থাকবে, দম আটকে রেখো।'

পাথর ধসের সরু ফাঁক গলে অদৃশ্য হয়ে গেল সুলতান। ধীরে ধীরে দূরে মিলিয়ে গেল তার পায়ের আওয়াজ। তারপর অস্পষ্টভাবে রোলার সচল হবার শব্দ ভেসে এল। খানিক পর সুলতানের ছুটন্ত পায়ের আওয়াজ ঢুকল কানে। ফিরে আসছে সে। পেশী শক্ত করল ওরা, বিস্ফোরণ ঘটবে।

তাওয়াজটা এল কয়েক সেকেন্ড পর। গোটা গ্যালারি, আশপাশে

সবগুলো দেয়াল খরখর করে কেঁপে উঠল। বিস্ফোরণ একটা নয়, প্রায় একই সঙ্গে কয়েকটা ঘটেছে। বিস্ফোরণের গর্জন আর বিরতিহীন পাথর খসে পড়ার বিকট আওয়াজ খনির ভেতর প্রতিধ্বনি তুলছে। গ্যালারির ছাদ থেকেও পাথর খসে পড়ছে ওদের চারপাশে। ওদের সামনে পাথরের স্তূপটা মোচড় খাচ্ছে।

ধীরে ধীরে নিস্তব্ধতা নেমে এল। কান পেতে আছে ওরা। কোন শব্দ নেই। ওরা ডাকল, কিন্তু সুলতান সাড়া দিচ্ছে না। 'আমি ওকে ফিরিয়ে আনতে যাচ্ছি,' বলল হাদী।

'না, আমি যাব,' বলল রানা। সুলতান যদি মারা গিয়ে থাকে, সেজন্যে ও-ই দায়ী হবে।

কিন্তু রানার আগে হাদী রওনা হয়ে গেল। সরু ফাঁকটা আরও সরু হয়ে গেছে, সেগুলো সরিয়ে পথ করে নিতে হচ্ছে তাকে। আবার ওরা অপেক্ষা করছে।

দুই কি তিন মিনিট পার হলো। হাদীর ফিরে আসার আওয়াজ পেল ওরা। 'সব ঠিক আছে,' পাথর ধসের ওপার থেকে বলল সে। 'সুলতানের মাথায় ছোট একটা পাথর লেগেছে।'

পরম স্বস্তিবোধ করল রানা। একটু পর সুলতানকেও দেখা গেল সরু ফাঁকের ভেতর। কপালের এক পাশে, ওপর দিকে, খুলি ফেটে গেছে, রক্ত ঝরছে সেখান থেকে। 'বিস্ফোরণের ধাক্কায় ছিটকে পড়ি আমি,' বলল সে। 'কোথেকে ছুটে এসে একটা পাথর লাগল মাথায়।'

'আরও একটু এগিয়ে সুলতানের কাজটা দেখে এসেছি আমি,' বলল হাদী। 'গার্ড-রুম বলে কিছু নেই। টানেলটাও পুরোপুরি বন্ধ হয়ে গেছে।'

রানার মনে হলো, নিজেদের নৌকা পুড়িয়ে দিয়েছে ওরা। সম্ভবত সবারই এই একই অনুভূতি হলো। এখন আর পিছু হটার কোন পথ নেই। সামনে যত বড় পাথর ধসই থাক, সেটাকে ওদের পেরুতে হবে।

ভাগাভাগি করে যে যতটা পারে বহন করছে বোঝাগুলো, গ্যালারি ধরে এগোচ্ছে ওরা। মেঝেটা ক্রমশ ওপর দিকে উঠছে, সেই সঙ্গে ঘুরে যাচ্ছে বাঁ দিকে। এদিক-সেদিক পুরানো ও ভাঙা রেললাইনের চিহ্ন দেখা গেল। গ্যালারি হঠাৎ চওড়া হতে শুরু করল। মেইন গ্যালারি তিনটে শাখার একটা থেকে বেরিয়ে এল ওরা। সামনে রয়েছে হাদী, ঘাড় ফিরিয়ে আহদের দিকে তাকাল। 'মেইন গ্যালারি,' বলল সে। 'বাকি শাখাগুলো পাথর ধসিয়ে অনেক আগেই বন্ধ করে দেয়া হয়েছে। পাথর সরিয়ে পথ যদি করাও যায়, দেখা যাবে সাবমেরিনগুলোর কাছে ফিরে গেছি।'

মেইন গ্যালারি ধরে এগোচ্ছে ওরা। কিন্তু একশো গজও এগোয়নি, দেখা গেল পাথরের স্তূপ পথরোধ করে খাড়া হয়ে আছে। 'ডিনামাইট ফাটিয়ে কাল এই ধস নামানো হয়েছে,' বলল আহদ।

'এখন কি হবে?' ফিসফিস করল শারমিন।

'আগে জানতে হবে স্তূপটা কতটুকু গভীর,' বলল সুলতান।

বোঝা নামিয়ে রেখে তখনি কাজ শুরু করল ওরা। শারমিন জেদ ধরল

রানা আর সুলতানকে বিশ্রাম নিতে হবে। কিন্তু সময়ের মূল্য সম্পর্কে অত্যন্ত সচেতন রানা, এক হাতে যতটুকু পারা যায় সাহায্য করছে ওদেরকে। সুলতানও বসে থাকল না।

পাথরের তলায় শাবল ঢুকিয়ে চাড় দিল আহুদ, বাকি সবাই খালি হাতে আলগা পাথর সরাচ্ছে। কাজটা যখন ওরা শুরু করল তখন চারটে বাজে। কিন্তু তারপর ওদের কাছে সময়ের আর কোন তাৎপর্য থাকল না। ধুলো, পাথর তোলার কষ্ট, হাঁপানোর আওয়াজ, চুল থেকে পিঠ বেয়ে নেমে আসা ঘামের সুড়সুড়ি, ছোটখাট আঘাত পেয়ে ব্যথায় গুঙিয়ে ওঠা ইত্যাদির মধ্যে সময় সম্পর্কে কারুরই কোন খেয়াল থাকল না।

সময় অবশ্য বয়েই চলেছে। ঘড়ির কাঁটাতে এক সময় রাত হলো। যে যেখানে কাজ করছিল সেখানেই নেতিয়ে পড়ল, নড়াচড়ার শক্তিও যেন অবশিষ্ট নেই। আধ ঘণ্টা বিশ্রাম নেয়ার পর বিড়বিড় করল শারমিন, ‘মাসুদ ভাই, আপনারা কিছু খাবেন না?’

সামান্য কিছু মুখে দিয়ে আবার শুরু হলো পাথর সরিয়ে পথ বের করার অমানুষিক পরিশ্রম। তবে সবাই একসঙ্গে নয়, পালা করে কাজ করার নির্দেশ দিল রানা।

তারপর রাত গভীর হলো। বেশ খানিকটা পথ তৈরি করেছে ওরা, কিন্তু এই ধস কোথায় গিয়ে শেষ হয়েছে সে-সম্পর্কে কারও কোন ধারণা নেই। রাত বারোটার পর দ্বিতীয় পালায় কাজ করতে এসে জ্ঞান হারাবার অবস্থা হলো রানার। শুধু পরিশ্রমে নয়, রক্তক্ষরণে দুর্বল হয়ে পড়েছে ও। তবে কোন অভিযোগ করছে না বা কাউকে কিছু বুঝতে দিচ্ছে না।

রাত তখন কত কেউ বলতে পারবে না। কারও খেয়ালই নেই জিজ্ঞেস করে ক’টা বাজে। দশ-বারো সের ওজনের একটা পাথর তুলে সরাতে যাবে রানা, হুমড়ি খেয়ে পড়ে গেল। কেউ দেখে ফেলার আগেই সিঁধে হয়ে বসল ও, তারপর দাঁড়াবার চেষ্টা করল। মাথাটা ঘুরছে।

আহুদের গলা পেল ও, ‘এভাবে সম্ভব নয়।’

কাজ না থামিয়ে জবাব দিল হাদী। ‘এভাবেই সম্ভব। আর যদি সম্ভব নয় বলে মনে করো, চূপচাপ বসে থাকি এসো, মৃত্যুর জন্যে অপেক্ষা করি।’

‘কতটা এগোলাম?’ ক্রান্ত, বিরস গলায় জানতে চাইল শারমিন। ‘আর কত পাথর সরাতে হবে?’

‘জানি না,’ জবাব দিল সুলতান।

‘চূপ! চূপ!’ হঠাৎ সবাইকে চূপ করতে বলল হাদী। ‘ওই শোনো!’

কান পাঁতল রানা। কিন্তু কানের ড্রামে রক্ত ছলকানোর আওয়াজ ছাড়া কিছুই শুনতে পেল না। তারপর মনে হলো, ও স্বপ্ন দেখছে। সেই স্বপ্নে নাচানাচি করছে ওরা—শারমিন, হাদী, আহুদ আর সুলতান। তারপর, রানাকে হতভম্ব করে দিয়ে, সবাই ওরা আবার পাথর সরাতে শুরু করল। দেখাদেখি রানাও হাত লাগাল কাজে। আরও কিছুক্ষণ কাটল। তারপর পাথর ধসের ওপার থেকে অস্পষ্ট একটা আওয়াজ ঢুকল ওর কানে।

‘মাসুদ ভাই,’ হঠাৎ রানাকে পিছন থেকে দু’হাতে জড়িয়ে ধরল শারমিন। ‘আপনি তো নিজেকে মেরে ফেলছেন!’ টেনে এক পাশে সরিয়ে আনল ওকে। ‘যথেষ্ট হয়েছে, আর দরকার নেই। শুনতে পাচ্ছেন না, ওরা আমাদেরকে উদ্ধার করতে আসছে?’

‘ওরা?’ শারমিন শক্ত করে ধরে থাকা সত্ত্বেও মাতালের মত টলছে রানা। ‘আমি সোহেল ভাইয়ের গলা পেয়েছি,’ বলল শারমিন। ‘উনি বললেন, ওনার সঙ্গে লেবানীজ আর্মি রয়েছে। ড্রিল আনতে পাঠানো হয়েছে, সমস্ত পাথর সরাতে আধ ঘণ্টার বেশি লাগবে না।’

হাসতে চেষ্টা করল রানা, কিন্তু হাসিটা ঠোটে ফোটান আগেই জ্ঞান হারিয়ে শারমিনের গায়ে ঢলে পড়ল।

লেবানীজ আর্মির দুটো কোম্পানীর সঙ্গে কাফায় পৌঁছায় সোহেল আহমেদ সন্ধের দিকে। মধ্যপ্রাচ্যে যুদ্ধ শুরু হবার আশঙ্কায় রানার মত তাকেও পরিস্থিতি বোঝার জন্যে লেবাননে পাঠানো হয়েছিল। রানা ও শারমিন নিখোজ হবার পর বৈরুত থেকে সোজা তাকরির উপকূলের মুয়াক্কা খাঁড়িতে চলে আসে সে। ক্যাস্টগার্ড শমসের লিবান তখনও হাসপাতালে, তবে সে তার ভাষা ফিরে পেয়েছে। স্থানীয় পুলিশ স্টেশনের ইসপেক্টর কায়সুল কারাম আর সংবাদদাতা জাকির হোসেনকে সঙ্গে নিয়ে তার সঙ্গে দেখা করে সোহেল। সে-ই প্রথম তার সন্দেহের কথা জানায়, তাকে সমর্থন করে ইসপেক্টর ও সংবাদদাতা—জেরোম টিন মাইন আসলে পরিত্যক্ত নয়, ভেতরে লোকজন আছে। শুধু তাই নয়, তাদের সবারই সন্দেহ, এই টিন মাইনের সঙ্গে ইসরায়েলি সাবমেরিনের কোন না কোন সম্পর্ক আছে।

এ-সব জানার পর লেবানীজ আর্মির সাহায্য চেয়ে বৈরুতে মেসেজ পাঠায় সোহেল। বৈরুত থেকে খবর আসে, সন্ধ্যা-রাতে দুই কোম্পানী সৈন্য নিয়ে মেজর তাহির কাফায় আসছেন। মাঝপথে কনভয়ের সঙ্গে যোগ দেয় সোহেল।

মাইনে ঢোকার সম্ভাব্য পথ তিনটে। মেজর তাহির প্রতিটি প্রবেশমুখে সশস্ত্র গার্ড বসালেন। আরেকটা দলকে পাঠানো হলো মাইনের ওপর পাহাড়-প্রাচীরে। প্রতিটি দলে একজন করে স্থানীয় মাইনার থাকল।

‘বি’ কোম্পানীর সঙ্গে থাকল সোহেল, তাদের সঙ্গে একটা শ্যাফট হয়ে খনিতে ঢুকল। তার আগে ওই শ্যাফটের পাঁচিল ভাঙা হলো ত্রিশজন শ্রমিককে দিয়ে। ভেতরে ঢোকার পর কয়েকটা জলপ্রপাত পেরুতে হলো ওদেরকে। তারপর গ্যালারি হয়ে একাধিক টানেলে ঢুকল, কিন্তু দেখতে পেল পাথর ধসে সবগুলোই বন্ধ হয়ে আছে। অবশেষে এমন একটা টানেল পাওয়া গেল, যেটার শেষ মাথার পাথর ধস পরিষ্কার করা হয়েছে, ফলে তৈরি হয়েছে সরু একটা ফাঁক। সোহেল ধরে নিল, শারমিন মাইনার তিনজনকে নিয়ে এই পথেই এগিয়েছে। লেবানীজ মেজর সৈনিকদের নিয়ে ওই টানেল ধরে এগোলেন। টানেলের পর আরেকটা গ্যালারি পেল ওরা। এখানেও বড় একটা

পাথর ধস সামনে এগোবার পথ বন্ধ করে রেখেছে।

পাথর সরানোর জন্যে ড্রিল আনতে পাঠানো হলো, তবে ড্রিলের জন্যে অপেক্ষায় না থেকে হাত দিয়ে পাথর সরানোর কাজ শুরু করল সৈনিকরা। ড্রিল এসে পৌঁছানোর পর কাজটা অনেক সহজ হয়ে গেল। পাথর ধসের ওপারে শারমিন আর মাইনারদের খুঁজে পেল ওরা। মাইনারদের একজন, সাজিদ, মারা গেছে। ওদের সঙ্গে রানা ও আল হাদী নামে একজন স্থানীয় জেলেও আছে।

রানাকে অজ্ঞান অবস্থায় পায় সোহেল। জ্ঞান ফেরার পর ওর কাছ থেকে রিপোর্ট পেল সে। খনির শেষ মাথায়, সাগরের নিচে, পুরোদস্তুর একটা ইসরায়েলি সারমেরিন ঘাঁটি আছে, আছে ছয় থেকে সাতশো লোকের থাকা-খাওয়ার বন্দোবস্ত। লাইমস্টোনে আঙুন ধরিয়ে বাতাসে কার্বন ডাইঅক্সাইড ছড়ানোর ব্যবস্থা করে ওরা, ফলে সাবমেরিন ঘাঁটির সব ক'জন ইসরায়েলি জ্ঞান হারিয়ে ফেলে, এবং সেই সুযোগে খনির ভেতর ঢুকে পড়ে ওরা। তার আগে ঘাঁটি থেকে সাগরে বেরুবার আভার-সী প্রবেশপথটা কামানের গোলা ছুঁড়ে বন্ধ করে দিয়েছিল।

খনিতে বেরিয়ে আসার পর নিজেদের পিছনে গ্যালারি ব্লক করে দিয়েছে ওরা।

ভোর সাড়ে পাঁচটায় পাথর ধস সরিয়ে ঘাঁটিতে ঢোকে লেবানীজ আর্মি। ইতিমধ্যে গ্যাস সরে গেছে, ইসরায়েলিদের অনেকেই জ্ঞান ফিরে পেয়েছে। তবে তারা দুর্বল প্রতিরোধ গড়ে তোলে। সাড়ে ছ'টার মধ্যে গোটা ঘাঁটি লেবানীজ আর্মির দখলে চলে আসে। সৈনিকদের তিনজন মারা যায়, দু'জন আহত হয়। ইসরায়েলিদের ছ'জন মারা যায়, সাতজন আহত হয়। অগ্নিজেনের অভাবে ও অন্য কোন কারণে আরও সাতচল্লিশ জন মারা গেছে। গ্যাসের প্রভাবে বহু ইসরায়েলি গুরুতর অসুস্থ হয়ে পড়েছে।

সব মিলিয়ে পাঁচটা সমুদ্রগামী সাবমেরিন আটক করা হয়েছে। একটা সাবমেরিন বিস্ফোরণ ঘটিয়ে ধ্বংস করা হয়। সাবমেরিন ছাড়াও প্রচুর অস্ত্র আর গোলা-বারুদ দখল করে লেবানীজ আর্মি। বন্দী করা হয় সব মিলিয়ে পাঁচশো একষষ্ঠি জনকে।

লেবানন কর্তৃপক্ষের অনুরোধে সংশ্লিষ্ট সবাইকে বলে দেয়া হয়, লেবাননের উপকূলে ইসরায়েলিদের এই সাবমেরিন ঘাঁটি আবিষ্কারের কাহিনী কেউ যেন ভুলেও প্রচার না করে।

ঘাঁটি দখল করার পরপরই সাগরের দিকটায় প্রচুর মাইন বসানো হয়, আভার-সী প্রবেশ পথের একেবারে সামনে। ওখানে একটা বয়াও রাখা হয়, আগে যেমন ছিল। এর মানে হলো, আরও চারটে ইসরায়েলি সাবমেরিন ধ্বংস করা হবে।

বিসিআই চীফ মেজর জেনারেল (অবসরপ্রাপ্ত) রাহাত খান দু'দিন পর লেবানীজ ইন্টেলিজেন্স ও লেবানীজ নৌ-বাহিনীর সঙ্গে যোগাযোগ করলেন। কয়েকবার ঘন-ঘন বার্তা বিনিময়ের পর সিদ্ধান্ত হলো, লেবানীজ নৌ-বাহিনী

আকারে এত ছোট যে তার পক্ষে এতগুলো সাবমেরিন রক্ষণাবেক্ষণ করা সম্ভব নয়, কাজেই তারা বাংলাদেশ নৌ-বাহিনীকে একজোড়া সাবমেরিন উপহার হিসেবে দান করতে প্রস্তুত। তাদের তরফ থেকে আরও একটা প্রস্তাব এল—লেবাননের মাটিতে ইসরায়েলিদের সাবমেরিন ঘাঁটি আবিষ্কার ও ধ্বংস করার কৃতিত্বের প্রতি সম্মান দেখিয়ে মাসুদ রানা ও শায়লা শারমিনকে তারা রাষ্ট্রীয় খেতাবে ভূষিত করতে ইচ্ছুক।

ঢাকা থেকে রাহাত খান জানালেন, খেতাব ওরা নিতে পারে, তবে মিডিয়াতে তা প্রকাশ করা যাবে না। অনুষ্ঠানটাও হতে হবে গোপনে। সেদিনই রানাকে একটা মেসেজ পাঠালেন তিনি, তাতে বললেন, 'ওয়েলডান, মাই বয়! কফি আনান বাগদাদে এসে প্রেসিডেন্ট সাদ্দাম হোসেনের সঙ্গে আলোচনায় বসে সঙ্কটের সমাধান করে ফেলেছেন। ইসরায়েলিরা জাহাজ তিনটেকে ডুবিয়ে দিতে পারলে কফি আনান ব্যর্থ হতেন, ফলে রক্তক্ষয়ী একটা যুদ্ধ ঠেকানো যেত না। সেজন্যে ব্যক্তিগতভাবে আমি তোমাকে ধন্যবাদ জানাচ্ছি।'

